

近代中國史料叢刊第八輯

沈雲龍主編

拙尊園叢稿

黎庶昌著

文海出版社印行

拙尊園叢稿序

光緒十九年秋余友黎君蕤齋裒所爲古文辭百餘首郵致上海付之石印詒書海外徵序於余余與蕤齋相知久其敢以不文辭當同治紀元蕤齋以廩貢生應

毅皇帝求言之詔上書論時事萬餘言是時河內李文清公棠階以名儒入政府建議宜擢用風示天下會曾文正公駐軍安慶進勦粵寇於江南

天子命以知縣發往安慶大營差遣中興新政頗有采用蕤齋議者天下因以誦蕤齋之文而想見其人越二年余入曾文正公幕府文正告余幕中遵義黎君暨澈浦向師棟伯常可交也余始與二君以學業相砥礪伯常志豪才健不幸遘疾以沒蕤齋恂恂如

不勝衣而意氣邁往若視奇績偉勳可捩契致文正意不謂然顧
時時以文事獎勉僚屬一見許余有論事才謂菴齋生長邊隅行
文頗得堅強之氣鍥而不舍均可成一家言居常誨人以爲將相
者天下公器時來則爲之雖旋乾轉坤之功邂逅建樹無異浮雲
變幻於太虛怒濤起滅於滄海不宜嬰以成心文者道德之鑰經
濟之輿也自古文周孔孟之聖周程張朱之賢葛陸范馬之才鮮
不藉文以傳苟能探厥奧妙足以自淑淑世舍此則又何求當是
時幕府豪彥雲集并包兼羅其治古文辭者如武昌張裕釗廉卿
之思力精深桐城吳汝綸摯甫之天資高雋余與菴齋咸自愧弗
逮遠甚文正沒後同人散之四方罕通音問菴齋蹤迹雖隔而情
意益親數萬里外往往互達手書有無未嘗不相通也升沈未嘗

不相關也文藝未嘗不相質也蕤齋自出幕府浮沈州縣者近十年充出使英法德日四國參贊者又五六年頗以未盡所用鬱鬱不樂既而

天子驟用爲出使日本大臣任將滿遽丁內艱服闋復用之前後凡奉使六年適值朝鮮內變強鄰隱集戰艦將駛往襲取其國都蕤齋偵知密電馳報余時在署北洋大臣張靖達公幕府力勸速發兵輪統以大將風馳電邁遂執戎首以歸敵軍遲到半日耳至則內亂已定受盟而退朝鮮無事今傅相合肥李公追論蕤齋前勞

天子簡授川東兵備道監督重慶新關蕤齋涖官兩年諸所規畫卓然可觀來書自以生平志事垂老無成若有未慊於懷者蕤齋

純齋胡不追味文正之言而不自得若此乎余昔盤桓幕府靜觀世變垂二十年出而任事者逮十年始知文正之論實不我欺大凡經世百務機之已至我一措注推挽者四出而助之非必恃權位之重也機之未至我極經營齟齬者四出而撓之不盡由權位之輕也純齋惟置其難自主者靜以俟時珍其所固有者聊自怡悅足矣純齋爲文恪守桐城義法其研事理辨神味則以求闕齋爲師文凡六卷顏曰拙尊園叢稿倉卒未及鈔示然純齋之文大半皆余所及見其翹然傑出者猶往來余胸中也可傳也時八月旣望

欽差大臣出使英法義比四國二品頂戴都察院左副都御史無錫薛福成序於英倫使廨

拙尊園叢稿目錄

卷一

前編

上 穆宗毅皇帝書

上 穆宗毅皇帝第二書

卷二

內編

周以來十一書應立學官議

圖畫章句三大儒遺像記

讀三國志

何忠誠公編年紀略書後

書梓湖文錄後

刻孫淮海先生督學文集序

續古文辭類纂敘

答趙仲瑩書

答李勉林觀察書

楊性農先生重赴鹿鳴燕序

章子和墓誌銘

先兄魯新墓誌銘

鄭徵君墓表

翰林院典簿胡君墓表

工部侍郎石公神道碑銘

趙剛節公神道碑銘

贈內閣學士前安徽鳳潁六泗兵備道任君神道碑銘

丁文誠公專祠碑

特用知府華君墓誌銘

蕭吉堂先生墓誌銘

向伯常墓誌銘

長姬趙孺人墓誌銘

仲姬王氏墓誌銘

莫芷升墓誌銘

莫善徵墓誌銘

貴陽王氏四世五忠三節烈合傳

誥授光祿大夫都察院左副都御史薛公墓表

趙宜人墓表

周楚白墓誌銘

直隸正定縣知縣循吏周君家傳

書朱軍門克金陵城事

誥授光祿大夫建威將軍長江水師提督黃公墓表

禹門寺築寨始末記

夷牢亭圖記

金鼎山新建玉皇殿記

禹門寺置佛藏記

介石園記

改建五福宮北樓記

敬志箴

卷三

內編

曾太傅毅勇侯別傳

卷四

外編

讀論語

讀易程傳

讀王弼老子注

讀儀禮

讀墨子

禹貢三江九江辨

李白至夜郎攷

青萍軒遺稿序

浙東籌防錄序

庸庵文編序

游歷日本圖經序

日本新政攷序

弢園經學輯存序

大小雅堂詩集序

跋趙曉峯輯犍爲文學爾雅注

題鄭伯更說文正問

跋楊龍友畫

跋悅坳遺詩

沙灘黎氏家譜敘

湘鄉師相曾公六十壽序

送姪尹融之吉林序

贈趙殿撰序

漢孝女先絡碑

誥授奉政大夫黎府君墓表

先大夫側室劉孺人家傳

從兄伯庸先生墓表

仲兄椒園墓誌銘

劉君墓誌銘

詹節母墓誌銘

楊先生墓誌銘

鄭兩山人傳

莫徵君別傳

布政使銜四川候補道蹇君墓表

誥授通奉大夫心泉高公家傳

誥授光祿大夫山西巡撫鮑公墓誌銘

臺北府知府循吏林君墓誌銘

李芋仙墓誌銘

江蘇按察使中江李君墓誌銘

知府銜江蘇候補直隸州知州孫君墓誌銘

晉封通議大夫署雲南恩安縣知縣傅府君墓表

誥封通奉大夫江蘇補用道李君墓表

書全忽戎軼事

書張敬堂軼事

黎氏家祠記

拙尊園記

禹門山銘

祭曾文正公文

弔諸葛忠武侯文

祭曾襲侯文

卷五

餘編之內

敬陳管見摺

奉使倫敦記

卜來敦記

尊攘紀事序

儒學本論序

燕集三編統序

養浩堂詩第二集序

醫說一首贈淺田栗園

題梅所文鈔

書高松保郎斷腕事

卷六

餘編之外

與莫芷升書

巴黎大賽會紀略

刻古逸叢書敘

書原本玉篇後

跋日本津藩有造館本正平本論語集解

跋日本活字板白氏文集

養浩堂詩集後序

書森立之壽臧碑後

重九燕集詩序

跋江亭記

題藏名山房文鈔

海南文集序

黃石齋詩第六集序

春山樓文騰序

跋外交餘勢斷腸記

日本正六位藤野君墓誌銘

游日光山記

游鹽原記

訪徐福墓記

崇福寺鐘銘

恭花齋觀察以邊徼儒生上書言事由知令權至監司用人可謂政格矣其間督責
戎機出使異域於時事多所洞達集中所作者是也又以上

穆宗二年冠首与介甫子瞻相頌頌八百年之此作矣至於古文義法祖相城而彌湘鄉
近今、辟歷于也其分爲前編內編外編餘編凡六卷蓋託於諸子之例云於石宣統元年
春三月江甯陳作棠識於瑞花館

拙尊園叢稿目錄

拙尊園叢稿卷一

遵義黎庶昌純齋

前編

上 穆宗毅皇帝書

慶生_臣黎庶昌謹稽首懃懃上言

皇帝陛下 臣愚伏讀七月二十八日星變 詔書勤求中外直言

特開忌諱冀聆幽隱遺闕仰見 皇上寅畏 天命勵精圖治之

至意 臣竊幸 詔書一下必有直臣烈士披瀝肝膽昌言儻論侃

侃諤諤指陳利害以聳動 天聽為一代除積弊為萬世開太平

為國家固本根為生人振氣節上以回 天變下以盡人事乃涉

月踰旬而王公宰相無有言者督撫大吏無有言者甚而至於臺

諫諸臣亦無有言者臣愚區區之心不勝憤悶謹應 詔昧死爲
陛下一言臣聞天道福善而禍淫氣和則致祥氣乖則致異祥
多者其國安異多者其國危此天地之常經古今之通義也故聖
人因天道以慎人事春秋二百四十二年間日食星隕山崩川竭
螟蠹旱潦雨雪冥晦之屬無一不備書以明天道之至嚴而可畏
不可以纖小忽也周衰聖王不作陵夷至於秦漢以還禍變日甚
災異尤多然其大者爲危亡傾覆之徵小者亦政治敗忽之驗歷
史所記殷鑒昭然不可誣也自 陛下卽位以來纔期年耳上年
冬地震金州雨雪不作今年正月日三暈二月星變春夏之際陰
霾晝晦者數日大風揚沙塞河河北旱蝗四起陝甘大水漂沒總
督秋京師等處大疫死者相望廣東颶風震括千餘里人民傷亡

萬計七月星隕彗星又見於西北此皆異常之變稠見疊集於一
年之內以警戒於 陛下非小小災異之事可爲寒心者也 陛
下知天命之可畏深宮修省乾惕以弭其變故 詔下數日而星
象滅亡雖大戊之化祥桑成湯之禱旱雨無以加茲以此見天人
之際感應至捷又不可誣也然則革今日之積弊行先王之德政
而休祥有不立至變異猶有復作者哉 臣願 陛下察 臣 愚而寬
臣 罪 陛下深處法宮之中尊居九重之上庶僚莫能覩其面豪
傑莫由進其忠雖殫精極思竭蹶以圖天下之治而本末輕重利
害得失既不能周歷而洞悉又未能合天下之才智熟思審處以
維萬世之安徒委之諸王大臣諸王大臣不盡深思遠覽敢於任
天下之重逡巡塞責而已夫天下大位也治天下公事也 陛下

居天下之大位辦天下之公事將撥亂世反之正不進天下之英賢傑士而與謀根本不拔之基創生民未有之業徒以引繩削墨拘文牽義坐致久安此亦卻行而求前者之計也臣觀今日大勢猶賈生所謂病腫四肢不能運用竊恐日削月弱痿憊不起之證深中膏肓一旦元氣厥絕而國有不濟之患矣賢才者國之元氣也人無元氣則亡國無元氣則滅乃者陛下亦嘗汲汲以求賢爲事矣然而一歲以來奇材異能之特進者誰也鴻識博學之顧問者誰也山林隱逸之辟召者誰也未僚下位之汲引者誰也公卿大臣之薦剡者又誰也陛下有求賢之意而諸臣無求賢之心卽有求賢之心而陛下又不示以求賢之格於是天下之賢才銷亡淪滅於草莽中而卒無以自見過者或至目天下爲無才

豈不謬哉今之言求賢者動曰循例夫循例則人人皆可自進而無待於陛下之求之也賢才者將以備非常之用愈求愈出而非可以例限者也設例以待奇傑之士彼既不樂俯而就而又往往以跂弛見黜良臣志士復扼於例而不得盡其才充例者類皆庸陋冗闕不足以計議天下大事三者皆執例之咎陛下因循而不變無惑乎天下之糾紛舛謬王政不綱百度訐潰至於此極也陛下誠能掃除一切文法準漢代求賢之意參之以司馬光十科之議責諸臣以求賢歲訪其才之所宜書而進之不時拔用賢多者受上賞壅蔽者蒙大戮不必限軍功之一途不得棄幽隱而不舉陛下博以諮之寬以收之量以用之行之數年間臣見中國元氣振而痿瘵之證可徐起矣夫中國者天命人心之所依

歸也衣冠禮樂之所萃聚也百代聖君賢臣之所維持以至於今日者也自周之衰嬴秦恣興殘虐生民爲中國一大變五胡雲擾冠履塗炭爲中國二大變五季之際紛爭戰伐五十餘年黯無天日爲中國三大變金元禍宋古所未有爲中國四大變四變之中益以三大害楊墨之無君父一大害也黃老之清靜無爲二大害也佛氏之虛無因果中於人心牢固而不可破三大害也中國經此四變三害而天地之正氣幾乎息先王之禮樂法度掃地盡矣我 聖祖皇帝以堯舜之德修文武之政使天命人心有所依歸使衣冠禮樂有所萃聚使百代聖君賢臣之所維持者敝壞而復整是以天下爲壽爲富且二百年至於今日英法諸夷之禍合四變以爲一大變者也耶蘇之教合三害以爲一大害者也堂堂中

國坐令數千魑魅罔兩橫行而無毫髮之忌憚恣睢不道惟所欲爲此天地神明之所震怒忠臣烈士所痛心疾首憤不願與俱生者也 先帝北狩之痛天下臣民未嘗一日忘諸心也 陛下豈肯含垢蒙恥隱而不言置而不問以聽中國之斃哉外夷之志在中國不自今日始也乾隆嘉慶之際窺伺已深當時中國元氣尙厚惟以優容示爲寬大而不知遺禍之烈至於如此若再姑息隱忍 臣恐數十百年後挈二百餘年衣冠禮樂子女玉帛之天下一旦被髮左衽於夷狄變人類爲禽獸化孔孟爲耶蘇盡四民爲行教稍有變動而中國不可復問矣 陛下繼輿返正已久不聞進天下賢豪與王大臣等議所以控馭之方籌所以防備之策思所以殄滅之道而姑息之苟安之不知外夷豺狼之心制之受其害

不制亦受其害制之害速而淺猶有再振之機不制禍大而遲終成噬臍之患從古至今中國之與夷狄未有不以和議而倖存卽以和議而致亡者也春秋許九世復讎 陛下奈何不以大義聳動天下之人心禁罷一切奇技淫巧使激勵奮發人人深惡痛絕思報君父之大讎如其私讎羣起而攻之而中國始可圖矣斯亦今日中原盛衰消長之機而皆繫之於 陛下者也今日人心之所以敝壞國家之所以孱懦不起者由 朝廷無以策勵而倡導之也 陛下卽位之初新政屢出人人翹首引領以謂中興旦夕可致及行之數月而氣亦漸餒矣孔子曰欲速則不達孟子曰進銳者退速中庸惟稱至誠爲無息三者之間是不可以不深省也 陛下之氣正則天下氣正矣 陛下之氣衰則天下氣衰矣

陛下上承先帝付託之重下繫四海元元之望宵旰求治以冀中興而以文墨取人以律例舉事是猶繩騏驥之足而欲爲千里之行也今日之弊其亦可謂多術矣言慎法則胥吏弄法言課官則百司曠官宰相卿貳不擇賢愚但依銓次以充數督撫大吏不問能否但憑資格以遞升分滿漢以設官則非官不必備之義守令輕於遷調實爲擾亂生民之階民隱不得上聞恩澤不得下及疏通正途而官方仍窒求進直言而極諫未聞言財則財日窮言兵則兵日玩言教化則教化不行言風俗則風俗不厚凡此皆亟宜更張之弊而陛下今日之所未行者也臣請爲陛下切指之胥吏弄法此不持大綱之過百司曠官此不責實效之過授官論銓次進人以資格此惰於量才之過民隱不上聞恩澤不下及

此粉飾太平之過官分滿漢此畛域大明之過輕用守令此疏於民瘼之過官方不澄此不愛名器之過直言不進此畏聞咎失之過兵日玩財日窮教化不行風俗不厚此安於積習不思變通之過陛下爲天下父母爲中興令辟尙不能掃羣弊而空之更誰望哉是以朝廷之上因循遷就翕翕訛訛不特大疑大難相顧愕眙而不肯任卽小小勞怨亦且退避不遑遇艱難輒曰無法效輒媚稱爲合時以盡忠孝者爲大愚以講利弊者爲多事無正色率下之義無進忠納誨之心無推賢讓能之美無以死勤事之節素餐竊位廉恥道消此乾綱之所以岌岌欲墜而陛下中興之治徒遷延歲月鋪張具文而無與收實效也陛下卽位之初亦嘗憤中外之緘默而大計之無聞矣故聲靈一布遐邇震動蔣奇齡

進中興之策王柏心陳經論之篇海內嚮風正氣伸雪不可謂謀國之無人矣乃前者御史曹登庸以多言貶官職員龐鶴年奏陳封事不聞獎進以作敢言之氣培忠直之原而反以越職編管自是之後言者寂寥此可見天下有以測陛下之意向而緘口卷舌以退矣天下莫不願陛下之稍假顏色而欲爲效忠瀝悃也慮陛下不由斯道也不由斯道則壅蔽之患起矣前此求言之詔數下然其大旨不過循例內責之諫官外責之大吏而已而於士民陳獻之路仍未開百司職事之禁仍未弛國家之大計仍未盡去其忌諱也多忌諱則採納皆虛矣禁陳獻則聽受不宏矣陛下何不大開天下忌諱使人人得自盡其愚則諫諍之氣伸而萬世之議出矣天地剛毅正大之氣散布於中國中國人士必

有當之者不應至今日而不發洩然臣觀今日士氣頹靡頑惰而不振此獨何也臣又有以知陛下取之不以道也古者鄉舉里選猶以考行爲難後世變科目以取人一切已非先王之舊然猶諮以時務兼舉行誼而又廣爲科目以待之尙可得才於十二三今盡困天下之聰明才力於場屋中而場屋之士又盡一生之精力不爲效命宣勞之用徒用之於八比小楷試帖無足用之物天下賢賢莫聞大道而其試之也又第取之於字句點畫閒其亦可謂靡靡無謂之術矣使天地剛毅正大之氣消磨沮喪而無一復存術不遵孔孟程朱而墨守王安石之經義士不講修齊平治詩書禮樂而專講小楷時文世不尙禮義廉恥而尙鑽營奔競朝廷以此望士士以此報效朝廷以故人心日壞人才日下風俗日墮

皇路荆榛聖道息滅悠悠長夜良可痛也臣愚以謂程文之士資
格之官殊不足以當度外非常之用而又竊怪陛下抱用賢之
美意樂於求才而疏於識才急於取才而略於培才獨不罷去一
切八比小楷試帖之弊兼舉德行才能文學與夫孝弟力田茂才
異等之屬以復前代取士之良法也陛下之喜怒天下之真喜
怒也喜則必賞怒則必罰天下謂之真賞罰往者肅順端華等之
大逆爲天下所切齒陛下奮雷霆之威以誅之天下莫不服
陛下之至神頃者何桂清以誤國罪魁江表人民欲食其肉陛
下徇私情而不誅天下於是惜陛下之不斷夫賞罰者天子之
所與天下共不得而私者也賞罰乖於上羣情懈於下陛下方
奉天行討將帥如林海內豪傑喁喁內向冀成雲合響應之勢

而賞罰一乖自失重望此不可解之事矣 陛下之賞罰壞則天下之賞罰無一不壞舉可惜矣名器者賞罰之大端用人之先路也今開捐籌餉借名器以濟天下之窮宜可以裕度支矣而臣見近年以來捐例日繁捐價日減報捐者日以多四方之告匱者復日甚一日得不償失有明徵矣 陛下處 祖宗極盛之後奈何以天下黜陟大柄反覆於部議假手於吏胥受賣官鬻爵之名爲直尺枉尋之計競奔海內流毒朝廷百姓因以受其殃 陛下莫能正其弊此亦非萬世之利矣無論非常偉出之才不樂由此途國家用人之法不必以此重而堂堂中國三綱五常之所繫政教典禮之所出戎夷蠻狄之所瞻仰自令官方混濁善惡不分姦宄同流貪婪雜出斷非 聖朝之所宜矣鄙夫孺子今日入兌明日

升庸而與公卿相揖讓商賈阜隸今日釋褐明日居官儼然執國
家之大權君臣上下惟見以利相接臣憂其國之危矣傳曰禮義
廉恥國之四維四維不張國乃滅亡今日之勢何以異此故臣竊
謂今日之積弊未有如開捐之糜爛者士不必讀書而躋大位民
不必耕種而服美官天下之人見其取之至速且易於是苟有積
蓄者輒思爲此苟且至便之計羣趨眾鶩如蠅蚋之集朽腐而不
返不特無以抑生人僥倖之氣養國家廉讓之風而反令天下之
人以為民爲恥其患非淺鮮矣陛下建中興之治十已四五而
此端不塞臣實病之名器之壞如此因之有官冗之害內而王公
宰相以下其名以數千計也外而督撫將軍提鎮以下其名以萬
餘計也此猶正額也而每歲科目之所得開捐保舉之所進又數

倍之綜計天下之官當不下十萬人而僕役書胥幾數什倍者尙不在此數夫開捐則濫濫則易易則人人視官爲私物幾成子孫世襲之珍而富家便利矣官冗則滯滯則貧貧則無所不爲而寡廉鮮恥矣二者交爲國之大害也國家有此無業之民旣不能自食其力必安坐袖手以待元元之養而百姓方流離瑣尾無一日之安無一省之靖男不得耕女不得織加以軍輸追迫有可侵漁未有窮極尙冀其能安貧忍死而無橫潰決出之虞哉臣恐河北之響馬江浙之長髮皖豫之捻匪黔蜀之苗教滇秦之回紇從此不可復制此消彼長迭爲宗社隱憂而危亡之轍見矣臣竊計今天下其危道有十二而賊與外夷不與開捐取利上下交征一危也冗官蕪雜貽害百姓二危也捐釐抽稅刻剝無已三危也律

例牽掣百度不張四危也空言粉飾務爲太平五危也言路不宏見聞多隘六危也士無實行正氣不伸七危也禮義廉恥上無倡率八危也官人不擇援例是銓九危也州縣無權濫授輕調十危也兵制破壞散漫不修十一危也財源閉竭不思變通十二危也不特如此京師亦有十危焉無勁兵一也無一月之儲蓄二也多游民三也盜賊公行不用重典四也旗人坐食毫無生計五也商人把持物價涌貴不常六也律例屢更法令不一七也戶口繁重無所統紀八也官祿不給無以養廉九也閒暇時日不策備防十也凡此危道不除而欲底治天下豈不難哉乃者陛下亦嘗除弊矣然除之不盡不如勿除爲其除與不除等也亦嘗興利矣然興之不力不如勿興爲其興與不興等也夫治國猶張絃作室也

絃壞不取而更張之絃不可調也室圯不從而改造之室不可居也非更張而遂謂前人製絃之不善改造而遂謂前人作室之不堅也今國家大局敗壞若此 陛下第用守而不用創不知法敝不變則不可守事繁不省則不可守人才不更則不可守積弊不去則不可守律例不寬則不可守 臣愚以謂今日之事當用創爲守而後天下乃大可爲也 陛下何不鑒前代治亂之故考今日得失之由重守令之權講取士之法寬用賢之格宏聽言之路除冗官之害罷開捐之途去滿漢之閑破律例之習復鈔幣之法修兵政之壞延攬天下賢才開誠布公與之籌根本不拔之基創生民未有之業庶足以恢宏國脈而光 先帝舊德也 陛下以冲齡踐阼孜孜求治志在中興又有 兩宮皇太后親裁大政和衷

集事用以宏濟於艱難誠百代之昌期矣故臣敢昧死上書言事
 粗陳大略而亦不知其言觸犯忌諱也昔宋當南渡之後君臣上
 下安於一隅惡聞恢復之說陳亮以一書生猶數上書陳當世利
 害欲以感悟孝宗況陛下大一統之君同符聖祖虛已求言
 樂於聽受顧可詔下月餘而無一人竭忠盡愚以塞陛下之
 清問哉陛下不以臣妄愚不肖賜之優容俾臣得竟其說條具
 數事以聞此尤區區犬馬微忱不勝大願干犯天威罪當萬死
臣謹言

上 穆宗毅皇帝第二書

虞實生 黎庶言謹稽首惶恐上言

皇帝陛下臣頃者不自揆量妄論世務上瀆聖顏干犯忌諱退

而席藁私室以待 雷霆之威逮奉 詔書 陛下匪惟不加譴責由賜優容並 諭命 臣條晰其說 臣今者是竭忠盡愚以報上之日也 臣聞自古天下有治人無治法孔子亦曰人存政舉治世之要不出此兩言而已得其人則雖進今日爲三代也可不得其人則紛更擾亂以圖一日之安不能也今天下大弊 臣愚前書已略具矣 臣不復贅惟在 陛下之因時變通而已夫天下之變無一定之局也以無定之局而執一法以繩之法終必至於窮而於變仍無濟運用之妙又在存乎一心而已 陛下虛己求言含宏若此 臣不敢不盡愚謹遵 聖訓將 臣愚前書所謂重守令之權講取士之法寬用賢之格宏聽言之路除冗官之害罷開捐之途去滿漢之閑破律例之習復鈔幣之法修兵政之壞數事有所

見者類具以 聞至於變而通之神而明之以創爲守之法非區

區愚 臣 所得而盡也惟 陛下垂意則幸甚

一求賢爲今日第一義應請將司馬光十科用人之目頒之天下
 倣漢舉賢良文學例飭京外大吏四品以上各舉所知每歲依科
 省舉數人不限以數亦不得踰十人以上務求慎重無論山林隱
 逸布衣搢紳末僚下位皆得被舉由地方官給資入京許馳驛

朝廷試以事或如漢以鹽鐵發論反覆詰難能自理其說者量才
 官之彙效者不次超擢毫無發明者放還大吏無真知聽其闕而
 不舉如舉主係請託受賄或參劾或訪聞與被舉者同坐罪

一軍功保舉仍聽照常惟當立之限制嗣後非克復城池不得入
 奏一切勝仗歸克復彙案保舉保舉之格分三等戰功爲上助理

軍饒者次之防堵團練文案爲下除戰功外理饒防堵團練文案數者非二三年不得敘功保舉之人必所辦之軍務平始令其選缺赴任如其人不在軍營託情受賄保舉者坐罪與上法同

一內而宰相尙書侍郎都御史外而總督巡撫布政使或致仕或遷調或臨沒應許薦賢自代

一一省治亂係守令天下治亂係督撫督撫權重尤宜擇人應請嗣後勿以資格躋升必擇素有功業風節凜然者除授外此守令宰相尙書御史五者亦不得拘以資格除授慎重與督撫同皆勿輕遷調以責成效

一京官當用守令今一二品大員尙有自外召入者三四品以下悉由內放並無外召昔張九齡有言古者刺史入爲三公郎官出

宰百里致理之本莫若重守令凡不歷都督刺史雖有高第不得任侍郎列卿不歷縣令雖有善政不得任臺郎給舍應請今後授官京外並用凡九卿科道之屬許以守令召入補授

一漢武帝從公孫宏之議下至郡太守卒史皆用通一藝者唐高宗初詔諸司令史考滿者限試一經宋孝宗時臣僚亦言吏事必歷而後知人才必試而後見爲縣令者必爲丞簿爲郡守者必爲通判爲監司者必爲郡守故唐宋以來吏皆以進士爲之今則不然一切佐雜之屬皆視爲俗吏而吏真不可爲矣應請稍重州判縣丞等官資望卽以進士及舉人大挑揀選拔貢爲之考滿始升爲令至翰林一途明初爲修史而設後定庶吉士之額此途目爲清要今則大者出卽督撫小亦府道實啟浮競之風應請今後庶

吉士散館轉爲部曹若撰修國史及他文章論著卽以薦辟中之博通經史者爲之或致仕之官有學問者亦可充此選

一科舉取士誠不可廢惟今八比小楷最空疏無謂應請罷去做朱子議第一場易詩書爲一科三禮大戴爲一科三傳爾雅孝經爲一科四子書爲一科凡四科科出經義一道答義者先條舉注疏及後儒之說旣備然後以愚按結之曲暢其旨其不條眾說竟入己意者雖通不中格有司不依章句截搭配題者降級第二場周程張朱陸爲一科孫吳武經爲一科管荀老莊董賈揚文中爲一科國語國策史記漢書三國志爲一科晉書南北隋唐五代宋遼金元明諸史爲一科凡五科子史論五道第三場時務策三道爲一科詩一首爲一科凡二科三場並用無軒輕會試亦然至取

士之額寬則人多倖進應請今後鄉會額減十之二生員額減十之五副榜悉裁

一府縣提學小試分爲四場先經義二道次子史論二道次時務策二道次詩賦各一道至拔萃優貢二途尙有鄉舉里選遺意應請嗣後飭提學專取品行識量非此雖稍有文采者不入選

一殿試應請倣賢良文學直言極諫等科意策問當世大務許其恣意敷陳無所忌諱勿拘以字迹如有董仲舒劉蕡文天祥之才者特旨再三策之盡其所長首舉以爲士林勸朝考論疏詩如故

一絕學如歷算樂律測望占候火器水利之屬各設爲科以附於鄉會試後不定額有應者試之果有發明與舉人進士一例進取

不能則罷無則闕

一郡縣學官毋得出自選除應由郡縣公議如書院例請有學行者爲之自布衣以至宰相之卸事者皆可其人有干清議聽郡縣公易之至大學祭酒應選當世大儒待以賓師之禮其重如宰相等或宰相尙書退處爲之入學讀書者由廩生以上皆聽勿用捐納以端進始教之必以經世大務及先王禮樂制度之屬崇尚氣節爲天下先朝政缺失許其直言

一開捐枉濫名器不重前書已具而臣猶有說者或四方奸宄挾貲入京借報捐爲名與公卿大夫往來交接訪聞中外密計與賊暗通消息未行而賊已知此弊尤密應請京外一律停止以詔下之日爲斷其已捐者聽惟飭各省督撫量加澄汰貪劣庸陋者

陸續罷還鄉里餘一體錄用有異績者仍不次超遷

一總督按察使道員提督皆係冗官官冗則費繁而大者尤甚應請裁官自此數項始歲可省百萬之費巡撫視如總督布政使視如巡撫兵刑錢穀驛務之屬俱布政使總之許照六部例省併照磨經歷庫大使爲六科掾科一人以進士爲之知府視如道知縣視如府州判縣丞之屬亦略重提督則巡撫兼署而總兵視如提督副將以下其權以次遞推此外二品以下文武酌裁十之二六七品以下文武酌裁十之三則費省而事少矣

一今日貪取之風膠固於人心而不可去者以俸祿之薄而無以贍其用也漢書言王莽時天下吏以不得俸祿各因官職爲姦受取賕賂以自供給唐楊綰爲相承元載侈汰之後欲變之以節儉

而先益百官之俸宋太祖亦言與其冗官而重費不若省官而益俸今請痛裁冗官卽以所裁冗官之俸薪養廉加增於未裁之官京外一律而於守令宜尤厚然後衙門陋規及一切節壽門包之屬始行禁止嗣後有奉法不力貪鄙無狀者按律治罪不貸

一冗官旣裁守令之權重寬一切文法處分使便宜行事慎擇其人與督撫等久任之勿輕移調凡有興革利弊必令始終任其事嚴定考課法清廉不阿肅清境內盜賊者爲上修地利崇學校勸農桑勤訊獄者次之平穩無過失者下三年考績如此者俱再任六年如法考之有爲士民愛戴如漢循良者巡撫臚列事迹以奏特旨褒嘉宗其職而不遷惟貪墨者隨時奏劾立予罷斥削職爲民

一用人之法惟求其當今國家滿漢太分是亦一弊在 朝廷大
公黜陟原屬無私然如宰相尙書侍郎之屬必曰滿幾缺漢幾缺
科道以下無一不然既存其名卽不得泯其迹應請今後凡滿漢
之名並列者悉除去不拘補授滿人而當悉用滿人不爲私漢人
而當悉用漢人不爲過詩曰溥天之下莫非王土率土之濱莫非
王臣願化此畛域之見

一古無諫職人人皆可以諫設以官而言路反隘應請今後蕩除
忌諱之禁內官無大小皆言外官由知府以上許專摺論事武職
斷自總兵而止州縣有陳民間疾苦者許由知府上達士民陳大
計者聽亦不必應 詔始言言有可採錄用施行御史如故
一紓今日財富之困窮宜莫如行鈔製鈔一依舊制惟分等不宜

繁碎應以五千貫千貫五百貫爲大鈔百貫五十貫爲中鈔十貫二貫爲小鈔大中鈔裝潢成卷小鈔亦裱糊務極精好大中鈔當會票之用小鈔當錢票之用二貫以下無鈔者仍鑄精好制錢以便流通之用外以金玉水晶銀銅刻爲五印命官掌之大鈔鈐大印五中鈔鈐中印五小鈔鈐小印五先行京師以次頒於各省布政使印記發各府各府印記發各縣各縣印記發錢莊錢莊印記然後發行民間期以三年通行不必分畫疆界此省之鈔可用於他省此縣之鈔可用於他縣令於通衢大邑設立辨鈔之人以防作僞民有誤用僞鈔者不加罪惟根究其作僞之人斬之私減鈔價者治罪告僞鈔者賞行鈔之始必先重入下令天下凡錢糧關稅悉皆收鈔二貫以下收錢勿畸輕畸重以鈔爲母錢爲子子母

相權始能行之久遠凡京外出入非鈔勿納務使鈔之在手與現錢無異鈔本卽計歲帑爲之如歲入百萬之帑卽可造百萬之鈔鈔出之始許民以銀易鈔鈔旣通行始禁民間不得以銀爲幣凡監造之官制鈔之人地方官奉行無弊者量予議敘加級頒行之旣時明定則例布告天下不得有意輕重亦不得格外勒索行之旣久鈔有昏爛者許解部焚毀如此則無成色無扣折賣輕用便破用銀之見而鈔無不可行矣惟宜堅之以信出之以斷宜多行而不宜少行宜久行而不宜暫行宜必行而不宜試行宜速行而不宜緩行從前寶鈔之壞由於民間得之者不能取銀又不能交庫價由是日賤而各部各院及崇文門之領款者俱不肯收鈔頒發各省者又沮以不得搭解部庫一語其他關稅各處仍是取現銀

買鈔解庫後井田科案發至有空紙易現銀之說而寶鈔爲棄物矣然今尙不至於全廢者賴捐銅局搭收之故今若行鈔必追究已往之失改易章程不特今新制之鈔許行卽寶鈔亦舉而行之而民始信民信而鈔行決矣昔順治中嘗造鈔十二萬後因充裕停止 陛下以同治建號行鈔非法 祖之一端平

一營伍散漫非聚不能成勁旅應請倣于謙練十團營之意籍天下正兵多少之數其始以調防爲詞合諸汛之兵歸諸營汰之上其籍於標又合諸營之兵歸諸標汰之上其籍於督撫督撫稽其數酌量分駐於各州縣城池以備調遣如境內有搶劫盜賊卽由守令調遣捕之督撫留精壯數千制爲一大營領以將置之居中要害之地以備非常小省以二萬五千入爲度大省以三萬五千

人爲度南方卽以現募之勇充之有大賊起或入境督撫卽日徵發起行前驅以擊賊於是營制合而無零星之弊浮額裁而減軍費之需計當無便於此者

一兵之強弱視乎將將之應變不窮視乎帥將才易得帥則難其人今之帶兵者有總督有巡撫有欽差有督辦有幫辦有團練大臣有將軍都統有提督其權皆相等權多則不能合一而意見紛歧往往敗事今以現有軍務省分計之應請江蘇安徽浙閩等省立一大帥山東河南直隸陝甘等省立一大帥雲貴四川立一大帥其帥卽以應裁之總督留三缺以處之巡撫之屬悉聽節制或裁撤之庶足以重事權而歸畫一

一京師東倚大海西擁太行北負長城南顧河洛誠天府之固金

湯之雄然無事則尊居上游有事則孤懸一角非勁兵不足以資
鎮衛應請籍五城之兵澄汰老弱多則裁少則募無論滿漢俱可
充額以二萬人制爲營分屯五城選膽識之將爲統領晝則習技
夜則更番捕盜並附近京畿一帶響馬隨時襲擊一有警急召則
立至但須合五城之權於一人而又勿拘以咨調之常格有事徑
報統領斯可耳

一八旗生計舍屯田別無良策臣按嘉慶中富俊爲吉林將軍奏
屯雙城堡分爲中左右三大屯三屯之中通爲百二十屯每屯鑿
井二井給銀十八兩每戶窩棚銀四兩每丁給三十晌先開熟二
十晌五年徵糧二十石移駐京旗到日撥給熟地十五晌荒地五
晌通二十晌餘十晌荒熟各半給屯丁三十戶京旗三十戶三大

屯議移駐京旗三千戶每歲移駐二百戶願移者十月報部次年
正月起程每戶給裝銀三十兩本旗津貼銀十五兩車馬耕牛農
具籽種皆官給到屯後每戶給屋四間官爲之建計移一戶不過
在二百金道光中行之已有成效後富俊又欲廣其法於伯都訥
圍場松筠亦請開養什牧及大凌河馬廠俱不果行近蔣奇齡亦
稱東三省沃壤數千里並獨石口外之興和新平等城熱河等處
之閑田與旗民贖產入官籍產應請責成吉林將軍等官次第舉
行每歲移二三百戶誠一勞永逸之計若果曠地眾多並請將京
師游民擇就近地方一律移徙以宏生計

一八旗皆有駐防駐防之外不許寄居應請今後開此禁凡在外
仕宦者照商籍寄籍例許其買業居住在所住州縣呈明編入旗

籍出土命盜諸務照平民歸地方官經理生子隨時呈報督撫歲終咨部願考試者卽在所駐州縣一體應試其願爲商賈者照開墾例給資隨其所之惟於所在州縣呈明入籍入籍後俱聽其自爲生理官不復問

一外夷以奇技淫巧炫惑中國人士人士向風今請將中國服色仿古五等之制定爲品級使公卿大夫士民到目可辨則人有限制華靡自抑並洋貨使用亦定爲品級使與中國限制同至中國從教之人應取先王屏之遠方終身不齒之義令其照僧道喇嘛等類例卽服夷服以示區別如此不特可啟斯人愧恥之心並可杜奸民冒充從教之弊第舉行必由通商衙門移文外國總理飭其一律下令始不至漏網者多區別旣明並應試亦嚴爲禁止

一外夷洋藥之禁甚嚴中國反開此禁 陛下既冒不韙之名徵收其稅應請將此項稅例重爲加增稅增則價必昂平民之吸食者當不禁而自止亦足以稍遏頽流

以上各條就 臣 妄愚之見所及敷陳爲 陛下獻以備採擇然此

不過補苴之術而非本之所在也本之所在得人而已 臣 自恨閱

事未到窮理未深知識未通讀書未富所言極知謏陋然區區愚

忱惟願 陛下開誠布公以接賢豪誠正修齊以端 主極集思

廣益以收羣策深謀遠覽以固本根則我 清室之隆永永無極

矣 臣 無任瞻依 闕廷激切惶悚之至

十月初八日內閣奉 上諭都察院代奏貢生黎庶昌條陳時務

一摺所稱薦賢才慎保舉及殿試條陳時務各等語迭經降旨諭

令中外臣工薦舉賢員並訪求山林隱逸之士及軍營保舉明定章程殿試策許敷陳時政不得專取楷法現在中外臣工薦舉賢才尙不乏人而山林隱逸以及末秩下僚或以德行或以政事或以文學各擅所長湮沒不彰甚爲可惜允宜及時登用以副闢門籲俊之典著京外三品以上各員並直省學政悉心訪察臚舉所長咨調來京候旨考試視其器識破格錄用不得視爲具文至各省孝廉方正亟宜選舉名實相副不求聞知之人著該督撫秉公薦舉給咨來京候試不准再涉遷延虛應故事軍營保舉自上年明定章程後本日復因嚴樹森之請停止記名藩臬極爲妥協黎庶昌所稱分爲三等敘功戰功爲上理饒次之防堵團練文案又次之理饒團練防堵文案非二三年不准敘功保舉各員俟軍務

平後始行選缺赴任等語尙屬可行卽著各該軍營遵照辦理貢士策問著遵照本年三月閒諭旨准其敷陳政事缺失毋庸避忌並不准專取楷法嗣後閱卷大臣務當悉心校閱力挽頽風其餘所稱京官兼用守令以進士舉人爲佐雜科舉罷用制藝小試分爲四場會試後附試絕學教職由公舉停止開捐酌增廉俸試行鈔法改設營伍等條是否可行著各該衙門分別妥議具奏欽此上諭前因貴州貢生黎庶昌條陳時務由都察院衙門代奏當經諭令該衙門轉飭該貢生將應陳事件詳細具呈茲據都察院據呈代奏詳加批閱其中雖有更改舊章事多窒碍之處閒亦有可採擇業經另行降旨施行並交該衙門分別核議外黎庶昌以邊省諸生攄悃陳書於時務尙見留心方今延攬人才如恐不及黎

庶昌著加恩以知縣用發交會國藩軍營差遣委用以資造就該員其勉圖實踐用副殊恩欽此

蒞老之上此疏年甫二十有六不第行文驅邁雄闊格律精美而當時利病洞見癥結條分縷析雖未能卽時一一採用今又二十餘年默觀大事改更復有與條陳合者昔賈太傅之陳政事疏諸葛武侯之隆中對范文正之上宰相書文信國公之殿試策皆在二十及三十以內之年多未曾出山而天下之形勢祖宗之成法以及用人行政之得失並所以整頓規畫之方指陳周密利害分明賈生不幸未竟其用武侯文正信國三公後來致身將相實皆克踐其言世人動云古今人不相及今讀蒞老此疏真覺諸公去人不遠平心而論使諸公生於今日所見

所陳恐亦無以有加他日刊全集宜以此疏冠諸首簡以誌
皇太后暨先皇帝特達之知且以昭國朝諸名公未有之
盛事焉光緒十四年戊子冬十二月桐城蕭穆謹識

拙尊園叢稿卷一

拙尊園叢稿卷二

遵義黎庶昌蕙齋

內編

周以來十一書應立學官議

昔周衰孔子自衛反魯憂道不行退而贊易敘書刪詩定禮樂修春秋垂範百王是爲六經尊盛與道無極樂經遭秦而闕僅存其五然而孔子沒門弟子各闡師說曾子述孝經游夏之徒譔論語左邱明公羊穀梁傳春秋至戰國而有孟子爾雅禮記浸尤晚出自是而七經九經十一經之名以立及至孟蜀刻石成都十三經遂著爲令其於孔子所刪定固已增益其七八矣唐雖以經升老子而不久卽廢南宋時朱子作集注始於戴記中摘出大學中庸

以配論語孟子題曰四書詔學者讀書當自四書始清熙以降翕然宗之元皇慶中定制以四書試士明代樂其易簡因仍不革學使者校藝專以論孟學庸發題先四書而後五經廢注疏而遵朱說道術因之一變我 聖祖仁皇帝 高宗純皇帝深維其弊力矯末流 詔撰七經傳說彙纂義疏等 頒諸學官示天下以實事求是之旨包舉漢宋不名一家康熙乾隆以還巨儒雲興經學由是盛絕然所廢舉亦祇系傳注之間非於經外別立一書以崇配者也嘗謹按 國家自府廳州縣學政校士以及鄉會試雖以四子五經垂教舍是莫由進身而私家誦讀往往溢出令甲頗有視爲不刊之典者當周末時莊子著書多寓言然其指事類情於諸子中最爲瑰放特出陸德明釋文已列爲經而作之音義太史

公稱國風好色而不淫小雅怨誹而不亂離騷兼之王逸注楚辭
尊離騷曰經朱子從而不廢後世騷學選學相因爲用欲祛文章
流別之僞文選其最要矣司馬遷史記究天人之際通古今之變
其閎識孤懷蓋未易幾也班孟堅紀述漢事斷代爲書文字之淵
源經世之大法粲然畢備許叔重說文解字博奧精嚴六藝遺文
賴以不墜實軼爾雅一經之上本朝蔚成絕學儀禮十七篇士禮
雖存頗闕王朝邦國舊典欲觀後世帝王因襲之迹惟杜氏通典
馬氏通攷博要能通通鑑上續左氏事始三家分晉體大而思精
言馴而不雜則亦優視聖作矣杜子美冠絕古今詩人韓愈文章
粹然一出於正其道自比孟子使孔門用詩文二子者入室矣校
此數家之言兼包大小豈非文武道不墜地在人卓然俟聖不惑

者哉故其書之傳遠者一二千歲少亦七八百年非有名爵利祿之資然而歷世相承誦習不絕莫不飫其精深博篤取用宏多有以協人心眾好之同如饑渴飲食不可一日離也其視爲經固已久矣往者嘗與曾文正公討論羣籍公獨以謂子若莊子辭若離騷集若文選史若兩司馬氏班氏小學若許氏典章若杜氏馬氏詩文若子美杜氏昌黎韓氏所謂曠代命世大才也躋其書以配經典誰曰不宜今以功令之所頒若彼學士大夫之所誦習若此記曰入其國其教可知也又曰民之所好好之竊謂莊子以下十一書宜因私家肄習特爲崇異立入學官使列十三經後以莊子次孟子楚辭文選杜詩韓文次毛詩史記漢書次尙書通鑑次左氏通典文獻通考次三禮說文次爾雅各降一等命曰亞經俾天

下人士益隆所習咸馳驚乎通儒於以廣術興微翼贊聖業非復
謏聞曲學之私將樂與海內知言君子一平其議也

圖畫章句三大儒遺像記

六經皆出於孔氏自夫子在時七十子之徒各以所傳發聞於世
受易則子木矣習書則子開矣問樂則子貢矣學禮述孝經受春
秋則孺悲曾參左邱明矣然惟子夏氏之儒博而能兼詩有序書
有說易與喪服有傳樂雖無書記乃得諸弟子魏文侯所述文侯
又爲孝經作傳其於論語爾雅揚子雲鄭康成皆以爲仲弓游夏
等撰定而春秋屬商傳業者公羊高穀梁赤則又其高第弟子也
六藝章句之興實自子夏氏始蓋夫子沒子夏以其學教授西河
身爲魏文侯師年且八九十歸然老師宿儒及門人徒授受賡續

沿流益分諸經或至曠闕而詩學獨盛六傳以至大毛公漢興猶未絕也故徐防稱之曰詩書禮樂定自孔氏發明章句始於子夏不其然與漢踵秦火之餘收拾遺經春秋分爲五詩分爲四易有數家之傳禮壞樂崩書缺簡脫自韓嬰申培后蒼孟卿膠東庸生瑕邱江翁等號爲名德始治兼經東漢益眾然皆莫能相通至鄭康成氏出凡易書詩周官儀禮禮記論語孝經無不融會貫通爲之箋注而又尙書有贊毛詩有譜三禮有音六藝七政有論禘祫有議許慎五經異義有駁臨孝存周禮有難以至何休之春秋發墨守箴膏肓起廢疾如此其勤也小無不盡大無不賅子夏氏以還可謂命世集大成之巨儒者矣朱熹氏奮於千載之下其爲儒也格致以明理章句以治經旣傳易矣又以費直合彖象於經不

見文王周公孔子之遺而又爲之本義書傳以屬門人蔡沈矣而又別定古經使人知伏生今文之舊以孝經多附益也於是爲之刊誤以春秋爲皇帝王霸之書也於是別出左氏經文及纂通鑑綱目事竊取之義書法尤致兢兢乞修三禮也周官爲綱領禮記爲義說儀禮爲本經具采注疏諸儒之說而其合大學中庸於論孟尤以章句名篇一守漢經師家法雖毛詩之傳論語孟子之注不盡遵用故訓涵泳所安自成爲一家言大要與漢儒不合者寡矣自餘旁搜博紹六藝之外闡闢涂徑尤多古韻之復萌芽於吳棫韻補而詩傳引其端古文尙書之譌伏疑者七百年而臨漳書後發其覆離騷百代辭原也病王逸之迂滯而別注楚辭韓愈文章之雄也爲天下所歸因譏韓文攷異無一不從訓詁中來其於

章句之學何如也世儒耳食目語不究朱子研經宗漢之旨而概以道學附之不識康成整齊六藝之功而反以訓詁少之皆非博篤至論也若子夏氏之發明則更數典而易忘矣六經之義坦然而明白至今日而如日正中懸諸不刊之典矣詎知夫皆天縱此三大儒者出其絕地通天之力以續斯文於未喪而其學皆自章句得之夫下學則上達章句明而後義理生自然之驗也余故圖其遺像備朝夕警省亦將終身焉從事斯語已耳

讀三國志

吾觀陳壽之於諸葛孔明也其猶七十子之服孔子乎孔門籍弟子眾矣而能善言德行者獨稱宰我子貢有若爲智宰我曰以子觀於夫子賢於堯舜遠矣子貢曰仲尼日月也猶天之不可階而

升也有若曰出於其類拔乎其萃自生民以來未有盛於孔子也三子者之所以尊孔子若此壽譔三國志書成於晉武帝泰始十年上距蜀亡之歲十有二年距孔明卒已四十一年故家文獻略無存者古者國必有史而蜀乃無官壽獨旁按博紹譔定故事隨史表上又采遺言軼行散見於各志傳中凡士經孔明片語褒抑者若等於春秋之嚴無不謹而書之勤亦至矣晉書以應變將略非長一語爲壽詬病後遂從而和之不察余讀諸葛氏集表而悲壽屈之深也夫爲人臣而至於周公召公亦可以止矣文章至於尙書謨誥亦可以無憾矣壽之所以推重孔明者若此而世猶以壽父參馬謖軍被罪借私隙咎亮曲致其文嗚呼亦見其爲淫詞之設而已孔子欲見南子子路不悅公山弗擾以費畔召子欲往

子路曰末之也已何必公山氏之之也然則謂子路貶孔子可乎
孔明之伐魏也以區區蜀漢一隅而當曹魏三分有二之眾夫人
而知其艱危矣彼孔明者乃獨行其志而不悔順萬世之心以爲
公申討賊之義以爲大其志其事雖與湯武放弑同可也夫湯武
之放弑幸而其事之成也孔明之伐魏不幸而其事之未成也然
而湯武之難易不可與孔明同日而語雖然微壽良史直筆孔明
帝蜀之精神亦不能曲傳諸千載後皜如陽暴耳吾故曰陳壽之
於諸葛孔明也其猶七十子之服孔子乎

何忠誠公編年紀略書後

往時獨山莫友芝子偲撰黔詩於邦人事搜討甚力私怪何公忠
誠爲有明一代臣節勁殿其事蹟自史傳外罕有能舉軼者因就

其家訪之得公從孫琮編年紀略一卷首尾完具足補史氏闕遺
又因以攷見全州桂林兩大戰績及主將招降不屈從容盡節諸
狀曰噫烈已子偲欲遂旁采他氏爲年譜一書遭黔亂客游江淮
未竟也紀略成於康熙末年距公成仁之歲已七八十年其時忌
諱之禁稍弛迨乾隆中 詔修通鑑輯覽史臣珥筆一秉 聖裁
書法至爲矜慎余觀輯覽所附三王事凡書定者六克者四十二
人者三至者五襲者一平者三圍者三擊敗者二攻者四未嘗有
言戰者獨於攻全州也曰騰蛟率焦璉郝永忠盧鼎趙印選胡一
青五將合力拒守大戰全州城下攻桂林也曰騰蛟督焦璉胡一
青等分三門力戰拒守於公之攻永州也曰圍城三月大小三十
六戰遂爲所陷是 王師入關後放兵南下觸之者皆若焦熬投

石已耳獨公堅不可撼使史公督師江上時卽已能如公之守全州守桂林則揚必不失揚不失而金陵尙可有爲否或二公者易地以守明之亡不亡未可知也晉畫守淮決於肥水一戰宋主和議成於順昌朱仙鎮兩捷從古未有不戰而能自立者孟子曰天時不如地利地利不如人和如公之竭忠盡力不得令展於江淮用武之地至全州桂林則地利已失以此挽回全局至難吾於是不爲公惜而爲明之用人惜也廢興之際雖曰天命亦豈非人事措注有善不善哉雖然彼宏光者又烏足以語是哉

書梓湖文錄後

有明歸熙甫善屬文得太史公書趣桐城望溪方氏稱之姚郎中鼐又推望溪之說以尊歸氏歸氏文由是大顯然望溪爲文與熙

甫絕不類卽姚氏亦不近似之也巴陵吳君南屏敏樹自少篤嗜
熙甫文嘗手纂成帙公車攜入京一時名流如梅伯言朱伯韓邵
位西王定甫輩聞而爭求之以爲異蓋是時天下方重姚氏學以
謂學子長必自歸氏始而君伏處窮鄉初固未嘗聞知也其好熙
甫文出於天性及君自爲之清纘往復善談名理亦瑣瑣喜道鄉
曲事聲音笑貌宛然一熙甫也無町畦而動應繩墨雖君亦不自
知其然所居曰鹿角市濱臨湖陰巴陵洞庭極天下壯區處也時
時獨往來於君山登九江樓寄寫其邈漠無涯之思天水漫濫生
世富貴貧賤趣舍得喪舉一不關於胸宜其文之幽渺獨絕稱是
大湖也爲人清夷和惠卽其文可想見之焉況接其人乎同治戊
辰歲君來游江甯年六十四矣曾文正公客之幕府與余及桐城

吳摯甫汝綸陽湖趙惠甫烈文三人者爲忘年交君故善飲每夕必得酒而後寐一夕與客劇談忽忘飲酒客去夜分向盡索之厨下不得顧視牀頭有巨甕命僕趣啟封封塗膠驟不可啟君乃自持門撐擊剝之其聲碩碩然余遙與君戲語曰徐之否者酒且迸矣良久甕啟持椀汲引椀巨甕又不可入君益叫躍號呼如渴驥將奔冷泉也卒易盞斟酌之乃已翼日相與大笑以爲樂其不滯於天機若此君歸數年而卒今讀梓湖文余名在焉慨然想望巴陵洞庭閒遂無復有斯人因書以誌感光緒九年八月

刻孫淮海先生督學文集序

吾黔僻在西南隅自後漢時道真尹公從許慎應奉受經書圖緯還教鄉里以北學開南中之陋仕至荊州刺史歷有名德惜無傳

書厥後士宇乖分黔服陷於蠻夷鬱千餘年不能振拔遂無人焉能繼起以昌明聖學興起斯文爲己任者至明乃得文恭孫淮海先生先生當明中世傳陽明王氏之學於貴谿徐樾波石卽能洞徹良知之弊嗣又討論於蔣道林其學以求仁爲宗以誠意慎獨爲要以盡人合天爲求仁之終始其於成己成物位育參贊天人一體之原心契微眇温故知新浩然自得晚歲築學孔精舍以居尤致精於易理生平難進易退不以依違徇人亦不以激烈取異匡君德鑄巨璫論革除清國學兢兢焉惟以維持風教作育人才爲急務物來順應沛乎有餘海內羣以名臣大儒歸之可謂命世賢豪不待文王而興者也惜其身沒之後傳業無人明史未爲立傳雖有郭青螺表章於前田山薑揚推於後而遺書湮晦行蹟無

存三百年來通人學士幾至不能舉其名氏況於黔之後生小子乎先生之書見於明史志者淮海易譚四卷律呂分解發明四卷論學會編八卷莊義要刪十卷學孔精舍彙稿十六卷 本朝四庫著錄已少論學莊義二種而其散見於黔書理學傳及溫純恭毅集毛在遺稿序黃虞稷千頃堂書目者復有春秋節要四書近語左粹題評教秦語錄雍諭學孔精舍續稿道林先生粹言教秦總錄歸來漫興等編道光咸豐中獨山莫友芝子偲按求邦故竭數十年之力僅得易譚四卷四書近語六卷左粹題評十二卷教秦緒言一卷幽心瑤草一卷學孔精舍詩稿六卷因爲先生立傳詳載黔詩紀略中光緒四年子偲之弟祥芝彙刊爲文恭遺書別輯雜文一卷附於其後餘皆不可復得今年夏庶昌偶於日本友

人中村正直家獲先生督學文集四卷取以與雜文校增多八十餘篇首末完備雖不能復還彙稿舊觀庶幾先生遺文粗具於是乃舉而刻之將使吾黔人士由先生之書以推知先生志業講明而昌大之使聖學復明於時又益知先生之文如星日之氣歷久彌光遲之三百年猶於海外遇之終不可磨滅然則士之有志於聖慨然以斯道自任者可以興已光緒十五年八月黎庶昌續古文辭類纂敘

右文四百
篇總二十八卷分上中下三編皆以補姚氏姬傳古文辭類纂所未備也上編經子姚氏纂文之例首斷自國策不復上及六經以云尊經然觀其目次每類必溯源經子之所自來雖不錄猶錄也今次爲三卷曰論辨曰序跋曰奏議曰書說曰

詔令曰傳狀曰雜記曰箴銘曰頌贊曰辭賦曰哀祭其爲類十有一左氏敘事之文自爲一體姚饗無類可傳則取曾文正公經史百家雜鈔之目以入之錄敘記爲一卷又別增典志一卷典志亦雜鈔之目也中編曰史姚氏饗文不錄史傳其說以爲史多不可勝錄然推此義法類求之馬班而降可讀之史蓋少今錄史記紀傳世家爲五卷漢書紀傳爲四卷序跋奏議書說詔令辭賦哀祭姚饗所遺而尙有可頗采者爲一卷三國志五代史其書最爲馴雅有法漢以後史之良也取一二類著焉通鑑法左氏敘事體也史之八書漢之十志皆典章國故與周禮儀禮全經同錄敘記爲一卷典志爲一卷下編方劉前後之文文無所謂古今要趨於當姚氏之論卓矣而譏次方劉文或爲世儒所非此方劉文之不足

以贗人意姚氏無可議也今依此例傅益之使究一代之變其爲類十有三曰論辨曰序跋曰奏議曰書說曰贈序曰傳狀曰碑志曰雜記曰箴銘曰頌贊曰辭賦曰哀祭曰敘記次爲十卷無者姑闕焉古文辭粗備於是矣文章之道莫大乎與天下爲公而非可用一人一家之私議自劉向父子總七略梁昭明太子集文選而後先古文章始有所歸宋歐陽氏表章韓愈明茅順甫錄八家而後斯文之傳若有所屬姚先生興於千載之後獨持灼見總括羣言一一衡量其高下銖黍之得毫釐之失皆辨析之醇駁較然由是古今之文章謬悠殺亂莫能折衷一是者得姚先生而悉歸論定卽其所自造述亦浸淫近復於古然百餘年來流風相師傳嬗賡續沿流而莫之止遂有文做道喪之患至湘鄉曾文正公出擴

姚氏而大之並功德言爲一涂挈攬眾長轅歸掩方跨越百氏將
遂席兩漢而還之三代使司馬遷班固韓愈歐陽修之文絕而復
續豈非所謂豪傑之士大雅不羣者哉蓋自歐陽氏以來一人而
已余今所論纂其品藻次第一以昔聞諸曾氏者述而錄之曾氏
之學蓋出於桐城固知其與姚先生之旨合而非廣已於不可畔
岸也循姚氏之說屏棄六朝駢麗之習以求所謂神理氣味格律
聲色者法愈嚴而體愈尊循曾氏之說將盡取儒者之多識格物
博辨訓詁一內諸雄奇萬變之中以矯桐城末流虛車之飾其道
相資無可偏廢故旣敘述略例亦明夫不敢封己抱殘守一先生
家言暖暖姝姝而私自悅以足也然遂欲執涂之人而強同則是
又大惑已

曩者余鈔此編成客有示余長沙王先謙氏所譔續古文辭類纂刻本命名與余適同而體例實異王選祇及方劉以後人文多至四百數十首余竊加約 本朝文纔二百四十餘頗有溢出王選外者而奏議辭賦敘記則又王選所無人心嗜好之殊蓋難強同要之於姚氏無異趨也後之君子並覽觀焉

唐以前史漢並尊自昌黎韓氏太史子雲相如之論出不及孟堅而馬班始有軒輊其後柳子厚李習之之倫祖述其言遂若斯文之傳孟堅擯不得與此與以耳食何異獨蘇明允稱之曰遷固雖以辭勝然亦兼道與法而有之時得仲尼遺意焉而惜乎其少信從也余謂子長網羅百代孟堅紀述一朝義法固自有當未可執彼議此且班書典雅宏贍微特元明人莫能爲卽唐宋諸賢昌黎

而外亦未有能幾之者曾文正公略師班氏其文規恢闔闊遂萃然直躋兩漢況進於此者邪故今斷以馬班韓歐爲百世不祧之宗云

桐城宗派之說流俗相沿已踰百歲其敝至於淺弱不振爲有識者所譏讀曾文正公暨吳南屏二家之書斷斷之辯自可以止然工輪雖巧不用規矩準繩又可乎哉 本朝文章其體實正自望溪方氏至姚先生而辭始雅潔至曾文正公始變化以臻於大桐城之言乃天下之至言也昔孔子論文義主修辭而以立誠爲本昌黎韓氏則曰沈浸醲郁含英咀華未有辭不工且雄而文能造其極者余今所論纂博觀慎取蓋亦有年凡神理氣味格律聲色有一不備者文雖佳不入望溪方氏致力於史漢獨深其讀史書

後各篇多足闡發馬班義理頗取以綴諸傳之後

道光初興縣康撫軍刻姚氏古文辭類纂本有畫段圈點後數年吳啟昌重刻於江甯以爲近平時藝用姚先生命去之然觀先生答徐季雅書不又有圈點啟發人意愈解說之言乎余以後世之變何所不有自秦燔詩書而漢儒有章句之學自劉向校書而後儒有校讎之學宋元明以來品藻詩文或加丹黃判別高下於是

有評點之學 本朝以經藝試士科場定例又有點句句股之學皆因時適變涂轍百出不窮今悉采而用之不得以古之所無非今之所有傳曰法後王謂其近己而俗變相類也吾又何疑焉

古人選文不錄生存杜標榜也余意不然文章優劣如人之有妍媸美惡觸目自見匪一人之力所能私姚先生以乾隆四十年出

都數見劉海峯於樅陽其簞次古文辭時海峯尙存也余論本朝之文蓋至咸同閒而極盛錄者尤多自曾文正吳南屏鄭子尹而下其人大都生平所親炙否則亦其與接者也武昌張廉卿桐城吳摯甫夙所嚴憚無錫薛叔耘頗與去聲商訂此編桐城蕭穆敬甫雖未錄其文而匡諍啟發裨助宏多皆孔子所謂益友也嗚呼文章經國之大業不朽之盛事世有直諫多聞引繩墨以糾余不逮者禱祀求之矣光緒十五年秋九月遵義黎庶昌簞敘

答趙仲瑩書

仲瑩仁兄世大人閣下秋初接到三月廿二日手函會僕有西京大阪之游卒卒未報頃夏子猷至又奉九月旣望惠書弁拜川墨之賜藉審文翰餘暇博覽羣編用爲身心之助甚休甚休京師學

問海也亦利祿之所從出非豪傑之士卓然有以自命者居之鮮不馳騫聲華咻於眾俗而莫能振拔以仲瑩今日居地自世俗言之依日月之末光據清華之要選所與游處又皆賢公卿大夫之有氣力者稱古今而譽盛美誰不謂宜而來書深自謙抑勤勤下問若歉然有不足於中而樂取人善以自廣益此其用心固賢人君子之所難能而僕乃私喜草木臭味之不遠者也雖鄙陋無狀敢不竭愚以爲高明之助竊以爲本朝學問義理攷据辭章三端至今日而涂轍大明皆可尋求而自致然書籍浩博畢世不能殫其業若不循持要領而泛泛以求則恐舍本逐末遺精得粗寶砥硤而棄珠玉必有誤用其精力者矣夫六經之當諷味盡人而知之矣六經之外余謂有可讀與經等者於子則取老莊荀周程張

朱於史則取兩司馬班氏於集則取文選韓歐陽合此十餘家之書窮原竟委熟讀而深思長吟而詠歎久之必有如杜元凱所謂江海之浸膏澤之潤渙然冰釋怡然理順者其他則供流覽而已況此十餘家之中亦有不必要盡記誦者乎本朝人喜言攷据然其學在今日實已枝撐節解幾無賸義可尋驚而不已誠不免於破碎害道之譏惟獨文章一事余意以爲尙留未盡之境以待後人而因文見道之說僕尤篤信不惑何也蓋文以載道周子固嘗言之也古之善爲文莫盛於司馬遷班固韓愈歐陽修韓歐之文世頗以道歸之矣而馬班則未也獨蘇明允稱之曰遷固雖以辭勝然亦兼道與法而有之時得仲尼遺意焉望溪方氏推尊子長曾文正公則兼及班氏謂其經世之典六藝之旨文字之源幽明之

情狀粲然大備是豈逐世俗爲毀譽哉故僕近者妄有古文辭類
纂之續於史漢所選獨多欲以踵姚氏義法後閣下苟無意於文
則已若有志於此異日取吾書而讀之以求合乎桐城之法與宋
儒者不悖之言其於因文見道一說將深造而有得也夫道與文
並至者孔孟是也下此見道有淺深言道有醇駁而皆由文字悟
入則自漢唐以來無或異也天地之運積久必變以故夏尙忠商
尙質周尙文三王之道若循環今天下似亦攷据將衰之時也救
敝之術莫若古文斯文廢興蓋有天命僕旣自勗勉亦以進於閣
下願負荷無忽有不當希更往復惟亮警不宣庶昌頓首

答李勉林觀察書

辱書蒙誨以所不及勉以無自菲薄之道非甚見愛誰肯爲言此

雖然第以僕前書云云爲有所憤嫉則實不然庶昌方十七八歲時讀古人之書卽知慕古人之爲思以瑰偉奇特之行震褻乎一世故年二十六而應 詔上書言事頗自傅於蘇子瞻陳同甫一流二十七而從軍江皖三十四而綰符治縣四十而奉使出洋今十五年於茲矣中間自奉諱外未嘗一日歸休於家其非無意用世欲以肥遯自高甚明然而行能有進有不進者各人所遭之勢異也曩者嘗從事曾文正公矣亦又周旋於李傅相丁文誠二公之間方同治初年將帥聯翩誅討叛逆庶昌皆躬與其會當是時也彙征如拔茅求材若拾遺不以此時與羣賢馳騫並進而乃欲於垂白就衰之年芸芸不已斯亦徒見其惑矣古之人量而後入不入而後量如僕今日所處已非量人之義使臣一役歉猶有所

難勝況更踰分干進以覷巨艱之任乎脫不如是而從俗俛仰庸庸循循相與競爭於蒙昧之中使人熒而失守又非愚拙所安也二者俱無所處計惟卷懷以退然後可葆吾真而全吾志與閣下交三十年其視僕肝膽豈不然哉且吾聞之君子之仕也將以行道驗所學而已道足以拯天下雖皇皇日求登進而賢哲不以爲非學足以究天人雖汲汲以赴功名而反躬不以自恥無他爲有所濟也故曰隱居以求其志行義以達其道窮則獨善其身達則兼善天下道如是是亦足矣而或邂逅不如志雖聖賢不能違道希遇必有說以處之故又曰用之則行舍之則藏不知命無以爲君子誠知命之繫於天而一不由乎己得其時則行爲禹臯爲伊呂可也不得其時則藏爲孔顏爲孟荀可也卽或行或藏而處於

時不時之閒爲柳下惠爲令尹子文亦可也其行也衆民廣土不見爲有餘其藏也獨寐寤言不形其不足古之君子惟能究極乎此而無願乎其外故安命樂天無入而不自得孟子所以稱禹稷顏回同道也推孟氏之義豈惟世俗所謂富貴功名者不足道卽叔孫豹三不朽之說功與言抑其末矣達乎人之謂道修於身之謂德崇其德之謂學事誠一貫君子亦惟修德已耳後世習尙雖大遠於古然名世如諸葛孔明司馬君實范希文歐陽永叔王陽明湯潛庵曾文正公諸賢猶庶幾乎此詣此旨夫豈以進退得失爲有餘不足哉庶昌讀書雖陋頃歲以來頗以聖賢知命之學默自體勘若有所契於心故於得喪一涂不甚措念冀幸有聞道之日非果懷抱鬱鬱而爲是不平之論輕世肆志以取快也遠承教

督不獲面譚書以悉臆伏惟亮督不宣庶昌頓首

楊性農先生重赴鹿鳴燕序

並吾之世居洞庭湖東西而以古文名重天下者二人曰梓湖老人巴陵吳南屏敏樹武陵楊先生彝珍性農往者同治戊辰之歲庶昌從事曾文正公幕府適吳先生來游金陵文正客之幕中獲與游處譚藝甚洽吳先生顧不以晚進少我遂訂爲忘年交先生則自在家時卽讀其移芝室集欽企先於梓湖後亦就通音問而先生道德高雖居武陵嘗卜築郊外之方家冲屏處不入城市無緣得見光緒十一年庶昌奉諱自日本還黔道經常德以爲必可一遂瞻謁適會先生不在斬焉衰絰之中迫從奔星又不及見然先生固嘗枉書下交也吳先生之文由歸熙甫以希風子長非筆

墨町畦所能囿冲夷澹蕩得洞庭之清先生之文浸淫唐宋不名一家如沅澨會流納眾派之水排崖激埼宛渾膠盪至洞庭而一放皆天下極觀也先生之不仕高尚其志與吳先生同著書之多以古文名世亦同其集亦皆播行於世士論定久矣吳先生不幸前喪獨今先生尙存年登耄耋德業猶日進不已自古文章盛衰與時高下方唐之中世遭值安史播孽肅代而降繼體撻伐號爲中興而韓愈柳宗元李翱皇甫湜之徒遂起於貞元元和閒戛然修復於古唐之文章一變至道及我朝咸同兵事起翦叛誅暴武威之震邁絕唐室而文章亦極盛於此時曾文正公挈其衰先生與梓湖諸人昌其術豈非天之爲哉抑何古今事勢之累迹也先生以道光壬辰 恩科舉於鄉至光緒十七年辛卯正科歲值周

甲國家行事例得重燕鹿鳴此非直湖湘士大夫之慶實誦先生
文者所當共慶庶昌又辱先生知不可無言以稱休典於是獨論
先生文之有關運會者綴爲式燕之辭以祝使當工歌鹿鳴笙簧
鼓吹之際取而閱之未必不忻然進一觴也是爲序遵義黎庶昌
章子和墓誌銘

君諱永康字子和別號瑟廬大定章氏由拔貢生中成豐元年舉
人癸丑成進士改翰林院庶吉士散館再改中書升侍讀曾祖某
祖某考首乾妣某氏諱氏母謝氏以君貴贈某官某封始贈君前
妻生永孚永孚母卒繼娶諱歸未幾而贈君逝君庶出也生而失
父及期母謝亦卒於是二子者皆育於諱撫養教誨迄於成人而
諱故無出君子以謂諱母所爲極天下婦行之難能矣其後君貴

諶又謝世君思母教不忘命工作機聲鐙影圖以志哀一時題詠甚廣君子又以是賢君也君爲人頎身玉貌雅度温温所居錦茵繡幕狀類婦人女子初入翰林年二十餘名譽藉甚及改官中書非意所樂當是時海疆多故君居京師與名流數輩悲歌擊筑侘傺傷懷嘗要今中丞南皮張公之洞賦行路難古樂府十餘章詭切時事微顯志晦深文隱蔚進乎春秋其友涇縣吳承修讀之歎曰子和肝膽皆芬也黔本山國大定尤處萬山之交僻陋在夷世鮮名達君出而天才綿麗冠絕時流有騷人之遺風焉夫其性情悱惻牢愁悲思則楚臣屈原之所爲惓惓君國也人才不擇地而生如君固天地清淑所特鍾而非一隅一世之有矣君以咸豐十年冬出京其兄方官江西知縣道往省之還黔數年將改官知府

分發補用已治行矣會黃號賊陷大定倉卒及難死焉同治三年十一月十六日也春秋三十有幾君死屍卒不獲大吏亦未具其事上聞余聞而悲君數之奇謀輯所爲詩歌傳世吳君承修搜得君詩四十餘首詞數首介其鄉人洪都轉汝奎詒余刻之光緒元年攜至荷花池釐局勘定錄副未竟局燬於火稿失大半僅存者行路難樂府而已君之厄乃至於是邪蒼蒼者其果有知邪果無知邪吾不能名矣君無屍宜具衣冠葬配某氏子某某銘曰水西孤城如斗大惟黔采風等自鄆藐姑仙子眞天人起家孝秀無等倫威鳳不翔豈其志翦爲國殤天亦寐請陳侷詩行路難化爲碧血千萬年

先兄魯新墓誌銘

同治四年正月先兄魯新以書抵余金陵寄所刊詩詞命爲覆審且曰吾困於病久矣吾貧益甚歲暮單褐不完妻子有饑色然皆不一累心者以古人差足與娛也庶昌發書歎息謀迎致之江南使發半道而兄卒於家其年九月仲兄赴告我於徐州庶昌爲位以哭時軍事方急未卽銘後遂閱十九年始克敘藏諸墓兄諱庶燾字魯新別號篠庭遵義黎氏曾祖諱正訓歲貢生妣鄒氏祖諱安理以舉人官山東長山知縣妣楊氏考爲開州訓導諱愷妣張氏母氏吳生子四兄於次長也生十六歲我君卒官開州仲未成童季者纔二歲耳旣痛父沒熒熒在疚又傷諸弟孤露無與成立乃遽發憤強起求爲人先自其時卽已岸然旌異迨後八九歲家居讀書益力志凜凜抗古矣每有述作輒就諸弟與相違覆剖瑕

摘釁辨析毫釐交訟互褻董勸並進兄弟閒自爲師友儼如也中
咸豐辛亥鄉試舉人踰年仲兄庶蕃亦舉於鄉計偕北上至鎮遠
之無水以疾作不能前歸而大困得反胃之證不良飲食一歲中
瀕死者數矣兄曰窮於天者吾不得而爭之矣千秋之業在人者
吾何敢讓於是蠲棄萬慮一從事於詩以鳴其坎壈不平之氣自
世所尊漢唐以來能詩者之說之法靡不涵茹錯綜以適厥旨課
迹責音振華挹髓與古大翫故其爲詩屏去宛曼鏤腸鑿胃冥索
章句形神寂寥辟邪觝讖密栗氣清規規然務合繩削而始止也
卒存詩曰慕耕草堂者三卷曰依硯齋者四卷別有琴洲詞二卷
嗟乎君子疾沒世而名不稱以窮若彼以成若此其在我豈不礪
然信券著哉而說者曰自古通人哲士肩項相望雖顏氏之聖不

得夫子而名不彰揚雄氏著書渾渾近古知之者獨一侯芭桓譚而已劉歆猶以爲無祿利而空苦況區區文字淺末操術眇小世又不常有芭譚其人而求索諸杳冥不可知之天然則兄所持以爲千秋者其果足恃焉否邪抑又悲已病凡十四年中閒遘亂者十二年困臥顛沛之中未嘗一日去書誦聲琅然恆達旦不息其卒當同治四年乙丑二月十九日春秋三十有九將卒之前月舊疾益篤水漿不能咽形瘦骨瘠顛顛柴立無復人理臨絕適涓潭黃號賊大至環攻我禹門寺寨飛礮及其楊家人倉皇棺斂卽厝宅南坎下明年九月十四日仲兄卜兆於姚家巷水井堡之陽葬之旣葬踰年庶昌歸自河南曾文正公軍省兄之墓宿草在目欲尋昔日之警欬而已邈然不可復聞已追維夙命負疚孔多人能

宏道末如命何其詩詞刻者將別爲刪定以行配楊氏妾駱氏子
尹頤幼殤尹融光緒庚辰科進士簽發吉林卽用知縣女一未字
殤銘曰

厄於身昌者詩昇以名斬厥施彼蒼蒼實爲之久而定來者知訊
異世爲此辭

鄭徵君墓表

先生諱珍字子尹晚號柴翁姓鄭氏其先吉水人七世祖益顯爲
劉縱部將以明萬歷庚子從平播縱班師被論回衛益顯領舊兵
屯防水煙遂爲遵義人曾祖某祖學山縣學生員考文清兩世精
醫衍德於術妣氏黎余姑也先生自幼精力之過絕人寓目輒能
記誦余世父雪樓公以憂歸自桐鄉多蓄典籍先生以甥行學於

舅家悉令鼓篋讀之恆達旦夕肘不離案衣不解帶數年而學以
大明道光五年選拔貢生受知於歙縣程侍郎恩澤侍郎詔之曰
爲學不先識字何以讀三代秦漢之書先生大感悟益進求諸聲
音文字之原與古宮室冠服車輿之制方是時海內崇尚攷据名
曰漢學從者波靡先生師承其說實事求是立異不苟同卽已
洞知諸儒者之弊治經宗漢析理尊宋踰二年復從侍郎於湖南
歸而與府教授莫猶人先生游益得與聞國朝六七鉅儒宗旨久
之經術益大涵肆莫可殫詰先生之爲學其孤詣有可得而言者
矣其初實致力於許鄭二家之書以爲不明傳注則經不能通不
明訓詁則傳注不可得而讀其於康成叔重信之惟恐不篤尊寵
之惟恐不及旣治三反苟有感則發憤潭思又不合則羣綜諸儒

之說旁參曲證必求一得當程朱氏之義理而後已如是者積三十餘年而先生之於三禮六書乃始渙然怡然矣蓋經莫難讀於儀禮昏喪尤人道之至重則爲儀禮私箋古制莫晦於攷工則爲輪輿私箋鳧氏圖說小學莫尊於說文以段玉裁嚴可均二家之說綦備則爲說文逸字及說文新附攷奇字莫詳於郭忠恕汗簡而謬俗實多則爲汗簡箋正漢學莫盛於康成則爲鄭學錄每勘一疑獻一義刊漏裁誣卓然俟聖而不惑斯亦天下之神勇也先生嘗以謂遵義漢牂柯地自郡人尹珍從許慎應奉授經書圖緯教授南域後遂無有經術發聞者於是毅然以道真自命故學成而先生褻然爲西南巨儒以道光十七年丁酉舉於鄉甲辰大挑二等凡三爲校官最後補荔波縣訓導適狄夷作亂大舉攻城縣

令蔣嘉穀病不能視事先生募南丹廠工三百人署以軍政縋城
出擊斬馘甚眾城賴以完未幾遂棄其官以歸先是先生自得鄉
舉後卽已厭薄仕進惟從政於門內甚謹存則授几授杖以至視
形聽聲無不致敬以勉於分所當爲沒則附身附棺以至繼志述
事無不盡慎以達乎心之所安晚歲經營子午山廬於墓次將浩
然自得以終不復與聞人閒事同治二年癸亥乃用大臣密薦
詔赴江蘇以知縣補用未行而口疾作遂以甲子九月十七日終
於家春秋五十有九配余從姊黎孺人子一知同女子二人孫男
幾人孫女幾人先生之學鴻肆而核辯經術所不能盡者益播爲
詩古文辭以昌大之瓌奇孤邈力闢陳常論者以爲漢學家所未
有撰著之書已刊行者儀禮私箋八卷輪輿私箋二卷說文逸字

二卷說文新附攷六卷汗簡箋正八卷鄭學錄四卷集經集經說一卷集經集詩鈔九卷樗爾譜一卷母教錄一卷未刊者有攷工鳧氏圖說說隸親屬記老子注世系一綫圖集經集文鈔無欲齋詩注凡若干卷而遵義府志播雅兩書尤爲邦人文獻所繫往者吾讀國史儒林傳見高宗純皇帝崇尙儒術於時顧棟高梁錫與等皆以經明學粹下詔褒許列於冊首如先生者內而懿行集於身外而經術顯於眾以視棟高諸人孰爲優劣未易遽定其可與於儒林邪抑猶未邪將以俟諸知言君子

翰林院典簿胡君墓表

光緒十年八月十一日翰林院典簿黎平胡君卒年六十七明年五月十六日葬某里某山君諱長新字銘三獨山莫友芝別字曰

子何而爲之說遂以子何行道光丙午舉人丁未進士卽用江蘇知縣賓客有賀者君曰勿爾吾未自信未可出而仕也且母老不宜遠行又奚爲於江蘇立請改教職得貴陽府教授一年丁母憂服除選銅仁府教授未行郡守留襄軍務苗匪圍黎平如楚乞師事定乃之任以功保國子監學正加五品銜提督學政韋業祥又以端介可風薦升翰林院典簿不樂赴病免歸掌黎陽書院在銅仁十年而黎平尤久先後凡十五年君之學蓋自知恥始其程己以宋五子爲侯的以經史爲衡繩以小學爲羽翼於並世人師鄭珍莫友芝友黎兆勳莫庭芝獨其徒未嘗有聞然而銅仁之人曰胡先生教人能使愚者明惰者起頑者革今之胡湖州也黎平之人曰胡先生律嚴而道尊言動而躬隨今之石徂徠孫泰山也其

於忠孝節義禮讓廉恥若出天性皇皇勗圖無日時不然無事不
然不可一節名也曾祖世範歲貢生銅仁訓導祖榮增廣生考秉
鈞嘉慶乙丑進士河南扶溝縣知縣因事降改教職授遵義訓導
娶劉氏子一生同所著書曰籀經堂集君葬四年而墓未有表黎
庶昌曰古者賢士有易名今諡不下行道何由光君執德秉貞礪
然自守始末不渝若用昌黎韓愈銘孟貞曜故事取學政語諡曰
端介先生具列諸石則君之生平行誼不待戶說皆明白且行遠
矣以書播告士林咸曰宜光緒十四年正月表

工部侍郎石公神道碑銘

同治未改元之歲 天子旣黜八大臣不用誅鉏姦慝思擢一二
貞亮守死之臣以風示有位於是超拜天津知府石公爲順天府

尹 詔曰近年吏治廢弛封疆大吏以奔走逢迎者爲能其悃悞
無華者往往目爲迂拙未列上考昨已超擢天津知府石贊清爲
順天府府尹俾資觀感而樹風聲天下翕然頌 帝德知人也先
是咸豐十年八月西洋英法兩國以條約不諧故合寇天津吏民
駭散總督以下官多受辱公時爲知府四年私念空城徒死無益
不若徑往赴敵卽單車抵英酋所陳說大義諭以我 朝神武宜
速罷兵議和毋自取覆轍慷慨而談顏色不變英酋雖未卽聽然
心敬中國有人矣旣而以五百人劫質南營公卽倔强罵時時
引手搏頸曰速殺我取吾頭去酋益敬禮有加爲具食不肯食進
酒不肯飲勺水不入口者三日酋皆私竊自謂此 大皇帝忠臣
不可屈宜還之而天津士民數十萬人復集日夜環奏輪舟距躍

謹諱曰還我石父母來於是英人羅拜送出戒其部勿得侵擾百姓以敬石大人郡界肅然莫敢犯者 兩宮太后聞而嘉之 詔軍機處記名以道員請旨簡放蓋公之以忠節受 上知事如此公諱贊清字次皋一字襄臣貴筑石氏道光戊戌進士直隸卽用知縣補阜城署獻縣正定盧龍知縣大計卓異升蘆台撫民通判署永定河北岸同知升順天府治中署通永道霸昌道補天津知府同治元年以府尹兼署刑部右侍郎迭充辛酉科舉人覆試閱卷大臣壬戌科會試搜檢大臣順天鄉試監臨官稽察右翼覺羅學九月補授直隸布政使二年調湖南布政使三年奉 旨祭告南嶽四年護理湖南巡撫五年 召入爲太常寺卿稽察左翼覺羅學轉宗人府府丞六年補授都察院左副都御史再補工部右

侍郎時黔省賊氛延蔓糜爛幾不可收拾公先後條奏請促川楚合力進兵又請飭裁撤湘勇移饟接濟議下三省督撫施行厥後黔亂卒由此定從公言也而直隸遭旱大饑三口通商大臣崇厚又舉公籌辦全省荒政謂可獨任其難 朝廷方虛心倚任未幾而公遽隘疾八年益甚請告開缺不弔月卒於京師春秋六十有幾曾祖某祖某考某祖考皆贈資政大夫工部右侍郎妣某某氏皆封夫人配某夫人無子以從子承霖嗣某年月日歸葬貴筑北郊紅邊里吉宅壩之陽公由縣令敷歷中外三十餘年皆以清正愛民著稱而天津治績尤異百姓歌之曰爲國爲民天津府剛毅不撓胸有主及海疆變起羣吏望風解竄公獨以二千石守死自效不爲外侮所屈辱天下高其節競以比漢典屬國蘇武云今公

沒二十年墓道之文未具庶昌深恐遺事湮軼後無復能言者乃表公大節於阡而別綴他行誼聲諸銘詩使並有攷銘曰

擾擾羣生孰能無死泰山鴻毛惟其所止止而得所死則死耳求死如飴時或不死大節炳完如石公是公之爲政學道愛人輔仁造士羣彥萃振釐剔姦拐平市米銀令行禁肅化暨海濱公之聽斷老吏若神曰石一堂民自不冤潞河漫漫郡爲衝壑公日不遑殫求民瘼露醜風梳隄卑埵薄導水歸流民迺反作公事上官不爲跛飢直道而行仕已任彼坦懷率真亦厭苛禮御史如奴視民猶子雅善談說名論波起雜以詼譎粲花齊委文章游藝飭餽一編屠堂香屑誰與後先天機雲錦儷巧組妍風雅道變極於是焉紅邊郭外踰越阡陌攢峯之阿古壤所宅天寶留此永奠公魄刻

銘表忠用載史筆

趙剛節公神道碑銘

公諱德光字輝堂郎岱張氏少隸提督趙德昌戲下數從征伐冒姓趙有大功於黔黔之人皆樂稱趙氏遂不復改黔亂之興至同治五六年而極公嘗以孤軍枝柱省垣蔽翼三府七州十一廳縣之地勇冠三軍所向無敵中外皆以名將目之公亦自以討賊爲己任也咸豐六年始由勇丁征剿雲南回匪積功保六品軍功藍翎八年雲貴總督吳振械飭令回黔剿匪於平越一帶以千總拔補 賞五品頂戴十年克復修文縣城擢都司 賞換花翎苗匪踞獨山州城攻拔之北徇下羊場巴香直抵清水江削平四十餘壘明年破賊沙潭江口再捷於主戎山威名由是漸起 賞豪勇

巴圖魯名號同治元年進攻王卡王卡者在清水江外賊之老巢也山菁深峭公得降人訶知賊以腰蘿溪新寨巖爲門戶旁則花巖梯子巖閒道走蘿溪公分軍塞其旁別遣奇兵瞰寨巖後而建旗鼓自將當其前與賊爭山累肩越壘以進氣銳甚遂奪王卡拔出男婦數千人追至尙大平毀賊寨而還眾聲大和 命以副將留黔補用二年克復舊縣補都勻協副將記名總兵三年公方營東山平圖霸芒而省門告警率師回援縱擊於紅邊北衙大膊於永樂堡再蹙之小菁又以其閒收復龍里與賊戰於城內江西街賊陷鎮西衛攻清鎮廣順定番長寨俱失公引兵而西連下數城出奇制勝所在戰克復北定開州修文賊逼青巖又南出貴定龍里黔西大定望援切巡撫張公亮基檄公往應公自開州橫出陸

廣河掃蕩而前又以次伐定已而開修再失公憤禍變之靡已也
益晉部曲而申討之警備不虞雖以記名提督迭署古州安義鎮
總兵遙領而已方是時省之南則潘名杰省之北則何得勝二巨
慙者卵翼其閒又傳以苗教回狎黨嗥朋咻羣盜如麻公提孤軍
當四戰地數不滿六千頻年轉戰無一虛日饑餒匱竭至或忍饑
赴敵露處於嚴風酷雨之中終日荷戈不獲一飽而含宏淵默未
嘗一見顏色人咸以爲難愈益欽敬其攻賊也尤善爲超距鵬劫
之法賊莫知所爲備皆畏憚之號曰鐵腳板云五年擢署貴州提
督正月克復永甯州城踐血而西蹙募役司蹕張官堡掇翁貴廣
興撤賊而東趾倉坡踣舊縣益黃土坎軍久無功張公令圖油溪
公曰貴定百里皆賊雖有忠義永固諸團僅能自守一隅不足以

率賊勢某以孤軍深入而甕城洛白諸隘係賊藩籬無軍進討今張樑李忠恕童三元等咸觀望不進使賊得專并一路乘我後軍此劉廣橋民屯所以被襲也兵則愈疲愈少賊則日戰日多況油溪在黃土坎後其能越寨進剿乎會暑疫回省其秋赴援安順追賊至頭鋪二鋪大破之安順圍解六年春再援定番出賊不備疾馳至穿心堡乘雷電中奮擊士皆殊死鬪賊大潰墜崖罌樹死者以萬計斬賊酋許八大等進迫花山降二十餘屯直抵底季登山營兩峯間斷賊樵汲遂拔陳喬生逆巢聲威大震遠近快之賞換博奇巴圖魯旋密疏奏保按察使鮑桂生請破格擢用上以公武臣擅保文員命傳旨申飭郎岱賊入安平公乘勝要敗於蘆荻哨日加晡率數騎渡河度地勢驟中伏鎗墮馬從者驚潰賊

出剖心裂腹攫公首以去同治六年七月初五也年纔三十越二日趙德昌所遣守備楊嗣基接應公者至公死所賊猶未退眾皆痛憤見紅巾賊十餘負公首疾馳嗣基揮騎窮追及之沙子哨悉數殲滅奪回事聞上悼惜殊甚加太子少保銜照提督陣亡例賜卹死事地方及貴州省城郎岱廳原籍建立專祠子諡剛節賞騎都尉兼一雲騎尉世職曾祖某祖某考某贈振威將軍妣某某氏皆一品夫人配雷夫人生子甫彌月耳某年月日葬某里某山公之行軍也一以愛民爲主有警卽赴如患難之在其身以故百姓戴若慈父母諸路告急皆求提督親行一聞公至相率輸豬雞菜果或炊飯以待及其卒也士民皆巷哭失聲悲痛至不忍聞嗚呼忠且仁已銘曰

世變之興利賴賢哲文武同涂有殄斯滅黔亂紀餘孰爲其烈文
則銅山武則剛節惟公首出光嶽所分將材天授匪由學廛票姚
冠軍氣吞凶逆匹馬入陳萬夫辟易人方卻退公獨撼堅眾如振
槁公屹若山爲民復讎視如家事有功莫居遇險弗避嗟我黔士
君子六千豈無軀命誓與同捐感公忠勤不忍背畔萬棘千艱共
濟時難中道而稅隕此長城震驚邊徼人喪父兄莫敖衛楚不知
所益決腹斷脰以憂社稷公實近是大勇忘身千載墮淚視此刻
文

贈內閣學士前安徽鳳潁六泗兵備道任君神道碑銘

君諱蘭生字畹香江蘇震澤任氏任之先出於孔子弟子當陽侯
任子不齊傳三十三世至梁新安太守昉始家江南又三十二傳

曰伯通自宜興徙吳江同里鎮吳江與震澤同城今又爲震澤人君生而英敏縝栗自少則見端緒年十二隨父訓導君拯飢委己救人具列條理長老驚歎爲文章慕先古不中時程嘗一就禮部試罷去遂以同知投效皖營喬公松年委充前敵營務處至則大爲果敏公英翰所賓敬事必咨而後行雉河集者今所設渦陽縣擒賊老巢也貫渦河之中擒賊絕欲得之以躡潁亳壽三州之地同治四年僧忠親王戰沒曹州城下賊酋張總愚任柱賴文光益橫合眾十餘萬南趨圍之數重時守兵三千人形勢寡弱英翰公謀曰今賊眾兵少不冒萬死一生之計以求援則彈丸小集糜爲齏粉矣於是屬君與今雲南布政使史君念祖堅守而自率數十騎卽夜潰圍馳出賊偵知益疾擊君廣設方略隨敵應變神卜鬼

諛賊不能窮逡巡矢氣圍中食且盡君以餘粟分置四門虛內倉而實其外標眎充積矢守益固相持四十餘日而英翰公以援師至卒大破之賊鹿埵隴種而遁聲譽翔起遠近皆奇君才以謂可屬大任矣厥後蹙李允於盱眙滁州遏任柱於宿遷殪張總愚於臨清靡役不從算卽克捷臨清之役英翰公凱旋至南樂軍士十人爲某寨所阬殺眾怒欲屠之君請以二千人往單騎款寨門一諭而服斬八人而事已歸渡黃河也馬步四萬君下令舟各載二十人渡南予券日暮計券受直軍至如流是時君已改防軍營務處兼綰淮北牙釐局駐壽州君綜覈之才冠絕一時奸蠹所叢皆能窮抉奧竅絲粟不得欺隱復以餘力治寇擒賊雖平而皖豫穎毫閒孽芽包荒伺閒輒發君耳目廣布悉鉤致其計畫主名先

事覩情翦其牙翅應時摧破無留餘者一州以甯累功至 記名
鹽運使安徽補用道 賞布政使銜光緒三年署鳳潁六泗道安
徽巡撫裕祿公兩江總督沈文肅公葆楨吳公元炳交章論薦五
年遂拜真除之 命矣中間一署按察使君旣與民蘇息於是盡
飭吏治以清獄訟整緝捕爲課吏之首以勸農桑興水利爲養民
之原以修書院設義塾爲教士之本陂塘道路平治修濬義倉豐
備儲使充物大小庶政條綜周密廢墜皆起然獨君精力能行之
他人學者不能至也而晉豫大饑流民走死入皖君守便宜發倉
廩賑濟前後收養資遣凡十一萬餘人皆占記籍尤以此名譽在
口先是君任鳳潁六泗道七年以留用革書屠用亭被劾落職居
無何紳民謳思善政醵金八千兩代籌捐復再奉 命發往安徽

是歲河決鄭州黃流四溢皖北尤被其烈君復任賑撫事益感激
馳驅乘騎周歷轄境形神並罷疽發尾閭未幾竟卒光緒十四年
四月十九日也春秋五十有一安徽巡撫陳公彝臚陳事實照道
員積勞病故例從優議卹贈內閣學士事蹟宣付史館立傳附祀
英翰公專祠嗚呼偉矣君之先世代有隱德曾祖祖望祖振勳均
國子監生考酉附貢生候選訓導皆贈資政大夫妣皆夫人配陸
夫人妾潘氏子二傳書傳薪女子子五人某年月日葬君某所君
鄉人浚君淦者與余善以余昔令吳江寓書以神道之文相屬而
余亦自美君政略故忘其弁鄙而樂爲之辭銘曰
豪傑代興大難斯靡前湘後淮異軍特起亦有皖軍克趾厥美將
帥聯翩伐亂而止維民有瘼吏事實難任君天授嶽嶽膽肝外臨

戰陳內靖凶頑愛人學道秉心所安淮潁之間捻巢榛莽梟狼是
棲人禽反掌君不鄙夷曰吾師長撫此獷區風蘇雨養七年報最
民和政成古有遺愛如君式賡請祠復秩直道在氓我銘貞石永
播休聲

丁文誠公專祠碑

光緒十一年四川總督丁公奏請建昭忠祠祀公與中丞唐公炯
援黔之軍之死事者 詔從之明年眾議建祠於貴州省會之南
雪厓洞之側四月祠未成而公薨遺疏入 天子動容嗟悼 詔
葬公山東歷城與諶夫人合 贈太子太保入祀賢良祠 予諡
文誠躋於中興輔佐之次未踰月山東巡撫請建公專祠於濟南
維時唐公方以越南事繫部獄庶昌丁憂在籍乃走省城集耆老

搢紳大夫而謂之曰當咸豐之際黔亂肇興苗教並發省垣兵饑兩訕坐致困斃各省方救死扶傷不暇何有蚍蜉蟻子之援丁公毀家起鄉兵擊賊捍閭里由近及遠救安平援貴陽勦平越獨山甕安麻哈守都勻馳驅五六年軍事稍定省城危而復安其後北平捻匪護援京師中原肅清撫山東督四川前後且二十年勳業尤磊落動宙合而其平日植躬儉介志意皎然不欺有禹墨之遺烈使頑懦皆起黔自建省以來名臣碩望接踵代興攷其勳德之隆未有如丁公者也且以本籍故事言之李恭勤尙書也治行爲乾隆閒最楊勤勇果勇侯也平定新疆川陝王壯節朱勇烈王勇壯大臣死綏者也或裂尸斷臂或累世效忠劉松齋天下之清官也教匪之亂無役不從唐威恪則名臣而蹈節者也以至石侍郎

抗天津之難陶文節殉都勻之守然而通祀不過名宦祠不過昭
忠鄉賢未有旌特殊異之典豈朝廷忘之哉毋亦鄉人簡忽無
任事者之過也今丁公勲德尤盛若釀金請建專祠事旣應法且
慰鄉人仰止之思感發興起欽聳來哲其於臣道未必無裨皆曰
君言是於是合四十八人上言巡撫潘公潘公以聞得旨報可
其明年唐公出獄復以巡撫銜赴滇督辦礦務道出貴陽經理祠
事前敘永廳同知華國英佐之又明年落成吾友莫庭芝寓書來
告祠建於雪厓洞與黔軍昭忠祠相屬於是庶昌大書其事於麗
牲之碑並爲之辭使可歌以侑樂公諱寶楨字稚璜平遠州人咸
豐癸丑進士辭曰

圖雲兮關東爛鼉日兮曠隴紛龍蛇兮在戶叛陸離兮新宮豆籩

陳兮咽簫鼓羅滿庭兮惟黔士女公之靈兮互霄騎箕維兮回翔
以下子弟兮八千被犀甲兮彗戈鋌勇氣之兮昔日相患難兮後
先孰爲生兮孰爲死公之靈兮宜顧而喜悲游子兮故鄉魂魄猶
思兮樂此願公留兮勿歸公歸去兮黔士心悲撫瑤華兮延伫建
芳馨兮以遺我來者臣有則兮士有師我銘質兮公知之

特用知府華君墓誌銘

自丁文誠公勑辦黔滇邊岸官運法權蜀鹽之利盡入縣官以贍
度支之急歲增銀百餘萬兩戶部恆倚以爲重建議者唐公炯而
卒成之者華君也君諱聯輝字檉塢遵義人同治初元教匪肆擾
遵義君避亂徙家貴陽乃始棄儒學賈而業鹽君精心多計畫且
讀且賈十餘歲居積致數萬金輒以分散親戚朋友鄉故貧乏澹

然若無營者君之意以爲人者萬物皆備於我上當博施濟眾充
滿乎仁聖立達之量次亦宜存心利物求有濟於世庶幾吾儒性
善之旨否則雖苟富貴何益時人莫能識也惟唐公然之光緒三
年文誠總督四川將整鹽法而未得要領唐公言於文誠曰自古
有治人然後有治法遵義華某者其於鹽務利害至精熟也今公
欲掃孔桑之豪析規劉晏之常平將非其人不可公乃以書致之
與計事大悅歎曰果奇才也唐某誠知人改運事一倚君主辦君
亦竭誠贊畫巨細躬親蜀鹽敝壞久始變法改爲官運商銷事不
更州縣之手舉百餘年中飽悉奪而予之官胥吏交怨而富商豪
賈夙幹非竈之利以役細民者莫能持輕重亦不便所爲相與煽
議厯譏羣蜚四掣冀且復舊商情亦訐沮觀望不肯領運而公家

運本訕貸外省者四十萬僅得乃八萬文誠亦頗疑以問君君曰公此舉裕課卹商便民深合大學理財之道非聚斂培克比法無可疑者今獨商情未達耳某願親赴各岸一行與之區畫保爲公成之君至開說利病狐猶冰釋不一月而繳本領運者四十餘萬兩官運由是大甞其法於瀘州居中置官運總局井竈所置廠局各口置岸局廠局就井竈糴鹽委員押運以授岸局岸局轉而糴之商人不復問其所之而第設卡以事稽察凡滇黔兩邊額引帶銷配運出納皆筦其權於總局復於總局置裕濟倉以平鹽價置大盈庫以受各局委輸其引課稅釐皆納銷於成本之中商無私估官無外取引無留滯課無責逋利歸公家而市無騰踊之患方是時黔滇兩邊商號林立不杖官法之能行而恃君一言以爲身

家進退之計蓋其平日經事綜物宅心公普爲眾所信服者深也君中光緒乙亥鄉試舉人文誠以官運旣成奏請破格錄用特旨以知府留於四川補用君辭不就職在局數年亦不受薪俸光緒十一年正月初九日卒春秋五十有三西南士大夫商賈聞者莫不歎君之未盡厥施繼以嗟惜文誠尤深惜之曾祖開宣祖文才考銘軒皆贈如君官妣皆恭人配蕭氏子二之湘先沒之鴻以某年月日葬君沙子哨君事親孝爲弟悌處鄉黨仁厚可以風勵薄俗其弟國英別有行略余采入黔故頌不悉書今特揭其功在國家者以待論定於太史氏銘曰

俊傑者謂識時宜蜀巖敞壤誰職之繫惟華君整其維大利在國返度支綱緒旣就駕而馳天平人與吾匪知劉晏後舍君焉誰

蕭吉堂先生墓誌銘

黔有經師曰吉堂蕭先生神明於易先生治易不求諸傳注而求諸本經不求諸本經之象數而求諸其辭其字其始若極穿鑿可怪笑者取本經經傳之辭除其重複得字一千三百三十有六大體以卦彖字爲母爻翼字爲子依許氏說文求其故訓離其偏旁齟其聲紐茫如涉大水無津涯而觸牆壁也先生益不自悔窮探力索研幾極深神謀鬼詼啟其橐籥竟搆元解久之得直卦例若干事因而旁推交通恢游餘刃凡十易稿積十六年而成屬辭十二卷通例五卷通說二卷最數十萬言又取繫傳中孚七爻爲一六居下履九卦爲二七居上咸十一爻爲三八居右離十三卦爲四九居左大有一爻兼乾坤爲五十居中成大有圖卽孔子之言

具河圖之數以爲綱領又於二十二卦中三陳之履九卦取履至明夷三九明夷至履四九爲履九卦圖以應序卦雜卦之次第又於十九爻中以中孚七爻七乘之以應大衍用數證大衍章古本所以直接七爻之義其說以乾元亨利貞五字爻辭五十字卦名四六一有大有彖爻五十字爲五十有五準天地之數爻辭十翼不同字各五百五十由天地之數推廣而出文周統舉於卦爻孔子分配於繫傳皆不假強爲一若三聖人者之於易卦傳爻翼用字皆有定程度其用心不當拘曲若是而先生卒以是上契書不盡言之旨推見天地之心自然之妙不歉不溢爲漢九師宋五子陳搏劉牧邵子來知德諸儒所未著因漢而悟宋由困而得亨可不謂神乎其知變化之道者乎先生諱光遠字吉堂遵義人道光

十七年丁酉舉人選青谿縣教諭未赴虛憺寡欲不驚仕進迭主
湘川培英育才書院講席數十年弟子去來數百人無有能傳其
業者以先生之學皆由神悟不可得於語言文字閒也光緒乙酉
年某月某甲子卒春秋八十有幾曾祖某祖某父某娶某孺人子
二某縣學生員次某孫幾人葬某所某山先生之書別有易字便
蒙均語毛詩異同漢書彙鈔詩文集若干卷皆非其至至者易圖
要之先生以易名也銘曰

易道坦然自明白鉤河摘洛數乃僻謏夫鑿之益乖格詎知至理
目日覲三聖心源並一迹卦爻翼義各適字匪苟用有定式數
位乃與天地則先天之圖在孔翼聖伏神徂孰爲摘鑽堅仰高守
以墨室極得通卦涂闢三千年閒見真易

向伯常墓誌銘

吾友激浦向君伯常識足以致知勇足以幾道故有濟時之志而不屑以功名終也有高世之行而不欲以文辭著也自君之沒蓋未嘗一日不思思之未嘗不以是儀於人今二十五年矣吾求友於天下亦善且多未見有如伯常者伯常天質曠美又能搏志好學大抵務精博而求有要不苟尋聲以逐時好亦不迂遠以闕事情期在明體適用不睎至於聖不止平居終日闇修而已自古仁聖賢人孔子所慟歎如顏淵冉伯牛吾智不及知若後世李元賓王深父之倫卽吾能知之矣以伯常儕視顏冉非知道者所敢任然或冀斯一至焉雖與之極其量可也至如元賓深父則信可以過之其爲雄駿非常傑出之士矣君雖不遇孔子猶得遇曾文正

公未爲不幸而惜乎其止於是也其止於是天也非人也君子之所共惜也伯常諱師棣由諸生以軍功保舉特用江蘇知縣同治四年冬從事曾文正公徐州幕府一日得暴疾不溺遂卒年三十一余請於文正具棺斂之文正嗟悼不自克率僚屬用軍禮祖奠遣之反葬其尊人在和州未及聞也旣行而余始以伯常之死告曾祖某祖某考某廣西某縣知縣妣某某氏娶某氏子學耿某年月日葬君某所光緒十五年庶昌乃追爲之銘銘曰
苗秀之特兮孰使其不實也玉璫之猛兮孰使其不器也嗚呼伯常吾烏測其所自也

長姬趙孺人墓誌銘

光緒十六年九月余遣孺人送兒子尹驄自日本還黔歸娶十月

二十七日癸亥孺人道沒於嘉魚鱗洲司舟次春秋三十有六尹
驄還至武昌以電來赴時余在東京東京有所謂凌雲閣者高數
百尺於是翌日造凌雲之頂而望弔焉致余升號之意東臨滄海
西極武昌浩乎渺漫孺人之音容不復可接於吾之耳目矣歎息
良久而罷孺人蘇州趙氏年十五歸於余爲側室余字之曰曼娟
慧婉有志操頗識字能讀百家傳說諸書卑約自持入門而兄嫂
皆喜女姪咸慰順事嫡長以溫以飭篤摯不渝久而交愛中間嘗
一還家不鄙夷其鄉人無疏數新故一接以和尤推賤尤予存卹
宗族間黨爭譽之不容口余是以知孺人能型於家也甲申八月
余在日本三年矣海上方有警吾母病足久未瘳一日心動亟使
孺人歸覲隻身渡海還至滬上母見大懽翌辰而吾母考終得與

舍斂余是以知孺人能事親也余之奉諱里居也將出山猶豫未
決孺人責余丈夫當激昂志氣出而出耳苟促井閤中幾見山水
閒有不朽盛業乎余悚然敬異之立治行入都再拜出使日本之
命余是以知孺人能相夫子也今又以余羈旅王事之故躬送
子還黔孺人之所以爲余則至矣余於孺人何也而不幸前喪是
豈所謂命邪抑非邪斯足慟已初煙臺條約成始有遣使西洋之
役海外事茫如也湘陰郭公嵩燾檄調參贊四人出洋皆以大瀛
廣遠疑沮不樂往獨余奮行使期敦迫余自通州花布釐金局至
揚州寓舍暫與家人別孺人年少不敢沮余行而意不欲往惟數
數視其釧環默無一語余乃置酒私室酌孺人酒酣起而爲遠
之歌召善謳者撫絃而節之歌曰遠遠國兮天一方際入日兮浩

洋洋御輪船兮涉地維徑萬里兮使倭遲海水廣大橫絕之載黃
鵠兮高翔馳吁嗟黃鵠之舉兮安可得而繫羈歌數疊孺人嗚咽
流涕不能自止明日別去去六年而始歸歸而再使日本挈孺人
以行是時日本新變法崇重西術每有大朝會備禮延見各國公
使夫人余守行人受命不受辭之義以權宜爲旨使孺人入宮參
謁其帝后帝后斂容謝焉以爲達禮其後主客交際日隆分誼由
此始也子一卽尹驄國子監生孺人旣沒寓其柩於武昌將以某
年月日返葬遵義縣東七十里小青欄林先壠之次預爲銘伐石
以待銘曰

吁嗟孺人其來也何從乎其往也何愬乎將俾汝以託吾宗乎胡
歲年之隆盛兮命櫟絕而不逢乎天地至廣大兮其孰能搏控乎

生旣非我有兮死益曠然若發蒙乎歸骨於故邱兮依吾母以示終乎千秋萬歲兮哀人生之無窮乎

仲姬王氏墓誌銘

仲姬字新寶松江秦氏女也父母死鬻於戚黨王氏因冒姓王松江密邇滬濱王氏教之歌舞攜至滬欲以納之蒼芳里中姬堅執不從爲其家人所厭薄遂得歸於余余適有奉使日本之役舉家東渡大爲長姬趙孺人所愛悅姬願身小衷居室溫謹有幽閒之度光緒十七年余任滿歸國仍寓家滬上趙孺人前沒數閱月矣姬思念不已時時愴然未幾生一女乳憐越三日而病病四日而沒實六月十七日也年二十有二將沒之前夕余妻臨視指乳憐曰妾不幸短命以此女累夫人矣轉壁歔歔而泣余妻亦泣已而

曰棄之蓋測余妻年老衰病不能終撫育之事也其語尤痛絕不忍聞始趙孺人之病道沒於鱗洲司舟次余遠在日本及姬之死余又在都距南歸十餘日耳皆不獲一見以遂永訣亦命也夫是年八月余赴任川東道溯江西上挾兩棺以行抵金雞背舟覆逐流百里幸拯而起生故與長姬相親愛若姊妹也死又同厄於水於是便道還家卽以其棺合葬小青桐林先壠之次爲之起冢而題曰吳姬之墓身則泯然不知其返故鄉也遠近聞而悲之或曰是葬非古法也余曰後世人事變古者多矣獨此一冢乎又烏足病乎銘曰

是爲拙尊園主人之妾依父母之松楸歸骨此土永奠於幽
莫芷升墓誌銘

君諱庭芝字芷升獨山莫氏猶人先生之子子偲徵君弟也君旣樂有賢父兄進則劬志好學怡怡孝友退則闔然自修不違如愚比長而業日進遂通羣經諸子兼及說文漢隸分篆詩古文辭然皆視爲術之寄於道未尊其學要以省身寡過爲宗旨近曾子家素貧嘗館穀於外遨遊公卿間食力自奉妻子饘粥或時不給無幾微見於顏辭天性平恕與人交終身無所忤卽有橫逆君不與校或反引咎責躬視其心恆坦蕩然若不知富貴功名之可以術取也者醇篤而已矣而又非遁於莊周列禦寇之倫湛冥得喪自放以適其趣自周道隱仲尼沒世論無德行之科久矣以余觀今世士欲與之進中行之道若君殆其人邪君舉道光己酉拔貢生選思南府教授晚主講貴陽學古書院與黎平胡君長新子何齊

名胡君之介君之和易皆官司徒友所交服而論定者也光緒十五年四月二十四日卒年七十三貴州一省僻在西南夷文獻寥落近古無徵自君考猶人先生爲遵義府學教授始以樸學倡導士林洗南中之陋其於漢志牂柯郡縣鉤覈精嚴教授君沒君兄子偲徵君繼之高名宿望震祿一時誤遵義府志黔詩紀略以存國故黔事始爛然可述厥後子偲游江南君又踵爲黔詩紀略後編帝綜 國朝之事按討尤勤潤色益備蓋自嘉慶中葉以還君家父子兄弟緜嬗賡續垂七十年斯文賴以不墜及君沒而遺獻盡矣君配何氏子桐孫橙孫先沒孫先甲女幾人某年月日葬君某所君生平工小篆八分書自得天趣爲文章無存稿亦無多譔著自黔詩後編外僅存青田山廬詩二卷詞一卷余爲刻之

日本附於黎氏家集後君本以儒行著稱晚歲味道益篤白髯飄然垂尺許儀度甚偉每出入羣兒環繞聚觀驚若神仙者流也余欲爲君圖像而畫工無人惜其莫能圖何哉銘曰孰道之蘄孰聖之晞匪雕匪績良玉素絲嗚呼芷升儒質近孔天寶昭之循牆入室君其庶而墓門有石我銘在茲

莫善徵墓誌銘

君諱祥芝字善徵晚多鬚髯又號拙髯獨山莫氏先世居江南上元明宏治中有名先者征貴州都勻苗留守家焉四傳至雲衢遷獨山州兔場遂爲獨山人君高祖也會祖嘉能祖強附生考諱與儔嘉慶己未進士翰林院庶吉士四川鹽源知縣遵義府學教授皆贈通議大夫曾祖妣氏吳氏周祖妣氏邱氏蕭氏張妣氏唐氏

李皆淑人君兄弟九人居齒最少諸昆仲多用學行顯獨君以才能爲士論所推自咸豐初年從巡撫韓公超勦滅桐梓賊楊龍喜於葛彰司聲譽頓起眾往往指目莫九爲異才堪任軍旅矣初以縣丞候補湖南曾文正公之起兵挈君東下嘗令登山瞭望繪圖以定攻守之策咸豐十年楚軍合圍安慶文正與胡文忠公檄署懷甯縣事假石牌爲治所公私子立而大兵開濠置壘日役數千人責君應付羽書徵發局門成市君佐軍撫民事辦無擾當是時文正方以氣節勵天下士皆爭自策磨君位置尤峻不肯詘體於人爲忌者所中誣以貪墨事文正奏劾君旣而知其枉復奏白君以縣丞降補檄筦山內糧臺數年翁和眾軍調饑餉渴經費至數百萬無毛髮欺侵金陵平以勞擢兩階君爲人強毅精敏天性長

於吏職雅善折獄他人數十百言不能得其情者君一二語已中
款要尤喜摧抑強宗雖謗怨羹沸不止嘗以三事名齋曰不生事
不畏事能了事其自負若此初任六合歷署高郵上元通州兩涖
江甯調補上海屢以海運保擢知府加三品銜升太倉直隸州在
任候補袁榆生者文正公壻也金陵平後君覓坊口巨館一區置
報銷局袁納賄率親兵數十直入堂上阻撓詐稱已寓君壯聲呵
折立答親兵數百袁大沮文正公聞之嘉其勇敢不惑高郵生員
馬某者積惡訟棍也操刀筆數十年破人財無算歷官皆不能治
君遣役逮捕窮籍其奸猾狀卽日下獄論如律一州盡驚總督馬
端敏公新貽初任兩江其庖人索供應詎縣僕值君衙參命予杖
司閹者出左袒君答庖人墀下畢鎖還縣請發閹並治端敏使弟

來謝良久乃釋同治九年金陵謠言奸拐迷人民閒無故相驚恐各以十字架木布列街衢道無行者君出巡視鞭作俑者一人風使解撤一日而市廛復安已而盜殺端敏城中再擾亂君繫盜縣獄外懾羣小內鉤致獄辭百官就詢數月不決 朝廷遣大臣馳傳詣治卒從君初讞定議某商設鹽肆金陵苦售不廣請於巡道孫公衣言集醬園數百家稽缸派額孫公聽其說君抗言病民不可持之堅與孫公大忤而議卒不行孫公故與君兄子偲徵君友善者也上海東北近郭盡租界惟南市自成一境富商郁氏有地居市尾英人重利罔得之爲闢地自廣計君亟白大府就籌二萬金值還而以其地建海運局由是南北二市截然分明二十年無敢越尺寸縣民程宗崔訴人殺其弟於涂遺刃刻名金某逮金至

則撲愿不能語君察宗崔貌很戾腕束重帛解視拒傷宛然笑謂之曰殺人者汝也宗崔色變乘閒詰磨不刑而悉得其圖產謀害嫁禍諸始末遠近以爲神光緒十年法人封閉海口糧艘中梗南漕數十萬抵滬駁船不能卸載舟子七八千人環叩糧道主持不得則持械集商船公所毀牆室奸人旁煽招呼勢益眾且變君至徑入大眾中諭以勿動爲平亭收放積貯之策眾且譟且服斂手而退崇明沙田百姓畚種成熟皆民產也巨紳李某罷歸假書差名悉占爲己業縣莫敢誰何君至太倉發案牘究書差主名甚急李知事屈丐上官求解盡反民田君不許責李輸巨金助賑乃已仍置書差於法君生平治迹大抵皆類是事多不悉書書其著稱者其在六合清釐田畝招集流亡曲有恩紀在江甯開上新河四

千六百餘丈保衛民圩請辦抵徵緩復額民力賴紓修上江兩縣志以存文獻治上海最久通商數十國事有交涉會審君必示以誠信遇不可則守約固爭堅若金石大爲外人所屈服城中乏水潮落則艱於取汲君廣擇善地開井井成而民甚便之其涖太倉驅逐江湖游獵而於皖楚貧民流寓墾地者爲之調停主客使可並安又預籌遣散之法此皆實惠及民廩廩有良吏風不可得而遺也光緒三年舉治行卓異沈文肅公葆楨以風骨迥峻特薦吳公元炳繼之 天子方留以待用而不幸沒矣君卒以光緒十五年三月初一日春秋六十有三配余淑人早卒繼配張淑人子三科分部郎中先沒祁出嗣君八兄生芝兩淮候補鹽大使庶昌之第二女壻也棠貢生主事銜女三長次殤三守貞孫天錫天賚天

麟孫女幾人君沒後寓家蘇州祁等卽以光緒十七年二月八日
葬君光福鎮銅井山之陽某山某向初君家兄弟廬墓之志甚堅
道光中教授君卒卜葬遵義縣東七十里青田山距黎氏六里而
近同治九年君兄子偲卒於興化君解江甯任持期服走數千里
返葬之青田兄子彝孫復踵葬焉及君沒而遂卜兆蘇州君兄芷
升後君一月卒又羈厝貴陽人事之變幻豈身後所及料哉銘曰
光福之原太湖吐吞靈秀所宅匪仁不鄰吁嗟善徵奠魄於此以
祚其子孫

貴陽王氏四世五忠三節烈合傳

嘉慶五年閏五月湖北宜昌鎮總兵官王公凱討教匪於南漳之
馬鞍山死之越三十三年其子國華襲職爲湖南提標營參將討

江華徭復以戰死咸豐四年國華子古州營都司臻祐從湖廣總督吳文鎔討粵賊駐軍黃州堵城兵敗又死焉及同治四年臻祐子朝選禮乾亦以勦匪殉難於開州之燕子哨先後七十年間祖父孫曾專將死國四世五忠繼踵於一門之內至光緒十七年而其家復以三節顯嗚呼此自史傳以來未有之奇烈也此所謂一瞑不視窮天地互萬世而不顧者也豈不壯哉豈不壯哉勇壯公諱凱字清宇貴陽人少豁落有大志乾隆三十八年從領隊大臣奎惠定邊右將軍明亮征大小金川由行伍超至營長勤勇爲諸軍冠兩川平凡四十五戰功皆最自貴州平遠外委累升雲南武定營撫標左營守備 賞戴藍翎四十九年升湖北道士汛都司五十三年八月遷衛昌營游擊 賞換花翎五十五年升湖南桂

陽營參將五十九年遷江南安慶協副將六十年擢浙江定海鎮
總兵嘉慶二年以不善乘舟爲巡撫玉德所劾 上念其有勞發
往南籠軍營交雲貴總督勒保帶兵勦狆苗是年十月補貴州都
勻協副將三年四月授湖北宜昌鎮總兵赴白浪營防勦會均州
賊至與大兵夾擊殺八百餘人湖廣總督景安令公率湖廣河南
江南江西兵屯鄖西巴東以防四川逸賊旣而勦賊於竹山竹谿
皆勝五年閏五月偕領隊大臣明亮與青號賊徐添德戰於南漳
之馬鞍山公先入陷陳大兵繼之不克公爲賊所圍四面盪決殺
三人身亦被數創遂隕於陳事聞 天子曰王凱在軍數年甚爲
出力今臨陳捐軀深堪軫惜著照提督例賜卹 予諡勇壯子國
華襲騎都尉兼一雲騎尉世職國華字文山好讀書性冲和都雅

君子也嘉慶六年襲職十年署古州守備歷署上江古州都司撫標守備代理大定副將二十年五月補凱里營都司又署上江下江荔波游擊二十四年六月調威甯再署上江下江游擊道光六年權湖南提標營游擊次年署本標參將八年兼署都司十二年江華徭反從提督海凌阿征之二月至甯遠之池塘墟力戰死

賜卹如例子臻祐襲職臻祐字伯昌爲人剛正有才藝道光十三年襲騎都尉十九年署黎平營守備二十年以後迭署撫標貴陽鎮遠游擊台拱參將提標游擊以捕革丙苗功補古州都司與胡文忠公林翼友善後文忠作傳呼以爲伯昌將軍也咸豐元年粵賊陷永安巡撫周公天爵奏公謀略精詳檄調赴永安從都統烏蘭泰攻克其城又破金田村莫家村水竇各賊巢尋以病歸仍涖

古州任三年粵賊順江東下 廷旨甄材雲貴總督吳公文鎔又
以公世家將門才具勇練入 告六月至長沙防堵旋至江西解
南昌之圍十月粵賊陷黃州時吳公已改湖廣總督四年正月從
吳公駐師堵城大雪盈尺賊大至公背水而軍大戰良久賊敗走
另股賊由長江繞襲我軍之後勢不支復力戰死焉吳公亦殉公
有子二人長朝選字翰臣候選州同次禮乾字健臣貴陽諸生皆
有才學工書畫年甫弱冠聞其父之死扶服抵堵城求屍不得誓
不復反往謁胡文忠公文忠以堂有重慈力慰遣歸至則奉父衣
冠以葬貴筑陳銛者重其家世忠臣以女妻翰臣婚數月再往文
忠英山大營冀報父仇殺賊雪國恥居無何粵賊石達開竄貴州
省城戒嚴翰臣復歸省視已而丁祖母周太夫人承重憂欲再赴

鄂不果行翰臣故將家子多籌策年少才俊又爲胡文忠公所器異士大夫皆樂與交也安義鎮總兵林自清防勦教匪於開州一帶軍燕子哨慕翰臣兄弟名雅意招致至則以營務畀之林分三軍適後軍將乏人卽以翰臣接統一日馬嘶甚烈翰臣疑有變請移營據險不聽是夕賊果大至薄營諸軍皆潰翰臣健臣同戰死同治三年十二月初一日也翰臣妻陳氏有賢行在室割股療親疾夫弟禮坤本遺腹生年二十始患痘病勢危篤陳恐王氏遂絕禱於神復割股以療之病卒起自後世儒者之論繩之於事爲越禮然陳以一婦人而能效忠王氏激發於天性之親割肌剔膚雖死不惜又遑知世論之非與是哉健臣妻李氏歸健臣三月而寘今光緒十八年守節二十九年矣而禮坤妻胡氏其志節尤烈尤

奇禮坤旣無兄弟子姪以生員並襲一等輕車都尉兼一雲騎尉
光緒六年歸標八年署貴州中營游擊九年入都籤掣湖南補用
參將假歸以親老不忍遠離請留黔補用而其母羅夫人聞法越
事起閩粵將用兵以禮坤將種欲令立功承先人志業仍令改回
原省至湘數年落魄無所遇舌耕餬口最後始爲巡撫張公煦所
知檄統護衛親軍不幸數月而沒胡氏未之知也胡氏廣東萬州
知州胡君藻廷女習詩書愛物下人持身儉謹事姑尤以孝聞生
女順英光緒十二年嫂陳卒胡念陳氏割股救夫之痛卽男視己
女如陳出爲之制服盡哀再踰年羅夫人卒年七十八禮坤無音
耗貧不能葬胡盡典衣物百万假貸成禮迨禮坤寄金數十金胡
忍死不用悉以酬葬姑之費遠近大賢之光緒十七年九月九日

禮坤沒耗抵黔胡始聞而仰天長號曰王氏累葉忠孝今無一脈之存傷哉命也吾何以生爲是夜飲藥而卒顏色如生王氏竟絕荔波知縣湯君曉庵好善士也爲之醵金斂葬於省門外南郊祖塋嗚呼天之報施善人其何如哉或曰三代爲將道家所忌必亡其宗豈信然邪且天道至難明也以伯夷叔齊之賢而餓死首陽以顏淵之聖貧居陋巷而卒蚤天盜跖莊躄大盜也聚黨橫行而皆以善終張湯酷吏也深文巧詆夷滅者幾何而奕葉持寵與漢相終始降及晚近枉道詭遇希世苟合傲倖於封侯富貴之倫至或累數世不絕尤不可勝道然而其生則存其亡則忽以視王氏忠義節烈炳如星日之麗天百世而下聞者欽悚記者傳誦且至歷久不滅而逾彰者青雲之士皆將景而附之其得失賢不肖又

何如也

誥授光祿大夫都察院左副都御史薛公墓表

公生而天性惇敏劬志好學凡經史百家之書自少無所不窺亦無所不羅致而以餘力屬文布紙操筆輒就其於醫學家言尤致精熟若有夙契然也中咸豐五年順天鄉試第二名舉人世所稱南元者制藝一出鏗鏘中金石羣士驚誦奉爲規矩準繩如趨大匠之庭不敢踰越尺寸科舉術業之精又如此公諱福辰字撫屏別號時齋江蘇常州府無錫薛氏初官工部員外郎粵賊起梗塞長江公考光祿公知湖南新甯縣事遷廣西潯州府知府未行而沒公奔走經營返喪歸里已而賊益盛連陷蘇常又奉母避之寶應復至京連蹇不得志乃往參今傅相合肥李公墓府先後三年

擢知府赴山東候補佐平遠丁文誠公塞河兼綜全局捧土束薪
障捍危險若抗大敵窮四十五日之力卒塞侯家林決口河南北
方千里民困頓蘇未幾遂拜濟東泰武臨道之命矣蒞任四年
勇銳一如治河時光緒三年丁母憂及再入都人度公必以治河
功外簡適會慈禧皇太后慈躬不豫徵醫旁午於是傅相李公
鴻章楚督李公瀚章鄂撫彭公祖賢交章論薦供奉內廷者三
年每進一方劑一藥斟酌損益湊極淵微必求得當而後已暇則
稽徵靈素凝思竭精無少倦懈至或隆冬入直風雪霜露早夜交
侵寒冽鍼砭肌骨不敢告勞蓋臣子之於君父委身致命皆義分
也而況侍皇太后醫藥乎朝廷亦視公殊異累有金幣文綺
豐貂蟒玉珠串之賜其他恩遇尤不可勝紀迨報皇太后

大安 特授廣東督糧道 賞加布政使銜再報 萬安復 賞
頭品頂戴調補直隸通永道通永距京四十里 皇太后 皇上
偶爾違齋仍不時 召入診視 天子猶以爲遠也遂擢順天府
府尹轉補宗人府丞遷都察院左副都御史皆欲以近公而公適
疾作累疏陳請開缺 天子不得已許之嗚呼遇亦隆矣公返籍
未弔月以光緒十五年七月二日卒於無錫里第春秋五十有八
曾祖考世琛國子監生祖考錦堂府學生員考湘廣西潯州府知
府曾祖妣許氏祖妣顧氏妣顧氏三代皆贈光祿大夫妣皆一品
夫人配王夫人繼配樊夫人先沒又配寶氏皆封一品夫人子邦
彥出後從弟殉難優廩生福桂襲雲騎尉世職邦襄三品廕生候
選知縣邦龢刑部候補主事邦藩出後第五弟福祁是年九月十

七日止葬無錫縣東漆塘山之陽王樊兩夫人祔公昆季六人余皆及見與公交最先公弟今出使大臣叔耘福成前四川補用知府季懷福保二人者誼尤篤叔耘以余能知公也自英國寓書屬爲誌墓遂表而揚之以達叔耘狼狽友于之意光緒十九年九月遵義黎庶昌

趙宜人墓表

四川新甯知縣趙君二珊廷璜之妻贈宜人鄭氏以光緒三年六月十二日終於官所年五十有二歸葬遵義留青阡先冢側二珊旣自爲銘矣而其子怡懿恆思母教不忘復以墓道文請於是黎庶昌表於其墓曰宜人爲大儒鄭徵君珍女生而淵靜慧敏喜讀書數從問古先列女事又慕班大家之爲人也故徵君名之曰淑

昭而字以班班愛悅逾於他女重相攸鄉人誦言趙氏子二珊賢可壻徵君曰然遂適趙方是時吾鄉士大夫家風氣淳古二珊尊人芷庭君與兄芝園同居芝園性剛耿舉家嚴憚獨宜人能推二珊之志以事舅者事伯舅大得其懽心及事舅姑凡舅姑所愛無弗愛竭其愛而宗族三黨之和可知也舅姑所敬無不敬致其敬而婚喪賓祭之肅可知也相夫子以正順率羣從以禮內外俱無閒言咸豐四年楊龍喜亂作地方多故二珊率嘗去家謀食宜人處艱窘中縮米節薪以育諸子姑病喘尤甚調護萬方承唾抑搔終宵倚侍無一息苟甯見者以爲絕婦道所難能也芝園君遺一孫歸自賊掠宜人撫如己子已而病沒哭之慟率諸子告於祐命異時生子者後之子三怡光緒己丑舉人懿丙子舉人名山縣知

縣恆癸巳舉人女一蕙宜人教諸子也經多口授或據竈觚或攜之菜畛或置紡車春日之旁必使隨音緩讀背誦如流乃止課嚴而有恩諸子學問之基皆由此起晚頗爲詩然不存沒後怡輯錄餘篇爲樹護背遺詩一卷樹護背者宜人自署室也余與宜人同里聞其母又庶昌從姊也故得聞其內行余之所敘於阡者如此自余所未言諸子能文不能遺也

周楚白墓誌銘

君諱希祖原名聘珩字楚白江西泰和周氏家貴州三世君兄希韓占籍黔中遂爲貴筑人生而天性篤摯懼娛悲戚一惟父母之愛是從忘其爲有己也父母具存出則牽衣授杖左右扶持入則侍寢問安調致甘暖平時欣欣然爲孺子容婉使二老怡悅或時

不樂則愉色而進長跪請祈至於泣下必求懌豫而後已及遭疾
病卽又癯憂棘思醫藥飲食慙瘁經營不假僕婢之手下逮委瑣
細碎若槃匱巾櫛之盥濯抑搔唾涕之奉承諭志服勞莫不由順
親愜其視兄弟也愛敬與父母同其視姊妹亦無不同厥後君考
壽終五年之間迭遭數喪又益重以婚嫁舉家事無問巨細君皆
一身當之雞鳴矣眾指尙逸而勤動率先月出矣舉室就安而偃
息獨後諸務叢集治辦有條豐儉適宜咸共稱美而家徒壁立內
顧無儋石儲米鹽凌雜一筭百艱終歲貉縮精力固已耗損矣太
夫人復多病常困牀蓐君調護勤劬益進不已無一息之離無一
節之懈年三十猶未娶若不知有室家之樂者太夫人及兄憂之
君乃反以毋汲汲爲解病旣篤顏色蕉萃忍息不肯呻吟恐驚兄

母卒以不起蓋余生世五十八年行迹幾徧宇內以所聞見士大夫家羣從子姓純行若君者殆絕無而僅有可謂天下至孝也君卒於光緒十九年六月十七日年三十有二娶陳氏病亟割股救君不愈遺腹生子未彌月亦殤先是君祖諱作楫道光中仕貴州貴西道考諱繼煦光緒中仕思南府知府考昆季三人伯仲皆無子故以君長兄希韓仲兄聘珣相繼後之今君又無後希韓復以次子徵鈺爲之嗣其第六妹則余子尹驄婦也某年月日卜葬某所某山君讀書有卓識博綜羣編 國朝大儒所謂義理攷据辭章之學皆已刺得要領篆書尤雅勁絕倫深得冰斯意趣進希石鼓文余尤奇愛之光緒十九年君奉母太夫人將赴成都就婚道重慶余留居川東道署先後凡八月相與討論六藝文字決其必

成嘗屬君爲書趙王兩孺人墓誌刻石而藏之其爲人內介外齷於義利之界辨析甚精獨嚴取與時賢所不逮不謂歸未市月而天遽奪之速也惜哉惜哉銘曰

耿耿元精純孝積成下維倫紀上薄日星昔有顏子終三十二君壽與同何求何伎中庸之行聖道不頗我銘紀實遺漏孔多巉巖健筆愧王介甫旌此孝思亦足千古

直隸正定縣知縣循吏周君家傳

君諱灝字子純貴筑人祖奎舉人官教諭孝友篤行沒祀鄉賢父際華進士河南輝縣知縣調江南興化江都兼權泰州皆有惠政而輝縣治行尤異桐城方宗誠作傳稱爲循吏者也君爲輝縣君第六子性廉正懇直尤不喜諛事必擇義而後動其愛民疾惡出

於天性不以死生禍福易所守道光甲辰進士直隸卽用知縣初
署沙河補定興定興當驛道孔軌咸豐壬子廣西賊起二年矣
上命大學士賽尙阿公督師往討 賜遏必隆刀寵行時天下初
亂各省徵兵皆用承平軍興法大帥入境居有供行有餽兵弁有
酒食賽公隨從數百人求索不饜則撞定叫謹鞭奴僕毀器具勢
張甚吏民皆驚走伏匿君患之督師行館在北河去縣十里君單
騎上謁臨河驟不得船君遽攝衣亂流而渡至則毀館垣從後入
見賽公言狀賽公責君供張不辦君盛氣與爭擲冠於地請賜遏
必隆刀賽公始改容謝手令箭畀之員弁暴稍戢然自是大府雅
不喜君君亦不苟求合孤行己意而已明年改正定九月大股賊
林鳳祥李開方北犯賊自渡河破臨洺關陷沙河柏鄉欒城橫厲

而前浸益驕視正定旦夕且下正定城大四十里倉卒無備百姓相率避寇入城君仗劍坐門關督守命閉城知府某旗人也請送眷屬回京不許請縋城出亦不許乃宣言曰吾守土官也有言出以亂眾心者吾必按軍法治之民情乃定令戶出一人乘城夜則持燈植立不得移尺寸復遣壯士數百人瀕水列陳賊從滹沱南岸望見城上火光甚設知備嚴軍又迫河而守計無復施相持六晝夜不敢徑薄遂旁竄天津正定卒無恙京師之所以不遽震驚者以正定阻遏賊鋒也民譽大起 朝廷亦以君守城有殊狀將不次擢用會有鎮標兵鬪事鎮標兵者箕踞坐茶肆見君過不爲禮從者呵之標兵不遜反大詈君子以笞鎮營大譁號召數百人將毀縣庭百姓聞而護君聚眾與標兵鬪知府故以守城事曠君

左袒鎮營大府亦素惡其疆直遂奏劾君革職永不敘用百姓益
惘惘不能平也懇大府乞申雪不得則聘君主講恆陽書院合十
四邑人士供贍之知君廉無以自活踰二年直督易譚公廷襄百
姓復懇狀譚公據情入告得旨開復或勸君從此稍和融可以
安其位君笑曰吾豈桔槔也哉吾終不能任人挽仰矣再署安肅
故城故城城窳敗不可守又值捻匪竄入君朝服坐堂皇待盡竟
不攻而去譚公益奇之調甯河布政使某尼不使行留府發審同
治元年六月罹疫卒於省寓年五十有三娶某宜人繼娶景皆前
卒妾岳氏守節子開陽長蘆鹽大使次某孫五人長祐光緒五年
順天鄉試舉人君卒後以黔亂喪不能歸正定士民間之買地下
葬君城南爲起高冢會葬者數千人請建專祠歲時奉祀不絕

論曰方君之由故城罷歸保定也余在君所授子弟讀疾革入視已不能言及卒敗衣數襲棺幾莫能具得僕某為之左右周章始就斂余親見其如此語曰廉吏可為而不可為如君之守死愛民皆巧宦所諱避怪笑以為大愚不靈者卒其食報如是之速三代直道之存曷嘗不在斯民哉余久欲為君傳而其軼事頗有未詳者光緒十五年始得君從弟江蘇候補知府蓮謨次行略因刪正之而獨著其大節俾國史傳循吏有所攷鏡焉

書朱軍門克金陵城事

記名提督朱洪章黎平人也字煥文英豁沈勇為中興一時名將其克金陵城尤推首功世罕知之者同治三年夏官軍攻城久不拔李臣典建議於龍膊子山麓堅石最多處重開地道日列隊伍

環攻積溼蘆沙草填壘欲平接而前與城齊以疑寇使多備六月十五日甲申地道告成議推前鋒未決有營務處朱雲章者楚人也以不得統軍爲恨大言於洪章前曰若輩平日自命天下壯士今趣臨大敵便如鼠子卻縮探頭穴中吾知若無能爲也洪章怒曰孰畏死者而汝爲是言乎攻守未奉帥令若使某爲先登有不蹈萬死以取洪酋生致闕下者如此皎日兩人爭論於營幕中曾公國荃聞之亟召諸將入署名令具軍令狀於是洪章遂署第一武明良第二劉連捷第三其他以次署畢凡得九將李臣典實主地道事雖列名未嘗任頭隊也乙酉日中發火城崩二十餘丈洪章率所部長勝煥字三營千五百人首先登城從倒口衝入是時煙焰漲天輒石雨下賊復擁大眾謀堵築從城頭擲火藥傾盆下

燒士死者四百餘人洪章推鋒勸進所向披靡仰登龍廣山結爲
圍陳外傅與賊排擊諸將畢登乃分軍爲三並馳洪章趨中路直
攻僞天府之北大戰一日夜俘禽僞王次兄洪仁達以獻金陵
平論功李臣典居首洪章最四三閒或代爲不平說洪章往刺幕
府洪章謝曰是何言之鄙也寇亂方平而爲將者爭功相殺害此
與賊黨何異不將垂笑萬世乎公止矣吾義不肯爲也友人江甯
知府孫海岑昔爲余言如此孫名雲錦桐城人克城時充行營文
案故能備述其詳光緒十四年洪章以雲南鶴麗鎮總兵入 覲
迂道至金陵謁見曾公憑弔死事諸人立石瘞所曾公爲之識曰
同治三年閏六月十有六日龍膊子地道告成火發轟開城垣二
十餘丈甌石雨下長勝煥字等營首先登城前隊奮勇死者四百

餘名同瘞於此嗚呼慘矣亟誌之以表忠蓋云爾知其事者以爲實錄云

誥授光祿大夫建威將軍長江水師提督黃公墓表

自粵賊洪楊倡亂梗長江以阻我師使水陸不相及湘鄉曾文正公起而掃蕩之剗治水師縱橫決戰垂近十年長江數千里之險乃復爲我所有其閒諸將代興或騰遠或死綏殆不可勝數而雄偉絕特前則楊公岳斌彭公玉麟後則黃公昌岐威名尤震海內迨文正公奏立經制水師舉公爲提督節制五省此自古以來所未嘗有也楊彭二公之戰歷剗岳鄂彭蠡徇吳皖而克石鐘山斷鐵鎖下梅家九泐二洲勦最烈士大夫不敢忘至刻石以播千載公則佐皖軍攻福山鎮勇搏於狂飈巨浪中溺而不死卒拔福山

斬酋首賊燄頓衰皖軍由是大振其北攻擒賊也拒張家洲軍少
士一抵千公鼓勇猛戰竟破走之眾服其膽略蓋時及援德州至
張秋水淺舟不得入公徒跣禱津三日水起盈丈報稱龍見舟遂
達運河而是時東光南皮河決水漫溢與運連圜賊如環擒不得
脫遂滅是豈所謂有神助者邪抑亦福將之效也公諱翼升字昌
岐湖南長沙人形質頗偉年少自負考入長沙協標充隊長始從
向忠武公榮勦賊廣西旣而曾文正公檄回湘中管帶水師右營
隨同出師瀕江所遇皆賊若岳州若金口武漢若廣信九江湖口
若菱湖若太平蕪湖東關運漕金柱關東梁山等隘大都陷陣而
前無所於避凡七年由把總累遷至淮陽鎮總兵管帶淮陽水軍
擢江南水師提督又拜總統淞滬水陸之命西克金陵東取蘇

州始終皆與其役又奏平捻之績 天子念公功高水師關繫重大曾文正公方立持久章程卽以公補實又慮長江廣遠非一人之耳目所能周察也復遣楊彭二公互相巡閱楊公輒稱病免惟彭公獨任焉公與彭公性頗殊彭公性剛梗有犯必繩以法羣下憚之如火公性寬容有事輒以情諭羣下望之若雲居久之意若不相悅者會因舊傷觸發請開缺調理得 旨允從擬終老金陵游預事外而已光緒十八年 朝廷再起公爲提督重蒞長江二十年甲午日本寇擾中國防務棘艱公劬勞甚病亦甚以八月初十日卒於金陵年七十有七先時公以武功受 殊遇 賞戴藍翎花翎 賞剛勇巴圖魯名號 賜黃馬褂 賞一等輕車都尉世職 封三等男爵 賜紫光閣繪像紫禁城內騎馬 皇太后

萬壽慶典 賞加尙書銜逮遺摺入照提督例 賜卹 予諡武
靖事蹟宣付史館立傳 諭賜祭葬長沙原籍及立功省分准建
專祠子宗炎俟服闋以道員卽選孫恩綬及歲時帶領引見嗚呼
酬庸極矣元配陳氏 誥封一品夫人先公十六年卒繼配余
氏 誥封一品夫人子三其次宗楠宗錫均早沒女子四人宗炎
將以某年月日葬公湖南某縣某里某山某向丐今湖口鎮總兵
柳君金源屬庶昌爲公表墓誼不敢辭初黃公未離籍時柳君在
公所佐治家事後從之南征亦以武功顯軍務平補水師參將駐
紮三江營光緒元二年庶昌經辦荷花池釐金局與君往還甚密
遂爲篤友而公亦庶昌舊識也今撰此表固以答柳君之命而於
公之事迹舉其尤大者章之使覈實可信毋令後世以溢美諛辭

譏余並累及於公也光緒二十一年乙未正月二品頂戴四川東道監督重慶關道義黎庶昌

禹門寺築寨始末記

嗚呼軍興以來團練禦賊者眾矣而以一鄉一寨枝柱十餘年幾與全省兵事相終始如吾鄉禹門寺者蓋亦罕聞云咸豐四年八月桐梓姦民楊龍喜作亂破縣城出婁山關進窺遵義據雷台山圍郡城百二十日浸及於吾里里人就禹門寺設局治團練禦賊於是始有築寨之議禹門寺者濱臨樂安江一峯崛起周回里餘澄潭曲抱上有古寺頗壯觀號曰禹門 國初高僧丈雪徹智駐錫之所西距郡城八十里北距綏陽五十里東距湄潭七十里吾黎氏舊居左障山也明年春賊解圍遁築寨議尋罷其秋楊龍喜

平下游苗匪教匪相繼起教匪陷銅仁思南石阡思州苗匪陷丹
江八寨古州清江台拱施秉都勻黃平清平等府廳州縣七年黃
平平越流民糾合教匪內侵官軍禦之於重安江失利遂陷黃平
舊司據甕安玉華山爲巢穴同時思南人安某立靈覺團與鄰團
不協鄰團以反狀告知府福全謀執之安氏陽爲應募入城殺知
府以叛別有劉依元者本涪州教匪爲州官所捕名逃至思南剛
家寨依油匠何工顏以居仍以燈花教惑眾共劫大團名志和與
安氏相比附其不入教者又聯餘慶施秉思南龍泉數縣人爲團
以時和年豐民康物阜公平正直普樂咸熙十六字爲號別稱人
和眾七八萬旣而兩團交攻爲安氏所并八年進圍龍泉陷印江
石阡由黃精樹犯湄潭之偏刀水偏刀水巨集也提督蔣公玉龍

軍此年餘戰敗遂爲賊踞自是賊之在玉華山者目爲黃號賊之在偏刀水者目爲白號而安氏所有之賊目爲老號玉華山賊以沈太和賀大六爲首沈賀死何二強盜卽何得勝殺人王王超凡及陳某傅某石某等統之各擁眾稱王爲省門巨患偏刀水之賊劉祖祖何工顏楊和豐冉八閻王秦崽崽二等統之劉祖祖賊中呼依元之稱也後二年新舟場人張保山本江西賈人子充團首不法爲遵義縣令鄧公爾巽所斥乃往投白號詭稱明代後裔眾惑之尊立以爲僞秦王總其眾號朱民悅或稱朱王鑄嗣統錢散行之使民堅其信時湄甕思石閒羣盜如毛獨龍泉人李璠結團固守拒戰數年龍泉無恙遵義與湄潭毗連恃三渡關至山羊連山百餘里爲之障自乙卯以還四五年閒吾里雖未遭賊躡然其閒楊

龍喜餘孽如鄒辰保楊應陸之踞桐梓落水洞何元驥穆明王之
踞綏陽川主洞蠻王洞王龍之踞正安鼻孔山石筍官軍次第討
除無不徵調鄉團防堵險要七年秋余兄庶蕃又募勇隨縣令江
公炳琳勦賊甕安之上塘每有徵發禹門寺率爲東路兵饜會歸
九年冬黃號賊渡羊崖關犯遵義江公拒戰兩路口失利死之擾
及東鄉焚蝦子場庶蕃以鄉勇要擊於水白渡羊舞場賊旋退白
號賊亦進踞孫家坡綏陽縣令秦公安慶破走之屯先鋒營以蔽
湄潭十年十月又破之於山羊口斬賊首伍得勝是歲屯廣西賊
僞翼王石達開自泗城竄入興義貞豐破廣順走黔西大定窺四
川而提督田興恕爲 欽差大臣勦賊檄總兵沈宏富統虎威軍
進攻玉華山相持年餘不克退還遵義初平越人吳元彪以策干

蔣公玉龍蔣公謂其有反相不用又走遵義說當事當事者悅之命將二千人往屯高臺審上元彪爲人沈勇有急智數以計窘賊賊恨之甚合黨絕其饗道元彪乏食引還秦公解湄潭任先鋒營亦散遵義防弛十一年冬黃號賊乘勢趨渡上關安白兩號賊趨三渡關五里坎大板角分道入寇從兄兆祺縣人張師敬各率鄉勇禦賊於高洞子三渡關皆潰於是張保山據七星坡楊和豐據驪龍垠龍大勝據關牛坎冉八閣王據楊柳田安字老號據麻家垠連營百餘里綏陽縣令于公鍾岳兼攝遵義湄潭正安三州縣事親率所部駐禹門分遣把總吳元彪都司鄒開桂屯金盆山馬鞍山沈宏富亦遣都司左近光屯宋家垠吳元彪攻賊於阜角堰以除夕拔之執龍大勝于公方移屯而宋家垠不守他鄉勇之往

營牛心山者亦不能軍偽秦王張保山逕由楊柳田上據禹門寺同治元年正月十日也于公還軍綠塘河余兄庶蕃亦募勇出張飛隴約鄒開桂三面急攻賊遁仍復禹門寺吳元彪攻拔闌牛坎驪龍埧疾襲張保山走之遂營七星坡正安人胡先紹先科率團練來援破賊於麻家埧遵義復無賊然自是險隘俱習賊時去時來不常其得失來則所在焚掠團練禦之亦退由是築寨之議興矣于公之任遵義也屢勸鄉人仿古堅壁清野法修築寨堡自衛示三出而眾莫應至是余兄庶蕃從兄兆祺及里人劉漢英首任斯舉相度形勢就禹門寺築寨鳩工積石闕五月而寨成爲門者四濠牆樓堞皆具巋然一方重鎮矣同時興起者樂安里則有綠塘河白泡塘新舟場馬鞍山龍坑等以數十計而禹門爲最大東

隅里則有東皋東勝東平等以數十計而東皋爲最大置守粗備其秋閏八月石達開再由四川入遵義號稱十萬逼郡城城無見糧大恐于公檄調禹門團練助濟軍食兆祺以三百人運糧往與賊黨遇於米泥坝力戰一日夜卒護入城人心始定鄒開桂屯城外紅花岡賊張黃蓋登插旗山以瞰城城上發礮轟擊稍稍引卻又爭開桂壘開桂出戰殺數人賊無意攻城數日釋圍西走所過鄉寨有施放鎗礮者輒搖手止之或僅索酒食復趨大定入雲南其餘股迫近禹門兆祺禦之繳水敗還再發精銳要之賊已不宿而去二年正月東隅里人吳某誘高臺白號賊入寇與禹門團練戰於大水田賊敗走黃號復犯忠莊塘鄒開桂等挫衄遂徧擾縣西南境已而黃號聶定邦與白號爭高臺定邦破其十三營據有

白號之地黃號益強盛至五月而吳元彪又反先是元彪至遵義乞饒于公陽應之沈宏富惡其爲人以他事執下獄其黨藍山虎等乘不備破獄出元彪遁回七星坡據營以叛知府張公日崙欲和解之使人持五千金往犒元彪得金益張結盟與黃號賊合心知禹門必爲患害首遣其黨李春山萬得勝一夜行八十里襲禹門昏黑中賊已登陴守陴者始覺團勇奮起殺賊賊退再至再創之七月元彪改計攻綏陽亦不能下遂擾鄭家場大收其穀誘脅羣寨左至雙洞門右至堆蕎堡或破或降或觀望新舟場向與禹門犄角亦反爲元彪獨禹門傑然與抗其附禹門者西路綠塘河一寨而已元彪使人說黃號專力禹門黃號亦利禹門有積蓄率眾來攻礮斃其賊目賊退遷怒他寨遂屠白泡塘三年春元彪與

聶定邦有隙定邦攻破元彪雙洞門元彪亦襲踞定邦紅心寨定邦赴救復之攻元彪黨李春山元彪詐爲黃號旗幟往助戰突襲定邦定邦敗走元彪誘白號賊平定營叛將劉名貴共擊雙洞門定邦不能救雙洞門復爲元彪有八月元彪再圍綏陽知縣邵公維新與邑人廖熙麟誓以死守其冬縣降人宋玉山糾合黃號於寶峯山寇掠東西南三鄉破數十百寨殺戮甚慘禹門益增守備築甬路屬之河以防汲道綏陽被圍久邵公四出乞援從兒兆祺以團勇赴救賊益廣招白號劉名貴石先鋒等分擾四境屯繖水黃魚橋以扼外援阻不能達城中糧盡斗米值銀八兩餓死者相屬四年二月二十三日城陷邵公死之方是時禹門一寨北拒吳元彪東拒白號東南拒黃號環三面皆賊居民晝則疾耕採樵夜

則分陴守禦危苦萬端兆祺等數以大義稱說激勵寨中人皆曰誓不與此賊俱生其守益固二月十九日黃號賊大股來攻寨中出三百人與戰奪其營帳數百賊退屯龍坑龍坑距禹門十里賊因其糧日日索戰寨勇輒出應之殺傷過當夏四月賊從車水降寨楊大二等計火龍坑營引其黨近萬人直屯於隔江之大山坪與禹門相望示無還志數日又渡江營於寨旁之騾子堰後岡樵採道絕庶蕃等飛書至郡乞援郡人王藻章以壯勇三百來赴事益急使練總鄔正家募敢死士得百人乘夜登後岡逼賊壘而軍各持門扇箱籠之屬累土填石相距咫尺賊覺來爭刀矛接於肘腋閒勇皆殊死鬪不退比明營成而賊氣大沮寨中多草舍賊自岡頭以火箭射入皆及濠而顛否則過越寨西未嘗一著草木又

發大礮轟賊不知其先已入藥再食之礮炸而飛未傷一人論者謂有神助庶蕃等計議以爲賊今致死於我我不一大舉與決雌雄寨終不可保也五月八日悉發精銳分兩道出攻賊奇兵別從尙小渡戒之曰草山以望我軍兵旣交則疾出賊後斫其營縱火燔之雖死勿退賊戰正酣忽望見火光大驚反奔寨勇蹙之遂平江南各壘騾子堰賊亦潰退屯車水迎水棧寨首苟雲九素與楊大二有讎聞禹門寺破賊聲威大震來約濟軍潛往襲車水是月旣望又拔之斬楊大二黃號賊悉遁回高臺凡八十八日而圍解寨勇傷亡者幾三百人綏陽之初陷也聞楚軍統領雲南布政使劉公嶽昭駐軍綦江幾半年號爲援黔以不知虛實不敢進禹門寨首合謀遣綏陽附生楊遇澤遵義人劉應奇等齎蠟書往通消

息促進兵行至七寶寨五人者猝遇賊死余兄聞而復遣健往詭裝爲丐乃得達七月楚軍至綏陽合圍數月不下劉公問計於禹門寨兆祺庶蕃等獻言曰綏陽城小而固吳元彪亦悍賊也堅忍善守然其城在平地近黃魚橋河源兩界有山下流頗狹若從黃土坎一帶築壩束水灌之可不戰而克也劉公從之綏陽圍攻正急宋玉山復誘黃號自南鄉入襲破郡城北門爲城圍擊退劉公分軍往援五年壩成其夏水大至淹城不沒者二尺許元彪懼率劉名貴等降綏陽克復八月楚軍入遵義南鄉賊宋玉山等亦降遵義肅清禹門寺解嚴鄉人始下寨東南猶時時小警然賊到而希矣余以咸豐庚申去家至同治六年歸自河南曾文正公軍幕覽戰爭之遺蹟睹城堞之猶存慨然想見鄉人百戰艱難守死勿

去之義郡城之不亡禹門一寨之力也而其事終始不獲上聞寨始有二千餘戶丁壯數千人及是而罹於兵罹於饑餓罹於疾疫枕藉如山死亡不可勝數而賢人君子若余世父雪樓府君從兄伯庸兆勳胞兄魯新庶燾及大儒鄭君子尹珍先後皆隕沒於寨數百里內外殘破創痍豺虎縱橫蓬蒿滿目國中終日行不見所識天運人事足以悽愴傷懷矣於是追述始末粗備掌故元彪後改名奇忠從劉公入雲南肅清大定以西每戰先登累功至督標中軍副將里人黎庶昌記光緒八年六月

夷牢亭圖記

士大夫之有園林者眾矣或處鄉或處城莫不欲極山水之趣然率舍自然之一境而以意匠巧爲營度本無是山也累土疊石以

爲高曰某峯某岡某垞本無是水也捐溝引泉劑灰款而渟之曰
某池某湖本無是庭堂也架木結構雕飾精嚴曰某亭某館某臺
某榭胥假外物而爲之名凡此皆以求適吾趣而已若夫君子因
天地自然之用隨所遇以養神明其爲適不亦更大矣哉余家樂
安江幽勝處直拙尊園之西隔江有邱隆起可十丈往時卉穢蒙
蔽無徑可尋未嘗有過而問者經亂盡顯木之枿者斥竹之翳者
剔石之稜者覲童然若伏龜之下飲於谿一日偕余弟夏軒步登
之以望吾園遠而望山堂水牛山諸勝近而禹門寺及石頭之塔
青山之柏桂岡堯灣之桂大嶺之楓松悉羅拱環列若與爲揖讓
而拙尊園當其北吾弟別業在其南平疇衍迤與日際會炊煙縈
帶墟落如郢如畫斯亦天假之園以適吾適者余得之大喜乃謀

構草亭其上以攬之不十日落成邱故無名取牂柯之義繫之曰
柯邱亭曰夷牢夷牢者唐李吉甫元和郡縣志稱樂安江水名也
或曰夷平牢落也或曰夷語以樂爲牢余皆弗深究第日與吾弟
巖居川觀坐此亭以盡四時之變時方春也梅梨桃李怒華麥秀
陵陂生氣益勃夏至時鳥變聲於眾綠陰中子鸞鶯燕旦暮互啼
欣然有會於耳蠶事畢人家插秧行水被蓑戴笠叱犢餉耕婦子
嬉於隴畝秋稼旣成當七八月之交而黃雲布野蚱蜢如繁星農
夫腰鎌刈穫趁新月荷擔歸笑語樂豐歲及冬盡百物腓殘雲水
寥落獨餘山松庭桂不改故容使可悅目而怡性一亭之觀化不
窮若此余雖未知古仁知之樂山水何如而以此澄慮洗心似亦
超然榮觀之外不爲世網所縛束今來日本二年矣念斯亭不忘

又懼本懷之日汨也因屬吳縣顧君若波作圖而爲之記並詒吾弟共賞焉光緒十五年三月

金鼎山新建玉皇殿記

堯舜禹湯文武周公之道衰而老氏興老氏者其源出於黃帝與世和同以淡泊爲體以柔退爲用著書言道德大抵閔叔世之愚迷將一反諸清靜無爲已耳厥後莊周慕其術而悅之累著十餘萬言頗仿依其辭然而姑射神人之喻鴻蒙雲將之游率皆寓言無事實亦未嘗爲神仙家言如後世怪迂之變也神仙之說蓋盛於七國時燕齊海上之方士阿諛苟合其言益洗洋無涯涘造爲方丈蓬萊瀛洲之誕伯僑毋忌充尙羨門子高之不可即使世主想望瞑眩莫不欲得而甘心而列禦寇書遂有清都紫微天帝之

居爲道家之所自祖禦寇雖見稱於莊子而書特晚出去莊子時甚遠剽獵莊晏楊墨以成文唐柳子厚雖辨之而不悟其書之譌也世乃反以莊子取列子不亦慎與秦漢而降變本益厲刻木爲像築宮爲祀道家之言遂一成而不可止今天下各行省莫不有道教緇衣黃冠咸奉老氏爲宗主而又別有所謂玉皇上帝者體制尤崇於老氏其徒奉之必被以冕旒袞笏一準王者上儀人亦習見而莫以爲異吾邑郡城西四十里有山曰金鼎孤峯特起於眾山之上其高十里初夕之夜有星火數十百燦見於茲山左右若遠若近起滅不可究詰羣相與靈之春夏之際氓庶朝金鼎者環數縣不絕山舊有廟湫隘塵陋不足壯觀光緒中蜀僧大方性頗好奇來登此山遂闢地建玉皇殿於其頂以費絀久不就告余

爲集貲贊成之而令移吾鄉禹門寺玉皇像供奉於此使道釋各
得其所無相凌雜殿成楹棟堅緻丹碧煥然憑高四顧孤負寥絕
足以棲真而安神矣夫道家之言其事荒渺不足致辨然取其清
虛遺世之意以養人靈府使超然恆軼於塵壒之外儻亦君子之
所不廢乎大方書來欲余志其顛末因爲發凡如此而於工事則
別有書光緒十五年十月邑人黎庶昌記

禹門寺置佛藏記

距吾居里許有寺曰禹門 國初時蜀僧丈雪暨吾宗策眉九十
翁相繼居之飛樓湧殿踵事加闢遂爲壇場勝境舊有北本佛經
全藏同治以還兵興寺擾經卷散軼不完光緒七年余奉使日本
遇坊肆閒有繙刻南藏本佛經全帙遂以千金購製寄儲使與寺

藏經樓之名相稱十一年余奉諱旋里見寺多阨撓楹棟榱桷風
練雨澱日益朽剝丹雘失華乃命工修飭改易而髹塗之四閱月
告竣一木一石煥然增新矣余之爲此非欲求佞於佛實以其地
與吾居相近治此爲游觀之所而又念名勝之不可任廢滅也故
葆而存之意如是而已佛之爲教其初起於祭天金人事甚微眇
後乃浸滋浸長以戎夷之法而與孔孟爭衡自漢初撥羸秦之亂
典禮政教不能修復於古侵尋黃老王霸之間佛乃乘虛而增其
燄由是因果禍福善惡報應其說中於人心膠牢而不可拔而浮
屠寺塔之建蘭臺石室之藏天子且躬爲之駕以簧鼓一世人民
是豈佛之罪哉然自唐宋大儒論闢後佛說之不足爲天下患亦
已大明而後世儒者乃欲援儒入釋課其虛靈不昧以主靜良知

立爲宗極使與吾儒心性微旨相亂不尤過矣哉君子之持身也
不敢造次涉於虛無之境居常狼狽以忠信誠慤爲本以戒欺求
慊爲功以存不忍人之心爲用博約乎文禮之涂潛息乎仁義之
府無歧其趨無愷其行明德而新民開物而成務由家之國推己
及人其始無過致嚴異端之辨而其終遂達乎天人之故仁民愛
物之原充類以極於盡性至命方日從事聖賢不暇又何有清靜
寂滅窈冥誕幻之說熒視而惑聽哉方今天下乃有所謂耶蘇天
主教者傳自泰西流衍於中國竊釋氏緒餘舉君臣父子夫婦昆
弟朋友下逮食息之倫一切以天爲主平等持視無輕重厚薄之
分其說尤淺陋爲釋氏所不道知道者固不慮爲彼惑而愚民時
有信從者亦無人焉爲之反經而揭慝也余故因置佛藏並發斯

論使鄉人知所做悟焉經凡六千七百七十一卷總二百八十一函別匱度弄令僧顓司之其唐慧琳一切經音義百卷中土久逸頗存蒼雅故訓爲攷据之學者亦將有取乎此也里人黎庶昌記
光緒十五年十月

介石園記

友人蔡君念皇家郡城東郭外傍山爲園廣纔半畝有亭有池倚池疊石爲小山冠一峯玲瓏而秀特因名園曰介石余嘗寓居其中諾爲之記明年余再使日本又二年念皇益拓而大之自小山後鑿垣穿竹徑而上爲環堵樓樓之西屬以回闌迤邐下至山麓別開石屏爲洞三署其額曰穿雲窟窟之外有大圃編竹爲籬隔以柴扉顏其額曰中隱岡岡以內皆叢樹卽山半構室廬曰翠微

軒軒後峭壁三成怪石磊砢增葺草亭其上有古棠梨四映帶之
據亭俯瞰城郭內外萬屋鱗櫛環以湘流曰一覽亭亭側壅短垣
植藤花爲屏障外樹蔬果將自食力以休老乎其中寓書來告屬
踐前諾余雖未涉斯園而其位置頃畝高下曲折念皇昔爲余言
之遂若歷歷在目也念皇爲余年丈苴谿先生之子事親孝母沒
不能歸葬之城東五里許躬負土成墳時時往省以致其孺慕之
思此瞻雲之所由名亭也家甚貧子息單弱妻又病痿念皇處之
怡然爲人守狷寡欲不妄干求於人其行頗近知恥知恥故能介
惟介故與石宜嗟夫人之生世久者不過數十寒暑奈何挾其萬
物皆備之躬不踐吾形而俛首爭參於利祿之場營營不以自止
甚或隕身喪名爲天下笑若此者蓋不可勝數也要其歸則亦草

木漸盡腐滅已耳吾因是而思夫古之達士往往離世避俗雖有千乘萬鍾之在前斥而弗顧豈好爲矯激哉世患不入於胸斯形役不勞於外其自待已厚矣而聖賢者處已則尤有道不以窮戚不爲達欣遭遇合之隆則行其所志邁明時之蹇則卷懷退藏此所以無人而不自得也然其學必自知恥始吾願念皇之益持其介而勿流於許行並耕則幾道已黎庶昌記

改建五福宮北樓記

重慶蜀東一大都會也其地當岷涪二江之匯水陸四衝舟輿之所絡繹商賈之所駢集絲麻布帛丹漆鹽鐵之利都積而委輸渝關實縮轂其口人民數十萬重屋累居市廛糾紛鱗比櫛葺鬱撓而不得舒凡四方冠蓋之所經士大夫之所游息淹歷歲時大率

病其湫隘抑塞未嘗一得山川之奇以去者往往而然也城中五福宮爲形勢最高處道士舊觀也宜可以攬巴渝全勝及登其堂舉爲牆室所閉寓目無見益又甚焉光緒十八年余分巡是土友人廖君養泉觀察適自川北來游乃建議拓而新之土木之事一惟君是賴於是就其北三楹改易規制別爲亭斗出使可游騁抉壅障除陋汙卻丹華崇雅飭不數月落成顏其亭曰樓外之樓名其廳曰漲秋山館櫺檻四周爽塏疏潔憑高而視二江繞其前佛圖擁其後塗山龍門之旁湧環列者笏立而珮趨雲滃而波駛郁郁芬芬吐納萬狀譬若人負瑰偉之質沈鬱榛莽閒久無過而問焉者一旦遇眞賞拔識則盡態逞妍精神爲之一振覺昔之熟視無睹今乃爭相傳誦矣廖君屬余記之余謂史稱登高能賦可以

爲大夫夫古之君子游必升山陵處必有臺榭其所以居高明而
遠眺望者豈侈然民物之上南面坐大以自恣哉蓋內有以息一
己憧擾之神卽外有以靖萬類囂凌之氣非苟焉而已也今廖君
之爲此殆將以古誼策余然則余與二三守吏當政繁志軼之後
偶一登臨撫此城郭萬家之盛積思凝慮以求轍乎仲尼論庶富
教之旨其於三代賢聖之治或將有一合也是爲記遵義黎庶昌
敬志箴

皎然而麗天者爛爲星日之光輝凝然而負地者挺爲山岳之竦
峙橫乎其無古者前有不朽之聖賢芒乎其無止者後有不窮之
事世嗟余小子藐蟣蝨身混三才而立質懼草木之同塵蹈道不
實首初迄今攘攘五十七年矣志慮百無一成況乎憂患之叢集

利慾之薰撻將遂爲小人之歸乎抑庶幾一日窺君子之庭神明告汝敬持爾志待暝而休勿墮其氣甯爾之心除爾之害抱知命以永終曾不願乎其外

拙尊園叢稿卷二

拙尊園叢稿卷三

遵義黎庶昌菴齋

內編

曾太傅毅勇侯別傳

公諱國藩字伯涵別號滌生湖南湘鄉人也初名子城後改其先
自江西徙衡陽明季再徙湘鄉家世力農五六百歲閒無與科目
顯者祖玉屏始驚學父麟書老儒縣學生員至公乃大道光甲午
鄉試舉人戊戌進士改翰林院庶吉士授檢討二十三年充四川
鄉試正考官再遇大考累遷侍講學士內閣學士二十九年補授
禮部右侍郎始公居京師從太常寺卿唐公鑑講受義理學疾門
戶家言漢宋不相通曉亦宗尚攷据治古文辭與蒙古倭仁公六

安吳公廷棟師宗何公桂珍漢陽劉公傳瑩仁和邵公懿辰數輩
友善更相礪砥務爲通儒之學由是精研百氏體用賅備名稱重
於京師 宣宗崩 遺命毋庸 郊配 廟祔 文宗卽位下廷
臣議王大臣九卿旣集咸謂 廟祔固不可易 郊配亦在所必
行公獨以爲乾隆中繕治 郊壇考律呂之正義按九五之陽數
一磚一石皆有定程增之不能改之不可今 七廟配位外已乏
餘地論者徒欲於西三幄之南暫置一案計目前而忽久遠非所
以嚴典祀 大行皇帝深維萬世慮或有援唐宋故事陳請罷祀
者因以身制限制俾世世遵行無更革之患此大孝大讓三代聖人
制禮之精微也愚謂毋庸 郊配 遺命不可以有違與羣臣意
不合專摺建論之 上善其言曰該侍郎議是諸所奏殊少折衷

公又以國家用人之道有轉移培養考察三端而經筵日講爲人君求治基本皆宜加意切究復條奏數事施行咸納用焉是歲廣西兵事起賊酋洪秀全楊秀清等據桂平金田村咸豐元年益熾賽尚阿公以大學士督師出勦時上求治急用人或不測諭旨輒曰黜陟大權朕自任之又尚威儀羣臣失檢則得罪百僚恐懼莫敢正言公迺上疏極諫預陳三大流弊請防其漸上覽奏大怒捽其摺於地立召見軍機大臣欲罪之祁公嚮藻叩頭稱主聖臣直者再季公芝昌公會試房師也亦爲之請曰此臣門生素有愚直惟皇上幸而赦之良久乃解仍優詔褒箴大學士琦善公以番案得罪入刑部獄不肯承執薩迎阿查辦不實傾害之薩公時在新疆代任故事大臣查辦事件必隨帶司員一日會

訊坐甫定刑部尚書恆春宣言傳薩公所帶司員備質公驚問此何意也恆公曰有 旨公曰既有 旨胡不早宣示恆公曰面奉諭旨公曰 諭旨逮問司員豈能以面奉爲詞某亦刑部會審者未經面奉不敢附和司員微曹要亦會訊官也 諭旨未正其罪而先逮問今日在堂會訊者豈不自危自令以往大員有罪誰敢過問者必欲傳訊俟奏請奉 旨而後可四坐悚然遂已公旣好直諫議事數與諸公貴人不和諸公貴人見之或引避至不與同席公亦視之如無也爲侍從臣十餘年歷兼工部兵部刑部吏部侍郎居位稱職雖以直諫忤指 上心益察其忠可屬社稷卒以此用咸豐二年充江西鄉試正考官丁母憂歸其年賊出永安圍桂林陷道州郴州攻長沙解圍至益陽折臨資口大掠民船浮

洞庭而東岳州漢陽武昌俱失守三年正月沿江而下陷九江安慶破金陵據爲僞都秀全自稱天王建僞號太平天國僞東王楊秀清用事分黨北犯河南直隸陷鎮江揚州踞之海內震駭時公已奉 旨督辦團練於長沙首以人才爲急拔塔齊布於眾將中使領兵事倡勇敢巡撫張公亮基檄調湘鄉千人守城公曰團練僅衛鄉里法由本團釀金養之不饒於官緩急終不可恃請改募成軍乃可資以討賊湘勇之號自此起焉先是公嘗論東南各省形勢郡縣多阻水欲剿此賊非水師不可及新甯江公忠源禦賊於南昌郭公嵩燾獻言江湖一水遇風日可數百里賊舟瞬息得達官軍率由陸路追躡賊仗舟楫而我以營壘禦之此兩不相及之勢也長江數千里之險遂獨爲賊所有請急治舟師與爭江湖

之利江公大喜卽日具疏請飭湖南北四川各造戰船廣東製備礮位交會某管駕駛出長江肅清江面公亦奏請調瓊州紅單船放大洋由崇明入江廣州內江快蟹拖罟沂灘水過斗門浮湘而出收東西夾擊之效遂出至衡州勦辦水師會賊自江西西上再陷九江安慶黃州漢陽等郡武昌戒嚴廬州新立行省亦危急公方以討賊自任 上遽累詔出兵策應公奏水師未能就緒難以應敵 上手詔切責之公具陳饒乏兵單成效不可必惟有愚誠不敢避死而已 上復報曰成敗利鈍固不可逆睹然汝之心可質天日非獨朕知若甘受畏葸之罪殊屬非是已而廬州陷時衡陽廩生彭公玉麟落拓鄉里公一見器之楊公載福始仕湘陰外委名微甚應調至俱佐理弟國葆營務國葆薦此二人國士才任

一軍不當屈爲幫辦乃檄使募水勇楊公頓首自陳不習水性不敢受命以負公公笑曰觀君才氣無施不宜勉爲吾任之楊公彭公始治水師公徵將弁於兩粵數月戰船成者快蟹四十長龍五十舢板百五十度可應敵乃謀大舉四年春號召水陸萬人別爲二十營營五百人以塔齊布褚汝航楊載福等領之益募民船載運糧米萬二千石煤萬八千石鹽四萬斤礮五百尊鉛子火藥二十餘萬斤員弁工匠夫役皆具合者亦不下萬人傳檄遠近將而東征水師初出湖卽爲風所摧敗陸軍至岳州前隊遇賊潰退入城城守公率戰船拔出之不利引還長沙賊陷湘潭再邀擊之靖港又敗公發憤投水左右大驚援救得不溺後數日塔齊布公大破賊湘潭軍心始定公營長沙高峯寺重整軍實或請增兵公曰

吾水陸萬人非不多而遇賊卽潰岳州之敗水師拒賊者楊載福一營湘潭之戰陸軍塔齊布兩營水師楊載福兩營以此益知兵貴精不貴多故諸葛祁山之敗且謀減兵省食勤求己過古人亦正切實體驗非虛言也且古人用兵先明功罪賞罰今時事艱難賢人君子大半潛伏吾以義聲倡導同履危亡諸公之初從我非以利動也故於法亦有難施所以兩次致敗其弊實由於此諸將皆服方兵之初起大學士某公昌言於朝曰會某以在籍紳士非上素所令召而一呼萬人此其志不在小語浸淫上聞湘潭克復奏捷至京師大臣或指爲妄上心知非是一日特旨召見編修袁芳瑛問所以破賊狀芳瑛具言臣得家書述會國藩等戰事甚悉因舉顛末爲上備陳之上大悅卽日授芳瑛松江

知府而公志以明芳瑛者 上從摺紳簿中識其爲湘潭人也自
是大臣乃不復言公賊旣退出湘潭渡湖而西陷常德其在漢黃
者陷德安安陸荆門入宜昌越太平口而與常德賊合武昌再失
公復引兵趨岳州連戰下城陵磯水師獨衄亡其將陳輝龍褚汝
航等尋而復振會師金口諸將胡公林翼羅公澤南塔齊布公李
公續賓楊公載福彭公玉麟皆屬焉於是進兵圖湖北公令羅公
攻花園塔公攻洪山武昌漢陽賊聞兵大至宵遯遂復兩城順流
而東所過戰克大破之田家鎮斫斷半壁山橫江鐵鎖至於九江
水師浸驕賊營湖口梅家洲攻之不下舍去逐利入鄱陽湖未返
而賊夜柵斷湖口塞其後路不得出外江戰船大爲賊所襲焚燒
數十百艘公走羅澤南軍以免退屯九江於是外江內湖水師分

矣賊由小池口渡江西上再陷武漢北擾荆襄南入義甯公遣胡公林翼等軍救援湖北塔齊布公軍九江而躬至南昌撫定水師之困內湖者檄彭公領之時湖口賊陷饒州廣信入徽州羅公往勦克復廣信義甯而塔齊布公卒軍無統公復至九江羅公駐軍義甯上書言東南大勢在武昌得武昌乃可控制江皖大局乃有轉旋之望因詣公指陳形勢請率所部援武昌取建瓴之勢此時湖口諸軍但當主守不宜數數進攻以頓兵損威乞戒諸公堅持必俟湖北克復大軍全注九江乃可議戰公從之幕府劉公蓉諫曰公所賴以轉戰者塔羅兩軍今塔將軍亡諸將可恃獨羅公又資之遠行脫有急誰堪使者公曰吾極知其然然計東南大局宜如是今俱困此無益此軍幸克武昌天下大勢猶可爲吾雖困猶

榮也羅公遂行初公在衡州困急時湖北巡撫楊健孫楊江助捐軍餽銀二萬兩公嘉其意請入祀健鄉賢祠部議以爲不應坐革職上改降二級調用及城陵磯捷賞三品頂戴克復武漢授二品頂戴署理湖北巡撫公以未終母喪辭讓不受尋加兵部侍郎銜軍至九江賞黃馬褂五年九月補授兵部侍郎其冬僞翼王石達開由崇陽通城竄入江西連陷八府一州九江賊踞自如湖南北江西音問不通公在南昌從眾議復調羅公不知其已亡公弟國華國葆聞江西急於是用父命走湖北乞師巡撫胡公拯兄難將五千人行攻瑞州湖南巡撫駱公秉章亦資公弟國荃兵援吉安兄弟皆會行聞公前所遣回援湖北諸軍久之再克武漢直下九江李公續賓八千人軍城東楊公載福戰船四百號泊

江兩岸江甯將軍都興阿公馬隊佐以鮑公超步隊駐小池口凡數萬人軍容整肅公自南昌迎勞望見之則大喜兵勢復振是時下游軍事棘江南大營失陷督師向公榮退守丹陽卒 朝廷以和春爲 欽差大臣張國樑爲總統復進攻金陵而賊內亂僞東王楊秀清僞北王韋昌輝俱死七年二月公丁父憂奔喪回籍請開缺守制得假三月治喪再疏陳情具言辦事艱難狀 上雅知公拘謹重違其意乃先開兵部侍郎缺令守禮廬候 旨胡公旣定湖北馳至小池口合圍九江九月攻破湖口梅家洲鄱陽道通外江內湖水師絕四年而復合楊公乘勝轉鬪拔彭澤望江東流直指安慶城下進克銅陵耀師而還由是水師雄視東南復悉奪收漢黃以下江面與賊關銅陵而爲界胡公以此軍本公建立楊

彭皆其舊部請起公復統水師會九江克復石達開自江西竄入
浙江浸及福建 上卽家召公出辦浙江軍務公至江西未幾又
詔援閩僞英王陳玉成世所稱四眼狗者譎驚善戰再破踞廬
州李公續賓赴援廬州至三河舉軍覆敗公弟國華殉難駱公秉
章奏請舍江圖皖公亦奉 旨統籌全局者屢矣迺規取形勢九
年正月上奏曰就數省軍務而論安徽最重江西次之福建又次
之計惟大江兩岸各置重兵水陸三路鼓行東下剿皖南則可以
分金陵之賊勢剿皖北則可以分廬州之賊勢北岸須添足馬步
三萬人都興阿李續宜鮑超等任之南岸須添足馬步二萬人臣
率蕭啟江張運蘭任之中流水師萬餘人楊載福彭玉麟任之至
江西軍務亦分兩路臣與撫臣耆齡任之臣任北路耆齡任南路

福建之賊聞省兵力足以自了粵賊句結捻匪近來嘗以馬隊衝鋒擬調察哈爾戰馬三千匹募勇數千擇平曠之地馳騁操習臣願竭數月之力訓練成熟以備攻勦惟 聖鑒裁示 上深然其策後數月石達開竄入湖南西攻永州圍寶慶 上慮四川且有變令公以軍防蜀行至巴河聞賊已引去竄入廣西而上游兵事解胡公乃建議圖皖與公合謀攻安慶使弟國荃督諸軍在前圍之多隆阿公軍桐城李公續宜軍青草壩公次宿松經營江北而皖南賊陷廣德州遽入浙江襲破杭州回竄建平東壩溧陽偽忠王李秀成大會羣賊建平分道解救金陵江南大營復陷官軍悉潰常州蘇州相繼失咸豐庚申閏三月也左公宗棠聞而歎曰天意其有轉機乎或問其故曰江南大營將蹇兵罷萬不足資以討

賊得此一洗蕩而後來者可以措手又問誰可當之胡公林翼曰
朝廷能以江南事付曾公天下不足平也於是 天子慎選帥以
公功效懋著就加兵部尚書銜署理兩江總督促救蘇常左公宗
棠方嚮用有 旨下公問狀卽令襄辦軍務 賞給四品京堂未
幾公補實授 欽差大臣或言當撤安慶圍先所急公曰安慶一
軍關係淮南全局卽爲克復金陵張本不可以動搖也遂南渡江
趨祁門公爲人虬髯虎頰沈毅多度秉鉞專征天下想聞風采江
浙賊氛雲擾官紳告急軍書日數十至援蘇援滬援浙援皖援鎮
江 詔詔相銜公至祁門未十日賊陷甯國又數日陷徽州中國
方困兵革而英吉利法蘭西寇天津科爾沁忠親王僧格林沁與
戰敗績京師戒嚴 文宗巡狩熱河恭親王留守勝保奏請飛召

外援公發書涕泣請提兵北上會和議成止勿行其冬大爲賊所圍一出祁門東陷婺源一出祁門西陷景德鎮一入羊棧嶺攻其北環城數重吏士皆有憂色固請移營江干與水師相杖公曰無故退軍兵家上忌此不可也卒不從使人閒行檄鮑超張運蘭亟引兵會身在軍中意氣自如猶時時以詩古文是娛其堅定不搖率此類也左公至江西後數破賊樂平浮梁閒公薦宗棠可大用請改幫辦軍務十一年八月公弟國荃克復安慶捷未聞而文宗崩 穆宗毅皇帝立帝年少 兩宮皇太后垂簾聽政以公先帝重臣委任益至數 詔酌保封疆將帥人才頃之節制江蘇安徽江西浙江四省軍務 朝廷每有軍國大議諮而後行苗沛霖反 詔分兵討壽州東南兵事一皆專決杭州再陷公舉左公

宗棠辦浙事始公之起兵開幕府延客號得士合肥李公鴻章以
年家子入幕察其英毅非常器公嘗欲於淮徐閒別練一軍而難
其人及得李公奇其才欲任之未有因也江蘇官紳退保上海數
月望援不至使使至安慶乞師公卽遣李公至淮上召募得八千
人名曰淮勇赴援之時上海已設會防局議借西洋兵剿賊公言
上海本通商碼頭借以保守人財則可若令攻剿蘇州金陵代復
中國疆土則不可乃止同治建元公協辦大學士當是時公鎮守
安慶居中調度誅討懷集地方數千里部兵十餘萬人公弟國荃
益募勇圖金陵徇地至蕪湖水陸皆會薄雨花臺而進軍賊堅守
攻之不下乃增兵圍之相持踰二歲公嘗足食足兵以相餉救其
秋圍師病疫公憂甚奏言臣德薄不足以挽厄運請 簡親信大

臣馳赴江南分任重責 上諭勞之曰朝廷信用楚軍以曾國藩忠勇發於至誠推心置腹倚以挽救東南全局自諸軍進逼金陵逆匪老巢已成阱檻疊經諭令毋徒求效旦夕惟當立足不敗以俟可乘之機矧疫沴繁興各軍病困之餘詎忍重加督責其各傳旨存問當此艱難時會益以疾疫流行深虞墮士氣而長寇氛此無可如何之事非該大臣一人之咎意者朝廷政事多所闕失是以上干天和我君臣當痛自刻責實力實心勉圖禳救爲民請命以冀天心轉移事機就順至天災流行必無偏及各營將士旣當其厄賊中亦豈能獨無傳染該大臣鬱憤之餘未遑探詢刻下在京固無可簡派之員環顧中外才力氣量如曾國藩者一時亦實難其選該大臣素嘗學問時事艱難尤當任以毅力矢以小心仍

不容一息稍懈也洪秀全被圍久召李秀成蘇州李世賢浙江悉眾來援號六十萬圍公弟國荃雨花臺拒戰四十六日乃解去弟貞幹卒勞於軍卽國葆也明年五月水師克九洑洲長江肅清金陵城圍合賊糧垂盡洪秀全度不支服毒死李秀成擁立其子福瑱仍堅守時浙江略定江蘇亦平李公鴻章兵多無所用武有旨飭令會師未赴國荃亟治地道鍾山下克之三年六月十六日也李秀成生得洪福瑱逸出至江西後擒 天子褒賞功臣加公太子太保封爲一等毅勇侯世襲罔替賞戴雙眼花翎國荃一等威毅伯金陵旣克洋將戈登雅安瑪等來賀公威震中外乃議罷兵裁湘勇進淮勇而勦捻事起始淮勇新集公語其友郭嵩燾曰君亦知吾擢用李公者何曰不知也公曰目前大勢東南軍務可

了淮北擒匪尚無了期湘軍利山徑險阻馳騁平原非其所長用兵十年氣亦稍衰矣繼湘軍以馳騁中原不能不資淮勇管帶淮勇不能不資李公吾之用李公欲以爲湘軍之繼非第爲江蘇計也金陵平後賊悉竄至皖南江西楊公岳斌受命督剿江西肅清餘賊入廣東福建又二年乃平擒匪者起於潁毫光固閒剽掠以爲生事不攻城得亦輒棄去不守其戰善用馬隊衝鋒自陳玉成苗沛霖嘗糾與官軍戰益習攻鬪利器械玉成沛霖死僧王移師討之追剿數年馳驅山東河南安徽湖北數止戰失利賊奪官馬益盛聚散出沒不恆其處所酋曰張總愚任柱牛洪賴文光聚則數萬人馬萬餘匹日馳百數十里以爲常大河以南方一二千里蕭然咸被其患同治四年公聞僧王輕騎追賊步兵遲者後數

日乃到歎曰王軍罷矣不已必及敗將密陳於上止之弗及而王果兵敗戰沒曹州城下上聞而大驚念此軍非公莫統迺召公卽引兵赴山東勦賊其直東豫三省旗綠各營地方文武節制如故特使公權重與王侔者而李公代爲總督廷旨督師急日中數至公言僧王新敗之後士馬傷殘未易收集湘勇能戰者僅存劉松山一軍淮勇銳氣雖新然眾少不敷勦辦當益募新兵以楚師規模開齊兗風氣賊馬颯疾鋒銳不易當勢須出口採買戰馬添練馬隊黃河天險恃以扼賊北渡若興剡水師又非數月不辦是數者皆難迅速度今勦辦此賊不特西不能至湖北卽山東祇能辦兗沂曹濟河南祇能辦歸陳江蘇徐淮海安徽廬鳳潁泗此十四府州縱橫千里古來四戰之場捻匪往來最熟若以此

委督辦之臣而其餘責成督撫各練有定之兵制無定之寇軍務
庶有歸宿因定以臨淮徐州濟甯周家口爲四鎮扼要駐軍饟械
委輸皆由水道往進兵屯臨淮居無何賊竄河南 上令公移駐
許州節制湖北軍務兼顧山西至徐州復令李公鴻章帶兵入洛
陽以漕督吳公棠爲之代 旨未決事且下三人商定 廷寄到
軍中幕府請閒問公意云何公曰督撫進退繫國安危當由 天
子自任臣下豈可與謀吾當不商而奏幕府曰今 主上委心疆
吏視公等猶股肱故不疑而有是命不商無乃非 上意公曰若
亦睹漢唐末流之弊乎自古權柄外移孰非由漸而致方今天下
未靖封疆大臣率任軍寄人有飛揚跋扈之心倖端一開爭覩要
地恐州牧藩鎮之事將復起於今日非所以慮社稷也 明聖可

爲忠言不商何害乃上奏曰歷觀前史明訓軍事之進退緩急戰
守屯駐統帥主之朝廷之上不宜遙制廟堂之黜陟將帥賞罰百
僚天子與左右大臣主之闕外之臣不宜干預從古統兵重臣遙
執國命未有能善其後者同治元年 皇上命臣酌保封疆將帥
比卽奏明疆臣既有征伐之權不當更分黜陟之柄宜防外重內
輕之漸兼杜值私樹黨之端仰蒙 聖諭嘉許今以要缺督撫令
臣等往返函商如臣愚見密保尚且不可會商更覺非宜因不俟
吳棠李鴻章商定直據管見未審有當萬一否 太后臨朝稱善
明年春駐軍濟甯察閱運河至張秋遂登岱宗而還鎮兵之初設
也公與諸將約賊至迎頭而縱兵及剿辦年餘賊橫如故諸將士
皆曰不苦戰而苦奔走公迺起張秋抵清江築長牆憑運河禦之

未成而賊竄襄鄧聞公移而西更修沙河賈魯河開濠置守分地甫定賊復突而東時議咎公迂闊公在軍久益慎用兵書遺李公曰目下各軍勦捻視之無關得失若非僕與閣下提振精神認真督率則賊匪之氣日進日長官兵之氣日退日消若淮勇不能平此賊天下更有何軍可制此賊大局豈復堪問吾二人須視勦捻如曾李家事儻再無起色當奏請閣下北征蓋鄙人不能上馬督戰閣下能匹馬當先不過倡率一二次而士氣振興百倍矣會公弟國荃爲湖北巡撫遂請旨飭李鴻章出省駐徐州與山東會辦東路國荃駐襄陽與河南會辦西路自居周家口策應期以三方并力而是時言路迺數劾公辦賊不善乞加譴責天子明其不然爲寢其奏弗聽公亦憂愧不自安疏陳無功請開缺以散員

留兵聞効力援古義自貶注銷侯爵不許俄授李公 欽差大臣
勦賊飭公回任辭不任艱鉅亦不許是冬牛洪死張總愚竄入陝
西任柱賴文光入湖北中原少息賊亦不復合并由是捻有東西
之號矣六年六月公補授大學士任柱賴文光再入河南竄山東
渡運河而東擾登萊青李公鴻章劉公長佑建議集四省兵力會
堵運河英翰公請合兵守膠萊河圈賊於海隅皆主公防河初議
賊復引而西越濰河南入海州官軍陳斬任柱再擊破之壽光瀾
河賴文光走死揚州東捻平公加一雲騎尉世職張總愚入陝後
數月乘冰堅渡河竄山西入直隸擾犯保定天津河閒京師戒嚴
丁公寶楨帥先入援克饒陽駐固安左公宗棠駐天津李公鴻章
駐大名英翰公李公鶴年各引兵防河南北岸軍萃畿輔者七八

萬人莫適先縱擊賊徘徊而入山東東昌武定李公移師德州督
勦迺復事防河卒破平之在平南鎮張總愚赴水死如公策閏四
月加授武英殿大學士秋調補直隸總督公朝京師 召見養心
殿東室公免冠頓首謝 恩 太后見公容止非常備禮加敬是
時 太后垂念邊防以將材爲意顧問名將若何公舉多隆阿塔
齊布羅澤南鮑超楊岳斌劉松山劉銘傳等謀略以對 太后虛
己聽焉劉公松山始將老湘營公知其軍票姚整肅足倚平寇至
臨淮擴而大之後遂掃秦隴定新疆兵鋒常爲天下冠故言中興
名將旗人首多隆阿漢人首劉松山鮑超亦一代驍將也會歲暮
公留朝正旣至直隸練軍釐獄舉劾分明期年風俗大革先是天
津訛言有迷拐幼孩挖眼剖心者莫知所自始眾意指目西洋教

堂無據知府張光藻捕獲姦民張檢郭拐訊供實略賣子嚴辦已
民團旋得武蘭珍詞引法國教堂王三有授迷藥事民教因是鬩
鬪三口通商大臣崇厚與領事豐大業約集署會訊於時百姓謹
譁不止豐大業無所發怒卽舉洋鎗擬崇厚崇厚亟起避免豐大
業亦起徑出值天津知縣劉傑於途又不爲讓道益怒復以洋鎗
擬之中傷家丁津民憤環毆豐大業立斃集眾毀教堂誤連英俄
美三國西洋教民死者數十人天津大擾亂崇厚具以事聞公病
方請假養 上令馳往查辦公至天津津之教堂幼孩數百人召
問其父兄皆言無恙而投訴狀者率空語無左證王三捕得亦狡
展津民恨洋人深夙仰公威名冀且助我擊逐之及出示嚴禁滋
事大失望怨公時民教句句未已公慮四國合從敗約變不測卽

戰倉卒度不能禦之京師震驚思且爲之辨誣以解散其謀請
明詔通飭各省知教堂無挖眼剖心事奏既上朝士咎公左袒外
國謗議沸於京師法公使羅淑亞坐府縣主使欲以議抵持之堅
案久不決羅淑亞要挾萬方動引兵船爲詞持公不下怒去至總
理衙門爭公請交張光藻劉傑刑部治罪光藻傑先予假之順德
密雲 朝廷滋不悅詰公處分失當乃召李公鴻章於潼關引兵
馳赴天津會辦會兩江缺出仍以公調補而李公爲直隸總督刑
部定擬光藻傑罪發往軍臺効力 上從重改發黑龍江凶犯次
第緝得皆斬決依律償再踰月案乃結由是公聲名重損公辭兩
江 詔曰兩江該大臣舊治其勿辭第坐鎮其閒諸事自可就理
既復任充南洋通商大臣公之督兩江尚僑喜引經決事及治民

頗采黃老術清靜類古蕭曹居官有常度多謀能斷應事若流水
然幕府左右竊識之從容而已然未嘗一息佚素廉俸祿入悉以
養士軍所經用毋慮數千鉅萬家無改觀者用人持重其汎愛樂
士天性也諸將羣吏率子弟遇畜之得庶類之和尤知而善任使
所成就薦拔人才不可勝數而李公左公相繼極用遂匡國家以
故出入將相訖二十年爲盟主海內饜服蘇常之初失水師方爭
長江未遑及也公謂蘇常澤國非戰船莫達而揚州裏下河數爲
賊所瞰注乃議增設淮揚水師太湖水師皆與辦如言賊旣平水
師功高不可撤而船礮委棄足惜復議改置事遂設長江經制水
師始終公所建也初通商議成公陰有爭雄海上之志設內軍械
所安慶仿造火輪船踰年成小輪一號試之江可用迺使同知容

閱往西洋美利堅采辦機器洋鐵時李公鴻章亦自購得機器設局上海用西法製造鎗礮規模遂開中國機器之興歲益增盛自此始後公益奏請選派聰穎子弟前赴泰西各國肄習技藝期十五年而還仍以容閱往其遠略如此自餘他所規畫天下事甚眾無不效者或以爲聖公曰非也曹公有言更事多耳年六十二同治十一年二月四日薨於位江南士民巷哭江甯將軍以聞穆宗皇帝震悼追贈太傅賞銀三千兩治喪賜祭一壇諡曰文正入祀京師昭忠賢良祠各省建立專祠何公璟李公瀚章英翰公先後臚陳勲績宣付史館何公承公後上以守成爲戒是後更歷數公一皆無所改作云子紀澤以員外郎襲爵紀鴻孫廣鈞賞給舉人廣鎔廣銓主事初殯金盆嶺薨三年而其配歐陽侯夫人

卒合葬善化平塘公所定陸軍營制營規水師章程馬勇章程鹽務章程直隸清訟事宜練軍章程等皆經國之大者世所施行文章奏議尤美別有集他書藏於家方公在時門生故吏慕仰之甚者率圖形去藏之公薨後兩江重難其繼 天子盱衡數權試焉光緒中吏民思公功德不已門下士黎庶昌迺追美股肱之誼卽公圖像而頌之曰毅勇堂堂虬髯飄揚屬任大重惟哲 顯皇帝之基元羣盜披猖六師討伐經營極方公拯大難起搃賊吭六朝舊都逆豎居諸曰荆吳大國孰予敢踣楚師旣東包漢與江濯征十載遂臨海邦擒王掃穴兵威有赫若火日之烈烈亂賊息滅天實命我祚我聖相皇奮其威高視霸王有宣興周著列方虎炎漢再紹葛亮繼武亦有汾陽再續唐緒公隆厥聲伯仲伊呂初饒州

知府張澧翰善相人相公龍而癩謂其端坐注視張爪刮鬚象癩龍也公終身患癩目三角云

論曰粵賊之發難也起桂平據金田其事至微及禍本既成流毒徧於海內而外患乘之沸鼎滔天區夏糜爛此曠古所未聞也當是時公以紳士在籍讀禮家居不操尺寸雖不與聞軍國可也迺獨以討賊自任由今觀之有若天所命焉豈所謂篤生者乎夫舉兵犯難折而不撓是其勇也撥亂反正弔元元之命是其仁也開誠心布公道囊括天下之才而各任其器能是其明也收成功於李公鴻章是其智也天津之役揆量彼己辱身以安君父是其忠也嗚呼可謂臣道之粹精希世之人傑已

拙尊園叢稿卷三

拙尊園叢稿卷四

遵義黎庶昌純齋

外編

讀論語

柳子厚論語辨上焉堯舜之不遭而禪不及己下之無湯之勢而已不得爲天吏所以推尊孔子當矣獨謂堯曰咨爾舜以下六十
 三言爲孔子常常諷道之詞則不然論語紀事之書也孔子弟子
 雜記當時言行以垂後世於古無是體也游夏曾閔之徒習見孔
 子刪詩書有序贊易象有文言繫辭爲序跋所自出尊其所聞各
 稟師說譔而成編亦於其末序之云耳其意以爲孔子之不得位
 天也然生民以來莫盛於孔子令得在君人者之位尊五美屏四

惡必用虞夏商周之政甚明故歷溯堯舜禹湯文武授受之辭以
著仲尼躬纘二帝三王統緒而又終之曰知言與人卽孟子末篇
義旨知人論世尙友而已子厚求其端不得乃爲之說曰弟子或
知之或疑之不能明又截去武王書詞使義不完備夫孔子讀易
至於韋編三絕鐵撾三折終身以求寡過其慎可知也若以匹夫
不踐天子位時時取二帝三王禪吳討伐之辭諷於口識於心有
若闡干天命者然非聖人所宜用蓋論語之學會子以授子思子
思之門人以授孟子孟子晚而獨得其宗故直繫之曰由堯舜至
於湯五百有餘歲若禹皋陶則見而知之若湯則聞而知之由湯
至於文王五百有餘歲若伊尹萊朱則見而知之若文王則聞而
知之由文王至於孔子五百有餘歲若太公望散宜生則見而知

之若孔子則聞而知之猶夫七十子之志也其爲序一也孟子之說毅而顯論語之旨謙而隱曰何以如是曰時不同

或曰子申集注楊氏之說善矣然漢世所傳論語三家篇第各不同子以堯曰三章統爲後序不綦誤乎曰今世行者爲魯論語與孔子壁中古文章句煩省同惟分子張問以下爲從政故有二十一篇而魯論不知命章闕賴古論補之孔門所傳七十子以來之舊第蓋如此獨齊論增多問王知道二篇爲安昌侯張禹刪去余謂其篇必後人傳託所爲與孔子弟子語不類不然禹雖妄不至是馬端臨固嘗疑之矣孔子曰三人占則從二人之言吾從孔壁讀易程傳

世言王弼注易掃象不言而象亡於晉象非亡也不善言理者之

亡耳易聖人憂世之書也以下筮爲用宜其簡明易直不當怪迂
繳繞闊遠情事使人難明六十四卦之殺列三百八十四爻之參
伍錯綜象一寓乎其中而與人事相推移然孔子所以傳繫之辭
其恆言者止於陰陽奇偶剛柔動靜進退存亡吉凶悔吝而已未
嘗如漢以來人之說之穿鑿也易道至博而天人旣備仁者見以
爲仁智者見以爲智象不可勝窮也舍理以言象未有不入於小
數曲學支離詭異者京房孟喜虞翻焦延壽之儔攷其傳雖若甚
遠要皆無當於易人心之厭久矣故弼注行而眾家皆廢晚得伊
川書因弼注而研致益精乃始與聖人者性命之旨合雖以蒙之
不肖讀之亦覺犁然曲饜人心故程傳行而弼注又廢道之興壞
雖各有時然而伊川深造自得矣

讀王弼老子注

王弼注老子甚精妙得虛無之旨河上公不可以同日語及觀弼所爲注易高下懸絕與老子不類判若兩人言也世稱弼注易其旨多假諸老子余謂不然有老子而後知弼得易之淺也老子者元同以爲體因循以爲用無成勢無常形不可與聖人吉凶悔吝憂患之旨合而弼頗能言之弼深於老子而已於易強爲解事者也強爲之則得失之迹自在讀其書時若有會反而求諸性命之理無有甚矣學深淺不可假也朱子曰王弼周易巧而不明其知弼者與

讀儀禮

儀禮苦難讀本朝人爲之簡明章句者張爾岐吳廷華二家最善

余喜讀焉漢之興經書多出屋壁而儀禮十七篇獨完世儒頗推周公所爲斯固不必然而要爲輔政致太平之書無疑蓋周禮者會典而儀禮乃通禮也讀其書醇懿典則制度完備與謨誥同風使人卽欲進退揖讓鼓舞而不自知百世下猶若此況生於其際者邪孔子曰郁郁乎文哉吾從周豈不信哉余是以歎昌黎韓子之不善讀儀禮也僅掇其奇辭奧句而已又曰攷於今誠無所用之獨不知後世冠昏之緣飾喪服之因革何嘗不出儀禮所闕失者王朝邦國禮耳余意古經出魯淹中文相似多三十九篇者卽是劉歆欲以建立學官而惜乎其不得也不然歆號博極羣書若其文差與左氏春秋毛詩古文尙書不類又何必爲之發憤增歎也哉

讀墨子

墨子十五卷七十一篇今存者六十三篇此六十三篇中往往有子墨子大抵墨氏弟子所爲也翟所自著書祇親士修身經上經下並說六篇而已經上下篇文頗怪疑有錯簡世或以爲似爾雅釋詁而莫解其意以余觀之特堅白異同之辨非墨氏要指也據此則翟與公孫龍同時甚明班孟堅稱墨子貴儉兼愛尙賢明鬼非命尙同是其所長今取魯問篇語證之凡入國必擇務而從事焉國家昏亂則語之尙賢尙同國家貧則語之節用節葬國家喜音湛涵則語之非樂非命國家淫僻無禮則語之尊天事鬼國家務奪侵凌則語之兼愛墨氏亦何嘗不權時達變與仲尼救世意同而卒至充塞仁義無父無君爲孟子所距闢蓋別墨者流若相

里勤五侯苦獲已齒鄧陵子之徒猖言獠行有以召之耳豈墨之本旨如是墨道夏道也今泰西各國耶蘇天主教盛行尊天明鬼兼愛尙同其術磅礴然本諸墨子而立國且數千百年不敗以此見天地之道之大非執儒之一涂所能盡昌黎韓愈謂孔墨相爲用孔必用墨墨必用孔亦豈虛語哉

禹貢三江九江辨

自漢以來談禹貢三江九江之辨其說紛然淆亂至於莫可究詰余謂非山川形勢之難明穿鑿者之爲害也禹貢聖經也尙書敘事之文無若此謹嚴者其篇中本無南江名世儒泥於中有北必求南江以實之不得已而索諸經外由是聚訟之說斷斷而莫之止三江分爲五九江分爲三爲鄭康成氏之學者曰左合漢爲

北江右合彭蠡爲南江岷江居其中爲中江蘇子瞻書傳主之曾
改易祓夏僎程大昌黃度馬中錫胡渭等從而證明之爲庾杲之
之學者曰吳都賦注以松江婁江東江爲三江蔡沈氏書傳主之
爲班固氏之學者曰漢志會稽吳縣下注云南江在南東入海毘
陵縣下云北江在北東入海丹陽蕪湖縣下云中江出西南東至
陽羨入海皆揚州川也孔穎達氏正義主之爲韋昭氏之學者曰
三江松江錢唐浦陽江也顧炎武主之爲郭璞氏之學者曰岷江
松江浙江也歸有光主之此皆三江異名也九江之說主彭蠡者
太康地記曰九江劉歆以爲湖漢九水入彭蠡澤也酈道元云贛
水總納十川胡朏明引漢志以彭水爲豫章水源不當別出而曰
湖漢豫章與鄱餘修旴蜀南廬爲九水也此以彭蠡爲九江也主

尋陽者陸德明經典釋文引尋陽地記云九江一曰烏白江二曰蚌江三曰烏江四曰嘉靡江五曰畎江六曰源江七曰廩江八曰提江九曰箇江張須元緣江圖云一曰三里江二曰五州江三曰嘉靡江四曰烏土江五曰白蚌江六曰白烏江七曰箇江八曰沙提江九曰原江參差隨水長短或百里或五十里始於鄂陵終於江口會於桑落洲正義謂名起近代此以尋陽爲九江也主洞庭者始於宋初胡旦而晁以道曾彥和朱子從之曾氏曰九江一曰沅二曰漸三曰無四曰辰五曰澁六曰酉七曰湘八曰資九曰澧朱子攷定九江去無澧二水易以瀟蒸以導江先合澧而後過九江故不數澧無水可疑亦置之然瀟訓爲清水經無是水而金吉甫亦疑武陵零陵長沙閒如蒸水者頗多此以洞庭爲九江也其

說之繁難至於如此吾今一準地望反覆尋諸經文而別立一解以求當乎先聖之書法經於荊州書江漢九江雲夢爲三明其不可合而一也荊州一境當今湖南北兩省地東境盡黃梅縣與古尋陽接然導江之文明曰東至於澧澧卽今澧水也康成以爲澧陵山名在洞庭上游又書過九江至於東陵東陵卽今巴陵在洞庭下游頗疑卽城陵磯蓋大江東南流至城陵磯而極經特舉其迫近者言之猶漢之於大別不可以去江數百里之廬江郡東陵鄉當之亦不得以其山小及名不見於古爲疑也江自城陵磯折而東北流可五百里許至漢陽正與經東迤北之文合應讀爲句絕再東南流約六百里然後匯於彭蠡若移在漢陽以東則與迤北之文顯然謬刺又於導山條書曰岷山之陽至於衡山過九江

至於敷淺原衡山正在洞庭南連延以至九江之德化崛起鄱陽湖西而爲廬山敷淺原卽其麓所謂博陽山也然則據導江之文則過在洞庭西北據導山之文則過在洞庭東南其地適處荊州之中故曰九江孔殷譌孔傳訓以爲甚得地勢之中此也稱九江者言其流稱雲夢者言其瀦亦猶岷江之流專言之則曰江分言之則曰北江中江也吾是以斷然信朱子之說爲合於經也況有山海經灑沅瀟湘在九江之間一語可證乎山海經周秦閒書他紀或妄此語則不妄也江雖有九從雲夢會流而出下流實祇一江故統名之曰九江耳惟九江異名上世無書可證則從曾氏敗之說以沅漸無辰澈酉湘資灑當之而取說文入江之油以易漸雖不中不遠矣瀟湘係二字水名如滄浪之比余意以湘中記所

云是納瀟湘之名者爲是不當刪去瀟字而資亦應作濱以禹貢水名其旁多從水也九江既定卽三江可得而言三江者中江北江九江也經書岷江曰中猶質言正流耳非必左右有一江夾之之謂泥古者誤讀旣字屬震澤句執北求南強經就水無一能合若果有南江聖經何故不言而獨留此祕密以待後人之推測乎岷江以南大率山地無北方移徙之患不應有此配江之巨水忽歸消滅至漢時卽無蹤迹可尋此不待智者而知也導漢章云東爲北江明著漢之爲瀆非九江可得而比已於荊州遂言之矣曰江漢朝宗於海其書東匯澤爲彭蠡匯取回旋之義實統江漢以爲言明著迫邊均敵非一水之力而於導江則書會於漢則不書又明漢在中江之北不得以會名也經之苦心分明如是朱子猶

以彭蠡以下有江無漢又不見南江之名疑漢不當言北遂啟蔡氏有遣官屬往視未敢深入以此致誤之論此不信經之過也然則揚州一域西境之水以彭蠡既瀦一語當之東南之水以震澤底定一語當之實已包括無遺中江北江九江合流順軌而經於北境故曰三江既入與書江漢朝宗一也別無所謂南江有之卽九江也九江之水合眾派以成流至下游而彭蠡之水復合不可以瀆名不可名卽不能別出南江而使與北江相配經之書北江非苟而已也爲望秩計也吾意以爲聖人之精意蓋若此近儒李氏紱秦氏蕙田知三江之爲中江北江九江當矣而譏蔡傳以洞庭爲九江之非是其一失張氏敘知九江之卽洞庭矣而又疑洞庭本雲夢澤不可以江名別指湘江爲九江夫如是又何以解於

贛水之稱南江乎彭蠡之有贛猶洞庭之有湘也彭蠡之有湖漢九水猶洞庭之有沅湘九水也其名同其大小同會於澤又同今舍荆揚二州疆域不求而獨求所謂南江幾何其不替亂迷失也吾故準以地望證諸經文先分荆揚二州疆域荆州之疆域定確知洞庭卽爲九江而後南江之說不攻自廢南江之說廢而後三江明三江明而後諸家之論息諸家之論息而後禹貢荆揚二州及導江導漢之文皆燎如指掌無復留疑矣

李白至夜郎攷

李白之竄夜郎後人皆據流夜郎半道承恩放還兼欣克復之美書懷示息秀才詩題以爲白實未至貶所武威張介侯澍續黔書趙遵律謫仙樓記辨之甚力然均不免有所牴牾今試取白集覆

攷之其詩文雖編次無倫而細細尋究蹤迹亦自明白據唐書本紀肅宗至德二載二月戊戌庶人璘伏誅計白論罪當在此年春夏之際因郭子儀解官以贖始免死長流夜郎又因宣慰大使崔渙御史中丞宋若思推覆清雪始得出獄宋又辟參幕府上表薦授一官不報然後不得行前赴貶所是年九月廣平王復京師十月復東京而白有爲宋中丞請都金陵表是在未聞收復以前事白時尙在尋陽家室旋亦來會故於烏江留別宗十六環有拙妻莫邪劍及此二龍隨千里遠從之之語此烏江卽尋陽記所云去州五里之九江名曰烏江者也其贈辛判官贈劉都使留別龔處士贈別鄭判官諸詩皆在此前後作是年十二月戊午大赦賜民酺五日有流夜郎聞酺不與之作明年乾元元年正月戊寅上

皇天帝御宣政殿授皇帝傳國受命寶符冊二月丁未大赦改元
四月乙卯大赦十月甲辰立皇太子大赦皆未免罪故有放後遇
恩不霑之作然已在是年冬閒或二年春閒矣詩云獨棄長沙國
三年未許回蓋借賈誼自況也其自尋陽上溯有流夜郎永華寺
寄尋陽羣官之作行至西塞有流夜郎至西塞驛寄裴隱之作詩
云人愁春光短時爲春末夏初可知及抵江夏端午已過有答張
相公自荊州寄羅衣二事及五月五日贈余詩之作又陪長史叔
及薛明府宴興德寺南閣八月與尙書郎張謂沔州牧杜公漢陽
宰王公泛沔州城南郎官湖九月九日在荊州飲龍山九月十日
卽事自此西去荆門浮舟望蜀江上三峽巴東舟行經瞿塘峽登
巫山最高峯晚還題壁巫山枕障皆有詩可按題壁云江行幾千

里海月十五圓又云積雪照空谷悲風鳴森柯江寒早啼猿松暝已吐月是十月以後氣象由此年十月溯至上年至德二載十五月則尋陽啟行時適當八月也自此以後詞皆隱約然其流夜郎題葵葉望木瓜山憶秋浦桃花舊游時竄夜郎三詩似又確是在貶所時作題葵葉云慙君能衛足歎我遠移根白日如分照還歸守故園木瓜山云早起見日出暮見棲鳥還客心自酸楚況對木瓜山憶秋浦桃花云三載夜郎還於茲鍊金骨此詩似已在聞赦令後作故云三載情事皆不能移置他處木瓜山有三一在介休一在青陽木瓜鋪一在常德府城東七里在常德者一統志以爲白謫夜郎時所過余謂白由江夏至荊州由荊州上三峽蹤迹甚明實未經過常德攷唐之夜郎縣在今桐梓縣夜郎里而夜郎里有地名木瓜廟者

當爲白貶至之所玩其詩意蓋對此木瓜山而感懷青陽之木瓜山唐李吉甫元和郡縣志云珍州管縣三夜郎麗泉樂源並貞觀十六年開山洞與州同置三縣並在州側近或十里或二十里隨所畚田處移轉不常厥所尤可見白至之時縣治或卽在木瓜廟也宋樂史太平寰宇記牂州亦有木瓜山牂州今爲貴陽木瓜山卽元明之木瓜長官司非夜郎縣地至乾元二年三月丁亥以旱大赦有降死罪流以下原之之明文白必緣此詔旨得釋其示息秀才云半道承恩放還半道猶言中間也蓋白本是長流不赦之人今中間得釋故云如此不定作爲行路解也是年秋閒始由夔州下峽其早發白帝城云千里江陵一日還秋下荆門云布帆無恙挂秋風江行寄遠云別時酒猶在已爲異鄉客皆係一時作其

在江夏書懷贈韋太守良宰詩全是追敘夜郎以前情景又自漢陽病酒歸寄王明府云去歲左遷夜郎道今年赦放巫山陽與江夏使君叔席上贈史郎中詩昔放三湘去今還萬死餘措詞一致以巫山指夜郎猶夫以三湘指夜郎也不得執爲卽在巫山奉赦令之據合此前後事實觀之白自始遷至貶所及還江夏首尾實三年與三載夜郎還及江上贈竇長史萬里南遷夜郎國三年歸及長風沙語適合若至夔州卽還僅及年餘與各詩所謂三年者全鑿不應謬誤若是然則四川總志載遵義府有太白宅在夜郎里有題碑記信非傳會也唐書白本傳有詔長流夜郎會赦還不言半道可見史之審張介侯譏近人未讀全集信然惟家室實未同行有南流夜郎寄內詩北雁春歸看欲盡南來不得豫章書句

可證又唐時夜郎縣不在今遵義府治白田馬上聞鶯詩應以江南寶應白田渡之說爲確而烏江在尋陽且非唐歷陽之烏江縣更不得以遵義之烏江強合爲尋陽之烏江張趙二氏說亦誤又按白集附載唐人李華范傳正李陽冰劉全白等碑志集序於夜郎事皆隱沒不言獨前進士魏顥李翰林集序云解攜明年四海大盜宗室有潭者白陷焉謫居夜郎罪不至此屢經昭洗朝廷忍白久爲長沙汨羅之儔路遠不存否極則泰白宜自寬時白尙未賜環可見白之流夜郎久而後復而曾南豐序白集乃云乾元元年終以汙璘事長流夜郎遂汎洞庭上峽江至巫山以赦得釋云云蓋以至德乾元兩年之事合而爲一南豐能辨唐書流夜郎還尋陽坐事下獄之非而又有此失何也且言至巫山遇赦得釋亦

緣白詩今年敕放巫山陽之句而誤攷夔州以上所經之處萬縣
西山太白巖有絕塵龕三字在石壁上有唐人詩刻相傳太白讀
書處見潛確類書而涪陵有渡曰李渡以太白曾渡此曹學佺萬
縣西太白祠堂記所謂卽婦人稚子能知之者過涪陵則南州珍
州地矣白之至夜郎夫復何疑書此以質論古者又見草中有名
白頭翁者詩疑
亦是在貶
所時作

青萍軒遺稿序

自唐虞夏商周累世數十王積二千一百餘年而秦始皇帝暴興
滅封建廢井田燔詩書殺儒士禮樂政教一掃無聞三代由是曠
絕秦并天下歷漢魏六朝唐五代宋元明以迄於今亦二千一百
餘年西洋一旦挾其智力跨瀛海數萬里以款中國通商互市輪

船火車電綫鎗礮機器之屬馳騫紛紜人心競於亡等此二者五德剖判以來非常之變前古所不見聞而皆在此二千餘年間若有數以限之斯其所以然雖聖智莫能明也夫天旣以此變嘗試於人人卽當思所以處此變者而後謂之善承天易曰物窮則變變則通通則久可久則賢人之德可大則賢人之業嚮令禹湯文武周公孔子易世而並生今日其必能因勢救變以承此天也決矣余向蓄此論而未嘗以語人其後奉使西洋湘陰郭公嵩燾示余以季懷書金眉生六幸圖後盛言中國有大變二持論乃適如余所云郭公重益善之以謂季懷能知言也季懷吾友薛君叔耘之弟才高而識偉通知治世體要先後佐今尙書朝邑閭公平遠丁公幕於山東四川幾十年二公賓敬甚至浸冀大用及余辛巳

歸自泰西則聞季懷不幸沒矣余始識季懷在同治乙丑冬曾文正公勦捻駐軍徐州與其兄叔耘及澉浦向師棟伯常聚游幕府日夕究論天下事志意偉然方是時同幕諸賢各以經世之學相摩礪余雅不欲以文士自期亦遂不以此期諸僚友故於季懷但知才學足以任事有餘而其能文章則未嘗措意今讀青萍軒遺文然後歎向者識君之淺文雖不多頗據古人藩籬卓然有以自立且亦聞桐城遺風而興起者叔耘念弟之亡傷懷不已以余雅故屬爲序之因道季懷夙昔所以見重於余而議論之同若此光緒九年癸未六月遵義黎庶昌

浙東籌防錄序

浙東籌防錄四卷吾友薛君叔耘備法時公牘文字也光緒十年

法人侵奪我越南屬國地挾兵船踔入東南洋面牽綴援軍旁撓
虛喝眩沮我謀其時若聞若臺若滇若兩粵皆別遣重臣宿將聯
翩持節以往度要駐扼獨浙無有杭城雖名會垣而錢唐天險阻
鼈子門海艘不能直達防務實在甯波其轄下之鎮海定海懸隔
一隅孤注與雞籠等道光年閒前車之轍未遠也叔耘奉命備
兵甯紹台蒞任甫數月卽遭此變中丞劉公仲良駐省垣提挈綱
維稔知叔耘賢防務事悉委成之又令盡護諸將凡前敵築臺增
礮釘樁沈船塞口以及遷教士杜引水明賞罰固民心皆不憚煩
勞百計營度與諸將協規同力一泯異同故備禦嚴而折衷當部
署粗定馬江之敗耗已聞自是法益肆其慄疾勁悍之氣伺瑕抵
隙游目北窺明年正月遂犯鎮海口門卒兩次被創斂旗而退相

持四月之久浙防無恙豈非任得其人哉叔耘忠信醇篤恂悞無華嘗佐曾文正公暨傅相合肥李公幕府有年閱天下之義理多故能措注咸宜若此也今觀其處事之詳審持議之明通不專己不徇人庶昌自愧弗如遠甚宇宙至大世變無窮然則是錄也其卽未雨綢繆海防前事之師邪神而明之存乎人若以爲既往之陳迹而忽諸是非能善讀吾叔耘書者光緒十四年三月遵義黎庶昌序於日本東京使署

庸庵文編序

余旣序吾友叔耘薛君浙東籌防錄越四月其庸庵文編亦踵成叔耘歉不自足復以書抵余東瀛郵致樣本屬爲勘定庶昌受而讀之卒業三反乃引其端曰古之君子無所謂文辭之學所習者

經世要務而已後儒一切廢棄不講顯并此心與力於文辭取涂已陋而其所習又非古人立言之謂舉天下大事茫昧乎莫贊其一辭道光末年風氣蕭然頽放極矣湘鄉曾文正公始起而正之以躬行爲天下先以講求有用之學爲僚友勸士從而與之游稍稍得聞往聖昔賢修己治人平天下之大旨而其幕府辟召皆極一時英儁朝夕論思久之窺見本末推闡智慮各自發攄風氣至爲一變故其成就上者經綸大業翊贊中興次則謨謀帷幄下亦不失爲圭璧自飭謹身寡過之士叔耘之從公游在同治四年北征勦捻時視余略後而相從獨久先後入幕府者八年文正旣沒復參今傅相合肥李公幕府又踰十年天下不第以高叔耘而益歎頌曾李兩相國之賢事同一家士之居其幕如客得歸自適其

適爲前古所未有也叔耘旣佐治久聞見出於人人紀述論著亦且獨多不屑爲無本之學是編所載如策治平者六籌海防者十敘練兵者一論治河者一議鐵路者一議援越南者四論傳教者一論援朝鮮者一論海防總司者一書僧忠親王曾文正胡文忠程忠烈遺事者十雖其言或用或否其所述或親見或傳聞而中括機宜皆所謂經世要務當代掌故得失之林也尤拳拳於曾文正公之德之業反覆稱述樂道不厭蓋自公沒已十七年嚮之同事諸賢存世無幾流風餘韻漸就漸滅幾無復有能言者得是編而軼事遺聞網羅無闕其義比於陳壽之定諸葛氏故事此尤今日趑然足音庶昌所爲心契叔耘愈久而彌敬者也叔耘辭筆醇雅有法度不規規於桐城論文而氣息與子固穎濱爲近讀是編

者當自得之姑不備論云光緒十四年七月遵義黎庶昌

游歷日本圖經序

處今日而談洋務非身之所履目之所擊不足以爲異身履目擊矣而或不能著書著書而或浮聞勦辭寡要鮮實與不能施於政事皆君子所弗尙也鄒衍之談天也得海外九州形似惟其未嘗身履目擊故止於怪迂之變而已張騫雖鑿空能躬自應募傳至大宛大月氏大夏康居遂通西域三十六國之迹而傳聞大宛西旁國五六其言至今可覆驗衍之智豈出騫下哉而一則以供游談一則以開漢業成就各殊者見與不見之分也德清傅懋元駕部博學多通精攷据往年纂順天府志爲表多至數十余頗善其書蓋表者史之要自遷固而降世多難言之此非好學深思不能

也然以觀今日歐羅巴人之經國精粗巨細無不有表又益悟此
卽孟子條理之謂智者之事也懋元與顧比部少逸奉命游歷
其國有四先之以日本少逸措意新政懋元則兼及古事軼聞時
才六月成書二十六卷分目一百七十而表居十九屬草稿未定
又將有美利堅之行嗟乎余見懋元之游也舟行車息文酒談燕
鉗紙橐筆叩擿不休夜則篝燈展續指繭日眇勤亦至矣昔司馬
子長二十而南游江淮上會稽探禹穴闕九疑浮沅湘北涉汶泗
講業齊魯歷鄒嶧鄒薛彭城梁楚以歸奉使西征巴蜀略邛笮昆
明反覲父於河洛之間始有史記之作今懋元足迹遠過史公而
學又足以經緯所見美之郊東西萬餘里輪車自金山七日行至
紐約願益翔核茲事利病歸爲天子獻余卽以此并君書附贈

言之誼可乎光緒十四年四月黎庶昌序於日本東京使署

日本新政攷序

元和顧君少逸比部奉命游歷日本美利堅巴西祕魯等國以光緒丁亥秋首經日本明年三月成新政攷二卷因赴美有日先以所撰排印成編代鈔胥之役屬余爲序余維日本之與中國名雖隔海其實自西人通商以來輪船履洋面若平地由今日觀之直庭戶聞耳方唐之盛時彼國數遣信使往來慕效華風制度一準唐法行用至千數百年亦稍稍習見增厭矣適會歐美各邦款關互市別開生面明治改元遂舉唐制廢之一尙西法因時制宜不可謂非善變君子之觀於人國也第取其長而已今君居游半載遂能提綱挈領掇其國之大政都萃而條列之凡爲部有九曰

洋務曰財用曰陸軍曰海軍曰攷工曰治法曰紀年曰爵祿曰輿地九部之中又分細目七十有三不繁言費辭使全國維新治迹燦若列眉簡約能賅真大輅之椎輪也庶昌兩次奉使於此亦思有所記述而因循未爲讀是編實滋愧赧矣若君者殆無忝行人之職與光緒十四年春暮黎庶昌序於日本東京使署

弢園經學輯存序

弢園王君隱居滬北今秋將彙刊其生平著述三十餘種爲一家言而別以春秋左氏傳集釋春秋朔閏至日攷春秋日食辨正春秋朔至表皇清經解校勘記國朝經籍志六種名爲弢園經學輯存屬余爲之序余以未睹全書久無以報今始得其朔閏至日攷日食辨正朔至表讀之而後信其書之有用必傳無疑也古之學

者通經將以致用非苟爲訓詁已也本朝人學問偏重攷据乾隆以還風氣尤鶩浩博然易自惠氏張氏書自閻氏孫氏詩自二陳氏禮自江氏胡氏而外求其綜貫全經殆亦無幾春秋一書疑竇實眾杜氏集解義主簡嚴而訓詁稍略又其徵引前賢義訓不詳所自出亦元凱著書之體例使然未可輕議然服賈以降羣儒之說具在別集一編使與杜說相輔抑何不可至於朔閏日至日食之故非精疇人術者不能言歿園始尙經濟詞章繼乃進於經學又幸生今世歷法大明之後能通中西祕奧以上推春秋二百四十年難解之結真如燭照數計此孟子所謂千歲日至可坐而致者也其他洋務論著亦多可采錄見諸施行不僅此輯存足貴而已嗟乎太史公言虞卿非窮愁不能著書以自見余謂虞卿身爲

上卿有黃金白璧之賜爵士之封其後雖與魏齊閒行去趙困梁而以後世情事揆之尙不失爲士大夫有力者之家卽著書亦必有賓客之助窮愁猶未至於甚今弢園子然一身行年六十有二漂搖江海而此經學之成乃在大瀛數萬里外之蘇葛蘭爲余昔所游歷地此尤足異矣以弢園之才之學使得見用於世發皇盛業不且與漢學諸公絜長較短炳著一時門人學徒奔走後先之不暇而顧顛倒困厄至於此極使白頭垂暮之年拳拳爲敝帚之享未知天之生此才何也是余之所重惜也光緒十五年十一月遵義黎庶昌序於日本使署

大小雅堂詩集序

吉林尊生承先生有詩一卷曰大小雅堂集光緒十三年余至京

師先生之子仲淵叔涵昆仲將謀刊刻十七年歸自日本再入京師則集已印行叔涵以余曾辱先生知命爲之序憶咸豐十年先生爲貴西道余謁先生於威甯官舍友人莫芷升庭芝適主先生所時一過從與先生譚藝甚洽頗蒙國士之目是冬余謀赴順天鄉試先生贈金且以詩寵行其後二年先生擢署布政使方是時黔中俶擾苗教兩匪燎原交熾省會尤膺其鋒策勦籌防仰承倂接論者咸以爲難而先生勇深智沈應付整暇所抱雖不獲大施而精力已爲國盡矣軍事旁午之餘仍復典衣餉士不改故常蓋其天性然也同治某年卒於署任篋餘敗衣數領殼薄至不能成斂遠近聞而感泣今二十餘年而先生仲子仲淵部郎叔子山東督糧道叔涵觀察先生之孫奉天東邊道夔良召南侍讀學士準

良□□皆次第登用將以發皇先生之盛業其昌大豈有極哉先生集中黔事固所不忘而於遵義人士尤有夙契若鄭子尹莫邵亭兩徵君趙芝園芷庭兩明經趙二珊大令張半塘孝廉卽余兄伯庸州倅篠庭椒園兩孝廉莫不見於先生之詠歎然則先生之清德美政固黔人所當尸祝而先生之詩則又吾遵義人所宜珍重愛惜視爲拱璧者也先生詩雖不多然分四集其擬古諸作曰南譙集自滁州北上入都曰燕市集自官儀曹曰禮部集自服官貴州曰黔南集余謂先生之詩旣已刊行而先生之詞一卷曰冰蠶者尤爲海內所矜重南皮張孝達尙書至載之書目答問中叔涵觀察若能舉而刻之使與此集並行則兩美必合尤賢士大夫之望已光緒十九年八月遵義黎庶昌謹撰

跋趙曉峯輯犍爲文學爾雅注

爾雅犍爲文學注就余所見知輯者有余蕭客本有臧庸本有王謨本有馬國翰本有揚州女士葉心蘭本並曉峯而六六家中惟馬氏玉函山房本盛行於時其題銜直曰漢郭舍人譔張孝達之洞書目答問從之是不可以無辨馬序云文選羽獵賦注引爾雅郭舍人注張澍蜀典謂卽與東方朔同時待詔爲隱語被榜呼曇之郭舍人也此其題銜所據不知朔傳曰倖倡郭舍人陸氏釋文曰犍爲文學卒史臣舍人漢武帝時待詔其爲兩人甚明所載官階名字詳而有徵缺者獨一姓耳馬氏知其不可通從而爲之詞曰博攷漢時官階當是初爲郡文學後補太守卒史以能談諧善投壺入爲待詔舍人上銜甫以舍人爲名此又以舍人爲官前承

後盾進退兩無所據史記褚先生補佞倖傳祇言郭舍人發言陳辭令人主和說不謂如東方朔之好古傳書愛經術也漢世同名甚多如安國延年勝之之類未易枚舉要之舍人或姓郭或不姓郭俱未可知當從缺如之義今直斷以爲卽倖倡之郭舍人則大誤矣廣韻以舍爲姓亦是望文生義或又以爲卽茂陵郭威亦非何者依漢代上書例推之應題作犍爲文學卒史臣威不當云舍人也況西京雜記於牂柯盛覽作合組歌列錦賦一文一詩皆詳記不遺豈有犍爲舍人注經三卷反不及之理茂陵遠在三輔與郡國自除之例更不合是又不待辨而自明矣余向疑四川嘉定爲漢犍爲地城外有爾雅臺或卽舍人注經之所及攷苕谿漁隱叢話謂嘉州烏牛山在水中昔郭景純注爾雅於此有臺在焉

四川通志亦云郭璞巖在烏尤山上有爾雅臺相傳郭璞入蜀注爾雅於此又王十朋詩云隱迹江山郭景純學兼儒伎術通神蟲魚草木歸箋注何害其爲磊落人據此數說是宋以前亦未有以爾雅臺屬之舍人者然則遵義府志定舍人爲郡產並非借才異地奉爲樂祖其又奚疑

題鄭伯更說文正問

據敘周宣王太史籀著大篆十五篇與古文或異秦兼天下丞相李斯作蒼頡篇中車府令趙高作爰歷篇太史令胡毋敬作博學篇所謂小篆皆取史籀大篆或頗省改秦又興隸書以趣約易而古文由此絕亡新居攝大司空甄豐等校文書之部自以爲應制作頗改定古文經此數變唐虞三代之逸文至是而所存者無幾

矣許君憂之迺有說文之作其曰孔子書六經左邱明述春秋傳皆以古文厥意可得而說又曰魯恭王壞孔子宅而得禮記尙書春秋論語孝經北平侯張倉獻春秋左氏傳郡國亦往往於山川得鼎彝其銘卽前代古文皆自相似其詳可得略說及傅易孟氏書孔氏詩毛氏禮周官春秋左氏論語孝經皆古文也其用孔氏壁經爲主甚明故全篇體例篆文之外別出古籀者卽所謂與古或異也別出小篆者卽所謂或頗省改也六朝以降不知說文本字之卽古文誤以爲大小篆孫淵如氏已悉其非惜未嚙發斯義不謂精審如段氏亦沿譌襲謬直以秦篆當之於許君存古本愆去之殊遠豈所謂涉獵者博多所牴牾與伯更一一疏糾其誤每立一義堅卓宏通匪惟善讀許書實段氏之諍臣也已君家小學

冠絕南中若能盡發所藏別譔巨編緯以矜慎之思使許學毫無遺憾不更善之又善乎

跋楊龍友畫

龍友畫爲黔人冠余物色多年丁亥秋始於京師得山水絹軸幅高工部營造尺四尺五分寬一尺四寸五分上下截均有斷裂痕題崇禎戊寅冬日文驄戲墨鈐龍友二字印畫水流亂石閒一橋右轉入森木叢中斜露城堞郭外石坪上人家三兩圍以修竹映帶古木兩叢少偏則峯巒拔起老松離立巖際波光蕩其外蓋江邊側視景也特不能定爲何所攷龍友以崇禎元年戊辰冬侍其父霞標參政至吳門別於虎邱劍川上自石城解纜畫江行十二幅自爲記明年復爲天台雁宕之游作台宕等圖年纔三十三董

文敏已驚爲出入巨然惠崇有觀止之歎此幅又在其後十年距成仁時祇八年耳其意態變化益進神明可知余雖無鑒古識然視其品骨蕭澹簡遠似當在大癡雲林之間文董不逮也龍友大節彰著全家殉國至三十餘口世不以此增重而獨於其爲士英戚故訾警未已士論之隘豈天下之至公也哉撫斯畫不禁喟然增觸已光緒十四年戊子正月旣望黎庶昌記

跋悅坳遺詩

表兄鄭子行余作傳稱爲山人者也君爲子尹徵君之弟以布衣終家貧食力屢空晏如善形家言嘗於洪水埧點燈山下基兆謂與堪輿書中坳去聲腦天才者合君得之大喜自營生壙其間種松數百晚歲遷居山麓以近之光緒十一年余奉諱旋里時君沒已

七年一日往省君墓登點燈山乃觀所謂坳腦天才者禮故人之墓有宿草而不哭焉因就其家求遺稿得詩百餘首當咸豐六七年時君與余兄弟過從甚密及庚申歲暮寇氛不甯君勸余謀赴順天鄉試先之武昌依余從兄伯庸遂別不復合併其後服官江左益遠游海外數萬里之歐羅巴書問曠絕久不相聞君獨時時念余不置形之詠歌以達其意睹茲遺編使人愴惻不能自己君讀書雖不多其詩純任天籟頗近嚴羽別材之說異夫世之雕章琢句以爲工者蓋亦擊壤誠齋之支與流裔也今彙而刻之題曰悅坳遺詩並發斯義使讀者略其辭而觀其意云光緒十四年九月黎庶昌識於日本使署

沙灘黎氏家譜敘

吾黎氏世傳系出唐京兆尹幹幹戎州人今四川敘州府按蜀碑記唐黎幹墓表在宜賓縣西岸石

馬溪之上今幹之孫植按通鑑唐文宗太和九年十一月甘露之

石馬尚存植按通鑑唐文宗太和九年十一月甘露之植植不同不知即幹孫否又按徒居江西新喻蒙山至宋初有得

敘者官蜀昌州刺史昌州今後家廣安軍渠江之金山里按渠江

為軍治咸道中更廣安軍為甯西軍元升傳若干世而生元元生

廣安府仍治渠江明降為州省縣入州

肇基肇基生永陽永陽生本春本春生佑佑生朝邦朝邦遷遵義

是為入黔之初祖按遵義漢牂牁郡牂牁縣地唐為播州乾符三年

使遂世先是明萬歷十年朝邦祖命懷仁祖首遷貴州之龍里衛

有其地居久之意弗善也厥後二十九年而播州楊氏平地入為遵義平

越兩府分屬川貴更徙卜遵義治東八十里樂安水上之沙灘居

焉沙灘者宣慰使楊應龍官莊也樂安水即元和郡縣志夷牢水

下流入烏江漢志所謂延水者也

按漢志犍為郡漢陽下云漢水東至營入延符下云温水亦南

至營入江江蓋延字之誤水經注引作延是也

始吾祖自蜀遷黔之龍里已著籍為黔人

居十九年而徙遵義還入於蜀越百有二十六載而當我朝雍正

五年 世宗皇帝丁未之歲割遵義隸貴州故又復為黔人也黎

氏家世微薄自明以來累十餘世閱兩朝二百七十餘年而族姓

不甚蕃衍今又兵革之後轉徙無常懼其久而失攷乃取舊譜損

益之闕其不可知者而存其徵實者次列系屬斷自十一世為止

使後有所紀述焉譜自高祖以上祇系本支高祖以下之子孫則

分房並列後嗣作譜權輿也又別揭事實生卒娶葬著錄於後世

愈近則愈詳事勢宜然前不盡合於歐蘇大儒之義法

歐陽氏譜見居士集

三十三卷蘇氏譜見嘉祐集十二卷

亦與近世族譜稍異私家紀載義主於詳實備

忘已耳不必強同於古也光緒二年丙子十月朔庶昌謹述

附錄舊譜統紀圖

地皇黃帝有熊氏姓公孫名軒昌意 顓頊賜姓姬祝融名黎掌

郇後以名為姓黎數十代移京兆世襲侯爵失紀又數十代黎疑

魏太武時賜爵容城男加鷹揚將軍後為燕郡守乃遷北京生黎鎮襲爵為員外散騎侍郎生瓊襲爵為

生景熙將軍儀同三司金紫光祿大夫三十五傳失紀黎象乾西

臨江府尹因居新喻十傳失紀黎昭道州刺史至黎全登第官黎鳳官諫黎

相官巴州三傳黎口失名官其傳失紀黎得敘官蜀昌州刺史遷廣安生黎

靖官光祿三傳失紀黎錚官直再傳失紀黎模官教論生黎炤福

清通判至大理寺卿生黎墩官兩浙未至元無紀復蒙黎映文從康茂才征

州刺一傳失紀黎光霽寺官大理生黎瑩進士三生黎泰解元官翰

西中再傳失紀黎元上元令遷升生黎肇基大理府經歷生永陽

途卒廣安復業生本春生生佑進士生朝邦

右舊譜所列之圖如此按譜係四世祖先白公之弟名烈字繼明者手搨成於康熙六十一年僅有寫本未刊嘉慶道光中世父雪樓公及先資政府君屢欲修訂而未果譜載統紀圖一篇其敘明以前世次或繼或續原序雖言出自廣安肇基祖祠堂碑而不知其事之多不足據也蓋黎之先出於顓頊高陽氏楚語曰少皞之衰也九黎亂德民神雜糅顓頊受之乃命南正重司天以屬神火正黎司地以屬民使復舊常其後堯復育韋昭注長也重黎之後不忘舊者使復典之以至於夏商故重黎氏世敘天地而別其分主者也其在周程伯休父其後也當宣王時失其官而為司馬氏國語原文

止此史記太史公自序引同按章懷太子賢後漢書張衡傳注云重少昊氏之子黎顓項氏之子國於鬻其始封

疑在夏殷之世說文云鬻黎之古文殷諸侯國在上黨東北商書西伯

戡鬻是也

按漢志上黨壺關應劭曰黎侯國今山西潞安府治杜預注左傳同西伯戡鬻之後未知其復立黎侯與否世

無明文春秋時狄人迫逐黎侯而奪其地以地理證之當即西伯所戡之鬻也周桓王時黎為赤狄潞氏

所奪黎侯出寓於衛而作式微旄邱之詩

小序式微黎侯寓於衛其臣勸以歸也旄邱責

衛伯也狄人迫逐黎侯黎侯寓於衛衛不能修方伯連率之職黎之臣子以責於衛也

魯宣公之十五年晉

侯治兵於稷以略狄土立黎侯而還此皆三代逸事見諸經傳灼

然可知故黎氏言受姓大率本之黎侯秦漢以降史氏無徵而黎

亦不顯獨漢書功臣侯表有軼侯黎朱蒼高祖二年以長沙相侯

七百戶為今湖南湘潭黎氏所祖

按黎朱蒼史表作秩蒼又百官公卿表景帝中五年軼侯吳利

為奉常齊召南謂此表軼侯不至魏太武時有黎疑者疑出魏書姓吳而其子孫亦無名吳利者

氏族志之素黎氏從破平涼有功賜爵容城男加鷹揚將軍其曾

孫景熙宇文時仕至車騎大將軍儀同三司見北史儒林傳唐時

黎幹為京兆尹唐書北宋黎錞字希聲與蘇子瞻劉貢父友善見東

坡志明天順閒狀元黎涓官至南京禮部尚書卒諡文僖李東陽懷麓堂

集有神道碑明始各有事蹟可述號為聞人譜列景熙錞為先世

祖而反遺世所傳出之京兆尹幹不載而又載象乾為江西臨江

府尹抑獨何與攷景熙河閒鄭鄭當人地望頗不相及象乾為府

尹既在唐世而今之臨江府為唐吉州地至宋置臨江軍乃始有

此稱唐世不得而有尹也惟錞為渠江人或僅屬吾宗或果得敘

後而為本支之祖無他譜牒可證其世次亦不得而明也譜又云

黎元為上元令今攷同治十三年江甯汪士鐸所撰上江兩縣志

號爲翔實明代縣令亦無黎元其人然則舊譜之失實以此益知其多矣方嘉慶二十三年先資政府君隨侍王考府君自浙旋里道出江西經新喻宗祠據譜釐正亦僅推至幹孫常侍植而止世歷千祀代更十數凡在王侯將相之家廢墜絕滅奕裔不能舉其氏族者何可勝道而況在於士夫編戶之氓乎其數典而忘事勢適然無足爲病君子亦闕所疑而已今悉自朝邦祖以上不述述始入遵義迄於光緒己丑凡二百八十九年而黎氏事蹟具是矣其舊譜圖慮貽後嗣惑因附論正之使子孫知所辨訂且識誣託之貽譏宏達云光緒十五年己丑十月庶昌重訂於日本使署湘鄉師相曾公六十壽序

昔者孔子之道大而能博非徒垂空文而已也其在弟子有能政

事者矣言語文學者矣夫于獨嘗薦顏淵爲好學而與其用行舍藏及論爲邦則損益四代垂法百王問答與眾殊科彼顏氏者其用未施道不顯於時也然自七十子之徒咸推服之未嘗聞異辭蓋於其所素存必有以驗而然也及孟軻氏修仲尼之術明王道黜諸子荀卿晚出著書益崇儒效而世或莫之信抑獨何也後代儒者輩出言愈尊效愈寡至益重以闊遠爲世疵詬不亦旣過矣哉公之在翰林卽病世儒舍本驚末以寡要乏實取譏恆用自步而反求諸修己治人之原以庶幾乎孔顏坐言起行之旨其規模意量固已閎遠矣及後在軍又爲聖哲畫像記具論學問宗主得失之宜明儒術之足以經緯萬端稽諸室而從播諸市而行持義甚備蓋自 宣宗皇帝平治之朝公卽毅然有以任天下之重及

粵賊洪楊亂起倡率義旅卒然起一方犯莫大之難而不作厥後
兵敗九江厄於南昌困於祁門蒙難艱貞百折而無所於悔十年
之間卒誅凶暴削平大亂反正國家自江漢常武以還漢唐中世
匡復討伐之勤未始有若斯之烈者也東南既定公患兵革不休
於是鑒古矯失以息事甯人爲天下帥罷將士還隴畝沖襟元覽
倏然不改儒素之常舉蓋世勇功智名藐若浮雲之飄於太虛而
曾不一與斯豈所謂若無若虛知變化者邪及擒賊再平 天子
垂念畿輔吏治些窳待公以爲治佐之股肱未及期年剔獄以踰
萬數其他若鹽漕河防軍實次第奮修振槁扶衰令馳若流吏飭
民齋風化肅然又豈所謂期月已可者邪蓋讀孟荀諸大儒之書
而知聖人之道尊及觀公所措注設施又益信聖人之術確乎其

可行俟百世應時變若爲良造之御縱橫險阻而不失其馳也歲
十月十一日公登壽六十其夫人先以二月二十九日躋壽五十
有五元德齊祉世以爲難自在朝之宏公貴人下逮百僚師士龐
眉黔首異方冠帶之倫莫不延跂以望公之康強純固得恆倚爲
重而頌以無疆之休若古稷契皋陶伊呂周召方叔召虎仲山甫
衛武公其倫者爲辭殆不可勝紀庶昌等從公久雖遠在數千里
外獨可無一言以壽於是具道向所以服膺於公者以爲禽犢之
獻云

此文與四川井研王子蕃鳩
訓聯名亦公門下士也自記

送姪尹融之吉林序

吉林於古爲肅慎氏地自周武王時以楛矢石砮入貢魯史誌焉
度其闢國在夏殷以前遠於齊魯燕召大封且數百千歲而說者

曰吉林卽古雞林長白障其東南松花混同界其西北山川積高
神靈隩區帝王者所應運而興也 聖清受命滿洲分立五部其
地適當三姓甯古塔吉林之中而吉林爲扈倫四部長最稱雄桀
地利尤勝 國初迭設昂邦章京將軍都統以治將軍雖建號甯
古塔而常鎮守吉林吉林爲省自此始雍正乾隆之際稍改舊觀
嘗一設州縣矣未久而卽罷其時邊患未形一切得沿滿洲政俗
簡節疏目以長以養百有餘年而事變乃大異於古 今天子嗣
位慨然以邊防爲急務 詔將軍與督辦大臣經營險塞練軍實
起屯戍開郡縣繕城邑將以通商訓民一準漢法治之比於十八
行省於是吉林始設道府額缺二州縣同知通判額缺六於選人
中揀發所謂正途者需次補授今年夏 朝廷猶以正途爲乏著

令吏部籤掣卽用人員吉林特增一籤而吾姪尹融以進士與選
是非其幸與男子始生桑弧蓬矢以志天地四方雖適萬里猶戶
庭可也況爲 天子守土吏往卽邠邠肇基之域一旦撫有人民
攬其江山城郭土著射獵高步遠引倜然想望 興王之會其於
吏治必有以進乎古矣汝往敬之哉尹融頃來日本求示長民之
術余旣告戒一二別爲序以壯其行光緒九年八月

贈趙殿撰序

聖清受 命起滿洲以總壹海內凡百制度皆有改作獨取士一
準明制賓興三載大比天下羣士秋試於省闈謂之鄉試鄉試中
式明年春試於禮闈謂之會試會試中式成貢士 天子御保和
殿策而問之謂之殿試殿試中式一甲三名曰狀元榜眼探花謂

之鼎甲得者以爲殊榮而狀元尤絕異可貴重極天下之所慕歎者也自順治甲申迄於今上戊子凡二百四十五年舉狀元者九十八人不爲不多東南大省縣或至數人而西南邊徼之地至乃合數行省曠數百歲而不得一與又何其難也光緒丙戌科吾黔貴陽趙君仲瑩實始以狀元及第魁天下中外尤以爲異士在黔聞者相與引觴稱慶有若榮寵之被其身雖余亦不自知所以然余與仲瑩未相識丁亥仲冬邂逅於上海睹其容溫然以恭挹其氣粹然以和蓋成德者器也雖然使仲瑩由是翔步清華從容平進而爲天子文學侍從之臣以馴致大位皆其資地之能以自致不足爲仲瑩異吾願仲瑩之有志於道也昔宋王沂公答劉子儀之戲曰會生平志不在溫飽明王文成入京師諸貴人勉以

射策甲科爲第一流文成笑謂恐第一流當是聖賢茲二賢者足以法矣夫黔天下之右脊也其山川清淑旁魄之氣鬱極蓄久而於仲瑩發之宜益思所以副生才之意沈潛乎仁義涵泳乎詩書直養乎剛大之氣以待勳業之可成此殆有天焉必非偶然者余與仲瑩別一年所誼不可終默卒書鄙懷以贈光緒十五年春王正月同里黎庶昌譔於日本東京使署

漢孝女先絡碑

孝女先絡者符人也漢永建元年十二月父尼和爲縣長趙祉拜檄謁巴郡太守過成瑞灘溺死求屍不得絡年二十五有子女二人爲作錦囊分金珠繫頸下至二年二月十五日尙不得喪乃乘船至父沒所自沈其夕見夢於其弟賢告曰後六日當與父屍俱

出至日果父子浮出郡縣異之表尙書遣戶曹掾爲之立碑以旌誠孝人爲語曰符有先絡熨道張帛求其人天下無有其偶者矣事具華陽國志後漢書水經注獨戶曹碑久軼不傳越千七百六十有三年郡人黎庶昌譔先絡爲黔故首以其行絕特不世出不宜聽黯黹輒依度尙弔曹娥事別立石刻之仁懷漢健爲符故治安樂水會其辭曰

符女先絡令善猗儻天桃之子宜室宜家順元永建有父尼和拜檄上謁郡將於巴遇灘而隕腹葬魚蝦女心苑結又可奈何誓求父死汎逐洪波六日兆夢負屍江沱嶠然不滓翩翩懷沙蛟龍所畏鬼神所嘉繫彼孝女婉如隣華朝榮夕悴萬口咨嗟哀感行路女心則那父一而已匪恤其他楚纍被放自沈汨羅城崩野哭杞

婦不鬻髮道張帛上虞曹娥視彼孝女孰爲其多滔滔江流萬折而東一往不復身則與同抗此貞厲以矯世風亂曰湍流悍瀨駭可噫兮窈窕麗質棄如遺兮魂靈揚波永抽思兮精貫金石耀坤維兮韃牂之寶名馥菲兮千載未沫紛葳蕤兮江水可枯石不夷兮 大清光緒十四年歲在著雍困敦月在畢陬日在丙寅 誥授奉政大夫黎府君墓表

府君諱恂字雪樓晚號拙叟遵義黎氏黎之先出自唐京兆尹幹幹孫植仕爲散騎常侍自河南徙居江西新喻蒙山於是爲新喻之黎宋初有得敘者官蜀昌州刺史後家廣安軍之渠江於是爲廣安之黎傳若干世至朝邦明萬歷中始遷貴州龍里繼遷遵義沙灘又爲遵義之黎朝邦四子長曰懷仁懷仁生民忻民忻從梁

山來知德高弟胡生游傳瞿塘易學於府君爲六世祖再傳生高祖諱天明天明生會祖諱國柄國柄生祖諱正訓廩貢生正訓生考諱安理乾隆己亥舉人山東長山縣知縣 國史采列孝友傳者也以府君貴兩代贈奉政大夫祖妣氏鄒妣氏楊皆宜人府君生而沈毅寡言氣蓋一世讀書取明大義不屑屑治章句本諸身而可從質諸世而可行耿介離俗高視在王仲任徐偉長閒也中嘉慶庚午鄉試舉人甲戌進士改知縣籤發浙江累充丙子戊寅己卯鄉試同考官補桐鄉縣知縣在官五年考長山公自山東解組來觀政調歸安未行丁父憂歸家居十四年道光癸巳再起復揀發雲南充乙未丁酉鄉試同考官迭署平彝新平知縣補大姚縣知縣署雲州沅江姚州霑益等州知州題升東川府巧家廳同

知咸豐元年致仕歸里其在桐鄉也一以不擾爲治正獄訟弭盜賊寬賦役釐漕務舉邑先儒張考夫願學備忘錄以詔學子暇則修其墓遇吏民如兒奴稱譽翔洽在雲南凡三弭回變新平彝婦蔡刁氏謀反事覺府君自省馳三晝夜勒兵捕勦廣設方略擒蔡母子及僞署總督以下四十餘人斬蔡釋其餘遂解散緬甯回與兩湖客民械鬪屢期復仇鎮道至姚州諭撫回故以市羊漢人搆釁擁眾千餘脅就理鎮道不敢出府君坐堂皇叱其酋曰汝曹欲反邪皆伏曰不敢曰旣不敢爲一羊孰曲直當訴我此攘攘何爲與亭決立麾眾退大吏不以府君爲能竟撤任明年使領運一起京銅重困之甲辰川匪王某作亂渡金沙江入大姚據仁和街府君督團練拒守擒斬六百餘人賊潰踰月姚州花衣村回復圍白

鹽井逼縣境再率團練創走之總督林文忠公則徐大善其法下他州縣仿行以卓異薦浸欲嚮用而府君卽引疾去矣自先王井田之法壞而廉恥道消士惟徒手仰給縣官食租衣稅以放其亡等之欲故有一朝失職若不可自比數人類者矣嘉慶道光之際海內承平無事民庶豐樂正世論富貴利達之時而江浙又士大夫仕宦豔涂也府君於是時年甫強仕卽引疾家居浩然有箕穎之志及再起家爲令非意所好卒守止足之義請告懸車一返初服以視世君子奔命利祿之場苟患得失老死芸芸不休至或禍敗相隨屬者其賢不肖爲何如也府君歸休四年遵義亦亂比連歲不定舉家避之板橋桃溪源桐梓石阡所至焚香展卷翛然而已同治元年里人結寨於禹門寺因就居焉明年癸亥八月二十

九日卒春秋七十有九配周宜人仁勤淑慎偕臻耄耋年八十三卒合葬車田芝山子男五兆勳湖北隨州州判兆熙國子監生兆祺軍功保舉知州 賞戴花翎兆銓雲南姚州知州兆普女三長適鄭珍次適楊華本次適朱正儒孫男十三人孫女九人曾孫男七人府君於庶昌世父也沒二十年而墓道之文未具懼其久而失真特述府君高志介節揭諸阡原使來者矜式若其他懿言軼事別見鄭珍所爲行狀不備書也庶昌謹表

先大夫側室劉孺人家傳

孺人姓劉氏貴陽人先府君側室少時割股療親疾歸府君以才敏見稱尤篤愛於諸子始吾母吳太宜人頗病子女繁而孺人獨不育維時家貧也無他僕婢孺人輒以身兼之每一子生吾母乳

嬰者孺人卽哺其孩者羣小更迭在懷誠求保抱纖悉必周一忘其非己出也庶燾初就外傳不見孺人卽淚涔涔下不發聲孺人不得已日攜女紅往他室就治使從門罅壁隙閒望見之庶燾且讀且窺乃喜率數歲以爲常其在印江庶昌甫四歲患羸弱竟日號咷孺人百端曲慰府君時或抱持緩步庭中孺人舉巨椀實粉養隨其後庶昌以目注視不食亦不使去往來窮日夜無休時他煩數類是積一歲病瘳而孺人未嘗有倦容比長從師讀溺愛一如庶燾必旦晚挾書冊躬往送迎之以故歲十餘猶隨孺人臥起不辨爲吳太宜人所出者恩誼若與吾母等府君之沒也實道光壬寅十二月諸子孤露愛憐之尤甚謀所以撫翼者萬方如是且十年而諸子以次成立讀書發名孺人之力爲多其後精力衰得

腳氣疾不良於行積勞所致也猶時時助吾母檢校家政不遺餘力每夜深人靜星月在庭僕婢昏昏睡去孺人必獨自扶杖起行謹飭門戶乃就寢其勤動尙如此再踰年卒年五十有九當府君之沒旣歸而家益貧吾母與孺人私計曰今貧如是諸子又小弱將何以自存宜各勤手指於是吾母任紡織孺人任鍼黹賴以枝柱不墜至末年稍稍綏裕矣自咸豐丁巳以後地方多故板蕩播遷孺人乃復窮約遂至於沒諸子及今追思鞠養慈惠之德莫知所爲報流涕而不能忘也

從兄伯庸先生墓表

同治二年癸亥八月二十九日我世父雪樓公告終明年春兄自隨州州判任內奔喪旋里年六十矣先以水陸臧頓失飲食節至

又哭泣摧哀傷彌甚既葬疾作八月二十日亦卒春秋六十加一十一月初三日耐葬車田芝山世父墓右兄諱兆勳字伯庸晚號礪門居士九歲卽能爲五七言詩持贈同輩長老驚歎旣冠儁邁有奇氣不肯役志帖括世父亦雅不欲強之兄進則奉槃御食左右就養退則與外兄鄭子尹珍同事研席銳志求通於古而趣嚮各殊子尹稽經誼史志爲通儒兄則顛力於詩上起風騷訖於嘉道無不諷味以爲詩者性情之極則也治之六七年而業日以精道光壬寅癸卯閒世父出宰滇南會獨山莫子偲友芝奉其尊猶人先生之柩東葬吾里青田山去黎氏舊廬六里而近三家者互爲婚姻又同志友善兄於是方領家政外喜賓客內督諸昆季積苦力行井井有條理日夕發書與子尹子偲相違覆以詩古文辭

交摩互勵風氣大開久之羣從子弟服習訓化彬彬皆嚮文學矣
年二十四補縣學生員十試於鄉不得志於有司始援永昌軍例
報捐教職己酉署石阡府教授又三年補黎平府開泰縣訓導最
後以防苗功選湖北鶴峯州州判至楚檄署藩照磨兼鹽庫大使
同治元年調補隨州州判時喪亂之後兄以薄宦羈旅鄂疆位卑
而祿微權輕而事減恆不能以通其志悲愉欣戚一寓於詩閒與
監利王子壽柏心龔子貞昌運陽湖徐子楞華廷中江李眉生鴻
裔往來唱讎訕譏笑歌肝膽豁露多不平之鳴蓋才人不得志於
時者之所爲也少作千數百篇至老刪削且盡僅存四百餘首弟
輩強編爲侍雪堂詩鈔八卷尙非意所欲留早歲刻者有葑煙亭
詞四卷餘著多未成家世具世父墓表配阮氏妾陳氏梁氏無子

以叔弟兆祺子汝弼嗣孫二兄與鄭莫兩徵君同時並興名在其
次而知之者少獨今吳縣尙書潘祖蔭稱之曰鄭子尹莫子偲黎
伯庸皆黔之通人也眉生亦亟稱之曰伯庸天機活潑灑落塵埃
吾不如也因爲次敘厓略俾異世治黔故者有所攷論焉從弟庶
昌表

仲兄椒園墓誌銘

仲兄諱庶蕃字晉甫別號椒園長庶昌八歲道光二十二年我君
見背家貧不能自拔長兄篠庭念門戶繫兩弟董督之愈於成人
期在必達其志事所願欲其爲教之方雖嚴師弗如兄亦服教惟
謹敦自勵飭不樂以凡子居與庶昌並案讀屬文必盡夜分每至
月落山寒窗紙映黃金色竹露滴瀝有聲唵哦未已庭有古橙我

君所手植時或黃團下貫大聲砉然擊屋瓦皆碎爭啟戶往拾返
讀如初恆持用笑樂如是者三年業大進中咸豐壬子鄉試舉人
踰年北上公車至澧州道阻不得達歸而盡棄其學黔亂起喜言
兵事治團練於鄉嘗一從縣令江君炳琳勦賊甕安之上塘軍潰
大爲羣賊所困徒步歐血賴天幸得馬以免然無功事弗克上兄
亦灑然不以屑意久之苗教各匪數犯吾里兵不得休同治元年
再入殺戮彌甚刳人若羊豕燬廬舍無貧富貴賤賢不肖皆一掃
括絕盡人人露立兄乃率鄉人結寨禹門寺固守與賊相持凡五
年楚軍入綏陽始解論功保擢候選知州庶昌之從曾文正公江
南也遣使迎吾母兄亦厭兵事挈家來依改官兩淮鹽大使至揚
州候補光緒二年庶昌奉使西洋七年再使日本迎母居滬上兄

往來其間十年甲申母卒偕喪歸里營葬訖將返揚州喪未終也
庶昌諫不聽卒以十二年春載病出抵揚百許日七月初五遽沒
於旅寓年五十八子尹禕從行卽以是年歸柩卜葬小青欄林娶
駱氏吳氏妾譚氏皆前卒妾丁氏子二尹樵次卽尹禕女二殤孫
二初咸豐中兄以雋才績學爲學政翁文勤同書所賞許必以詩
鳴及至金陵邗上詩益豪且多友人莫祥芝爲哀刻椒園詩鈔六
卷雪鴻詞二卷沒後又得遺詩若干首他日將並刻之彙入家集
銘曰

樂天知命無入不宜此聖賢自得之學豈吾輩所能幾但苟識其
理亦可少安窮約守分不移兄之再出病已難支行不逮禮弟諍
不篤乃遂至於斯而止於斯乎噫

劉君墓誌銘

君諱仕元字善伯其先江西人明萬歷時有名明德者從劉綎征播播平居士崖墳遂世爲遵義人與吾黎氏同時占籍樂安里相距六里而遙然上世未嘗往來也君於咸豐初遣子漢英就先兄魯新椒園學始爲通家甲寅八月桐梓姦民楊龍喜作亂圍郡城里氛日迫羣情搖搖若懸旌君首倡團練以拒賊怒滋入境持兩端者多不便反訾君所爲君曰禍由我始當由我止卽夜執其人火其居率丁壯出禦截嶺而守賊知有備不敢犯竟去眾乃憬然悟賊可擊也同治元年黃白號匪交熾四郊多壘鄉人就禹門寺結寨自衛主之者先兄椒園及從兄介亭季和君命漢英協力戰守與賊相持年餘先後卻走僞秦王朱民悅僞元帥聶定邦叛將

吳元彪等大得其助然君爲人平時姁姁然遇物恭謹氣若不勝
衣言不能出諸其口見者不知其能任事如此人固未易測也晚
遭目疾喪明光緒十年十月二十六日卒春秋七十明年九月卜
葬綠塘河西潘家灣辛山之向曾祖春乾壽九十有六五世同堂
祖登東父正盈以孫貴 覃恩貤贈文林郎妣梅氏贈孺人配張
氏子一卽漢英同治丁卯舉人普安廳教諭女一孫家壩孫女一
曾孫鴻澤將葬漢英以銘請誼不可辭久乃塞諾銘曰
善人劉君藏於此土以施後昆世甯其宇

詹節母墓誌銘

咸豐七年節母詹孺人踵吾門而告於余兄篠庭曰妾夫不幸死
於非命今二子幸漸長大家鮮近親謹遣詣門下累先生先生若

聽哀微志教督之使有成所以貺詹氏甚厚余兄敬諾越八年而節母卒又九年爲同治癸酉子廷鏞舉於鄉又六年廷鏞以大挑知縣揀發甘肅具狀來請銘節母綏陽吳氏粗通書史父朝東舉人其母若姑皆余姑也姑以姊妹結媼重親而節母適遵義爲詹氏婦婉嫻貞靜入門卽有賢譽道光二十三年夫鈺漁於塘溺死父母具存節母哭之慟已而曰命也吾不敢以輕殉傷二老心時年二十二卽屏去曼飾銜悲飲辛嚴事尊章曲盡子職逾於夫子翁姑大稱孝婦數年翁姑亡始專家政詹氏於吾里爲單家素號饒給自其翁大人在時頗以博負進而未察及是眾負事白節母議鬻田鄰里或諫其名不美節母曰吾非不知第不鬻田則債莫能離子母相權不數年而詹氏田且盡庸有利乎卒割償三分之

一後皆贖如舊貫眾於是歎節母遠識其母遭家落又奉迎而養之移所以事姑者事母視微聽聲一承以志治家尤謹於法度喪祭有經賓客有奉閭里親族有賙僮僕手指各子常程條次精密半菽寸齋尺布段薪必飭必躬不言而教行內和而外穆以故升其庭肅肅如也入其室訢訢如也當是時節母賢聲播聞乎兩邑雖以士大夫詩禮篤訓之家內視歛然咸自以爲不及也咸豐中遵義數有寇警鄉人烏驚避之以此破家者甚眾節母旣遣子就傅單獨一身經營督察懷刃自衛多所保完十一年黃號賊大至室廬被毀始徙居東隅里明年再徙禹門寺寨造次顛沛中姑姊妹之來依者族黨之流離不振者猶復有無與共量力濟施眾於是又服其仁嗚呼節母之行卓然有以饜服人人若是於古當魯

母師陳孝婦之倫節母非有所慕效而然也行乎心之卽安而已
同治三年二月十二日節母卒春秋四十有三光緒四年十二月
合葬大林子二長卽廷鏞次遺腹生廷謨銘曰

繫彼婦行德言容功四者具備維德之崇孰爲女宗婉婉士風詹
氏之有心敬節母六星未周隕墜厥耦子荷婦負協於姑舅齊家
之教自古難奚桃李不言晚而成蹊賢行絕出輿誦實題貞此苦
節彤管有悽俟論史氏視我銘辭

楊先生墓誌銘

先生諱開秀字實田別號雲卿姓楊氏綏陽鄭場里人自少博聞
強記以制舉文雄於時每一篇出壓其鄉之長老長老咸驚歎屈
服曰楊君文六藝精華也然試輒不售年五十餘始中道光己酉

鄉試舉人一上公車遂絕意仕進專以經術教授鄉里道光末年嘗就吾鄉禹門寺設塾士聞先生名奏而受業者數十人寺舍皆滿余兄庶燾庶蕃從父兄兆銓及身皆列弟子籍兆銓庶燾又先生女壻也初庶昌將詣塾家貧不能具脩脯先生聞而呼之曰孺子來毋苦時年十二令植案講席旁與其子對坐東西嚮晨興入塾問先生安否就受書周禮禮記悉出口授刻程晷肄業必使背誦爛熟乃已讀有誤聞聲糾之不失一字如是者數年獎藉誘掖門牆益宏其後徒黨散歸各以所得傳授私淑楊氏學日盛里中爲之謠曰禹門寺讀書堂孰爲師黎與楊六十年前後光兩夫子澤孔長蓋自乾隆中吾祖靜圃府君設教禹門後不復見此盛已六十年故云爾先生以同治二年二月二十五日卒春秋六十有

七其年月日葬鄭場楊家村宅右曾祖某祖某父某妣某某氏配
王孺人繼配裴孺人子二遇庭縣學武生遇澤縣學附生吳元彪
反踞綏陽縣城遇澤往乞師綦江行至七寶寨卽夜寨陷於賊死
之女六長適吳某次適黎兆銓黎庶燾次適張鼎新次適丁某居
某寨亦爲賊陷自縊死次適陳某孫二人先生爲人內行篤修而
外甚和易與人游汎愛無町畦尤澹於嗜欲家貧食力屢空宴如
其視富貴軒冕若野馬塵埃之不足汙我也居恆課士畢下帷靜
坐神識淵然超乎萬累之表近古湛冥者與性好學然亦不常見
其讀書晚乃學奇字頗疏記古文異訓綴成一家言尙未卒業余
時少未知先生所爲書可貴不卽副遭亂遂滅今求其家無有惜
哉銘曰

豐其德潤其宅閭然自修不物役嚴君平鄭子真蘄而伯仲思古人

鄭兩山人傳

山人名珽字子行珽字子瑜姓鄭氏遵義人徵君珍之弟也讀書略通大義不肯竟學棄去家貧薄有田數十畝力耕自食道光末徵君以高名宿學爲西南儒宗郡守以下禮聘造請士大夫望塵款接惟恐失顏色山人獨默默寡譽以布衣終姓名不出閭巷老屋柴門蕭然物外於富貴人一不識也子行隱於堪輿子瑜隱於醫二人者各挾其術周旋鄉里時時以種德活人爲事頗爲人解紛眾德之民有隱曲及構爭訟事兩造莫能平皆曰願待鄭山人一言而定其見推信若此性嗜釣無事率嘗在樂安江水上藉草

地坐或據危石雖斜風細雨不歸志亦不在魚也子行所居曰小河溝子瑜所居曰望山堂距吾家里許咸豐中余兄篠庭以病廢與山人交最篤無三日不過視過則必命酒肴取娛劇談雄論談詡並作極夜分乃罷去折竹然炬以行明旦視之則又腰笮篋短蓑岌笠草屨持釣竿出矣子瑜先卒年四十三子行卒年七十黎庶昌曰山人之祖諸生鄭學山父布衣鄭文清兩世精醫皆有隱德布衣又余姑夫也尤善飲喜釣以謂釣者養生具非他玩物比然則釣亦豈其家學與

莫徵君別傳

徵君諱友芝姓莫氏字子偲別號邵亭晚又稱聃交貴州獨山州人父與儔以翰林院庶吉士再改官爲遵義府學教授君從來居

遵義爲人默然湛深與吾里鄭徵君子尹珍同志友善篤治許鄭之學因子尹以交余從兄伯庸兆勳三人者至莫逆也君家貧嗜古喜聚珍本書得多與東南藏弄家等讀之恆徹旦暮不息寢食並廢身通蒼雅故訓六藝名物制度旁及金石目錄家言治詩尤精又工眞行篆隸書久之名重西南學者交推鄭莫中道光辛卯鄉試舉人丁未會試公車報罷與曾文正公國藩邂逅於琉璃廠書肆始未相知也偶舉論漢學門戶文正大驚叩姓名曰黔中固有此宿學邪卽過語國子監學正劉椒雲傳瑩爲置酒虎坊橋造榻訂交而去咸豐十年君以截取知縣候選在都是時端華肅順方擅權欲收召天下知名士藉助聲譽介人來求君書不應又招致授讀子弟亦辭謝之居無何且選官睹東南寇亂不樂一旦棄

去往客太湖胡文忠公林翼所爲校刻讀史兵略胡公卒又從曾
文正公安慶黔亂益無所歸述影山草堂本末以見志影山草堂
者君所居獨山舊廬也自是客文正者踰十年江南底定寓妻子
金陵徧游江淮吳越閒盡交其魁儒豪彥與南匯張嘯山文虎江
甯汪梅村士鐸儀徵劉伯山毓崧海甯唐端甫仁壽武昌張廉卿
裕釗江山劉彥清履芬數輩尤篤其名益高所至求書者屣履逢
迎同治四年今大學士江蘇巡撫李公鴻章請州縣吏於朝君嘗
與子尹爲祁文端公寓藻密薦有 詔徵用君卒不就同治十年
往求文宗文匯兩閣書於揚州裏下河九月辛丑至興化病卒縣
令甘紹盤視其喪年六十一君弟祥芝方官江甯知縣請解任返
葬君遵義青田與先壠相近文正公善其所爲曰世不行此久矣

君生平志存文獻思爲黔之一書潤色邊裔道光中與子尹同撰遵義府志博采漢唐以來圖書地志荒經野史披榛剔陋援證精確體例矜嚴成書四十八卷時論以配水經注華陽國志又綜明代黔人詩歌因詩存人因人考事翔實典要爲黔詩紀略三十三卷貴州文獻始爛然可述居金陵得唐寫本說文木部百八十八文君自謂此吾西州漆書也以舉正嚴段二家校注譌箋異一卷文正公爲校刻以行又嘗至句容山中按討梁碑躬自監拓惟恐一字見遺譌梁石記一卷其覈如此別著之書有聲韻攷略四卷過庭碎錄十二卷樗繭譜注一卷邵亭詩鈔六卷邵庭遺詩八卷邵亭遺文八卷宋元舊本書經眼錄三卷坵錄三卷編訂未竟者有邵亭經說影山詞書畫經眼錄舊本未見書經眼錄資治通鑑

索隱各若干卷配夏孺人子一彝孫繩孫彝孫附貢生先沒繩孫知府銜兩淮候補監掣同知

黎庶昌曰徵君於余妻兄也光緒中議續修國史擬君入文苑傳公論定矣然事蹟獨據張裕釗所爲墓誌尙有遺軼未盡者故別爲之傳云

布政使銜四川候補道蹇君墓表

君諱閻字子和姓蹇氏明尙書忠定公義之後崇禎末被寇亂轉徙入遵義遂爲縣人曾祖某祖某副貢生考臣道光乙酉舉人官婺川教諭卒祀鄉賢妣李夫人母陳夫人生子三君其次也三代皆以君貴贈中議大夫妣皆封淑人後以軍功加級再晉榮祿大夫妣皆一品夫人君生而英豁沈毅饒有智略咸豐四年桐梓姦

民楊龍喜倡亂圍攻郡城時贈公尙奉 命在籍團練承平旣久
兵胞器荒君始爲當事者畫策協同戰守詰姦禁讟昕夕在勤閱
百二十日而圍解蹇氏名由是籍甚自是郡中兵事迭起一皆倚
君主辦君亦以爲事關桑梓誼無可委也積功由廩生累保同知
直隸州分發四川 賞戴花翎至則大爲駱文忠公秉章所知署
彭山縣知縣縣故無城適滇匪李泳和擁眾踞擾迴龍場君率黔
勇百人雜以團練分屯置守屹然如遇水使不溢防始築土垣爲
城病其窳敗乃集父老謂之曰吾欲易土以石何如眾有難色君
曰此彭民百世之利無可疑者因出圖指示城基曰應起某所止
某所須工費各若干吾籌之已熟成否祇在今日耳眾皆曰惟使
君命卽委輸金錢且防且築六月而城完賊以遠退君再破走之

快活山遠近大悅懽聲動鄰眉州民至移彭山界石以自蔽駱公
賢君勝軍旅也令兼治眉州團練解散勇目陳祥興數萬之眾十
一年署茂州直隸州松潘與茂州毗連爲番所陷數數侵擾州境
君治法一準彭山同治元年越勦匪首方自閩於綿竹其秋大破
番巢於疊溪引軍深入連下龍池梭多勒古諸隘壘生擒賊酋日
吉木諾進復廳城君績爲多由是晉階知府四年丁李陳兩夫人
憂駱公留辦番務君固請回籍方是時黔省軍事糜爛蜀邊益棘
駱公念援黔卽所以爲蜀就令統舊部至遵義設防而工部侍郎
石公贊清亦自條陳軍務薦君才可大用堪倚以辦賊未幾果有
三路援黔之議矣君以所領當中路駐勦數年討平高臺覺林寺
橙木園各教匪斬僞朱王攻復涓潭縣城分軍與楚師會克清平

天子多君功免補知府以道員用疊加鹽運使銜布政使銜又於其閒辦結天主堂巨案約堅條明民教大安凡地方義舉皇皇焉圖之惟恐不及任之益不辭勞怨八年丁贈公憂服闋引見回省新津有通濟堰爲眉州彭山兩邑民田所利漑新津民累靳修築積訟彌年君奉檄往勘爲之平亭利害眾各爽然一遵約束以退旋赴酉陽巡視邊防歸及重慶病卒同治癸酉十二月六日也春秋四十有六上自大府帥下逮僚友莫不歎君之位與壽不克盡其才爲國家大用惜也彭山茂州遵義士民間之先後請建專祠得旨報可事蹟宣付史館立傳其明年五月卜葬縣西觀田山初咸豐中君兄諤以舉人勦賊殉難特予建祠及是君又以勳績邀此曠典郡人以爲榮合祀之文昌宮後號蹇公祠

云配朱夫人子二念咸念恆俱廩生女二長適清鎮候選從九孫秉懿次適余從子尹融孫男四人孫女二人君在軍在官常手不釋卷亦頗讀宋五子書以自儆然不喜著述僅有權彭平番援黔等日記六卷君弟詵別輯詩文爲諍庵雜著二卷家書及論學語爲一家言四卷君沒十餘年而其羣從子姓能篤守家法門庭雍睦蔚爲一郡之冠無改舊規然後知君之所樹立皆出自有本之學非偶然也其廟食宜也念咸等數乞余文爲君表墓因綴其大者使揚於阡用式鄉閭而告異世光緒十三年正月同邑黎庶昌表

誥授通奉大夫心泉高公家傳

公諱以廉字心泉別號鳳樵姓高氏貴筑紅邊里北街村人累著

不施自公之考廷瑤始以乙科顯仕至廣東廣州府知府治行爲嘉道間最世稱青書先生余譔全黔國故采以入循吏者也咸豐之際粵賊亂起 詔各行省治鄉兵以在籍紳士領之公與漕運總督朱公樹江蘇蘇松太道王公玘湖南攸縣知縣孔公憲典山東益都縣知縣寇公秉鈞同日被 命欲辭不可團練踰年遵義遂有楊龍喜之亂居亡何下游苗教各匪起省垣由是多事矣公與陝西鳳邠道黃公輔宸籌辦城守編保甲簡丁壯建礮堡輸粟鑄礮劫初甚終殫力勤恪每建一策發一議省之人咸指目曰非高十二公莫能爲也迨至朱公等相繼喪而黃公出仕遂獨任其難同治甲子以後黔事否極公籌防論戰足無停趾官牘私函手答口商竟無虛日昕宵劬勞忘視家事雖至倦徂不得少休始公

將以鹽提舉之官雲南爲巡撫蔣公爵遠所留繼是撫黔者若善
化勞公崇光銅山張公亮基皆倚以襄事遂不復言出積二十餘
年卒睹全黔平定鄉土乂安亦足酬澄清初志矣敘功累保至分
省補用道加布政使銜 賞戴花翎 賞給三代應得封典 恩
獎優異里閭榮而服之方青書先生之仕廣東也歸橐數萬金悉
命分贍親族計口授產金立盡公奉志唯謹及黔亂起家實無餘
貲而門第猶盛性又好施予有廣州風兵燹之後疫疹繁興餓孍
相望凡四境之流離不振者爭走其門公衣之食之病者醫藥之
死則殯葬之不足則多方稱貸以應必求達其心之所安而後已
或謂公泰勞公曰吾非不知第日對此輩不禁恫然難止耳君子
居上則道濟天下居下則善及一方皆聖賢不忍人之義也公有

兄二人早逝第以莊字秀東官四川雲陽知縣有治聲友愛至篤爲怡怡樓以居克稱其名遵義鄭珍獨山莫友芝貴筑黃彭年皆嘗爲之記三君天下所號爲能文章者也光緒十二年冬余至省垣見公子培淦好學有家法述公事狀乞余文將彙入先德編因論次其大者以爲之傳家世已具泰和周繼煦墓誌及公子培年等碑記不贅公卒於光緒四年六月三十日春秋六十有五

論曰咸豐八年余年二十餘客有自貴陽來者盛稱高十二公之爲人樂善不厭時私已識之不謂越二十有九年遂執筆爲公傳也十二者公之行第黔之人不名公而但以行第稱盛德之感可知鄭五歐九之倫自古有其比矣

誥授光祿大夫山西巡撫鮑公墓誌銘

公諱源深字華潭號穆堂晚又號澹庵和州鮑氏上世自晉咸和間新安太守宏家於歙四十三傳至康熙中有諱啟忠者於公爲六世祖遷和之梁山鎮遂爲和州人曾祖諱暄附生祖諱本泰附生考諱東里皆以公貴贈光祿大夫曾祖妣氏沈氏顧祖妣氏吳妣氏吳皆一品夫人公生而簡重沈靜有成人之目六歲遭曾祖母以下喪哀毀柴立篤摯踰禮梁鎮歲比不登家中落光祿公經營劬悴色時不愉公發憤歎曰有急不能貸親憂焉用子爲志學益力選道光丁酉拔貢生旋丁光祿公艱二十六年中式本省鄉試丁未成進士改翰林院庶吉士散館授編修咸豐元年天子懋修典學造次必以儒先自程 詔選七人繕錄朱子全書公與其一三年粵賊陷金陵公於是勇言事有請振乾綱儆積玩固人

心諸奏 文宗嘉納四年命督學貴州時黔中苗禍已熾經過鎮遠黃平苗數攻城士民徒手抗賊有司以兵饒請公至省爲大府言之不應遂以苗亂情形入告故事學臣不得擅言軍務有 旨申飭自是不復再關兵事然智慮所得爲義不辭難 上亦浸知公深 穆宗繼序倚任尤重公凡四爲學政四入 上書房行走授世子讀再遇大考累遷侍講侍讀詹事府右春坊右庶子侍講學士侍讀學士擢太常寺卿大理寺卿都察院左副都御史補工部右侍郎轉兵部戶部兼禮部吏部侍郎迭充順天鄉試同考官 宣宗 文宗兩朝實錄館纂修日講起居注官順天鄉會試磨勘官江南鄉試監臨散館閱卷大臣會試覆試閱卷大臣殿試讀卷大臣朝考閱卷大臣邀拜 上方珍物之賜不可勝計其在貴

州也首發王安國之難王安國者遵義團首積功保至都司陽禦
 賊而陰與聯鄰邑傅之有眾數萬潛蓄異謀端倪大顯郡守上變
 告急大府帥莫敢誰何公試士遵義密飭郡守檄仁懷令江炳琳
 兼攝縣事江有幹才一夕便道入擒斬之眾遂瓦解麻哈州陷苗
 教合趨省城已至近郊烽火燎及櫓樓省中公私匱乏上下縮手
 適平遠丁文誠公寶楨以庶吉士在家募勇勦賊公飛書乞援文
 誠卽以兵赴至省饑甚士譁欲潰公急按囊中得數十金出犒士
 皆感激曰學臺如是吾輩敢不效死卽夜出城迎擊一戰而捷賊
 隴種退去卒至黔亂十餘年全局糜爛省城根本之地遵義富庶
 之區保全無恙者因公始謀也其在廣西亦如其在黔時思恩團
 首林如海欲假考試歛費以兵至南甯迎公按臨意實迫挾公得

情不往南甯知府某與如海比卽掣撓百端文報出入皆有查聲
息不得達省公迂道賀縣言狀卒置如海於法厥後督學江蘇順
天大亂旣平請開書局以饋孤寒釐正文體以崇實學士論斐然
與黔粵時情事不侔矣同治十年遂有山西巡撫之命軍興各
行省久虐於兵獨山西號爲完善吏治軍政率狃承平故習公至
掃除一切與羣吏更始取舊案與新牘雜治鈇芟析微早夜孜孜
克勤克慎必得當而後已始嚴鶯粟之禁使民重本食又以晉省
外樸內華力革淫靡風俗至爲一變出行邊兵遵黃河而東遇險
塞冥阨躬自履勘甚或徒步以從見者歎爲宿將所不逮又仿曾
文正公直隸練軍章程遴提鎮兩標軍士增益口糧練成勁旅足
備緩急之用部內肅然坐是心力耗瘁積漸不支數請開缺勿許

光緒二年陳乞益力得 旨報可其時晉省初旱卽發糶賑濟及
解任後乃遂變爲奇荒公引咎責躬如不自克寓居江南之寶應
縣踰年主講金陵上海書院布衣粗糲蕭然與寒畯無殊以光緒
十年六月十四日告終春秋七十有三兩配陳夫人皆前卒子二
孝光道銜江西候補知府孝裕附生提舉銜兩淮候補鹽運判女
四人孫九人曾孫五人孝光等將以某年月日合葬公江甯太平
門外之丁家山具狀來請銘庶昌自咸豐丁巳卽受公知光緒七
年奉 命出使日本道經上海謁公於龍門書院公喜動顏色然
語及時事輒獻歎歎絕生平惻隱民物憂國愛人之念至老彌篤
蓋天性使然非可學而至也在京在外無赫赫名亦不立講學家
名目而慎獨寡過表裏純白類古蘧伯玉之流世所僅覩以庶昌

所見知公與兩江總督開縣李公宗義而已其所論奏多關根本
至計非外所悉聞公子別錄奏牘若干卷藏於家不以著著其卓
犖在人耳目者銘曰

峩峩梁山大江之濱蘊蓄旣深誕此哲人山輝川媚斂以鴻文玉
堂金馬爲國貢珍南紀不靖有猗黃巾乾綱乞振密勿敷陳輶軒
整俗黔士莘莘頑金受冶亦躍於甄膏澤未竟四郡載仁春明回
翔 上齋作賓 淀園被擾歲厄在申 鼎湖龍去攀號乞身重
曦返曙眾正如雲起列朝省勸駕殷勤粵西禍本狼嗥虎蹲欲持
玉節蕩彼荒榛羸秦一炬有觸成塵漆書竹簡鉛槧可因在人未
墜賴公一言萬手駢奮墳典以新晉疆四稔煦瘠扶呻功成身退
匪曰隱淪歸臥江左心眷北辰愛人學道是謂天民銘幽紀實永

詔于春

臺北府知府循吏林君墓誌銘

君諱達泉字海巖廣東大埔人曾祖某祖某考春山監生兩代以君貴贈朝議大夫君中咸豐辛酉科舉人以在籍團練議敘知縣累保擢江蘇直隸州知府用 賞戴花翎爲人精敏純白勤於吏事嘗一署崇明知縣縣俗善訟前任者多選奕不治事君至案牘全集積盈架檔書吏以白實陰蝕君君曰諾明日闕堂皇縱民入觀手判口決巧健替進更唆互證承伺顏色君逆折機牙使不得發前者辭窮後者大畏相顧愕眙私共驚歎老吏弗如旬月未浹詞訟殺滅民志率服或咨君初任治劇果何操而能若此君曰吾無他術一坦誠相與耳期年調署江陰治法一準崇明民譽翊起

又明年調補海州州故盜藪也當歲五六月盡禾黍滿野羣賊出沒其中號青紗障子剽劫椎埋日中數發莫可誰何久宦者識之命盜案率終歲日得其一者此爲其極少矣他訟牒數倍此君布設方略會合營伍躬自逐捕盡鉤致渠首趙慶安張飛豹郭佃揚等按置諸法黨羽解落犬吠不驚境乃夜眠旁及民隱藝桑樹麻早夜孜孜如勤其家又廣爲教條誘民以禮民益愛之余所重君篤在於是然君之治蹟尤以水利暴稱於人卓犖在目州有甲子河歲久淤墊水溢爲害是歲天旱民罄寡食君言大府條其利害請開此河卽工賑饑役作萬人廣所全活頌聲喁然其在崇明大疏沿海港口江陰濬城河及東橫河蠲錢萬緡醜渠蕩淤潮汐壑宣橋梁剝岸繕使完整橈楫利通權夫舟子謳歛載涂光緒元年

廷議改建臺灣淡水廳爲臺北府增置縣邑制度草創任人其艱
盱衡屬吏無若君可於是兩江總督沈文肅公葆楨閩浙總督何
公璟福建巡撫丁公日昌合疏陳請部臣猶持故事議駁 特旨
詔授臺北知府戊寅三月入臺治事百度劭新開番墾荒策防禁
姦軍紀民瘼寄成於君一任以勇昕宵疲勞觸犯炎瘴忘其有軀
病伏膏肓忽不自覺勤猶不已會贈君赴至悲痛長號疽發于背
踰月遂卒光緒四年十月九日春秋四十有九泣臺八月續止於
此君通脫簡易樂與人交悃款無奧喜經濟家言談輒飛舞初佐
丁公幕復爲曾文正公所知嘗建三洋總督議事雖未行文正偉
之尙書彭公玉麟巡視長江經由崇明有老人者饑踣在涂哀而
進食老人致詞林縣官在吾何至此言已泣下彭公以語沈公沈

公亦曰吾叩江陰邑士今令若何則對如前尹林公不復可得
其次者惠我多矣相與嗟歎共稱良吏久之及卒臚語以聞請宣
史館列入循吏有 詔報可何公亦奏君以死勤事狀優卹如禮
贈太僕寺卿君於是獲上信友治民三者交盡朝野一致可無憾
辭配某氏子四振庚蔭生錫恆候選主事振江振瀛以某年月日
葬君某所君來服官蘇州始交於余誼篤且久其卒也君同年友
何君如璋已爲碑文揚之神道余別撰墓誌詒君子振庚刻而藏
諸墳趾銘曰

吁嗟林君倏焉已陳繭絲保障善理其勞所至日淺勤而有聞宦
以巧貴君獨守真不欺暗室還我天民治行絕異輿誦史甄昔在
漢世吏道首循璽書褒美降寵及身君施厥半已比古倫詔敦信

史永永千春銘此幽石無慚鬼神

李芋仙墓誌銘

君諱士葵字芋仙四川忠州李氏道光己酉拔貢生以善詩爲曾文正公所賞時與中江李鴻裔劍州李榕號四川三李君性通脫不中程度喜爲無顧忌大言有狂名於京師閒達官貴人往往折節下交而君顧落寞以此沈滯不進性又善哭咸豐之際粵賊亂起君語及時事多故或身世蒼茫如浮萍著於太虛輒歔歔痛哭同年生戲呼之曰文哀公君曰嬰兒笑語無常酒人墮車往往不死者其天全也公等以此生諡吾殊當吾意吾將與阮籍劉伶爲徒矣與人語亦自系曰文哀公安慶克復君筮仕得彭澤知縣彭澤晉徵士陶淵明故里君大喜到官攜琴一張書萬卷棺二具自

隨名其二子曰松存菊存誦歸去來辭烽火達於鄰疆方據案吟
哦不覺也一日語僚友曰吾爲縣令長而使四郊多壘可乎卽抗
言軍情數事論高而闊曾文正公笑置之戒後無復輒言事未幾
歸安慶狂益加率玩不恭同官忌者尤甚文正待君依舊賴是獲
安余之交君實自茲始同治二年也已再赴官江西數年以臨川
錢糧空缺案與巡撫使者劉公秉璋爭論於堂皇語侵辱之劉公
不能堪劾君無狀遂罷居江西曠絕久不相聞光緒七年夏余在
歐羅巴人有傳君詩至者末署忠州李士棻余曰文哀公固無恙
邪卽以其年歸自海外相見滬上追敘舊游各傷老大而君年六
十一矣然其狂如故初君在京師放縱詩酒與伶人杜蝶雲者曠
及是蝶雲亦老流寓滬上仍倚歌曲爲生涯君之一二故人始頗

數數資給君君揮霍不顧金人立盡久之無繼落魄甚依蝶雲以
居蝶雲奉君三年無失禮斯足以愧天下士已九年某月君還江
西至安慶道卒春秋六十有三曾祖某祖某考某贈某官妣某某
氏配某氏子二松存菊存松存先沒孫幾人詩若干卷菊存將以
某年月日葬君某所銘曰

瞿唐峽西涪水東有士曰李命實窮天放傲骨世莫容一官敝履
如轉蓬乾坤大句聲摩空曾文正公贈詩有時吟大句動乾坤之語死而死耳文則雄
物蛻返始歸蜀宮湛湛江水涵青楓

光緒九年余在日本有傳君道卒者其言甚碻遂撰此文寄哀
君本曠達士不拘行檢正不必以公家言爲之飾諱昌黎誌王
適例具在也然君仕江西迭署數缺實有善政可紀當別敘述

文成踰年始聞君尚存因錄副寄視君喜出望外以謂此等風
誼雖古人亦何多讓頗復商訂字句一皆從之是年冬余奉諱
歸里猶見之滬上抵家數月而凶問至矣君生於道光辛巳年
十二月二十二日卒於光緒乙酉年八月初七日實年六十有
五上海縣知縣莫君祥芝經紀其喪曾祖正藩妣氏秦氏閔祖
濂妣氏何氏周父學泗妣氏周氏賀氏顧配羅氏子文琮卽松
存先沒文琛卽菊存君卒三年亦沒孫四炘炯焯煥著述成者
有天瘦閣詩半六卷續集曰天補樓行記一卷炘等以本年某
月某日葬君江西省城外西山寓書來告因自日本伐石謀轉
致之豫章使埋諸墳趾光緒十四年五月黎庶昌附記

江蘇按察使中江李君墓誌銘

君諱鴻裔字眉生別號香巖晚以居近蘇子美滄浪亭又號蘇鄰
四川中江李氏曾祖純祖敦魯考崧霖舉人崇世蘊德君以拔貢
生中咸豐辛亥順天鄉試舉人旋入貲爲兵部主事才高而學贍
聲譽翔起公卿多折節枉交有達官諷使出其門許以鼎甲不應
某相國素與君善君見其權勢日盛亦謝絕咸豐十年不樂在京
將南游江淮未至鄂爲胡文忠公林翼奏調赴英山大營未幾胡
公薨從曾文正公國藩於安慶君本文正門下士文正開幕府治
事辟召天下英雋程其器能君恆爲之冠參與機要文正嘗曰眉
生豁達精敏應世才也密疏薦君堪任大受江南平明年遂權十
府糧道及北征勦捻又奏補君徐海道徐州縮穀南北時湘淮各
軍之討賊者數萬人更番休替糧械軍火皆以徐州爲總匯君內

筦胥儲外充營務又以餘力治民所設施方略甚具准勇銳氣正
新銘字營勇嘗殺人君擒而治之卒張軍法與諸將接納撫以權
好主客大和踰年擢江蘇按察使論功晉加布政使銜 賞戴花
翎寢寢大用矣而君遽以耳疾再請開缺竟不復出云君旣罷官
閒居樂吳中山水徙家蘇州得瞿氏網師園葺治之園故有老樹
怪石池沼亭館之勝積書數萬卷益蓄三代彝鼎漢唐以來金石
碑版法書名畫以自娛閉門謝客徜徉物外身與世不復相關性
內介無妄交交必有終始生平游宴甚廣而其契誼最篤若吳縣
潘尙書祖蔭湘鄉曾襲侯紀澤開縣李制軍宗義嘉興錢太僕應
溥吳縣潘方伯曾瑋歸安吳觀察雲劍州李方伯榕湖口高大令
心夔獨山莫徵君友芝此尤海內共知者可以觀所與已君卒於

光緒十一年八月十五日春秋五十有五娶敖氏榮昌望族遵心疾不瘳妾二俱吳氏無子以從兄子賡猷嗣廩貢生候選道孫五人鷺候選知縣鵠鵙鷓鴣某年月日葬君吳縣四都十二圖善人橋金牛塢君書法甚精詩古文亦窺古人堂奧晚又好釋典皆以爲寄沒後賡猷僅得詩二百餘首刻之君之至鄂也與庶昌從兄伯庸善卽弟視余越二十六年矣銘君之墓其曷有辭銘曰高才步追淵雲躅厥蹤治彭麟一角急流不居此其卓退棲吳中山水曲靈巖之宮與木瀆精魄永綏藏此麓

知府銜江蘇候補直隸州知州孫君墓誌銘

君諱玉堂字森伯號右卿劍潭其別字也來安孫氏嘉慶道光之世風氣醇古士之窮而未達者或家居耕讀或以經術啟迪後進

率守先民矩程無敢踰越尺寸非若近世之紛紜亡等也君始與
昆季讀書發聞來安人及旁縣高才生從而問業者歲數十百人
君悉稱量其材質高下指授義理無不得意以去多成就者嘗一
主邑南板橋鎮章氏十年不遷其爲縣人所矜式如此道光二十
九年由廩膳生員選拔貢生 朝試優等例得用知縣而是時
宣宗成皇帝重儒術以校官有風化責非端厚者不得與引 見
謂君能勝任 命以教諭用歸未卽補官遭內喪而大亂亦作咸
豐八年粵賊破縣城君挈家出走佐防定遠敘功擢知縣旣從軍
吳會累保直隸州加知府銜 賞戴花翎爲今大學士李公鴻章
所器異論者謂將不次遷除而部章復選天長縣學教諭然是時
君在滬職任繁劇大府留不遣皖撫果敏公英翰又爲奏請開缺

仍留江蘇已而轉饒入都道病至天津病甚僅達而卒同治十一年九月十七日也春秋五十有六聞者惜焉功名之際有天有人獨在人爲足恃耳天則無如之何也儒者讀書將以順性命之理君深於義理者必有以處之矣配王淑人子二芑仁國子監生軍功保舉府經歷 賞戴藍翎次點光緒乙酉拔貢生直隸州判敏而多文從余出使日本女六皆適士族孫三君卒六年王淑人亦卒合葬來安武家集東枒杈樹新阡所著書二十餘卷點皆編次藏弄考丙祖蔚文以君貴贈朝議大夫加級晉中憲大夫妣皆淑人其遠祖諱天馨者先籍句容仕明爲衛千戶過來安樂其俗之樸厚也徙居之故今爲來安人銘曰

遇於仕爲躋符於德爲充德於古爲達仕於今爲窮嗚呼森伯孰

重孰輕何去何從今豔古薄繁惟德之崇旣無歉矣甯此幽宮
晉封通議大夫署雲南恩安縣知縣傅府君墓表

君自少則劬志於學年十餘入塾讀書讀偶誤塾師撻之流血創
久不合君輟讀家居日以目誦蓋數年而默識五經又數年而益
及醫經形法名法之學樞戶冥索日夜求通曉思欲推其術以濟
世喜聚書不屑爲章句記問口未嘗道理學家言而儒行絕特與
人無苟合其於孝友睦婣任卹一意踐行無要譽意以故世知者
少也道光十一年累試於鄉連蹇不得志喟然歎曰士莫恥於無
用行莫醜於空言悔莫大於過時吾將出而驗所學矣乃客游四
川四川人聞君名爭延致諸幕先後佐州縣治者十年最後疆吏
檄讞獄稱之曰能君曰吾何能吾惟求其平未知死者果無憾焉

否也二十二年壬寅援豫工例入貲以府經歷選用籤發雲南二十五年署臨安府經歷先是谿處土司趙理有罪誅以旁支名維藩者承襲維藩與頭目李開元不睦理子平安倖復職煽開元使搆閔建水知縣某主勦維藩維藩懼堅壁嚴備以待君因轉饒至廉得其情單騎叩壘門諭釋之難遂解過恩安見山麓矗大木而下有焦骨問故土人對曰鄉俗惡盜獲則驅至此焚之君曰法至於是邪卽言縣令請禁弗省踰年君來署知縣事立革此俗縣有石龍壩河夏潦漲遏汎激爲民害君謀除之而石堅滑不任錘鑿君編麻蟠石沃以油炬而燔之石皆焦潰逐流下工隨以施數百年水患一旦豁除如人沈疴之去體也民用大和歲亦有秋百姓乃歌之曰我食我衣傳公富我我婦我子傳公父我治恩安三年

他惠政多類是終以直道事人與上官意不合咸豐元年竟引疾去其弟殷巖問歸計君曰吾積俸至三百輒作一利民事未遑問家也五年十一月甲戌卒於四川宜賓寓次權葬萬縣春秋五十有五君諱羹梅字商巖德清傅氏曾祖九鼎祖廷琇考同聲配張氏繼配姚氏子四雲龍兵部郎中雲萬同治丁卯舉人刑部主事改官知縣雲夔雲昭女二君始以雲萬官刑部遇 覃恩贈階中憲大夫配皆恭人及雲龍加三品銜又晉通議大夫配皆淑人光緒三年遷葬德清之尚博村兩淑人耐德清一縣自 本朝以來多積學博聞之士君子雲龍其一也雲龍著書數百萬言以學行顯光緒十三年奉 命游歷日本美利堅巴西祕魯古巴堪納達行數萬里驅馳王事近古甘英之儔經留日本年餘役畢將歸國

出君譜狀乞爲表墓之文禮辭不獲謹揭其大者列於阡餘具俞編修樾洪給諫良品傳中不備書也光緒十五年九月遵義黎庶昌表

誥封通奉大夫江蘇補用道李君墓表

君諱宗煇字輝亭晚歲獲善地於黟南五都舊庵實中段奉其高祖父母父母伯叔父母以次十餘人列葬其中別於左方隙地自營生壙取魏風樂土之意刻石墓門曰爰得我所因自號爰得安徽黟縣李氏本唐昭泐王後至宋銀青光祿大夫德鵬始遷祁門南宋時有名定者再徙黟之懷遠鄉家南屏山下十七傳而至君曾祖諱文耀祖諱世墀考諱高琳皆以君貴贈通奉大夫妣氏胡氏胡氏王皆夫人君爲通奉君長子粵賊之亂皖城不守倉卒與

通奉君相失君號泣四求卒遇之山谷中奉迎以歸後賈於外一日心動還家太夫人方疾革語人曰兒不歸吾不瞑矣言未竟而君至母子大慰是夕考終人皆以爲誠孝所格鬼神或相之云安慶之未克也君賈於銅陵大通鎮無幾何居積致富起家爲素封金帛流衍修業而息益贏然非意所樂通奉君旣沒愈泊然寡營於是專力爲善以佐縣官之所不及其著者如晉豫大饑輸賑金至數萬兩燕齊蘇皖粵西江右鄭州諸大水輸金又數萬兩銅陵江隄敗獨修七千數百丈以衛民田輸金亦踰萬兩彙刊徽州鄉賢遺集數百卷捐置各省書籍致之國子監南學及焦山書藏自餘若宗祠義塾書院賓興橋梁道路救生公惠等凡世所號稱善舉無不黽勉圖維累輸金亦數巨萬兩他人得一已足者於君固

自視蔑如也禮賢好古晚乃彌篤造次必依儒者嘗語其子英元曰聚財而不散是愚也散財而必邀名是私也可以想見君之性質矣昔孔子與子貢論富必以好禮爲歸春秋時陶朱公三致千金再分散與貧交疏昆弟太史公以爲好行其德漢時河南卜式上書願輸家財半助邊復持錢二十萬佐徙民天子謂式終長者尊顯以風百姓君之富果視二子何如而樂善博施力行不惑至老益靡厭倦斯豈所謂富而好禮者邪其與陶朱卜式同不同未可知也君卒以光緒十七年九月十三日春秋六十有四先是光緒四年論晉賑功敘秩至江蘇補用道加三級嗣是不復再與時榮配余夫人側室氏林氏丁子三長英元附監生分部學習主事次英亨出嗣君弟宗輝早殤次英耆女子子三人孫一顯謨英元

以某年月日葬君自營之生壙乞長沙王益吾祭酒先謙爲誌銘而以表墓之文屬余余始與君相知在日本時未及晤也光緒十七年余奉使歸國拜四川川東道命道出長江君自大通附輪舟修相見禮懽若生平至安慶而別不謂其遂止於此也今表君墓神明契許其曷有辭遂書行誼如右揭於阡原使後世有攷光緒十八年秋遵義黎庶昌

書全總戎軼事

道光咸豐之際粵賊亂起各省皆倚制兵討賊後乃稍稍召募方楚軍之未興也戰武宣桂林戰湖南戰金陵黔軍最著而全總戎尤以勇聞於時總戎名玉貴鎮遠人少落拓不偶初入營伍補名糧無所表見意頗不自聊及徵兵令下從征粵西乃稍喜每戰輒

衣白襦襜以自標異。驍果冠羣，都統烏蘭泰公一見，大奇之。使募健兒三百人，別爲一營。而是時湖北人田學韜者，亦以勇名。與玉貴埒。烏公擢爲左右翼。凡戰，皆此兩人先登。爲賊所指目。及烏公戰沒，桂林學韜亦前死。玉貴從他軍至道州，賊酋楊秀清擁眾奄至。大將某棄營走。營內金輜山積。玉貴不忍棄，謀督護而計未出。賊已迫近，卽挺身單騎，橫矛立橋上，厲聲謾罵。且曰：「吾一人耳，汝敢來鬪否？」秀清初起持重，又未知大將已去，惶視良久，謂其下曰：「此白袍將，吾聞名舊矣。今觀其氣盛，言壯，必有伏，不可墮其術中。」竟退。玉貴飛報主者，徐引還閭營。無恙。軍中莫不服其勇也。總督徐廣縉爲繪圖呈奏，錄首功。白袍將以此名聞天下。時以比唐薛仁貴云。後隨向忠武攻金陵，提督和春前在廣西湖南親見玉

貴戰狀及是赴援廬州絕欲得玉貴自助咨向調往遂以副將署
壽春鎮總兵王貴既至相度廬州城外有平地可以立營而前後
皆賊屯玉貴念非出奇不能取勝引兵直入其閒置壘令曰以半
軍築以半軍護士皆注鎗持滿賊錯愕來爭且戰且築壘立成晝
夜疾擊剗平十餘壘賊幾盡矣會攻城爲礮子所傷數月不愈卒
廬人惜之私立祠以祀或曰賊酋陳玉成疾玉貴甚使人於當道
掘阬與戰佯北以誘之玉貴墜阬死余至江南欲問其事而竟無
知者

書張敬堂軼事

靈璧張敬堂編修錫嶸同治五年統軍駐臨淮余在曾文正公幕
府始識其人先是文正公北征勦捻所部湘勇遣撤殆盡僅存劉

忠壯松山老湘營一軍餘悉倚淮軍辦賊公念淮軍五六萬皆淮南人不慣麩食且新建平吳大功將領頗驕蹇不樂受節度欲於淮北別募新營使異軍蒼頭特起儲備西北之用而置將久難其人敬堂方解學政任歸自雲南雲南遭回匪亂後公私赤立學政入境供張闕如未及開棚試士遽丁父憂閒歸皖是時滇黔閒驛道艱阻敬堂往往徒步以行公見之大喜謂其誦法儒先堅忍耐苦足勝將帥之任檄募敬字三營使隨湘軍戰守令與漸習會臨淮大水各營皆築隄自衛衢市中水深三四尺兵士市物者率乘船往來百姓流離滿野文正議發賑使敬堂主辦余竊聽其言論多近諛意頗少之私語幕府諸人曰侯相生平觀人百不爽一今或於敬堂而失之乎是秋余奉諱旋里及明年八月再至營則

聞敬堂戰沒矣乃大驚於是庶昌心重敬堂悔前者之失言也敬堂之援陝以正月六日行抵西安府雨花寨中涂猝遇賊前後不能相救左右纔百餘人遽直前搏戰眾寡懸殊身中數創而隕事聞追贈侍講學士始文正初遇敬堂一見卽許以爲偉器恆與劉松山劉銘傳並稱密疏奏保卒其臨難勇決不苟退縮如是是真能見危致命無忝所學者然後乃知文正之知人爲果不可及也

黎氏家祠記

古者別子爲祖繼別爲宗繼禰者爲小宗大宗百世不遷小宗五世則遷此常法也然小宗有繼禰繼祖繼曾祖繼高祖之殊而廟制復有三廟二廟一廟之別先儒泥小記庶子不祭祖禰之文遂謂大夫士祭不及高曾不知其果得祭與否皆當視宗法而定不

因廟制爲損益也魏晉而降制度疏闊廟祀代數大率準官品爲差宋文潞公欲營家廟得唐杜岐公一堂四室之式始有所依循禮制之不修若此司馬文正公實記之而其謨書儀亦祇上祭曾祖不敢主高祖之議唯獨伊川程子以謂高祖有服無貴賤皆當祭及高祖朱子從之後遂垂爲定制蓋其言深原禮意協乎人心天屬之至安而無以易也我朝儒者萬氏斯大秦氏蕙田益稽經傳以證古大夫士禮確然得祭高曾祖禰甚明然後又知四親之祭爲三代所通行無一廟祭禰二廟祭祖三廟祭曾祖之異後世失之乃不能詳也黎氏自遷遵義以來累代耕讀爲業未嘗顯聞至嘉慶中王考靜圃府君始起家仕山東長山縣知縣世父雪樓府君繼仕雲南巧家廳同知俱授爲奉政大夫先考兩耕府君

亦仕開州訓導授修職佐郎而從兄兆勳仕至湖北隨州州判兆銓仕至雲南姚州知州小子非才又以二品頂戴記名道員充出使日本國 欽差大臣重荷 國恩日益昌顯於法當古大夫士皆得立廟咸豐之際雪樓府君自滇中歸里卽規拓基緒構建家祠於正寢之東遭亂未成燬於火齋志以沒歲月變於上人事遷於下今又二十餘年而祠仍未舉廟祔之典闕如爲子孫者不能無疚光緒十年夏從兄兆祺書抵日本以祠堂爲謀擬釀金若干合建一祠卽於祠後附置家塾以從簡易所以修雪樓府君之志而亦庶昌之素願然也因籌千金爲祠費未幾從兄卽世議旣不諧費亦旋爲子弟輩耗去庶昌雖歉於心而力不逮矣遲之又久乃始就居室正寢中樓權備四龕之制以待異時擴充凡祭式

祠規諸大端比傳前哲成模酌擬使後有所守又懼其不能持久也一皆從儉僅免貽數典之譏存餼羊之禮而已若夫祖遷於上宗易於下異時禰位之主旣祧則宗莫能統必當另立支祠改易規制是又望於後之賢子孫而非今日所能計及矣庶昌記

附家祭條規

一家廟之祭四仲徧舉古禮皆然但居鄉儉薄深慮後難爲繼舉而復廢轉滋不敬今應照 會典所載品官家祭七品以上之文春秋二舉庶可永久遵行每歲定於二八兩月上旬擇吉致祭凡高祖以下之子孫年已及冠者男婦皆會行禮此後旣依典禮行事則鄉俗所有端午中元歲除之祭皆改爲薦新祭期一通禮所載品官家祭仍用俎敦邊豆等器原以存古禮於十一

又云代以時用槃碗者聽蓋恐費煩難製兼采司馬公書儀今人別製碗楪等器專供祭祀及朱子本合用古器恐私家不能辦且用今器以從簡便之說順適人情也今已照卓數置備槃碗杯楪之屬另櫃存儲專供祭祀之用平時概不得擅取卽祭祀時撤去後亦應將祭品立刻傳卸他器洗滌潔淨照舊收存至古器一項僅製銅爵三尊於參神時一用見意而已

祭器

一余嘗博攷宋以後儒者家祭之禮以本朝吳中陸朗夫中丞所定祠堂品物施之鄉俗最爲合宜中丞不用薦牲概用熟食又定爲四碗六槃四楪與吾鄉九碗之俗略同今定割牲用羊一豕一但皆熟薦其品仍循照鄉俗每卓九數九數之中庶羞八碗雞魚羊豕四品必備餘則隨配若余在家主祭則添用魚翅海參否則

不必中閒用湯一椀卽古人和羹之義此則與中丞小異者也羹
飯麪食在外兩邊耐位每卓祇用六椀 祭品

一行禮節文攷歷朝家祭行禮之書多未盡善以余不揆獨觀先
農壇祀不繁不簡施之家祭頗合宜今依仿改定附列於編用垂
家式至忌日祭時節薦新朔望獻茶行一跪三叩首禮 行禮節文

通贊唱

序爵序事主祭

孫某男某

就位陪祭

孫某男某

等各就位啟戶薦

牲饌迎神奏樂

引贊唱

跪叩首叩首三叩首起

通贊唱

樂止主

祭孫男恭行初獻禮奏樂

引贊前引

主祭孫男詣盥洗所

唱

濯手淨

巾盥洗畢

引贊引

主祭

孫男

詣酒尊所

唱

司尊者舉冪酌酒

復唱

司香帛者捧香帛詣某

祖妣顯妣

之神位前跪初上香

輔贊唱

初敬

香

引贊唱

初獻帛

輔贊唱

初敬帛

引贊唱

初獻爵

輔贊唱

初奠

爵引贊唱叩首起通贊唱平身主祭孫男恭行讀祝禮詣讀祝位

引贊引主祭者詣讀祝位前唱跪通贊唱眾皆跪樂止讀祝文

讀畢引贊唱讀祝畢通贊唱奏樂引贊唱叩首通贊唱眾皆叩

首引贊唱起通贊唱眾皆起復位引贊引主祭孫男復原位唱復

位通贊唱平身樂止主祭孫男恭行亞獻禮奏樂引贊引主祭孫男

詣酒尊所唱司尊者舉冪酌酒引復唱詣某祖妣之神位前跪

亞上香輔贊唱亞敬香引贊唱亞獻爵輔贊唱亞奠爵叩首引

贊唱起復位仍引主祭至原位又唱復位通贊唱平身樂止主

祭孫男恭行終獻禮奏樂引贊引主祭孫男詣酒尊所唱司尊者舉

冪酌酒引復唱詣某祖妣之神位前跪終上香輔贊唱終敬香

引贊唱終獻爵輔贊唱終奠爵叩首引贊唱起通贊唱平身主

祭孫男恭行福胙禮引贊引主祭孫男詣福胙位前唱跪通贊唱眾

孫皆跪引贊唱飲福酒輔贊唱受福酒引贊唱賜福胙輔贊唱

謝福胙復唱叩首叩首三叩首通贊唱眾孫男皆三叩首引贊唱

起通贊唱眾孫男皆起復位引贊引主祭孫男至原位唱復位通贊

唱通贊唱平生樂止撤饌辭神奏樂送神引贊唱叩首叩首三叩首禮

畢通贊唱樂止讀文者捧文執帛爵者捧帛爵者燎奏樂焚祝

帛望燎闔戶禮成撤班

一忌日之祭以三代為率今應祭至梅溪公止後可遞推庶母劉

太孺人撫育我輩有恩以私情而祭異世則否生日之祭古典所

無以後應一概致齋不祭忌日祭

一每歲令節為鄉俗所尚者如元旦則薦湯元端午則薦糉子中

元即七月半則薦新穀除夕則薦茶食果品惟清明掃墓則仍舊用饌

於墓上薦之不必在家行禮饌品以六為度時節薦新掃墓

一每月初一十五焚香獻茶朔望

一鄉俗凡遇令節用金銀鏤錠或紙錢包裹及轎馬箱籠等屬焚

化謂之燒包今改於兩祭時行之餘則祇散燒紙錢或金銀鏤錠

以取簡便而已燒包

一鄉俗上元節於墓上然燈為各省所無此與掃墓插標同一追

遠之義亦仍而不廢以後凡正親十三至十五然三夜十五至旁親及疏遠者

然一夜然燈

拙尊園記

結園居室之偏方廣不盈畝缺牆西南隅面山有庭三楹積書二

萬卷其中疊石爲池輪挹溪流瀉諸田穴牆以入池屈曲如菌芝
如殘荷如蝶翼沿堦行纔七十步土薄而磽不中耘鉏念庭嚮當
西曬審所植莫若卉木宜以故環池皆蔭物也草則蘭蕙青莎蘘
荷蒟蒻華則玫瑰月季海棠辛夷芍藥牡丹戎葵芰荷芙蓉紫薇
木則梧桐槐柳椈桂冬青果則枇杷林檎楊梅石榴桃梨杏李櫻
橘橙柑以至交讓所植相思之木揚雄左思詫爲蜀產異類者靡
不羅列庭階之下每當風月交會翠綠墮地波沍微微俛仰其閒
謀耳謀目愴然以清穆然以甯若忘其在深山中也園成友人莫
庭芝來居之請所以爲名余曰天下惟拙可以已內營可以卻外
擾動靜交養游息斯能適真今揭子美詩意命之曰拙尊明吾志
也莫君曰善引勝落成而爲之歌歌曰塵埃埃兮八區昧不識兮

路涂子獨知止兮守故吾半畝宮兮聊且以娛充子之養兮神明
適居逍遙兮遂初將蟬蛻萬物兮而天民與徒黎庶昌記

禹門山銘

有序

山舊名回龍順治丁亥丈雪通醉來棲易曰禹門直郡治東八十
里樂安江經其麓支危隱秀有幽奇之觀道光中里人鄭珍莫友
芝黎兆勳樂此率日月至己亥秋霽汎舟抵崖壁下刻石稱顯之
茲山一旦得與浯溪澹巖比誠異遭也世有漫叟涪翁當余知言
余後三先生游幾五十年手剔荒翳履危捫石讀旣竟顧視斜日
挂村墟外輝映林薄裴回古徑寂寥長懷灑然見三先生風流被
衣巖谷閒也恐來者闕不聞且旌吾獨爲銘識之歲在光緒疆圉
大淵獻孟陬穀旦黎庶昌銘曰

禹門巉崑不崩不騫上叢招提下遡洄淵文游所止炳耀腴健企
斯陳迹視我銘鏤

祭曾文正文

維同治十一年歲次壬申三月甲辰朔乙酉門下士黎庶昌謹以
清酒薄饌致祭於吾師太子太保武英殿大學士兩江總督一等
毅勇侯贈太傅諡文正曾公之靈嗚呼公遂無意於世邪昔日之
戲言而真以至斯邪以公之盛德大業光輝充實其不朽於世者
方將下凝河嶽而上爲星日之垂斯固慊然無憾獨其耿耿在我
者則不能以不悲始吾讀書識字嘗欲抗志夫先哲而如幽乏燭
無以辨於學術之歧自遇公而始有師以爲世不復見孔子見公
則亦庶幾自余之從公軍時方屯蹇追隨往復遂已十年及茲分

則僚屬而其飲食教誨不厭不倦於我者視猶如子竊比回路之於仲尼吾之設心制事孤行寡合恆若與人異趣微公則孰諒余之不欺雖有時懷抱孤憤鬱不自得公匪直恕我且益慰勉我曰以待事會之可爲公之文章舉世宗仰久矣乃獨以百年致託此又惟公之命而非予小子之所能知嗚呼公今往矣伯樂逝而騏驥不鳴鍾期亡而伯牙絃絕絃非果絕而騏驥非果不鳴也賞音知遇之難蓋自古而實痛之然公之云亡日變月移世且將至於無復統紀又朝野上下君子小人所與爲不幸夫豈不肖一人之私撫公棺而一慟陳薄奠以致辭嗚呼哀哉尙饗

弔諸葛忠武侯文

維光緒十三年五月二日前出使大臣黎庶昌道出沔陽謹以隻

雞斗酒黍飯豚羹展謁蜀漢丞相諸葛公忠武侯之墓而爲文以
弔曰嗚呼天人之際蓋難明矣以公之純忠大節而志事弗克展
於成以公之遠略雄圖而漢祚終於不競豈非千載難平之故望
古者所爲遺憾而霑襟神龍潛淵而久闕讀公之言教書疏與陳
壽氏所志猶能仿像其生平余嘗論公之北伐其智則高祖定秦
之智其心則湯武放弒之心亙古今而閒隻實聖哲之豪英暨今
遵於蜀道越劍門登隴首又翔度乎籌筆之經營蓋深知益險難
恃而乃身抗大敵詒君父以安榮世徒羨出師之名美孰追溯夫
慮患之艱貞如公之仁爲己任死而後已匪惟百世所心敬鬼神
亦且以震驚蓄私願於卅載今始得展乎墳塋雖雞黍之薄奠類
蘋藻之潔精侯靈昭哉不昧冀髮髯而來臨

祭曾襲侯文 并序

維光緒十六年閏二月二十三日癸亥總理衙門大臣戶部侍郎承襲一等毅勇侯曾公劼剛薨於位明日電赴至日本越七日三月朔庚午出使大臣黎庶昌設位爲文遙祭之曰

嗚呼明德遠矣蔚此達人如何不恤遽返其真朝野繫歎余思愈紉我交君侯金陵克後嘉會合併雖不恆久二十五年爲屬爲友江甯節署幕府閱懽羣賢輟止余竊其閒湘鄉家法玉璫金堅有斐年少薪火畢傳閒尋吾室談謝大笑萬書薄腹避違敏妙岳牧量移隨侍北轅我戀一官匏繫吳門兩載南旋蘇甯非遠音訊雖通蹤迹則蹇太傅之喪赴悼梁木三帟繞棺相見痛哭淚積襟裾江騰漲陸謂於師門不負所目歐洲于役我先君侯邂逅不幸召

悔取尤寄詩薦勉慰我且留叢蜚聒耳忽聆鳳啾戊寅之歲侯來
自東建旆秉節聲光熊熊國書呈遞於法之宮彼都君長曰馬克
蒙免冠握手頌文正公威德蓋世我適與從侯赴倫敦我駐巴黎
往來參差如雁不齊使期報滿移馬得利曾不踰時遘伊犁事伊
犁烏孫據爲俄有遣使交收喪地八九玉帛興戎誰執其咎聚訟
盈廷戰和唯否惟 帝知人 詔侯往取事有至難奪肉虎口相
如叱秦完璧虜手棘澀絲紛砉然而剖英名海外震盪童叟萬夫
酋酋睽目鬢首窺望顏色瞻天北斗我之聞 命奉使東倭始疑
未信侯曰無訛英都揖別浮查日本杌隍屬邦贅猶旗扞狼跳于
藩盜斧其柵急電請師濟以兵艦咄嗟定亂龍驤虎鬪眾醒大覺
夢乃出寤辱書枉嘉謂無竦難功大賞遺國光事聞我之奉諱侯

歸自西兼長譯著通變指迷媚嫉百端反脣以詆餐腥履革朋嗾
莫稽 天子明察功臣分定倚佐海軍國之彥聖懿親扶維共持
樞柄丁亥七月我趨京華慰勞相權推轂於家再持使節喜色在
眉三年契闊遂止於斯東西新聞不識誰某吁嗟失氣若愾親舊
大政治家所蓄未究天不憖遺亞洲之面人言如此國則惜之感
恤中外侯乎何悲我羈異域執紼有闕郵辭寫私以代奠醑嗚呼
哀哉尙饗

拙尊園叢稿卷四

拙尊園叢稿卷五

遵義黎庶昌蒞齋

餘編之內

敬陳管見摺

奏爲敬陳管見恭摺仰祈 聖鑒事竊_臣伏讀三月十三日 硃諭嗣後內外臣工務當痛戒因循各據忠悃建言者秉公獻替務期遠大等因欽此仰見 虛懷納諫集思廣益凡百臣工苟有一知半解分當竭愚況如_臣者奉使東西兩洋已踰八載聞見所接思慮所籌何忍緘默不言以負 朝廷望治之意頃者法越事定外禍漸紓雖有球案一宗懸而未結將來無論如何擬議實不足再煩兵端然則今日所宜加意講求者專在整飭內政矣易曰物

窮則變變則通通則久處今時勢誠宜恢張 聖量稍稍酌用西法不必效武靈之變服但當求秦穆之樂懷中外協力圖謀猶不失爲善國若徒因循舊貫意氣相高援漢家法度以自解 臣慮後悔仍未已也謹就 微臣 管見所及爲我 皇太后 皇上約陳數端一曰水師宜急練大支 臣 觀今日洋務之件未有急於水師者也而事體之宏大條理之精微亦未有如水師之難自同治初元曾國藩李鴻章左宗棠卽建買船購礮開局製造之議誠見夫西洋船堅礮巨非此不能縱橫海上與之角逐迄今二十年來東南數省各自爲謀鮮睹成效惟北洋水師粗立基緒然戰艦未備魄力未雄實難責與西人匹敵 臣 愚以爲中國沿海疆域袤延萬里又有臺灣瓊州兩島海外孤懸一朝告警非有平時練足百號之

兵船斷難分布就此百號中宜定以六十號配爲南北兩大軍專作攻敵之用每軍應有鐵甲巨艦四五艘仿照長江規模擬設海部專統分年籌辦志在必成無事則派令出洋學習測量駕駛有事則發縱指使概歸海部主政庶幾章程一而號令齊可期得力國家雖費不得已也沿海形勢以大沽爲最衝要水師衙門必應設立於天津兵船統帶動涉外交宜委文臣大員不當目爲武事而又鼓舞妙柄操自 皇上不惜巨金以養戰士或時破格以獎有功務使天下曉然咸知 聖意所措而水師始可用矣一日火車宜及早興辦西洋富強之術首在輪船火車火車之行於陸猶輪船之行於水理本至常毫無足怪而議者多持異端或曰修築鐵路有礙民生或曰與此巨工有關風水此皆未睹其形而妄

下雌黃者也以臣觀之西法中之便官便商便民而流弊絕少者獨火輪車一事耳輪船之利猶可移此就彼火車則非身至其地者不得乘非已有貨財者無可運卽慮兩國構兵易以資敵殊不知丈尺之鐵折毀甚易修續頗難然臣嘗在西洋矣目擊歐土鐵路其多類如蛛絲瓜絡而同治九年布法之戰光緒四年俄土之戰皆未聞因火車而誘敵深入也似宜飭下北洋大臣派委妥員糾合公司先將天津至京二百四十里之火車鐵路勘辦興修不出兩年可冀告成至時鑾駕親臨一觀是非得失自不可掩然後明詔各省逐漸仿行如聖心以爲不當不過不推廣而已存此權輿亦未見其有害也一曰京師宜修治街道西洋教法務盡地力家無不修之業國無不治之涂而都會地方尤爲精神

所萃聚凡外國客之往遊者但觀其街衢之敞潔屋宇之整齊車馬之駢闐氣象亦足聳然矣大國倫敦巴黎姑不必論卽小國如荷蘭比利時都會亦皆壯闊無比今中華乃自古最尊之國京師又四海仰望之區其外觀可謂不飭矣臣愚以爲除宮禁未敢輕議自餘內外兩城坊巷似宜飭下五城順天府聽準官民共起公司設局修理國家歲撥經費數十萬兩助入之仿照外國章程抽收地稅房租以佐不足將街道一律平繕治使寬潔廣種樹木添設自來水火以便民用徙致豪富以實空間置巡役以養旗丁藉工作以消盜賊務令兩城內外煥然一新蕩平如砥則四海之人皆將悅而願遊於吾宇矣夫西人最視此等爲振作有爲亦以此等爲實事求是與其作爲無益之舉動或致虛糜何如興

此共睹之工程使人稱善此實於國體民生兩有裨益者也一日公使宜優賜召見今之遣使古之交質也然西洋視公使甚尊每遇國家朝會燕饗慶賀大事多者歲七八次少亦三五次無役不有公使揖讓其閒或立談或授坐各適其本國所宜而交誼之重輕卽寓於詞色抑揚接見之頃彼之所以爲禮者如此在我自可仿而行之應請皇太后皇上每年於春秋和暖時特旨示期臨御便殿召見各國駐京公使一二次接以溫語賜燕款之凡其眷屬人等例得侍從不苛以儀文概隨其國俗則天顏半日之謙光轉足以伸彼瞻雲就日之忱而起其肅廟雍宮之敬斯固無待親政之期而卽可舉行者也日本東瀛小國尙有延遼鹿鳴交親等館以待四方賓客之至獨我中華大國通使

已久授餐適館寂然無聞臣甚愧之並懇於京師天津上海三處特闢西式客館一所不厭崇闕巨麗輔以園囿足備壯觀凡遇各國游歷之王公貴臣及往來公使人等延使居住用示懷柔未嘗非外交之一助以先王經國大體而言則懷方氏治其委積館舍飲食本周官之遺也就我朝成憲而言則乾隆末年英國使臣荷蘭使臣來朝又有賜燕保和殿頒賞如意洲清音閣之例在是在皇上酌古準今而已一日商務宜重加保護中外經商之法自昔不同從前口岸未開華商與華商交易尙可置而不問今則事勢迥殊西人長駕遠馭挾其輪舟巨舶駛入江海捆載如山東南大利幾至盡爲所有同治年間李鴻章奏設輪船招商局與之爭競遂加恢拓至近年始挽回利權十分之一二然非仗

國家洞悉外情協之以巨款濟之以運漕則該局有時尙難自立卽此可爲保商益國之證現在各省煤鐵礦廠逐漸增開電報之設延及七省近又有雲南五金盡數挖掘之 詔局面愈大則端緒愈繁亟宜豫 飭經辦大員通盤計畫將來源銷路一一精籌奏明定案庶幾有以善持其後 臣愚以爲如興辦火車鐵路則煤鐵不患其無用矣改鑄金錢銀錢則五金不慮其不流通矣公務要件率先摘由電傳則電局不至虛設矣凡若此類必仰賴朝廷權力明示扶持庶免公司倒折之虞卽杜外人覬覦之漸商務當日有起色否則聽從各省枝節而爲之徒有開辦虛名不聞見功實效 臣實未見其可也一日度支宜豫籌出入西人之經國也每歲必合全國度支之數統籌豫算詳訂成書以昭示國內故

其取於民也恆視所出之度以爲權衡取之雖重而民無怨懟其法實與王制量入爲出周官歲會月要之義相符今以中國至大西人無不羨其地廣人眾足可自命強國而在我時若有貧寡之虞此最臣所太息者矣辦事首先需財財絀則事莫能舉而國弱國弱則侮之者眾而益貧西人豈真愚哉歲舉國賦幾半以養軍無異揮而擲諸大海之中蓋亦勢處於不得已也卽如中國以水師爲急務然竊計每年非確有五六百萬之饒卽不能養此數十百號之船旣練水師亦須整飭陸軍酌添開花礮隊鎗礮因之而改作局廠因之而擴充斯固勢所必然又非確有五六百萬之巨款不能供給裕如臣以各國度支比較至多莫如英國歲入二萬萬四五千萬兩出亦二萬萬四五千萬兩最少莫如日本歲入五

千餘萬兩出亦五千餘萬兩而中國歲入不過七千餘萬兩量地則不減於英國論財則未倍於日本出款又不可預知此所以剝肉補瘡與此廢彼無一而能持久也臣愚以爲嗣後似宜將一歲全國度支應出應入之數飭令各省分款核計豫約大綱於前一年先行奏聞彙候朝廷處分或分最急次要尋常三等應付急要者務期如額頒示簡明章程使之遵守不足之數然後酌取於民但令官吏無中飽之嫌出入有稽徵之冊共聞共見足可告天下以無慚矣至於籌辦之法仍不外規仿西洋查西法所有而不入我釐金關稅者如官民俸入之稅準票印票之稅煙酒公司之稅火車電報信局之稅皆屬巨宗若能一一推行歲增當必不少而鴉片煙一項不問中外所產尤應嚴密重徵無使漏網夫

取民以濟用保國以衛民不當與言利之臣同日而語也以上數
端審今日時勢所交迫而必不可無度中國情事所能行而非敢
高論但有竭忠盡慮之愚初無黨同附和之見儻蒙 聖明鑒納
飭議施行於國是苟補萬分之一 臣感且不朽扣 臣 尤有進者
方今四海合從連衡雖以日本一隅猶有所依傍獨我中國名爲
共入公法實則屏之局外而交涉事件又極重大繁多一有齟齬
動煩 宸慮不知西人情僞大事必用力爭小事可因勢利導然
此非身親其境目驗耳聞亦難懸得要領今軍機爲政本所在總
理衙門又洋務匯歸必宜多有數堂曾出外洋之員方足以廣獻
替誠使我 皇太后 皇上豁達洞觀特遣一二親貴大臣馳赴
歐洲一游經歷美國日本而歸綜攬全球虛心訪察必有歉然知

我內政之不足者臣愚以為莫如醇親王最宜矣如此不特目前醇親王輔佐 樞廷處事必歸至當卽異日 皇上親裁大政顧問亦有折衷自強之本實在於是西人質性臣所素知若聞親王奉 命出洋其接待之禮文必有異常隆重者勝於遣使萬萬矣臣不勝激切惶悚之至是否有當伏乞 皇太后 皇上聖鑒訓示謹 奏

中西交涉爲古今一大變端所貴審度彼己擇善而從庶不至扞格增患遣使八年出洋諸公從未有將中外情形統籌入告者甲申三月法約既定因不揆妄陋具摺言之冀備 朝廷采納不料此摺到京適值越事中變總署以其情事不合且有涉忌諱處竟寢而不奏將原摺退回殊覺可惜此稿本非密摺曾

乞正於李傅相曾襲侯二公俱有復書今摘錄附後亦見所言
不無微中云庶昌自記

李傅相函

尊議練水師築鐵路修治京師街道優禮各國公使保護商務
豫籌度支並請親藩游歷歐洲各節大言炎炎深切時事足令
小儒咋舌惜當軸未能盡知卽嘉納未必施行解人難索可爲
太息耳張幼樵京卿亦有請設水師衙門之奏交南北洋會議
目下和局又翻海防饜需支絀現在水陸各軍尙恐饋運不繼
更無餘力可議及此鐵路已有人奏請開辦 中旨令總署與
敝處會商議復旋有條陳其弊以爲斷不可行者中朝士夫因
循襲舊之見牢不可破言事者多曉事者寡 朝廷掎牽成法

回惑羣言不能灼見其所以然故議論多而成功少大疏未鈔發不審 批示云何想亦存而不論矣

曾襲侯函

大疏條陳時務切中機宜非歷年周歷外洋見聞精確不能洋洋灑灑暢所欲言其閒修治京師道路及請醇邸出洋兩層弟懷之已久而未敢發台端先我言之曷勝快慰假令 朝廷嘉采碩畫實見施行則中國之富強可以計日而待儻再因循粉飾意見紛歧則杞人之憂方未已也所奉 批旨如何仍乞鈔示

奉使倫敦記

光緒丙子十月余在江南通州花布釐金局蒙 欽差大臣禮部

侍郎郭公嵩燾檄調出洋於是有奉使英國倫敦之役至上海始知其爲駐紮三年也十七日乘英國公司輪船自上海出吳淞放大洋指南行約二千一百六十里可四日程而得香港經過浙江福建廣東三省境地福建以東臺灣障之西人謂其海爲中國海嘗有大風又多暗礁船人以爲戒又自香港指南行經七洲洋約四千三百一十里可六日程而得新加坡從雨中過越南羣山連延隱約可辨新加坡爲亞細亞斗入海中處最近赤道以圖經索之蓋距二百四十里而遙迤西爲馬納甲對峙者蘇門荅臘別自一島不相聯屬舟行有時望見其地炎熱卑溼有春夏無秋冬山中奇花異卉冬至前後號爲繁盛往游粵黃埔人胡璇澤園園皆西式有池沼而無亭臺畜養虎豹熊猿袋鼠鸞鳥之屬甚眾胡君

固富人英俄二國皆假以馭民之職而郭公欲於此建設領事以之充補者也又自新加坡折而西北行約一千一百四十三里可二日程而得檳榔嶼英語如碧瀾凡乘法國船往者至越南之西貢而不至此嶼嶼山明水秀迤南多深林叢木聞其中有瀑泉直下數十丈甚奇偉也自檳榔嶼指西行約三千六百三十九里可五日程而得錫蘭錫蘭佛所生也島周千餘里其泊船當南岸盡西處一海汊名曰高諾椰樹成林極望結實巨如瓜剖之有甘漿可飲土人貧薄或取饅頭果食之而飲此漿以解渴近岸有布喀刺瓦得寺經皆貝葉書文若連圓卽印度字母也又自錫蘭易船指西行約六千四百三里可八日程而得亞丁是爲印度大洋八日中無所睹惟巨浸稽天時有飛魚而已亞丁與阿刺伯連距紅

海口三百五十里瀕海一山多石英人建礮臺設兵二千守之屯
煤於此備輪船取攜阿刺伯唐世天方於漢條支也產駝鳥高可
逾丈其卵大者徑三四寸余購得其一史記大宛傳所謂其巨如
甕者也西洋婦女取其毛羽以爲首飾又自亞丁折入紅海西北
行約三千九百二十四里可六日程而得蘇衣士當紅海中經過
麥加城望見之焉地產加非其實大類蠶豆西洋搗滄爲茗與中
國茶葉並行而麥加號爲良品入麥西境後中國謂之埃及海海
盡處分兩汊東出曰阿喀巴屬阿刺伯西出曰蘇衣士灣屬埃及
中有大山曰西奈傳爲摩西以十誡立教地蘇衣士界亞細亞阿
非利加兩洲之間地本相連同治三年法人賴賽樸司建議以機
器開河通商旅避大浪山海道之險糜費至八千萬金磅鑿之七

年卒斷此峽而兩洲分矣自蘇衣士入新開河北行二百六十里可一日程而得波塞波塞臨地中海昔班超遣掾甘英往通大秦至條支臨海欲渡安息西界船人以海水廣大止之蓋卽此海也又自波塞正西行約二千八百十四里可四日程而得毛兒達島島形如臼犬牙曲抱爲英國修泊戰船處地中海第一重鎮也街市整齊壯麗視波塞迥殊又自毛兒達西行約二千九百四十三里可四日程而得支布洛陀縮穀大西洋之口觀所謂山礮臺者環山穿石爲隧道凡三重設礮門置礮五百餘尊高處距海面一千四百尺仰望若蜂窠然自此出大西洋折而北行沿葡萄亞法蘭西西境約三千四百五十三里可五日程而得掃司阿母敦掃司者英語南方之謂阿母敦則其碼頭也蓋自新加坡以西波塞

以東相望萬餘里間無城郭大都之會其人民頗有夷狄之風焉至亞丁而貧陋極矣紅海之中山皆童赤無草木至或終年不雨人事地利無足尙者盡波塞而止至毛兒達而異境特開西洋局面見矣又自掃司阿母敦登陸乘火輪車行二百一十五里而抵倫敦時十二月八日也總五十一日凡行三萬一千七百十四里皆以英之買爾折計每買爾當中國三里云使英三等參贊黎庶昌記

卜來敦記

卜來敦者英國之海濱歐洲勝境也距倫敦南一百六十餘里輪車可兩點鐘而至爲國人游息之所後帶岡嶺前則石岸嶄然好事者鑿岸爲巨厦養魚其間注以源泉涵以玻璃四洲之物奇奇

怪怪無不畢致又架木爲長橋斗入海中數百丈使游者得以攀
援憑眺橋盡處有作樂亭餘則淺草平沙綠窗華屋與水光掩映
迤邐一碧而已人民十萬櫛比而居衢市縱橫日闢益廣其地固
無波濤洶湧之觀估客帆檣之集無機匠廠師之興作雜然而塵
鄙也蓋獨以靜潔勝每歲會堂散後游人率休憩於此方其風日
晴和天水相際邦人士女聯袂嬉游衣裙雜襲都麗如雲時或一
二小艇掉瀆於空碧之中而豪華巨家則又鮮車怒馬並轡爭馳
以相邀放迨夫暮色蒼然燈火燦列音樂作於水上與風潮相吞
吐夷猶要眇飄飄乎有遺世之意矣余至倫敦之次月富紳阿什
伯里導往游焉卽歎爲絕特殊勝自是屢游不厭再踰年而之他
邦多涉名迹而卜來敦未嘗一日去諸懷其移人若此英之爲國

號爲盛強傑大議者徒知其船堅礮巨逐利若馳故嘗得志海內而不知其國中之優游暇豫乃有如是之一境也昔荀卿氏論立國惟堅凝之難而晉欒鍼之對楚子重則曰好以眾整又曰好以暇夫維堅凝斯能整暇若卜來敦者可以覘人國已 大清前駐英參贊黎庶昌記光緒六年七月

尊攘紀事序

宮城岡君天爵強識多聞仿通鑑紀事本末之例著書以紀國故始嘉永癸丑迄慶應丁卯凡十五年四十篇命曰尊攘紀事蓋取尊王攘夷之說而名也行有年矣天爵乞余序之日本沿古封建制度諸侯建國七十有三其後分多至二百七十餘而諸侯之中又有所謂大將軍者爲羣藩長天皇位雖尊然惟大將軍乃得專

決國事號稱幕府文祿慶長之際德川氏秉政天皇恭己以聽虛
擁神器幾三百年至嘉永中西洋英俄美先後叩關乞互市兵威
強盛大將軍不能拒於是鄰藩水戶氏倡攘夷之說士夫左袒閔
然一辭欲以奪將軍柄而德川氏不悟遽起大獄激怒之適以速
覆亡之禍內訌外沮迫脅無聊卒乃稽顙歸政奉還大權成其爲
尊王之局雖曰人事實亦天運使然莫之爲而爲者矣私獨怪當
時士大夫以尊攘爲名氣銳甚旣擯德川氏不用意必掃境攻戰
盡反幕府所爲申大義於海內乃不旋踵明治改元卽舉向所攘
斥者一變而悉從之而水戶之論絕不復聞推移反掌何其速也
然則夷不夷亦因心之異視已耳於人國無與孔子作春秋明王
道制義法諸侯用夷禮則夷之進於中國則中國之可知夷狄無

定名定形褻譏予奪一本政教而言非謂舍己以外綜地球七萬里而皆可禽擾獸畜也史記大宛列傳載安息在大宛西最爲大國臨媯水有市民商賈用車船行旁國或數千里以銀爲錢錢如其王面王死輒更錢效王面焉畫革旁行爲書記以證今日歐羅巴事甚明而後漢時之大秦卽今意大里史稱其俗力田作多種樹蠶桑銀錢十當金錢一質直無二價國用富饒各有官曹文書置三十六將會議國事其王無常人皆簡立賢者人民長大平正有類中國故謂之大秦定遠侯班超嘗遣掾甘英往通之不能得當其時羅馬并兼歐土廣制萬里政教號令郁然可觀浸與漢家冠帶比倫矣況更千數百年閒殊勢異變益務強兵並敵雜霸王假仁義修盟會若今西國者哉是以君子鑒往矯失將善謀其國

懽懽焉慎固封域舍己短益彼長不敢輕喪所守亦不欲賤簡他人以詒釁端庶幾乎保邦常道天爵著書或亦有見於是與至其文詞健快如水溢雲涌馬逸不可止自謂必傳無疑天爵既已知之矣余又何言 大清光緒九年癸未二月遵義黎庶昌

儒學本論序

日本長尾楨太郎入大學四年專修古典講習科撰儒學本論上下篇以明孔孟之術其意以爲古之學一今則洋學盛行百端繁興勢不能并日力以從事於儒則約而舉其要以西人著書之法爲尋序攷究之方可謂工於擇術嗟乎儒爲世病久矣自孔孟沒而戰國縱橫之術興至秦尤不信儒其亡遂立而待西人立法施度往往與儒暗合世徒見其迹之強也不思其法爲儒所包而反

謂儒爲不足用是烏足語道哉孔子曰物窮則變變則通通則久雖百世可知豈非善觀世變乎曰形而上者謂之道形而下者謂之器又曰以制器者尙其象豈非今世西學之所從出乎曰送往迎來嘉善而矜不能所以柔遠人曰卽以其人之道還治其人之身豈非公法條約之所本乎曰通其變使民不倦又曰行夏之時乘殷之輅服周之冕樂則韶舞使孔子而生今世也者其於火車汽船電報機器之屬亦必擇善而從矣至如孟子其言尤合於時宜曰凡我同盟之人旣盟之後言歸於好則訂約之說也惟仁者爲能以大事小惟智者爲能以小事大則交鄰之道也國君進賢必國人皆曰賢又曰不得罪於巨室則上下議政院之法也征商自賤丈夫始有布縷之征粟米之征力役之征則關稅之例也一

齊人傅之眾楚人咻之引而置之莊嶽之間則學館之規也天之
高星辰之遠苟求其故千歲之日至可坐而致聖人既竭目力繼
之以規矩準繩以爲方員平直不可勝用水搏躍可使過顙激行
可使在山則天文句股重力之學也堂高數仞棖題數尺食前方
丈侍妾數百人文王之囿芻蕘者往雉兔者往則房室園囿之觀
也齊王好樂孟子語以與百姓同樂齊王好勇孟子請無好小勇
齊王好貨好色曰與百姓同之於王何有嚮令孟子居今日而治
洋務吾知並西人茶會音樂蹈舞而亦不非之特不崇效之耳自
餘若矢人函人可爲巨礮鐵艦之喻鑿池築城守死弗去可爲礮
臺之喻而暴君汙吏必慢其經界遂至爭地以戰殺人盈野爭城
以戰殺人盈城所謂率土地而食人肉孟子之所戒何一非當今

强大之所戒孰謂儒果迂闊哉孰謂孔孟之道果不可施於今世哉僕向蓄此論在東西洋日久愈信孔孟之學爲可行推此而言則聖人所謂凡有血氣莫不尊親更千百年後必有是一日特非耳目所及見故人不能前信久欲爲讀孟子一篇以申余論因循未及成今於長尾君書略發其凡未知能有所證明否也光緒十六年十月

燕集三編統序

周官大宗伯以饗燕之禮親四方之賓客往嘗讀而疑之以爲賓客將君命聘問於王國而王國所以親之之道止於飲食燕饗間似不稱先王制禮本原之意釋之者曰不然詩大小雅之興在於成周盛時號爲正聲鹿鳴一什冠諸簡首而鹿鳴常棣伐木諸篇

酒醴笙簧邊豆豨牡言燕飲者居其大半降至春秋列國聘盟賦詩見志左邱明之所紀述仲尼之所稱歎尤往往而是禮所以謂始於飲食爲人情之極致也且古者饗依命數行之於廟燕則行之於寢饗有節燕無節燕則旅降脫屣升坐無算爵以醉爲度其疏數不同若此方今四洲遣使互駐事體絕重於古列國時而又異言殊服政俗不同若非飲食燕會相與達款誠聯情好卽不幸扞格而有事然則使臣之在他人國遇令典慶節以禮延致王公貴人精饌盛筵葡萄夜光毛冠金裾長劍陸離佩寶星而絡綬帶者謂之饗可也良辰美景華燈明燭賓客滿堂筆札紛綸嘉穀脾臠歌舞遞進者謂之燕可也余以光緒七年冬奉使日本有與國同文之樂暇輒與摺紳儒流敘交會飲諸君子或爲詩文以張之

而上巳重陽每歲必舉特別之會使與蘭亭龍山相配光緒十三年余奉命再至國好日密駸駸乎有唐世遺風愈益無事益得與諸君子道故舊爲燕樂於是會者愈繁詩與文日益多歲不下數十聚或有作或無作隨員孫子君異皆理而董之使自成帙今年冬余任滿將歸國又有餞別留別之燕詩文之外踵而爲圖酬唱倍於曩昔非一編可容孫子因綜前後所得彙爲燕集三編凡得詩若干首文若干篇均別爲之題而屬余誌其首嗚呼多矣自唐以來未之有也光緒十六年歲次庚寅十月遵義黎庶昌

養浩堂詩第二集序

余昔嘗從曾文正公游文正具知人之明號爲得士凡士有一材藝之能者無不爭炫鬻於其門而非常奇偉之才頗閒出於其中

方其在安慶時逋寇未盡平也而識者有以卜其詩書之氣必能靖禍亂而致太平金陵克復又一聚之江甯余因得盡交其賢豪長者一時朋好之樂以爲雖古今人才之會未數數然也文正旣沒曾不數年人才亦散之四方或老病且死余漠然無所信嚮乃走海外數萬里之歐羅巴獨居深曠求所謂朋好之樂者渺不可復得旣六年而奉使日本日本與吾同文國也東京又爲人才淵匯首因栗香以交其國人後遂狎而求之如歐陽子所交石曼卿者久之游契日廣及余再至與國人益習而適又幸無事於是上自公卿大夫下逮布衣野老之倫往往歌吟嘯呼詩酒淋漓酣恣而不厭其視在江甯時殆將有以稱之余又以得朋好之樂於異國爲足慶也然余與栗香交十年栗香嘗守介不妄求合其位雖

不顯所交多端人正士必盡栗香所與而後於士無憾栗香之介
余之博愛亦其居地使然與余又以謂日本古多豪俠磊落之士
其風俗感慨而悲歌與燕趙相類也栗香有室曰養浩堂余嘗登
其堂二人者傲然無復畔岸於天下事知無所不言言無所不罄
其於亞洲天時人事地利之故亦籌之悉矣栗香喜爲詩然不常
作余不善詩栗香數強余爲之故其後集中吾二人倡酬之作倍
於他人而栗香更謙下每有作必使余竄定頗有糾繩栗香不余
逆也今年冬余將歸國乃哀集辛巳以還所作爲三卷屬余曰爲
我序之夫栗香之前集余旣已贅辭矣今又何言獨吾二人者之
與游至密無閒其交誼不可終闕而余前序所云由語言文字之
微以進於捐故蹈道之實者其言至今浸驗嗟夫栗香雖不自以

詩名而讀其寄懷諸篇若伊香溫泉之游墨江月夜之興豪蕩綿
邈亦足以知其胸次所存矣光緒十六年十二月

醫說一首贈淺田栗園

儒道之所以異於他術者豈非以其心乎孟子曰惻隱之心仁之
端也故必有不忍人之心而後有不忍人之政禹稷之已溺已饑
文王之視民如傷仲尼之老安少懷皆具此不忍之心而已推之
於醫何獨不然是以古昔聖帝賢臣若黃帝雷公岐伯俞拊之倫
一草一木相與嘗劑於廟堂之上其重視人命若此西人之橫行
海內也日挾其吞噬之器瞰人肉而食之鐵艦如山岳巨礮臥而
隱人入其局廠而彈藥積如垣墉也凡所以求爲殺人之具者無
微不備而智者且益極精研慮以求異術之變化使機械技巧詭

出而不窮充其器非盡族他人之種類不止斯亦忍矣雖有好善之情不足以勝其戕賊之性獨至於醫一若將之以謹慎行之以至誠然其法也疏猶不免武斷一切之意寓乎其間以治本原之病則非矣張仲景長沙方書號爲聖作而說者猶以爲有大人之病而無嬰孺之患有北方之藥而無南方之治況於水土食飲之懸殊體質強弱之異態國俗風氣之迥然不侔者哉日本淺田栗園先生年七十七矣精醫學生平篤宗仲景雖今日西法大行而卓然守正其術亦並行不悖門徒且益盛不衰所著澡泉餘錄嘗推闡道家精氣神三寶之說宗旨頗與靈素爲近靈素之書實則養生家言也余嘗語先生東方食米之國與西人之食牛羊麪包者其人旣性質不同醫理亦必有辨先生以鄙言爲中理也因申

此義而爲之說以贈光緒十六年十月

題梅所文鈔

光緒十五年春有以書獻於僕者則日東人士西島醇也讀其書
條達疏密步驟於眉山蘇氏父子之間知爲雋才而未卽見已而
君介隨員孫子君異上謁年齡甚少布衣芒屨岸然而前睹其貌
儵爾而清聆其議論叩其胸所蘊蓄淵然而不窮也踰年出梅所
文鈔示余乞爲正定余益有以觀其深文有所謂焚書說者讀始
皇本紀而致已慨其言曰方今異邦上下尊卑同權之說盛行此
邦也雖未有秦皇焚書之事而道已焚矣余尤偉而奇之嗟乎周
孔之道其在天地如大海之浸潤萬物而無微不至或息
也豈惟道無息時卽區區文字爲道之寄迹亦且歷久而彌新異

邦人不能知也當周末時游說蠶行天下驚於合從連衡而屈原
乃於是時作離騷以香草美人委屑之辭攄寫其忠愛無聊之意
今乃與日月爭光杜子美遭天寶亂離顛沛於兵戈擾攘之中而
社稷君民一飯不忘其詩百世稱聖夫此二者所謂文辭之末而
猶然不可廢如是況於周孔之道乎士患不自立已耳若其有志
於道卽盡心文字之間亦何不可輔世翼教願君之益勵之也僕
喜君論與鄙意素合輒道所見相質證遂以題於卷端光緒十六

年十月

書高松保郎斷腕事

高松保郎者本名義智江戶人也江戶初爲大將軍治所明治維
新改號東京故今爲東京人保郎喜任俠能傾血性救人嘗慕魯

朱家軹郭解一流之爲人也少時與某藩士人某某氏善士人者
豪傑士也識保郎於疇眾中遇待殊厚以族人女山內千代妻保
郎二人者之與游相得甚親又要約爲父子也士人者一旦觸某
藩侯怒事莫解無人敢居閒當是時藩法嚴而獄甚急非自殺不
得明於是保郎慷慨矢誓曰此吾報知己之日也吾聞古有借軀
報仇者今將斷吾腕以白某某氏之冤不猶愈乎乃往見醫士岡
君明鄉說狀岡君曰異哉子之爲也吾閱世久矣見有刎頸而死
者矣有剖腹而死者矣從未聞自殘其支體以解他人之厄者且
以子之所爲斷腕而求余治是猶子放火而使余滅之也雖謂之
愚可也保郎曰不然吾之所爲非以爲名高而立然諾也亦非有
所利於其閒也然而且爲之何也夫人有不白之罪而坐視其死

不仁與人共肺腑臨難胡越棄之非義知有可救之道而怯懦不爲無勇是三者皆豪俠之所恥也吾之爲此欲以愧天下之儒言而蹠行者岡君曰善旣如是任自爲之保郎於是拔刀斷其左腕血淋漓盛以錦函使人馳報之某藩侯曰保郎再拜獻腕藩侯閣下謹以贖某某氏之罪閣下幸加憐而垂察焉保郎死骨不腐矣某藩侯大驚亦心義保郎所爲也乃謝其使者卒赦士人得不死而保郎亦以治痊列藩士聞之皆曰保郎奇男子也行雖不軌於正然絕一腕以存骨肉之交使其處君臣父子閒脫遇不幸殺身以成仁固優爲之矣保郎旣已斷腕益思以身濟人勗立宏通社闢西教游說至尾張又爲忌者所陷其妻千代病以書抵尾張慰保郎詞多哀婉竟死列藩士復聞而悲之保郎今爲愛生館主專

以良藥救世余見之東京蓋煦然儒人也終身不言某藩侯故人不能舉其名氏余竒其事書告世之傳游俠者

拙尊園叢稿卷六

遵義黎庶昌純齋

餘編之外

與莫芷升書

芷升六兄親家足下多年曠絕音問今春舍姪汝謙書來始悉山中兄弟近狀從兄介亭季和徙居省垣鄭子行表兄遂已物故蹇子振作宦蜀都而鄭伯更甥亦客游粵土庶昌更遠適數萬里之海外二十年來人事遷變風雲變滅不主故常獨足下歸然靈光仍爲老師祭酒主講會城汲汲以古學倡導後進聞與汝謙輩譔國朝黔詩紀略六十餘卷網羅放軼闡幽發微功在桑梓誠甚盛業竊謂黔人之詩本朝如周漁璜宮詹鄭子尹及令兄子偲兩徵

君允足爲黔南冠冕自餘眾家如家兄伯庸篠庭亦皆能翼翼獨造克樹一幟合以二百餘年鴻篇巨製裒然大集潤色窮荒計不在盧雅兩山左詩鈔阮文達兩浙輶軒錄鄧湘皋沅湘耆舊集諸書之下似宜趁令弟善徵親家及唐鄂生觀察仕宦得意之際集貲付刻以廣流傳一塞後死者責歲月不居世變多故正未可視爲緩圖也庶昌自二年冬閒應湘陰郭公嵩燾之調奉使出洋倏經五載駐紮者英法德日四國游歷者比瑞意奧葡數邦其於西洋情事窺之審矣歐洲一土富強者首推英俄二霸而俄人譎鷲志在并吞英則廣土眾民稍知持盈保泰人情法令嚴肅整齊自當以英爲舉首各國風氣大致無殊凡事皆由上下議院商定國主簽押而行之君民一體頗與三代大同然其國人顯分明黨此

伸彼詘絕似漢唐末流而於政令要爲無損至與外人交涉全視國勢之強弱以論事理之是非外假公法與爲維持內懷狙詐以相賊害又絕似乎春秋戰國今之遣使純是周鄭交質故智故其國旣非蘇張之舌所能說亦非陳班之勇所可施計彼所以誇示於我者則街道也宮室也車馬也衣服也土木也游玩也聲色貨利也此猶有說以折之至於輪船火車電報信局自來水火電氣等公司之設實闢天地未有之奇而裨益於民生日用甚巨雖有聖智亦莫之能違矣其人嗜利無厭發若鷙鳥猛獸然居官無貪墨好善樂施往往學館監牢養老恤孤之屬率由富紳捐集爭相推廣略無倦容亦不爲子孫計畫儼然物與民胞而風俗則又鄭衛桑間濮上之餘也每禮拜日上下休息舉國嬉游浩浩蕩蕩實

有一種王者氣象決獄無死刑而人懷自勵幾於道不拾遺用兵服而後止不殘虐其百姓蒙嘗以爲直是一部老墨二子境界老墨知而言之西人踐而行之鑿其治理則又與孟子好勇好貨好色諸篇意旨相合吾真不得而名之矣汝謙欲吾撮舉泰西大要於尊函一發其凡望賜示之不具庶昌頓首

巴黎大賽會紀略

西歷一千八百七十八年五月中歷之光緒戊寅年三月也法國開賽會堂於巴黎至冬十月盡而散名爲哀克司包息相先未開會之前一年法以書徧騰各國請以珍物來會至是會者咸集於是殊方異物新奇瑰瑋之觀無不畢至其堂建於商得媽司舊時練兵之所巨厦穹窿梁柱榱桷悉皆鐵鑄而函蓋玻璃下施地板

東西相望外綴園亭池館市肆酒樓規模壯闊自西洋賽會以來
詫爲未有余數數往觀默誌厓略蓋千百中之十一耳地分三大
區第一區爲各國房式及售零貨處在三納河西中一區爲講求
製造各學及日用飲食之所在三納河東又東爲賽會堂堂長二
百十四丈寬一百五丈阿房四周外柱刻石爲四大洲人物中左
右三樓高聳而其中亦分三區左區陳設本國之貨中區油畫石
像右區爲各國貨物此三區又各界出若干小區甬道縱橫物皆
以類相從一類之中又分數十百類夜則照以煤氣燈華麗宏博
至不可名狀入其中者但覺千門萬戶光怪陸離目迷五色自西
柵闌入大門爲脫漏加得諾高樓樓上下兩重爲作樂處容坐數
千人下一層左右長廊環抱如伸兩臂近肩處各有小樓旁聳高

出正樓數丈中懸徑尺餘鐵柱長五六丈以汽機旋轉之可升降自如正樓東嚮地漸低下迤平處鑿大圓池累石層級而上引水於樓闌外跌落赴注之如瀑布然池旁環踞石獅銅牛池內別設鐵管激爲飛泉百道西洋水法類多如此循池左轉爲法國飯館飯館之西有小花圃三北則累石爲數池高高下下名爲阿魁爾亞模養魚處也東爲虞衡公所東之北有屋數椽各自成式往往仿效野人所居茅茨樹榦互相枝柱內陳百穀蔬果種類及山林材木之屬又一間悉食穀果小蟲欲人究知其形狀也又一間以玻璃酒瓶裝爲城甕日光射之五色璀璨成文又一間爲風雨寒暑鍼表再北爲阿爾及耳房又東則悉唐花小玻璃房約十餘座再東爲講求百工新法之所東之北爲巡捕房至此近河沿而止

循池右轉爲日國飯館飯館之西南有大花園五唐花房三極西
高處因石壁爲園井木翼然已在長廊之外東爲日本房白板矮
扉以修潔勝迤南爲瑞典挪而威堆義司埃及波斯房波斯房內
陳設無多而承塵特爲精緻概用五色小方玻璃嵌成淺深凹凸
如石洞鍾乳然再南稍高爲中國公所東嚮左右兩轅門飛簷正
廳三閒陳設螺鈿几榻院中央一小亭兩廂十二閒爲售貨處所
售磁器茶葉古銅器雕刻象牙摺扇獨多會畢後中國以此房贈
伯理璽天德移建布注得不郎園內又東爲暹羅房屋爲唐花房
爲馬爾哥小圃再東爲陳設各種新式車輛處亦近河沿而止是
爲河西之一大區由正中渡大橋而東爲中區沿河左轉爲攷求
救生救火航海諸法圖器之所北爲水龍會再東爲唐花房又東

爲煙鐵兩作房爲法國飯館飯館之北爲石板印像處保衛牲畜會處再北爲唐花房爲煤氣公司爲巡捕房飯館稍東有建造房屋灰石式樣所再北爲克魯數製造廠待爾路瓦鐵廠由此轉東爲工部局爲三沙孟鐵廠又東爲火油木炭公司爲唐花房克魯數以製造鋼鐵兼講礦務著名與英之烏里飭德之克魯伯鼎足而三待爾路瓦三沙孟亦其次也油炭公司之南法飯館之東有大花園一小花園八大花園中引泉爲池至此已近會堂門首矣沿河右轉爲通商海口公局再東爲唐花房及種花器具所唐花之中又有一所爲英國花房又東爲比利時飯館其旁有小房爲英太子果下馬廐南爲莫納哥房再南爲日國回式房稍東又一花園日國房之西爲醫學館南爲水龍會爲火輪車公司爲海關

及城稅局稅局之東爲英國農務機器廠廠之北比國飯館之東
悉皆花圃布置略與左方同是爲河東之中一區由此升階爲會
堂上有平臺臺以石闌爲護入會堂大門東嚮正中一長閒較左
右兩區爲狹而橫分十四區第一區爲法國古像古衣物以次而
英而意而美與挪而威而德皆油畫及白石雕琢人物德與法爲
仇讎此次不以他貨入會祇此存盟邦之誼而已土耳其以有兵
事亦不與第六區爲巴黎本城之物地段較長爲全堂中央樞紐
中左兩區交界處走巷中穹然一石墩建方五尺許塗飾以金一
千八百七十一年法所償德國兵費象其多如此也又次而法而
奧而日而俄而比而葡而瑞士與丹而荷亦皆油畫石像極東一
區爲法國工作藝術諸器用及珍奇寶玩之物皆國家官物也左

一長閒雜陳法國百貨橫分之區犬牙相入尤爲細碎而直分者
共八行第一行首爲學部章程次大學次中學次小學各堂應用
書籍圖書器物次印書局書坊之圖籍次丈尺句股權衡次醫學
次文房百寶次照像次畫繪及顏料次天文地理次音樂音樂以
被阿魯琴爲多凡十二區第二行精緻古銅及鑿花新銅器次貴
重精細之家具次粗賤之家具次磁器次時辰鐘表次刀劍次糊
壁花紙次香水脂粉胰皂梳篦之屬入之異芬沁人凡八區第三
行織花錦毯次簾帳几榻所用之織綾花邊次五色玻璃及玻璃
挂燈瓶盤筒管等類四方亭一具最偉次金銀刀叉等日用器具
次粗細氈毯次煤氣爐竈次鍼褥盒綾織筐籃坐几小車之類凡
七區第四行鎗礮及礮臺圖式次粗細麻綾麻布次各色布匹綾

樣次手巾包頭領帶手套次金剛鑽石真金手飾鍍金盤蓋次男
女裏衣睡帽衾枕次各種戲玩器具凡七區第五行棉花綿布次
花素綢緞五色絲綫皆用光學分別淺深攢集成文次大絨大呢
次毛織粗褐次錦繡花邊次男子冠服次婦女衣裙鞋襪及剪綵
雜花駝鳥毛如行萬卉叢中穠豔極矣次女披肩次行裝衣履箱
袋凡九區第六行礦務各產次山林各產次農田各產次印花布
次漁獵之具次醫藥化學材料次生熟皮貨凡七區第七行悉皆
機器巨者數丈小者盈尺無下數百千種兩端雜以鋼條銅管此
一行又並兩行之地而爲一第八行各種車式及鞍轡鞭韁嚼韉
之屬次紅白各酒及造酒盛酒之器次魚果蔬菜次食油次麪包
次白糖蜜餞牛奶次豆穀籽種凡七區總五十八區右一長閒爲

各國之物橫分十八區右兩區之間有露空院落十八區又各自爲門以像其本國之形第一區爲英國英國之器約分四類一爲局廠機器一爲縫紉之器一爲百工小技之器一爲光化氣重等學之器次美國次瑞典挪而威次意大利次日本日本間一小區爲農務局亦頗別致次中國所陳磁器木器爲多而其出色者則以廣東繡屏爲最次日斯巴尼亞次奧司脫利亞次俄羅斯多綠松石器物次瑞士金表首飾獨精次比利時次希臘次丹麻爾克次南亞墨利加共爲一國次馬而哥堆義司暹羅波斯越南次呂克桑波爾莫納哥法國南邊一小國呂克桑波爾則荷蘭君主自屬地也次葡萄亞次荷蘭總二十三國由是而言其四周南北兩周已盡惟東西二周兩長廊西廊卽大門進處也右邊皆英太子

威爾士所陳珠寶玩具蓋自印度攜來者左邊爲哥布蘭織花錦
毯賽勿爾磁器二廠皆極有名故特設於此又有沙爾勒滿尼一
舊箱未知何所取義東廊雜陳男女百工技藝佐以音樂極東北
張挂法國大地圖中梁懸一金球有機擺動之以象地行四角皆
加非酒館堂以內規模備矣至於堂外東南北三面又各自爲區
南北分兩層近堂一層皆汽爐雜以花圃東一區有銅鐵大鐘有
電氣機器有粗磁器有玻璃有唐花之從屬地來者有越南小屋
有大會章程所有作冰機器局有奧國麪包鋪兩端有飯館皆各
由爲室不相聯屬南之外一區由西而東爲英國農務機器處精
致馬車處次爲瑞典挪而威房次爲意大利房次爲學習兵船挂
旗傳話處次爲奧國廳房次爲瑞士房次爲比國廳房次爲丹葡

二國小房次爲荷蘭酒店次爲水龍局次爲巡捕房與東一區之飯館接至此有角門可出北之外一區亦由西而東有兩長廊皆機器再東爲飯館與東一區之飯館接亦有角門可出兩機器房之中爲北路大門東爲辦公所西爲供事人役住處堂以外規模亦備其大略有如此者

刻古逸叢書敘

余使日本之明年得古書若干種謀次第播行屬楊君星吾任校刻惟夫古籍之僅存兵燹腐蠹之無常其勢不日趨散亡不止學士大夫雖病之而無術以免惟好之而卽求求之而卽傳差足救敝於後余非苟爲其難也古書之流遺何幸復見於異邦而自余得之且以付刊焉余亦不自知所以然庸詎知非天之有意斯文

而啟余贊其始也余患不學久矣今天假此使事歲月俾得從事讀書不可謂非厚幸子曰好古敏以求之請自茲始書成將斂其板運致之官局以與學者共之雖然卷帙之重而課成於再期校讎之繁而委積於一人或不免抵牾滋多而謏陋如余又不能精勘其誤失使讀者快焉其力僅足存此書而已古書之不亡古人之精神自寄之豈余所能增重而獨至按輯之責似若默以畀余者固不敢不勉也書凡二百卷二十六種刻隨所獲概還其真無復倫次經始於壬午告成於甲申以其多古本逸編遂命之曰古逸叢書而別條敘目如左光緒十年歲在甲申七月遵義黎庶昌

敘

敘目

影宋蜀大字本爾雅三卷

此書末有將仕郎守國子四門博士臣李鶚書一行爲蜀本真面目最可貴宋諱闕慎字其爲孝宗後繙刻無疑日本再繙之今又從再繙本影雕展轉撫摹僅存鄂廓而已按後唐平蜀明宗命太學博士李鶚書五經刊板國子監中見王明清揮塵餘錄爾雅在五經外豈明清家有五經僅舉見本而言與鶚鶚不同據此可以訂誤

影宋紹熙本穀梁傳十二卷

此與揚州汪氏問禮堂繙刻公羊傳同爲建安余氏家塾本二書均題紹熙辛亥孟冬朔日建安余仁仲敬書而此本第十二卷末有國學進士余仁仲校正國學進士劉子庚同校國學進士陳幾

同校國學進士張甫同校奉議郎簽書武安軍節度判官廳公事
陳應行參校五銜余氏萬卷堂藏書記又題癸丑仲秋重校訖則
穀梁之成當後公羊二歲矣此次撫刻俱精有取藍勝藍之妙附
校札

覆正平本論語集解十卷

此書根源隋唐舊鈔字句與今行本異同甚夥往往合於陸氏釋
文字畫亦奇古卷末題堦浦道祐居士重新命工鏤梓正平甲辰
五月吉日謹誌正平甲辰當元順帝至正二十四年其云重新鏤
梓則以前有刻本可知然時代無考矣道祐錢遵王讀書敏求記
及日本別刻題學古神德楷法日下逸人貫書者均作道祐余謂
當從此本作祐是又有津藩有造館本論語集解亦出舊鈔異同

處尤爲近古皆卷子真面目也天保中有縮刻本

覆元至正本易程傳六卷繫辭精義二卷

程子易傳東都事略直齋書錄解題載六卷者是爲原本錢遵王猶及見之後世通行本并作四卷大失程氏舊第近金陵局刻本董氏真卿周易會通區作六卷實則未見原書此本雖元時坊刻然宋諱如貞恆桓慎敦等字多缺筆則元繙宋板也所有異同卽附於逐行字句下是東萊呂氏參定之遺尤爲難得原書無呂跋今從會通中錄出補刊於後繫辭精義二卷董真卿云東萊集周子二程子張子諸家經說語錄及二程子門人共十四家之說以補之然則館閣書目以爲託名者誤也惟卷首諸圖爲坊賈增入覆舊鈔卷子本唐開元御注孝經一卷

孝經注疏序云明皇於先儒注中采摭菁英芟去煩亂撮其義理允當者用為注解至天寶二年注成頒行天下仍自八分御札勒於石碑即今京兆石臺孝經是也自石臺行而世幾不知有開元十年之注其實石臺即用開元本略加修改而已此本元行冲序完然獨存惜未錄疏然於三才章格外注云疏中廣要道章注云疏下猶可見元氏分卷之遺經義考引崇文總目云孝經正義三卷邢昺撰初世傳元行冲疏外餘家尚多皆猥俗褊陋不足行遠咸平中昺等奉詔據元氏本而增損焉與文獻通攷所引末句集諸儒之說異陳詩庭云叔明僅據行冲疏為本未嘗參采諸儒故今本猶止題邢昺校當以朱錫鬯所引為正

集唐字老子注二卷

日本有摹刻張參五經文字唐玄度九經字樣甚精與石本無異
又有南總地名字惠攷訂晁以道本王輔嗣老子道德經注今合以
局刻華亭張氏本集張唐二家經字爲之

影宋台州本荀子二十卷

朱子按唐仲友爲一重大公案其第四狀云仲友以官錢開荀揚
文中子韓文四書貼黃云仲友所印四子曾送一本與臣臣不合
收受已行估計價值還納本州軍資庫訖此卽四種之一卷末有
劉向敘目題荀卿新書十二卷三十二篇又有王子韶同校呂夏
卿重校銜名熙寧元年國子監劄子及校勘官十五人銜名又有
仲友後序蓋禧熙八年繙雕熙寧官本板心所題姓名卽第六狀
云蔣輝供共王定等一十八人在局開雕者是仲友雖爲朱子所

劾而此書校刻實精錢遵王稱爲字大悅目信然

影宋本莊子注疏十卷

南宋槧本每卷首題南華真經注疏卷第幾次題莊子某篇某名第幾郭象注次題唐西華法師成玄英疏分爲十卷與宋藝文志同又於每卷內題某篇某名第幾郭象注以還子玄之舊故分言之則爲三十三卷合言之則十卷也惟唐藝文志作注莊子三十三卷疏十二卷四庫未收書目依道藏本鈔作三十五卷敏求記又作二十卷均未知如何離析此本爲日本新見旂山所藏字大如錢作蝴蝶裝僅存十分之五余見而悅之以金幣爲請新見氏重是先代手澤不欲售願假以西法影照上木而留其真余又別於肆中收得養生主一卷德充符數葉爲新見氏所無並舉而歸

之然尚闕應帝王以迄至樂因取坊刻本成疏校定繕補而別集
他卷字當之不足者命工仿寫蓋極鉤心鬪角之苦矣天下至大
設異日宋本復出取以與此數卷相校字體多不類讀者當推原
其故也成疏稱意而談有郭象注解之曲暢而不蹈其玄虛有林
希逸口義之顯明而不至流於鄙俚且世傳老子西出流沙莫知
所終疏以爲適之屬賓尚存唐以前舊聞如此類甚可喜也子書
善本傳世日少世德堂六子久爲眾所稱貴讀此老莊荀三書更
當快然意滿也

覆元本楚辭集注八卷辨證二卷後語六卷

朱子注楚辭時年已七十識解在詩集傳之上世行本雖多往往
闕辨證後語此獨完整中間宋諱多缺筆亦元繙宋刻與程氏易

傳同作讀本最善

影宋蜀大字本尚書釋音一卷

武昌張廉卿所藏咸豐初年吳縣潘邕侯手摹與士禮居蜀大字本孝經論語行款同邕侯詫爲黃蕘圃顧千里諸人所未見不誣也

影舊鈔卷子原本玉篇零本三卷半

此真顧黃門原帙逸千三百年而幸存注文之詳奚翅溢出大廣益會本十倍雖僅僅十分之一足可視爲瓊寶余別有跋篇中放部卷末有馬道二字馬道在大和國奈良興福寺旁古有學校當是出於此學所藏也單行本已出日本紙幣局長得能良介始從高山寺搜獲糸部卷首至緘字半卷摹刻以印本見詒因另刊補

完故一卷中有兩次第聞之柏木探古云西京某氏尚存一卷在此刻之外但未知何部無從羅致耳

覆宋本重修廣韻五卷

此卽張氏士俊澤存堂所出之本宋諱闕至桓字則徽宗時槩也日本町田久成所藏亦假用西法影照付刻張氏雖名影宋而據玉篇集韻改字頗多顧千里曾以無札記爲憾又行款部位間有移易字畫俱一一排勻故明秀異常而遜其一種樸拙之氣今用張刻校其異同別爲札記附後

覆元泰定本廣韻五卷

此卽四庫提要所謂原本廣韻注文簡當者也余以大中祥符重修本比勘其視此書加詳者實祇姓氏地理兩門提要譏其冗

漫亦良有以自重修本盛行此本傳世日希以顧亭林之博洽僅得見明內府中涓本況泰定時槧邪第不知提要所謂元初刻板又是何本也卷中匡朗等字時有缺筆其爲出自宋板無疑惟俗體頗多譌舛亦眾今擇其顯然太甚者正之餘悉仍舊余見楊君星吾所藏明永樂甲辰廣成書堂宣德年間清江書堂兩次繙刻卽此泰定本注文遞有刊落別有元至順庚午刻本刪節尤多然則此本益重可貴矣

覆舊鈔卷子本玉燭寶典十一卷

隋著作郎杜臺卿少山撰原十二卷今缺第九卷其書用小戴記月令爲主博引經典集證之較周書月令解呂覽四時紀淮南時則訓加詳此爲專書故也開皇中疏上號爲詳洽陳直齋書錄解

題猶載之其亡當在宋以後耳

影舊鈔卷子本文館詞林十三卷半

文館詞林有二本一為高宗顯慶三年原修一千卷一為武后垂

拱二年采詞涉規誡以賜新羅國王者五十卷此則一千卷本也

今於林述齋佚存叢書外收得者第一百五十六卷詩一百五十

七卷詩一百五十八卷詩三百四十七卷頌四百五十二卷碑四

百五十三卷碑四百五十七卷碑四百五十九卷碑六百六十五

卷詔此卷殘六百六十六卷詔六百六十七卷詔六百七十卷詔六百

九十一卷敕六百九十九卷教東土僅存之本獲已過半其中亦

有漢書文選所載不盡逸文也字分大小兩種當以類從未獲者

附存目錄於後

影舊鈔卷子本瑠玉集二卷

通志藝文略作二十卷入類書日本見在書目作十五卷入雜傳此僅存兩卷其體例每類以二字名篇先撮所引人物爲耦語冠首再列故事書名於後略似小傳實小說家言書法頗勁疑遺唐學生之所爲末題用紙若干張天平十九年歲在丁亥玄宗天寶六載某月可攷見唐時卷子本舊式惟譌字頗多是必傳鈔之誤原篋不如是也

影北宋本姓解三卷

雁門邵思謨首有序題大宋景祐二年上祀園丘後五日其書以偏旁分部始人終暢凡一百七十部爲姓氏譜別裁原藪甚精頗類唐石經北宋本之極佳者向山黃村所藏

續永祿本韻鏡一卷

三山張麟之讓有紹興辛巳嘉泰三年兩序其說本之鄭樵以爲

反切之要莫妙於此不出四十三轉而天下無遺音矣序末有慶

元丁巳重刊圖記亦宋板也日本享祿戊子明嘉靖七年清原朝臣宣

賢繙刻之至永祿七年嘉靖四十二年又以張氏的本重校

影舊鈔卷子本日本見在書目一卷

此記從唐代齋來日本之書皆卷子本也原鈔出自大和國室生寺譌字甚多國人曾刻入羣書類從中點畫與此悉同題云七八百年前之物蟲蝕數字餘亦多可疑者然一從原文不敢妄改疑以傳疑之義也又有近人飫肥安井衡書後云右書目中所收爲部千五百七十九爲卷一萬六千七百九十分爲四十家七緯不

著卷數又據頭銜蓋寬平中

始唐昭宗龍紀元年訖乾甯四年

佐世在輿所輯距

今九百六十餘年按史先是貞觀乙未

唐僖宗乾符二年

冷泉院火圖書

蕩然蓋此目所因而作所以有見在之稱也據此則唐以前之書卷帙分明原委具在初無所謂古文逸書好古者當亦灼然知歐陽公百篇尚存之說其為寓言也無疑矣

影宋本史略六卷

宋高似孫續古修似孫有經史子緯騷五略子略緯略 四庫已著錄騷略見存目此史略其軼者也序云依劉向七錄法各彙其書而品其指意始寶慶元年十月十日畢十一月七日未及一月而書成蓋略采眾家評隲之言以明史之綱領而已

影唐寫本漢書食貨志一卷

此食貨志之上卷民世治三字皆缺筆字體秀勁當爲李唐人書無疑往歲獨山莫子偲友芝徵君得唐寫本說文木部六紙驚爲奇寶譔箋異一卷余爲手摹以行與此可稱兩絕

仿唐石經體寫本急就篇一卷

凡三十四章日本天保八年道光十七年小島知足所書字體摹唐石

經工楷雅致作初學讀本最善

覆麻沙本草堂詩箋四十卷外集一卷補遺十卷傳序碑銘一卷目錄二卷年譜二卷詩話二卷

此書前四十一卷宋麻沙本補遺十卷朝鮮繙刻本卷中惟題杜工部草堂詩箋卷第幾及嘉興魯豈編次建安蔡夢弼會箋者爲是餘或稱黃氏或稱集諸家注或云杜工部詩史補遺或題臨川

黃鶴集注建安蔡夢弼校正或單加集注增修等皆坊賈妄爲奪
文譌字不可勝糾蔡箋繁而寡要適如錢蒙叟杜注序例所譏可
取者編年本獨此耳攷陳景雲注絳雲樓書目宋板草堂詩箋云
草堂詩有高麗刻本如水筒詩何假將軍蓋之句蓋高麗本作佩
注引李貳師拔刀刺泉事錢受之謂較蓋字爲穩宜從之其爲善
本可知似未窺見全體惟翁覃溪復初齋集有二跋論最允當今
采附卷末當 四庫開館時覃溪爲纂修官此箋未經著錄僅收
詩話一卷想其獲睹全書在提要告成後也
影舊鈔卷子本碣石調幽蘭一卷
陳禎明中會稽邱公明所著琴譜之第五卷也余非知音不敢是
正以待世之能鑒希聲者

影舊鈔卷子本天台山記一卷

唐道士徐靈府撰見直齋書錄解題及通志略其書與瑀玉集皆小說家言以唐人著述日少仿四庫著錄桂林風土記例收之影宋本太平寰宇記補闕五卷半

四庫著錄原缺自一百十三卷至一百十九卷此宋槧從日本祕閣借出亦殘闕不完幸存缺卷自一百十三至十七及十八之半因影照刻補而以太政大臣往來函件附後以著同文佳話桂林陳蘭森補闕視此可廢矣

按日本所存中土逸書古本如唐釋慧琳一切經音義一百卷希麟續音義十卷此乃小學之匯歸軼文之淵藪有白蓮社刻本最爲完整可據唐楊上善黃帝內經太素注原書三十卷今存二十

一卷余獲有傳鈔本又曾借閱祕閣古寫卷子本春秋經傳集解三十卷其書出自隋唐舊鈔經傳字句異同極夥錄有校本又北宋本杜氏通典二百卷卷末鈐大宋建中靖國元年大遼乾統元年高麗十四葉經筵藏書圖記槧刻甚精北宋本世說新語三卷南宋單疏本尙書正義二十卷興國軍本不附釋音春秋左傳三十卷南宋本集韻十卷胥官庫物又有楊君星吾所收繙刻宋蜀大字本任淵山谷詩注二十卷皆以卷帙繁重未能謀刻姑附記於此以餉好事君子庶昌又識

書原本玉篇後

玉篇與說文並重說文討篆籀之原玉篇疏隸變之流余意其書必贍衍宏博辯析羣言如自序所述總會校讎足補文字訓詁者

及攷今世行本大廣益會玉篇注文簡略所引書多不詳出誰氏
頗與野王序不應然自唐孫強加字以來經陳彭年吳銳邱雍等
重修宋本孤行相沿且千歲無異辭學者雖致獻疑而莫由證其
非已 本朝四庫提要據永樂大典兼引顧野王及宋重修玉篇
悟爲二書已斥大廣益本非孫強之舊而又以篇字韻不收上元
本至謂重修本注文較繁故以多爲貴則亦是臆度蓋不見原本
之故也日本柏木探古舊藏有古寫本玉篇一卷自放部至方部
相傳爲唐宋閒物閒攜以示余余觀其注文翔實內多野王案云
云真乃顧氏原帙也又有言部至幸部一卷水部涂字至洗字一
卷糸部至索部一卷藏高山寺東大寺崇蘭館及佐佐木宗四郎
家不可得而見探古皆仿寫有副因贈金幣假而刻之惟放部一

卷探古祕惜殊甚別寫以西洋影相法於是顧氏之書逸久而幸存什一者得復傳於世今就此本與張士俊仿宋本校金部凡三百四十九字張本增多一百二十四字車部凡一百七十五字增多七十三字舟部凡六十四字增多四十六字不特注文繁簡與重修本倍蓰懸殊卽增加字數具可因此攷見上元本之舊其可貴非直姚方興大斲頭二十八字也古書之亡者眾矣而字學尤甚漢藝文志載小學十家四十五篇舉所謂史籀蒼頡爰歷博學凡將元尙訓纂無一存者僅存者急就篇耳玉篇又其晚出者獨足惜乎哉光緒八年壬午十一月遵義黎庶昌

跋日本津藩有造館本正平本論語集解

日本之有論語始於神應天皇十六年百濟博士王仁以論語十

卷來獻實當晉武帝太康六年其時未知所用注解何家自隋唐

通使一準中土制度大寶學令論語用鄭玄注何晏集解厥後鄭

注廢而何解盛行轉相仿寫世所傳最古本有二一為津藩有造

館本天保八年丁酉縮云係其國右大臣菅公昌泰二年所書唐

昭宗光化三年也以第三卷末題曰手自書寫畢字樣既得其正

子孫可寶之丞相十八字為證一為正平本甲辰道祐居士重刻本當元順帝至正二

十四年即錢曾讀書敏求記所誤稱高麗本者二者皆卷子本根源

中土舊鈔文字奇古與宋以後行本字句增省異同可三百餘事

以陸氏經典釋文證之多即所謂一本或本者也而有造本孝乎

惟孝乎作于譬之宮牆之作諸與漢石經合惡果敢而室者室作

室與魯論語合不知命章子曰作孔子曰與古論語合尤為近古

則灼然知其為隋唐間傳本出於開成石經未刊以前無疑也今以集注本與校摘其異文於左凡兩本同者即不別出俾嗜古君子攷焉

不亦說乎

說作悅乎作乎後孝弟弟作悌令色色作色正與朋友

交交下有道千乘道作導夫子之求之也求下無異乎人之求之

與人下無之字可謂好學也已已下有未若貧而樂樂下有告諸往而

知來者者下有患不知人也患下有而志于學于作從心所欲從

縱何以別乎無乎字正子夏問孝夏作而後從之後作不思則罔

罔罔作斯害也已已下有學于祿干作于正書云孝乎乎作于正是

亦為政奚其為為政兩為政下雖百世可知也世下有亦字女弗

能救與女作汝後仿杞不足徵也正平本媚於竈何謂也無也大

廟大作爾愛其羊爾作人以為諂也無也使民戰栗栗下有焉得

儉儉下有乎有反玷玷作玷正樂其可知也也作已正平君子之

至於斯也也作天下之無道也久矣無也里仁為美美作焉得知

知作無惡也正平本貧與賤是人之所惡也無也不去也正平本

我未見力不足者也者下有蓋有之矣乎矣作人之過也民人作義之與

比比下有禮讓為國國作不患莫己知知下有一以貫之之下有

見不賢賢下有勞而不怨無而父母在在下有古者言之不出出

有也縲紼紼作焉用佞兩用佞下禦人以口給無口屢憎於人於

二字不知其仁仁下有從我者其由與由下有吾亦欲無加諸人

也字不可得而聞也也下有已未之能行無之其使民也義無

本字正平久而敬之而下有告新令尹何如如下有之一邦之作再

斯可矣再下有思字 有不知所以裁之也下有也字 有盍各言爾志正平本言作日 衣輕

裘輕作輕正平本 無施勞施作施正平本 老者安之老作老 不如丘之好學也下也

有已字正平本作者也 可使南面面下有也字 有哀公問弟子問下有日字 有請益益作益正平本

益作益 不繼富繼作繼後仿此 曰賜也達日上有子字 曰求也藝日上有子字 冉求曰求作

有非不說子之道也道下有也字 有女為君子儒無女字 無為小人儒無作母 子

游游作游於 女得人焉耳乎乎下有哉字 出不由戶戶下有者字 知之者正平本無之字

問仁曰仁下有子字 有井有仁焉仁下有者字 如有博施有作能 而能濟眾眾下有者

字德之不修學之不講聞義不能徙不善不能改四句末均有字 從夢

見周公也公下有也字 有舉一隅隅下有示之三字 則不復也則下有平本無也字 子於

是日哭也日下有也字 有不可求求下有者字 不知肉味肉作完正平本 又何怨怨下有

有乎老之將至云爾也至下有也字 好古敏以求之以作而 三人行三上有我字

必有我師焉得有作以我為隱乎隱下有吾無行無下有孔子曰知

禮子下有君子亦黨乎正平本君取於吳娶取作則吾未之有得得

有也所貴乎道者三正平本不足觀也已已下有不易得也也下

字亂邦不居亂作亂不謀其政政下有周之德無之天之

未喪斯文也無也大宰知我乎我下有有鄙夫夫下有雖少必作

少下有我待賈者也無也自衛反魯反下有後生可畏畏下有不

足畏也已已下有吾末如之何也已矣未作未後仿此也三

軍可奪帥帥作師夫何遠之有哉下有左右手右下有攝齊升

堂升作舛後仿此足踏踏如有循循下有衫絺綌衫作必表而出

之無之狐貉貉作齊正平本必有明衣布布下有席不正不

坐席本作席立於阼階無於再拜而送之無而不敢嘗嘗下有先

嘗之無之字拖紳正平本見冕者與瞽者正平本冕作子路共之共

供皆不及門也門下有者字德行正平本德上有子日二字有顏回者好學學下有

不貳過六字今也則亡亡下有學者也以為之槩無此四字吾不徒行有可

大夫之後後下有以二字曰有慟乎日上有子字而誰為為下有慟字敢問死

敢上有日字閔子侍側子樂樂下有正平本無由之瑟瑟上

師與商也執賢賢下有乎字過猶不及及下有也字師也辟由也嘒師作

辟也由嘒也億則屢中如之何聞斯行之之下有也字大國之閒無之

可使足民民下有也字非曰能之之下有也字春服既成成下有得字宗廟會同

廟下有之非諸侯而何為之小為之大小大下均有相字

其言也訥訥下有也字斯謂之仁已乎斯下有已字斯謂之君子已

乎斯下有謂下無之字皆兄弟也皆下有為字足兵兵下有使字民無信不立無作

棘子成成作城何以文為為下有矣字惜乎夫子之說說下有正平本無之字犬羊

之鞫鞫下有也字徒義徒作徒正平本作徒愛之欲其生惡之欲其死生死下均

是惑也正平本無也字吾得而食諸豈字下有博學於文博上二字君子帥以

正而以作苟子之不欲無子之二字正草上之風正平本上作尚謂之達矣

也矣作爾所謂達者者下有矣字夫達也者夫聞也者俱無也字富哉言乎哉

有是忠告而善道之而下有字道作導不可則止不可作否奚其正正平本正下有名字

曰吾不如老圃曰上有子字亦奚以為為下有哉字冉有僕有作子正唯其

言而莫予違也而下有樂字無欲速無見小利無均作毋小人哉哉作不善

者惡之之下有也字小人難事而易說正平本說作挽兄弟怡怡怡下二字如危

行言孫孫作遜後仿此裨諶裨作卑子羽修飾之無之為滕薛大夫夫下也字

子路問成人子曰無子人不厭其言其笑其取三句下均子言衛

靈公之無道也

言作曰道也下有久則為之也難也難作難也

則為之也難

則下有其字陳

成子弑簡公陳恆弑其君

弑均作殺正

二告夫三子之三子告

均

二三不敢不告也

正平本無也字

今之學者為人

人也字下有

與之坐

正平本

恥其言而過其行

而作之字

夫子自道也

道作道正

患其不能也

其不二字

抑亦先覺者

覺作學正

有惑志於公伯寮

寮下有

辟世

辟作避

宿於石門

石門下復有

過孔氏之門

正平本

修己以敬

正

後仿此

幼而不孫弟

孫弟作

童子將命

命下有

居於位

正平本

在

陳絕糧

糧作

君子亦有窮乎

正平本無有字

見其參於前也

參下有

夫然

後行也

行下有

卷而懷之

之作

可與言而不與之言

無之

而與之言

之言作

友其士之仁者

者下有

人無遠慮

而字

終身行之者乎

無之

勿施於人也

人下有

如有所譽

所作

今亡已夫

則字

則亂大

謀無則非道弘人人也字憂道不憂貧貧下有小人不可大受受

有也及席也字何以伐為伐為作陳力就列列作烈正毀於積

中無於過與與下有而必為之辭必下有分崩離析正平本

政逮於大夫無於吾聞其語矣正平本前樂道人之善正平本無

德而稱焉得德作其斯之謂與無之不學詩詩上有無以言言下有

無以立立下有聞斯二者者作退而喜無而亦曰君夫人人也字

學道則易使也正平本君子不入也無也有是言也正平本由

也無也召南邵召作鐘鼓云乎哉鼓作德之棄也棄下有

無者可與事君也與哉無也苟患失之正平本奪朱也亂雅樂

也正平本均覆邦家者無者孔子辭以疾辭作辭食夫稻衣夫

錦有也曰安安下有宰我出子曰正平本難矣哉作難矣哉

難矣果敢而窒者室作室正賜也亦有惡乎乎作歌而過孔子

有之門何德之衰往者不可諫來者猶可追三句末均不可與同

羣也羣下有如之何其廢之其下有可伯夷叔齊夷作夷不辱其身

者身下有亞飯干正平本播鼗武鼗作周公謂魯公曰正平本不可

者拒之拒作吾所聞也聞下有我之大賢我之不賢正平本均以為

謗已也已作未有自致者也者也作是難能也無能陽膚膚作膚

作哀矜而勿喜喜作嘉正紂之不善善下有如日月之食焉食作

平本焉譬之宮牆之作諸牆窺見窺作闕正夫子之牆牆下有其

門而入入下有得其門者或寡或作或仲尼日月也尼下有無

得而踰無上有人字人雖欲自絕絕下有之不可及也及下萬方

萬作權量權作權正信則民任焉無此公則說則下有擇可勞擇

中庸卷之六

有其子曰不知命子上有孔字

跋日本活字板白氏文集

白氏集後記云白氏前著長慶集五十卷元微之爲序後集二十卷自爲序今又續後集五卷自爲記前後七十五卷詩筆大小凡三千八百四十首集有五本一本在廬山東林寺經藏院一本在蘇州禪林寺經藏內一本在東都勝善寺益塔院律庫樓一本付姪龜郎一本付外孫談閣童各藏於家傳於後日本新羅諸國及兩京人家傳寫者不在此記又有元白唱和因繼集共十七卷劉白唱和集五卷洛下游賞宴集十卷其文盡在大集內錄出別行會昌五年夏五月一日樂天之所自記者如此是其集名長慶者祇五十卷寶歷以後不得以長慶賅之汪立名之疑審矣余得日

本慶長年閒活字本每卷實題作白氏文集不名長慶編次視今
通行本迥殊與錢曾讀書敏求記所見宋刻廬山本合益知遵王
言不我欺 四庫提要以所不見而譏遵王並及立名非確論也
此本亦七十一卷無年譜而增多一卷確然出自唐時卷子本可
謂廬山面目也首冠元微之序序後題曰白氏長慶集五帙都五
十卷凡二千一百九十一首又另分總目十帙題曰第一帙詩七
卷總三百三十首第一二卷諷諭古調詩第三四卷諷諭新樂府
第五六七卷閑適古調詩第二帙七卷總四百七十二首第八卷
閑適古調詩第九十一卷感傷古調詩第十二卷感傷歌行曲
引第十三四卷律詩第三帙七卷總六百十五首第十五至二十
卷律詩第二十一卷詩賦第四帙七卷總七十九首第二十二卷

銘讚箴謠偈第二十三卷哀祭文第二十四卷碑碣第二十五卷
墓誌銘第二十六卷記序第二十七卷書第二十八卷書序第五
帙七卷總二百十三首第二十九卷書頌議論狀第三十卷試策
問制詔第三十一二三卷中書制誥舊體第三十四卷中書制誥
新體祭文冊文附第三十五卷中書制誥新體第六帙七卷總二
百五十八首第三十六卷中書制誥新體第三十七八卷翰林制
誥擬制附第三十九四十四卷翰林制誥勅書批答祭文贊文附第
四十一二卷奏狀第七帙七卷實八卷四十三字誤總一百五十六首
第四十三四卷奏狀第四十五至四十八卷策林第四十九五十
卷甲乙判第八帙七卷實六卷五十一至五十六七字誤共五百五十四首後集
第五十一卷雜體格詩歌行第五十二卷格詩雜體第五十三至

五十六卷律詩第九帙七卷共三百二十八首第五十七八卷律詩第五十九卷碑誌序記表第六十卷碑記序解祭文第六十一

卷銘誌序贊祭文記辭傳

原脫文記辭傳四字從本卷增

第六十二卷律詩第六

十三卷格詩雜體第十帙七卷共五百七十八首第六十四至六

十六卷律詩第六十七卷律詩雜體第六十八卷律詩第六十九

卷半格詩律詩附第七十卷碑記銘吟偈已上十冊共七十卷總

三千五百九十四首與唐書及敏求記宋本卷數合其第七十一

卷不入總目係律詩一百首前一行署刑部尙書致仕太原居易

題銜與他卷不同蓋卽續後集之一卷日本傳鈔當在廬山寫本

後矣其缺末四卷一百四十六首或是印行時已軼去不可知然

正編固自完然無關實可寶貴末附陶穀龍門重修白樂天影堂

記又有白氏文集後序卽刻集者所爲題戊午秋七月丁亥朔那波道圖書於洛中遠望堂

養浩堂詩集後序

余始至東京聞宮島栗香之名於何君子峩盛稱其能詩旣而栗香攜所作文來謁數與往復義理又知其能文然詩尙未睹也曾不數月而養浩堂詩集告成屬余綴言於後余觀子峩星使之序黃君公度沈君文熒之論難至爲精詳其相臣三條君又推原栗香家學之所自出詩道備矣余何以贅爲顧惟栗香之言曰僕於兩國交懽之始卽丐何星使序首具有微意若幸賜大手筆而助僕素志則不朽盛事於是乎成亦修睦之一端其言有足多者君子之於國也亦各自盡其分而已春秋時列國士大夫聘問不絕

往往賦詩見志用意微婉是以聖人嘉而尚之今栗香之爲抑猶是春秋遺風乎推栗香之志與事以充類至盡將由語言文字之微以進於捐故蹈道之美禮云禮云玉帛云乎哉此使者之所有事也因樂道斯旨以諭讀栗香集者於其詩不具論也光緒八年壬午重九日壬辰遵義黎庶昌

書森立之壽臧碑後

古之自營兆域者曰石槨曰壽臧曰生壙自宋桓司馬漢趙邠卿以來世多有之皆達者所爲日本森君立之篤信好學喜聚鈔本古書點勘證訂自少至老卷嘗在手迹其生平事業若隱若仕界於醫儒之間今年七十有六宦游東京且十年矣東京昔所稱江戶者也立之別起冢先人墓側瘞其髦髮臍帶而題曰壽臧之碑

文以誌之自古游子悲故鄉森君其有感於是邪抑狐死邱首誼
當以此爲正邪余意立之遭值承平仕不越境無去國之道要皆
無取於是孔子曰身體髮膚受之父母不敢毀傷孝之始也立身
行道揚名於後世以顯父母孝之終也森君之爲其致若與古人
同而志意則微遠已光緒八年壬午九月遵義黎庶昌

重九燕集詩序

光緒八年壬午重九余會日本人士於上野精養軒修登高約也
明年癸未再舉斯會益充其人東土來與者曰森立之曰重野安
繹曰川田剛曰巖谷修曰中村正直曰向山榮曰長松幹曰藤野
正啟曰三島毅曰龜谷行曰宮島誠一郎曰石川英曰森大來合
使署人員凡二十一人同會署後之西樓使署據爽塏地樓又其

最虛處可以憑高望遠日影加晡主賓卽席雍容翼如筆札紛綸
肴蔬迭輸每進益懽惟酒與奠余乃舉盞執觚而言曰登高之俗
周秦相襲所從來舊矣齊晏嬰艾孔梁邱據侍景公於牛山是其
遺也余意斯節者古以講武而然故宋武帝在彭城登項羽戲馬
臺踵成爲故事而南齊著令以九月九日馬射益厲習五兵順應
天地清肅之氣於禮甚宜自唐貞元中肇置三令節重九其一詔
公卿羣有司選勝地至日率官屬飲酒以樂後乃失眞遂若爲文
士所獨有古今事變萬端卽一重九而源流輕重固已若此況其
他紛紛者乎諸君子服膺聖學經書潤其腹韋素被其躬國殊而
道同羣離而情萃傳曰登高能賦可以爲大夫宜有以張今日之
雅者然如牛山之涕泣則無取森君老儒七十七翁雷聲淵默酌

道用虛舂鞬鞠臆晬然其容辭自上坐作而歎曰使君之言其可
誦哉於是眾賓愉怡興有所會託物造端酬唱環疊賦新詩寫素
心無管弦而極樂無禮數而有倫渢渢乎雅音也及夜酒罷各各
盡懽以散彙其詩得若干首錄存而爲之序遵義黎庶昌

跋江亭記

江亭記一卷日本友人宮島栗香所藏爲詩九序記跋三皆文明
時題左金吾太田道灌江戶城靜勝軒之作也方足利尊氏入京
都稱霸使二男基氏居鎌倉治關以東上杉氏爲管領上杉分兩
家曰顯定居山內曰定政居扇谷定政之臣有太田持資號道灌
者具文武才精築城法及關東亂大將軍義政使道灌築江戶城
備戰守時後花園天皇康正二年也城成道灌屈而有之大布威

信關東人士率背山內歸扇谷顯定縱反閒陷殺之是爲文明十八年道灌居三十一年而城爲上杉氏有上杉民居之三十九年復入於北條氏綱北條氏五代六十四年又入於德川家康氏德川氏稱幕府居此最久凡二百七十八年而明治維新將軍歸政定爲皇城江戶改號東京今二十二年矣總四百三十三年彼四氏者更嬗迭興皆視此一城以爲輕重卽形勢可知也城據全國之中負山臨海池深壘高雄跨津要非第名勝之足冠一州而已栗香工吟詠暇或登城凝眺芒羊以想望於盛衰興亡之會夫亦可慨然而賦矣光緒十五年三月

題藏名山房文鈔

余不才兩典使節於此獲與東人士游東人士亦以余久故與相

習又同文也用詩文投贈比古縞紵之獻事雅且法余因是以讀其全稿者有三氏焉曰中村敬宇藤野海南岡天爵敬宇措注時事持議欲酌東西之中而劑其平其文若江湖之水波瀾渟滌而無汎濫也海南儒者篤行自修其文若煦日晴雲翳靄使人可親也獨天爵志在用世百不遂一其懷抱鬱勃之氣充然不可詘止其文若深谷高巖時露巉嶸余讀其文悲其志未嘗不惜其窮老不遇而無大力者爲之援也往歲天爵嘗游我中土適有法越之難未得極其意興所至然北抵長城南逾嶺嶠亦足發胸中之奇矣今以藏名山房名編在天爵自處甚審非恆人所得喻文已有諸家評語不復細論論天爵之大者天爵亦許余爲有當知言否光緒十五年己丑二月遵義黎庶昌

海南文集序

光緒戊子藤野海南沒余爲之誌銘刻石立於墓道之右其女眞子以書抵余謝旣而眞子修儀上謁且執君遺文以請曰妾不幸遭先人大故弱質不任事有弟年幼後時樹立不可知恐不瞑先人地下謹惟先人之在世也閣下許之以交及其沒也辱之以銘今重野君等將謀梓其文若幸得一言爲之序因以傳於世則先人死骨不朽矣余聞而重閱之始余之來東京也宮島誠一郎栗香首因何君子我以交於余得讀其養浩堂詩集介爲之序旣又因栗香以跋元田東塾之詩而老儒森君立之精攷据學自爲壽臧碑余亦書其後後益內交重野安繹成齋川田剛毅卿中村正直敬宇島田重禮篁村三島毅遠叔岡千仞天爵龜谷行省軒等

皆博雅多識而以能文見稱以余之喜古文辭也往往過從出其
所作相質證而天爵尊攘紀事余又序之最後乃交海南海南關
然內修不自表襮於文章頗趣嚮桐城亦取曾文正公陰陽剛柔
之說以自輔爲文醇實有法度設異日有嗜古好奇之士欲哀輯
日本古文以成一編如曲園俞君東瀛詩選故事者則海南其名
家也余旣喜海南論文與余平昔之旨合其女真子又能讀父書
而海南之友重野君等當此漢學頽廢之際不忍聽其文滅沒無
傳皆足多也遂書以爲序己丑二月遵義黎庶昌

黃石齋詩第六集序

神仙之說愚者惑焉智者信之非以其果能尸解形化吐納飛昇
也仍當於率草道德之人求之耳凡方士所傳鍊丹符籙諸異術

皆非也揚子雲曰仙者無以爲也有與無非問也釋名曰老而不死曰仙仙遷也遷入山也古今人惟莊周書善言仙理其曰逍遙游養生主德充符吾嘗有味其言以爲真仙之要而後世神仙家如淮南王安魏伯陽葛稚川陶宏景之倫所著書具在頗迂誕使人失守無當於仙者意余所取乃獨在陶淵明李太白白樂天蘇子瞻陸放翁諸家之人之詩以彼襟懷曠適不爲事物所關累超軼於塤塹之表雖舉仙人而歸之可也往者於吾土得一人焉曰梓湖老人巴陵吳南屏敏樹爲人若夷若惠放迹於君山洞庭間蕭然自樂其樂詩古文冲夷動澹讀其書知其蟬蛻混濁也今又遇黃石翁於日本翁當慶應末年佐彥根舊侯參藩務從幕軍西征頗樹偉績及王室維新諸侯納土歸政有司交轂薦於朝則又

翩然高舉自甘肥遯爲無懷葛天氏之民今年七十九矣一日訪
余使署角巾藤杖鬚髮皓然儀度甚偉見者驚爲神仙中人圖畫
所不逮也翁生平喜爲詩多至二千數百首共編六集前五集已
播行今將以第六集付梓乞余爲序余因推論道家之旨以見世
果有神仙者流如翁未可交臂而忽之也光緒十五年己丑八月
中秋日使者黎庶昌

春山樓文贖序

小山朝宏君將刻其春山樓文贖以書抵余乞爲之序君之言曰
僕齡踰六十平生苦辛經歷之迹僅有是耳則不得不益自斲願
賜一言以慰蹉跎之身世余謂君言亦何悲也大抵人生涉世方
其少壯時年富力盛志意偉然視天下事宜若無不可爲及夫日

月浸馳更歷憂患或仕宦連蹇不得伸向之意氣積然就衰俛仰
身世之閒無足控搏則思託文辭以自見此自古賢人君子往往
而有是矣君少以疏狂得罪久乃獲釋大將軍柄政之際羣藩分
土而治士大夫過從或不如今世之密明治維新始一聚之東京
君位雖不達而文酒游燕皆盡六十州之選遭時之隆似有過曩
昔者斯足以復幕府之畸也爲文紆餘雅潔與余所見重野成齋
川田養江中村敬宇諸子相伯仲君前有春山樓文選二卷之刻
故此編名曰文贖實則是編多閱歷之言今不論論君身世之大
者以爲序光緒十六年閏二月遵義黎庶昌

跋外交餘勢斷腸記

勝君海舟以所著書二卷示余其涉國事者曰外交餘勢追溯嘉

永癸丑以來與歐美各國訂約互市之顛末涉已事者曰斷腸記
備舉生平更歷世患觸冒危難之險皆足裨史家掌故方王室未
維新也大將軍德川氏柄政懲前毖後知鎖港孤立之爲害於是
勅議通商而當是時眾說紛呶爭詆幕政失計以攘夷爲宗主論
非不正而不知其無濟世變也及長藩構難釁啟蕭牆兵連不克
有河決魚爛之勢大將軍深察時變奉歸大權贊成帝業今二十
餘年矣準前後事勢觀之然後知德川氏所處爲極巨艱之會其
臣節愈久而愈明耳語曰不習吏視已成事前事之不忘後事之
師也君之述此豈止爲幕府闡微也哉外交餘勢已有活字印本
余謂斷腸記亦宜排印並行庶幾君與德川氏心迹不泯沒於後
亦使論世者有所資以爲鑒也光緒十六年九月

日本正六位藤野君墓誌銘

君諱正啟字伯迪別號海南愛媛縣松山人藤野氏光緒九年余
闕使署西樓修重九登高約以賓晉東人士時未識君有來告者
曰藤野伯迪蓄道德能文章茲會不可失因不介而致之升吾堂
貌愉德充漢行而唐服褻然君子儒也自是雅重君明年夏余往
游伊香保邂逅遇之逆旅君挈妻女偕行般桓山中累日究論漢
學興廢及礦泉之理之說甚備時時見君點勘荀卿書手不釋卷
瀕行出女真子彈琴作歌誌別誼至懇篤真子多文而栗余私謂
君能型其家也君本以漢學著稱自國內改尙西法仕東京二十
年不甚顯由昌平學校教授充編修官凡十遷至正六位勳六等
與重野安繹巖谷修長松幹數輩先後同官始終不離修史局其

年冬余奉諱返國越三年再使日本君方養痾去京未卽見歸自
熱海猶手書賀正且閒一月耳君子漸來赴則聞君沒矣年六十
三惜哉余以異國人而與君交旣又與君游卒乃送君之死以臨
其葬此雖本邦親故朋好猶不易致況海外萬里乎非偶然已是
不可以不書銘曰

書同文百王揆情之親不隔海我爲銘播遐邇名在茲君不死
大清欽差大臣遵義黎庶昌撰並書光緒十四年二月

游日光山記

日光山一名二荒山又名黑髮山在日本下野國都賀郡距東京
百七十里今爲國幣中社國幣者明治維新初設官幣國幣分大
中小等社始爲此稱前世第曰二荒神社云爾當唐大歷初彼孝

謙天皇神護慶雲間有勝道上人者登此山弘仁時唐元和中使唐僧

空海弘法大師繼之佛教遂盛山下為大谷川跨以橋名曰神橋

或名菅橋橋之右折入一二里所有小倉山濱一湖極幽奧矮松

離立亭亭若人若車蓋御門主皇族為僧者之稱別墅也日光中有大瀑

曰七瀧曰布引曰索麴曰裏見曰霧降曰般若曰華嚴皆數見異

名大猷公廟在山之陽祀德川家康以還三代將軍東照宮又在

其東今為別格官幣社頗相連屬後水尾天皇元和元年明萬曆四十三

年僧正僧官名天海僧正僧正僧官名遷德川先代葬此二廟相望於白雲綠樹間

飛樓湧殿回環馭沓金碧錯彩壁皆髹漆如明鏡楣切礎柱黃金

塗飾之承塵各為井字函鏤刻龍鳳金雞孔雀圓紋雜以花竹卉

木而檐牙多出猛獸形瑰偉奇兀窮極人巧大率一準唐制也門

外華表高三丈餘塔五層層轟二三丈有朝鮮制蟲食鐘其他石
燈號蓮葉蟲蛙輪回等屬者重列以百數皆各國諸侯所進獻德
川氏武威之盛如此俛仰纔三百年而國勢亟變大將軍降於庶
人釋道亦落國人至結保晁會歲贖金錢營繕之抑何其黜之甚
也余以光緒八年七月游此信宿飲泉坐石得養性之趣一日騎
行入山十餘里觀所謂華嚴瀑者直下七十五丈果奇偉迥邈上
至南湖南湖一名中禪寺湖近日光頂處泓水清淺直視可里餘
眾峯圍之樹陰倒垂湖中幽秀移八下流卽華嚴瀑湖西北二十
里許聞有湯泉外國客所聚雨甚未能往游也

游鹽原記

鹽原在山峽中當日本下野國鹽谷郡之西連山皆石而獨宜木

產楓尤盛葉又先紅於他郡者蓋其地高多風而早寒也始以峽中深險無涂徑好游者不一至焉勝亦遂不顯明治十八年椽木縣令三島通庸闢山穿道使與外通鹽原之名始著輪車旣達於那須宮中顧問官高崎星岡君時一往游乃盡窮鹽原之蘊樂其林壑之森美也度地置別墅暇輒休沐其間蓋得山水之趣莫善於此一日導余往游余以中土人未嘗有先者游之當自余始自那須西行十餘里入山紆道盤詰而上入愈深峽愈束奇益愈顯泉之淙然鳴琴者瀑之洶然赴壑者松之偃立若亭若傘者石之縐若雲者矗若筍者垂壁可摩刻者礫硤嶽釜熊升鳥鶯者巖之斗出者奧者曠者竇者厂者窈窕而脩秀者使人攬接不厭幾二十里而後至至則緣山皆楓葉萼萼叢叢紅者若縵紺者若緞絳

者若丹日光射之皆斑駁成錦彩誠極天下之大觀也若夫山中
之景四時變幻不同雨暘明晦霜月高潔凡遭遇於心目而得諸
興象之間雖善游者莫能盡其狀也高崎君別墅在箒川甘湯川
交會處川大水名也而此實小溪有橋當其前旁有蓬萊巖高崎
君所命溯甘湯行數百步水流亂石間動宕可喜踰嶺而西則人
家數十沿箒川居宮內次官吉井三峯別業在焉與高崎君相望
也古諸侯卿大夫聘問鄰國感物造端登高而賦者有矣未始輶
傳四出互駐其國都履人國猶戶庭如今日者然則鹽原之游余
及高崎君窮幽極深一再信宿相與俛仰嘯歌於一堂之上以敘
布衣昆弟之懽殆古人所不逮也此於交鄰之道若與若不與夫
豈苟焉以娛悅耳目爲快哉同游者爵位局主事宮島誠一郎譯

官陶大均凡四人 大清光緒十五年九月游後五日使者遵義
黎庶昌記

訪徐福墓記

紀伊日本南海也斗入海中號爲多佳山水處與大和國中隔大
山紀伊在其南大和在其北大和者神武天皇始都之橿原也由
大和出紀伊多險絕難行非五七日不至而海道一日夜可達紀
伊有那智瀑高百餘丈自海中望之如白霓下垂以此名尤著其
地今屬和歌山縣牟婁郡當上古未立郡時概稱熊野云熊野三
山曰那智曰本宮曰新宮新宮近海徐福墓在新宮山下余以七
月二十四日自神戶趁商船抵三輪崎登岸入山行十餘里至其
地新宮人士導而前復踰一山得平田八九頃禾苗盈望福墓在

其中央循田稜數百武至墓所面山背海僅餘荒土一邱未墾耳縱橫可四五丈無所謂冢有古樹二株爲記墓前一碑題秦徐福之墓傳爲朝鮮人書元文元年新宮藩主水野氏所立元文元年當中國乾隆元年也碑左右積竹筒百餘中插花朵樹枝新宮人嘗祈禱於此以此爲獻旁有二十餘冢各距數十百步傳爲福之親近陵夷僅存其七余見者纔二墓東北又數百步爲神倉山山麓有飛鳥祠福祠在其旁久圯故址猶可辨識返至新宮神社觀所謂福之遺物事甚荒渺不足道獨古老傳言福始至時尙在新宮東北七里許日本里每里約中國七里海岸名秦須地尤陜隘後乃徙此其言致足信以余游歷所經見日本平原廣澤甚多福胡爲而獨取此豈當日風漂所至無暇細擇與抑將以近其國都與非可得而

詳已福之子孫或言多姓秦今皆分散各處維新後悉易他姓或言藤澤驛福岡平一郎爲福之後人嘗有贈物寄新宮神社或言有徐某在和歌山縣充醫士皆疑莫能明方秦始皇之遣福入海求神仙也豈意其止王不來及福挾童男女三千人以至亦欲廣強支庶貽之無窮今二千一百餘年開而族姓無一存者古與今相續其事皆大抵如是也然而人之欲爲福而猶不止者則又何也光緒十六年八月歸後十日記黎庶昌

崇福寺鐘銘

有序

日本滋賀縣近江國園城寺山中唐院卽智證大師廟也大師以文德天皇仁壽三年癸酉入唐齊衡二年五月至長安拜左街青龍寺傳教和尚長生殿持念大德法全爲傳法弟子天安二年六

月還國持法全所贈梵鐘以來懸諸道場爲法用之器厥後墜損
失鳴遂納寶庫有年矣今茲庚寅十月二十九日當大師一千年
忌辰前從四位勳三等元老院議官町田久成蜚遯空寂度爲園
城寺光淨院兼崇福寺住職范金依式重鑄而乞其友 大清欽
差大臣黎庶昌爲之銘時光緒十六年九月也銘曰

粵有巨鐘業牙旋蟲蟻器警世聲遠以宏度中鳧氏振彼曠聳云
自唐室浮渡海東長安古寺左街青龍歲久剝敝石則不庸弗鏗
弗鼓納寶庫中鯨吞蠹息閱此廢宮物閱千變神力忽通沙門久
成於論攷工于舞篆景撫范形容薪火智氏續天台宗一百八叩
播之無窮

拙政園叢稿卷六

大著敬讀一過東萊博古同甫知今佩服佩服中有涉黔中軍事如禹門寺築寨始末及趙剛節神道碑等擬錄存以證鄙作黔事紀略之同異是以遲繳執事人奇遇奇故文特有奇氣雖大指遠祖桐城近宗湘鄉而不規規一格其言多經世意主實用則近南宋永嘉諸賢其合攷訂義理詞章爲一手則似 國朝李穆堂先生其意在表章人物尤留心梓桑文獻又似全謝山先生鮎埼亭集特穆堂先生理學專主陸王謝山先生不分門戶執事所著置佛藏記有薄主靜良知爲援儒入釋之語爲異趣耳然象山之主靜實能確然有得陽明之良知亦從身體力行中來皆近乎禪而非禪其全入於禪者則慈湖之於象山心齋之於陽明前人已有一定論未可因弟子而薄其先生也所編次於涉洋事與人者概置

餘編尤見謹嚴微旨鄙見敬陳管見摺係未經進呈之作且多涉
洋事似可用冠餘編之首以歸一律再餘編中泛然酬應之作或
可再加刪削如何如何寡識妄言幸恕狂愚愚弟羅文彬再拜